

國學基
本叢書
潛研堂詩文集
三

上海
圖書館
藏書

既
研
堂
詩
文
集
(三)

上海图书馆藏书





A541 212 0006 1632B

書叢本基學國


集文詩堂研潛

(三)

著昕大錢



行發館書印務商



潛研堂文集卷二十三

書一

與友人論師書

日者。足下枉過僕。僕以事他出。未得見。頃遇某舍人云。足下欲以僕爲師。僕弗敢聞也。蓋師道之廢久矣。古之所謂師者。曰經師。曰人師。今之所謂師者。曰童子之師。曰鄉會試之師。曰投拜之師。人生五六歲。始能識字。稍長則習舉業之文。父兄皆延師教之。父兄曰汝師之。吾從而師之。非必道德之可師也。巫醫百工之人。皆有師。童子之師。猶巫醫百工之師。稱之曰師。可也。鄉會試主司同考之于士子。朝廷未嘗許其爲師。而相沿師之者。三百餘年。然令甲又有外官官小者。迴避之例。則固明予以師之稱矣。漢人於舉主有爲之制服者。而門生之名。唐宋以來有之。語其輩行。則先達也。語其交誼。則知己也。因其一日之知。而奉之以先生長者之號。稱之曰師。亦可也。今之最無謂者。其投拜之師乎。外雅而內俗。名公而實私。師之所求于弟子者。利也。傳道解惑無有也。束修之問朝至。而夕忘之矣。弟子之所藉于師者。勢也。質疑問難無有也。今日得志。而明日背其師矣。是故一命以上。皆可抗顏而爲師。而橫目二足。販脂賣漿之子。皆引

而爲弟子。士習由此而媮。官方由此而墮。師道由此而壞。孟子曰。人之患在好爲人師。古之好爲師也。以名。今之好爲師也。以利。好名之心。僕少時不免。迄今方以爲戒。而惟利是視。則僕弗敢出也。足下於僕。非有一日之好。而遽欲師之。僕自量文章道德。不足以爲足下師。而勢力又不足以引拔足下。若欲藉僕以納交一二鉅公。俾少爲援手。則僕之硜硜自守。不干人以私。友朋所共知。僕固不欲自誤。而亦何忍以誤足下乎。如以僕粗通經史。可備芻蕘之詢。他日以平交往還足矣。直諒多聞。謂之三益。不識僕之戇直。得附足下益友之一否。惟足下裁察。

與戴東原書

前遇足下於曉嵐所。足下盛稱婺源江氏推步之學。不在宣城下。僕惟足下之言是信。恨不卽得其書讀之。頃下楊味經先生邸。始得盡觀所謂翼梅者。其論歲實。論定氣。大率祖歐邏巴之說。而引而伸之。其意頗不滿於宣城。而吾益以知宣城之識之高。何也。宣城能用西學。江氏則爲西人所用而已。及觀其冬至權度。益啞然失笑。夫歲實之古強而今弱也。漢以前四分而有餘。漢以後四分而不足。而自乾象以至授時。歲實大率由漸而減。此皆當時實測。非由臆斷。故以古法下推。則必後天。由於歲實強也。以今法上攷。亦必後天。由於歲實弱也。楊光輔郭守敬輩知其然。故爲百年加減一分之率。以消息之。雖過此以往。未之或知。而以之攷古。則所失者鮮。是其術未始不善也。西人之術。止實測於今。不復遠稽於古。然其所謂

平歲實者亦復累有更易。則固非以爲永遠可守之歲實也。江氏乃剽爲本無消長之說。極詆楊郭。以傳會西人。然史冊所書景長之日。班班可攷。難以一人手掩盡天下之目也。於是爲定冬至加減之說。以加之。而仍後天也。於是又爲本輪均輪半徑。古今小之說。以加之。而仍後天也。詞遁而窮。則直斷以爲史誤。毋乃如公孫龍之言。臧三耳。甚難而實非乎。天道至大。非一時一人之術所能御。日月五星之行。皆有盈縮。古人早知之矣。各立密率。以合天行。郭太史之塚積。新法之本輪均輪次輪。皆巧算。非真象也。約加減之數。而假象以爲立算之根。合則用之。小不合則增減之。大不合則棄之。本無輪也。何有於徑。本無徑也。何有古大而今小。且夫兩輪半徑之數之減也。西人固疑其初測之未合。而改之。非定以爲古多今少之率也。就如江說。兩半徑古大而今小。則仍是楊郭百年消長之法。以矛盾陷盾。其何說之辭。夫以兩春分攷歲實。較之兩冬至爲近。然小餘二四二一八七五者。回回之舊率。而地谷所用也。崇禎時嘗改爲二四二一八八六四矣。今則又改爲二四二二三三四四二矣。只此百年之中。西士已不能守其舊率。而江欲以地谷所用之數。上攷千載以前。謂必無消長也。有是理乎。本輪均輪。本是假象。今已置之不用。而別剽橢圓之率。橢圓亦假象也。但使躔躔交食。推算與測驗相準。則言大小輪可。言橢圓亦可。然立法至今。未及百年。而其根已不可用。近推如此。遠攷可知。而江氏取其已棄之筌蹄。爲終古之權度。其迂闊亦甚矣。西士之術。固有勝於中法者。習其術可也。習其術而爲所愚弄。不可也。有一定之丈尺。而後可以

度物有一定之衡石。而後可以權物。今江所持以衡量者。有一定乎。無一定乎。言平歲實。則其數可多可少也。言最卑行。則其行忽遲忽疾也。言輪徑差。則借象而非真象也。以槃爲日。而詆義和。以錐指地。而嗤章亥。持江氏之權度以適市。必爲司市所撻矣。向聞循齋總憲不喜江說。疑其有意抑之。今讀其書。乃知循齋能承家書。識見非江所及。當今學通天人者。莫如足下。而獨推江無異辭。豈少習于江。而特爲之延譽耶。抑更有說以解僕之惑耶。請再質之足下。

與段若膺書

聞足下名久矣。頃邵孝廉與桐。以足下所撰詩經韻譜見示。尋繹再三。其於古人分部及音聲轉移之理。何其審之細而辨之確也。聲音之變。由于方言。始于一方。而徧于天下。久之遂失其最初之音。如今人讀胖爲普旺切。讀閎爲戶工切。卽閒有一方向存古音。終不能勝海內之口。藉非隋唐之韻尙存。豈復知有古音哉。足下謂音變而義未改。如印吾台予之台。非不可變如哈音。而三台天台。古人故讀若怡。真通人之論。先民有作。豈能易足下之言乎。足下又謂聲音之理。分之爲十七部。合之則十七部無不互通。蓋以三百篇閒有歧出之音。故爲此通韻之說。以彌縫之。愚竊未敢以爲然也。古有雙聲。有疊韻。參差爲雙聲。窈窕爲疊韻。喉腭舌齒唇之聲。同位者皆可相轉。宗之爲尊。桓之爲和是也。聲轉而韻不與之俱轉。一縱一橫。各指所之。故無不可轉之聲。而有必不可通之韻。不得以卮俎之轉彭亨。而通庚于豪。無俚之轉無

聊而通之于蕭寧母之轉泥母。而通齊于青也。古人之音。固有若相通者。如眞與清。東與侵。間有數字相出入。或出于方言。或由于聲轉。要皆有脈絡可尋。非全部任意可通。至如周原臚。韓詩作臚。正與飴茲韻。歌以訊之。王逸注楚詞引作誣。正與萃韻。字形相似。不無轉寫之譌。足下旣攷古而正經文之譌。而又兼存此傳譌之音。以爲通轉之例。大道之多歧。必自此始矣。小雅谷風之末章。足下讀怨如依。與鬼萎爲韻。此亦以意度之。未有他文可證。頃讀說文序。視而可識。察而可見。以見與識韻。乃悟谷風。思我小怨。當與德韻。怨讀若抑。論語以直報怨。以德報德。亦韻語也。愚管之見。未識有當否。幸賜鑒察。

與段若膺論尙書書

承示攷定尙書於古文今文同異之處。博學而明辯之。可謂聞所未聞矣。唯謂史漢所引尙書皆系今文。必非古文。則蒙猶有未諭。漢書儒林傳。謂司馬遷從安國問故。遷書載堯典。禹貢。洪範。微子。金縢。多古文說。是史公書有古文說也。地理志吳山。古文以爲沂山。大壹山。古文以爲終南。是漢書有古文說也。漢時立學置博士。特爲入官之途。其不立博士者。師生自相傳授。初無禁令。臣民上書。亦得徵引。許叔重說文解字。所稱書孔氏。詩毛氏。春秋左氏。禮周官。皆不立學者。而其子冲上書進御。不以爲嫌。馬班二君。又何所顧忌。而必專己守殘。不一徵引古文乎。春秋左氏。與尙書古文。皆非功令所用。而班氏律歷五行諸志。引左氏經傳者。不一而足。以春秋之例推之。則漢書決非專主今文矣。又如漾之爲瀆。問之爲槩。此古文

之見於許氏書者。而史記正與之同。是又史記兼用古文之明證也。足下以漢志禹貢養水不從水旁。遂謂今文作養。史記亦當作養。淺人增加水旁。無論莫須有三字難以服天下。恐世閒如此淺人。正不易得。何也。淺人依尙書改史記。必改爲漾。其能改作漾者。必係通曉六書之人。豈有通人而肯妄改古書者。此可斷其必不然矣。說文以漾爲古文。則漾必是今文。漢書之養水。卽从古文而省水旁。決非今文別作養字。僕於經義膚淺。不敢自成一言。聊罄狂簡。以盡同異。幸足下之教我也。

荅孫淵如書

足下研精小學。於許叔重之書。深造自得。求之今之學者。殆罕其匹。乃復虛懷若谷。欲求千慮之一於僕。僕中歲而讀說文。早衰善病。偶有所得。過後輒忘。坐是不能成一家言。何足以益足下乎。來教謂抔卽培之省。欒樹本一字。又謂仿柄。膊。乃古通寫字。徐鉉以蟀爲俗。失之太泥。皆極精當。春秋訪邴異文。卽仿柄相通之例。說文引詩不敢不踏。又作疎。脊束亦通寫字也。足下疑適仍恩。凶存才之類。非諧聲。以僕攷之。則古文諧聲。本有二例。同音謂之諧聲。同聲亦謂之諧聲。同聲今人所謂同母也。存取才聲。恩取凶聲。鳳取凡聲。皆聲之正轉。輦从軍聲。輦轉爲熏也。祈从斤聲。祈轉爲芹也。贛卽坎字。坎與空相轉。故贛爲贛省聲。乃與能相轉。故仍以乃得聲。曾與重相轉。故曾以困得聲。說文。艘。嬰聲。而讀若宰。韃。虫聲。而讀若騁。鞫。弁聲。而讀若響。者。占聲。而讀若耿。棚。朋聲。而讀若陪。璿。壽聲。而讀若淑。諱。革聲。而讀若戒。敬。豈聲。而讀

若狼。踰。扁聲。而讀若萃。羹。入聲。而讀若頰。又讀若非。古音非如悲。隄。是聲。而讀若瑱。楮。胥聲。而讀若芟。邨。年聲。而讀若寧。輪。命聲。而讀若戾。棧。炎聲。而讀若導。三年導服導即禪之轉。皆聲轉之例也。大學命也之命。鄭云當作慢。命卽慢之轉。宋儒讀爲怠者。非也。唐本說文。元从一兀聲。今本無聲字。元卽兀之轉。故髡从兀。亦从元。車軌字說文作軌。宋人疑兀非聲而刪之。亦非也。古之詁訓。音與義必相應。許氏訓春爲推。攷爲敏。警爲歛。肩爲開。瀾爲滿。莫非同聲。艸根爲荻。木頂爲楨。禾芒爲秒。瓜當爲蒂。亦皆同聲。則仍有乃音。思有凶音。又何疑焉。但此義自陽冰二徐已莫能聞。夾深陋儒。遂謂七音之學。乃自西域而來。此與窮子之舍衣珠而乞食無異。崑山顧氏之言古音善矣。而於聲音文字之本。則猶得其半而失其半也。若夫舍諧聲而言會意。二徐之後。流爲介甫。大率穿鑿傳會。自通人觀之。直可覆瓿耳。足下旣悟同母之可諧。而又疑而不信。仍以會意求之。愚以爲聲諧而意自不悖。叔重明云諧聲。則必無出於非聲者。雙聲疊韻。皆天籟也。裘从求。而讀渠之切。那从秝。而讀諾何切。侮从每。而讀文甫切。倩从青。而讀倉見切。母無鄙切。而蝦螻與雨叶。難那千切。而隰桑與阿叶。興許應切。而小戎大明與音林叶。凡一字而兩讀者。皆聲之轉。三百篇之例。具在。引而伸之。非無稽之言也。足下以爲然乎不乎。僕前跋楊大眼造像記。未詳儆字。足下謂震儆卽振旅之異文。敬聞命矣。頃見江都汪容甫亦如足下之言。卽當刊正。以志不忘。冬寒。惟自愛。不宣。

荅李南澗書

尊使至。知年兄于六月內奉太夫人之諱。悲哀切至。而僕遠在千里外。無從具生芻絮酒之敬。僕之抱媿甚矣。來教欲僕爲表誌之文。及讀年兄所撰行狀。文筆古雅。至性肫摯。流露行墨間。洵爲必傳之作。昔柳州廬陵。皆嘗表其先人之墓。今年兄之文。自能不朽其親矣。曷不仿此例爲之。若僕之文平淺。恐未能傳世。而有虛年兄之盛意也。但交好有年。不敢固辭。謹撰尊甫太翁墓表。太夫人墓誌各一道。皆撫取行狀中語。掠美之誚。諒所不免。行狀所述嘉言懿行。可采者甚多。因篇幅毋取太長。割愛置之。然卽此已足不朽矣。表誌旣出一手。故所載三代子姓及葬地。兩篇各有詳略。意取互見。未識於體製有合否也。撰書人銜名。或在文之前。或在文之後。古人初無一定。可以不拘。結銜止署本官階。今人多有書賜進士及第出身者。似亦無妨。但宋元碑却未見。恐是明人始有之。惟稱呼弟姪晚侍之類。起于近日。最爲陋惡。想好古者斷不效之耳。天寒讀禮。惟以道自愛。不宣。

與一統志館同事書

某頓首總纂執事。某學殖譾劣。於輿地一門。尤非專家。志局初開。未嘗與編纂之列。頃以白華侍讀出。差承乏攝事。於全書體例。旣未甚諳。瓜代之期。亦不過數月。惟是後進未學。得追陪長者之步趨。旣聞清論。不勝幸甚。受事以後。偶檢舊稿。人物一門。竊有貢疑。敢達之左右。夫輿地之志。兼及人物。特以其生長是邦。游釣所在。俾後世聞其風者。興高山景行之思。至若魏晉以降。士大夫以門第相尙。王必太原琅邪。李

則隴西趙郡。謝稱陳郡。裴號河東。雖去其鄉國。更數十世。猶必溯其本望。此乃氏族之學。無關於地理。而後之志州郡者。昧於疆域。濫收以備鄉賢之數。甚可笑也。顏氏本琅邪臨沂人。顏魯公撰先廟碑。稱西平靖侯舍。隨元帝過江。已下七葉。葬在上元幕府山西。宋書州郡志。晉亂。琅邪國人隨元帝過江。千餘戶。大興三年。立懷德縣。成帝咸康元年。桓溫領郡。鎮江乘之蒲洲金城上。求割丹陽之江乘縣境立郡。又分江乘地立臨沂縣。然則延之。協晃之推諸人。史書琅邪臨沂者。乃江左僑置之臨沂。與今沂州無涉矣。逮之推遭亂。由齊入周。子孫留居關中。爲雍州萬年人。之推雖嘗名其子思魯。以寓故鄉之思。訖未聞還居琅邪。今沂州府人物。收顏師古。真卿。杲卿。泉明等。實沿襲之譌。東坡居士嘗自稱趙郡蘇軾。而穎濱遺老又名其集曰欒城。今若以二蘇入真定之人物。可乎不可乎。愚意若此類者。竝當博攷改正。庶幾一洗向來志乘之陋。又執事於韋安石舉明經調乾封尉一條。疑有脫譌。委令照檢。元文蓋以初任之官。不當言更調。意其曾歷它官故爾。愚攷漢書。張釋之事文帝十年。不得調。匡衡射策甲科。調補平原文學。小顏注竝訓調爲選。廣韻調讀去聲者。訓選。集韻又訓爲試。乃知古人所云調者。只是試選之義。略舉唐史數事證之。蘇弁擢進士。調奉天主簿。杜正倫秀才高第。調武騎尉。劉從一擢進士宏詞第。調渭南尉。徐彥伯對策高第。調永壽尉。狄仁傑舉明經。調汴州參軍。宋務光舉進士及第。調洛陽尉。張柬之中進士第。始調清源丞。劉幽求舉制科中第。調閬中尉。李宗閔擢進士。調華州參軍事。李翱中進士第。始調校書郎。皆初任而

云調與韋安石傳文不異。桓彥範以門蔭調右翊衛。則任子初選亦云調也。韋澳第進士復擢宏詞十年不肯調。猶今人之不赴選也。宋時人謂常調官好做常調。猶云常選。非今之所謂調也。漢薛宣爲左馮翊。以潁陽多盜賊。令薛恭職不辦。粟邑縣小辟。易治。令尹賞久用事。乃奏賞與恭換縣。今時州縣繁簡對調之例。蓋因於此。而史不云調。稽之字書。調亦無更換之義。改調降調之名。明史始有之。唐以前未之有也。聊舉所聞。以塞下詢。伏希審察。

與晦之論爾雅書

得晦之書。知方讀爾雅。從事於訓詁。及蟲魚艸木之學。甚慰以喜。嘗病後之儒者。廢訓詁而談名理。日記誦爲俗生。訶多聞爲喪志。其持論甚高。而實便于束書不觀。游談無根之輩。有明三百年。學者往往蹈此失。聖朝文教日興。好古之士。始知以通經博物相尙。若崑山顧氏。吳江陳氏。長洲惠氏。父子。婺源江氏。皆精研古訓。不徒以空言說經。其立論有本。未嘗師心自用。而亦不爲一人一家之說所困。故嘗論宋元以來言經學者。未有如我朝之盛者也。夫六經皆以明道。未有不通訓詁。而能知道者。欲窮六經之旨。必自爾雅始。注爾雅者。有舍人李巡。樊光孫炎。沈旋諸人。今惟存郭景純一家。景純有音有圖贊。則今亦亡之。尙書正義引景純注云。恆山一名常山。避漢文帝諱。又云。霍山今在盧江灑縣。潛水出焉。別名天柱山。漢武帝以衡山遼曠。移其神于此。今其土俗人皆呼之爲南獄。南獄本自以兩山爲名。非從近來也。而學者

多以霍山不得爲南獄。又言從漢武帝始。乃名之。卽如此言。爲武帝在爾雅前乎。斯不然矣。今本注文。不若是之詳。然則景純注。亦經後人所刪。非完書矣。釋鳥。桑屬竊脂。文凡再見。攷春秋正義云。諸儒說竊脂。皆謂盜脂膏。卽如所言。竊元竊黃者。豈復盜竊元黃乎。若冬屬竊黃之下。果有桑屬竊脂句。則景純注明云。諸屬皆因毛色音聲。以爲名。竊脂之爲淺白。義已顯然。毋庸爲此辨矣。春秋正義又云。釋鳥自春屬鴝鵒。至宵屬嘖嘖。凡七屬。其文相次。今本多桑屬句。則當云八屬矣。故知此句。乃唐以後人竄入無疑。而邢氏不能辨也。此不精之失也。宋初古書之存者多矣。邢所徵引。不過九經義疏。經典釋文。而尙不免於遺漏。它書固未能津逮。此又不博之失也。予昔在京師。有志撰述。掇李孫之墜遺。糾郭邢之違失。至於康成之說經。叔重之解字。參互取訂。啓悟良多。嘗欲勒爲一編。以附述者之後。繼有刊定元史之舉。力未能兼。迺輟弗爲。今晦之欲從事此書。則予攷稽有年。千慮之中。或有一得。暇日出以相質。何如。來書疑舍人爲何人。攷陸氏釋文。稱犍爲郡文學卒史。舍人。漢武帝時待詔。而廣韻亦有舍姓。是舍人乃其人姓名。非官稱也。附去政和證類本艸一部。卽檢收之。

與友人書

前晤吾兄。極稱近日古文家。以桐城方氏爲最。予常日課誦經史。於近時作者之文。無暇涉獵。因吾兄言。取方氏文讀之。其波瀾意度。頗有韓歐陽王之規撫。視世俗冗蔓褻雜之作。固不可同日語。惜乎其未喻。

乎古文之義法爾。夫古文之體，奇正濃淡，詳略本無定法。要其爲文之旨，有四：曰明道，曰經世，曰闡幽，曰正俗。有是四者，而後以法律約之。夫然後可以羽翼經史，而傳之天下後世。至于親戚故舊，聚散存沒之感，一時有所寄託，而宣之於文，使其姓名附見集中者，此其人事迹，原無足傳，故一切闕而不載。非本有可紀而略之，以爲文之義法如此也。方氏以世人誦歐公、王恭武、杜祁公諸誌，不若黃夢升、張子野諸誌之熟，遂謂功德之崇，不若情辭之動人心目。然則使方氏援筆而爲王杜之誌，亦將舍其勳業之大者，而徒以應酬之空言了之乎？六經三史之文，世人不能盡好，閒有讀之者，僅以供場屋餽釘之用，求通其大義者罕矣。至于傳奇之演繹，優伶之賓白，情詞動人心目，雖里巷小夫婦人，無不爲之歌泣者，所謂曲彌高，則和彌寡。讀者之熟與不熟，非文之有優劣也。以此論文，其與孫鑛、林雲銘、金人瑞之徒何異？文有繁有簡，繁者不可減之使少，猶之簡者不可增之使多。左氏之繁，勝于公穀之簡。史記漢書，互有繁簡，謂文未有繁而能工者，非通論也。太史公漢時官名，司馬談父子爲之，故史記自序云：談爲太史公。又云：卒三歲而遷爲太史公。報任安書亦自稱太史公。公非尊其父之稱，而方以爲稱太史公曰者，皆褚少孫所加。秦本紀田單傳別出它說，此史家存疑之法。漢書亦閒有之，而方以爲後人所附綴。韓退之撰順宗實錄，載陸贄陽城傳，此實錄之體應爾，非退之所創。方亦不知而妄譏之。蓋方所謂古文義法者，特世俗選本之古文，未嘗博觀而求其法也。法且不知，而義於何有？昔劉原父譏歐陽公不讀書，原父博聞，誠勝於歐

陽。然其言未免太過。若方氏乃真不讀書之甚者。吾兄特以其文之波瀾意度。近于古而喜之。予以爲方所得者。古文之糟粕。非古文之神理也。王若霖言靈皋以古文爲時文。却以時文爲古文。方終身病之。若霖可謂洞中垣一方癥結者矣。泥濘不及面質。聊述所見。吾兄以爲然。吾

如淳引漢儀注。太史公武帝置位在丞相上。天下計書先上太史公。副上丞相。序事如古春秋。遷死後。宣帝以其官爲令。行太史公文書而已。顏師古據管灼以如說爲非。謂談爲太史令耳。遷尊其父。故謂之爲公。此不通之論也。史記百三十篇。惟自序前半篇稱太史公者。謂其父談。其它皆自稱之詞。尊父可也。尊己不可也。未爲太史公以前稱名。旣爲太史公則稱官。此史家之常例。史者所以傳信後世也。何私尊之有。小司馬索隱引桓譚云。遷所著書成。以示東方朔。朔皆署曰太史公。以爲太史公是朔稱。而又疑其未實。愚謂朔所署曰太史公者。題其書名曰太史公。漢書藝文志。太史公百三十篇。馮商所續太史公七篇。此卽朔所署之名。非謂書中凡稱太史公者。皆朔所竄入也。李巨來與靈皋書。言太史公曰四字。皆史記本文。非後人所加。亦非遷之尊其父。凡稱太史公曰。猶後世史書稱史臣曰爾。此說是矣。漢儀注。衛宏所撰。巨來謂衛宏注卽不可信。而漢儀固有是官。似分漢儀與注而二之。則攷之未審也。

與友人書

昨偶讀足下文篇末自題太僕少卿。僕以爲不當脫漏寺字。足下殊不謂然。足下所據者唐宋石刻。僕謂惟唐宋人結銜不得有寺字。自明以來官制與唐宋異。不當沿唐宋之稱。蓋九卿之稱。秦漢以來凡三變。曰太常曰太僕曰光祿勳。位列九卿。而官名無卿字。此漢魏至宋齊之制也。梁陳以後官名始綴卿字。後齊始定太常太僕光祿等爲九寺。而唐宋因之。然當時省臺院寺之名。皆不入銜。如中書舍人。不云中書省舍人。御史大夫。不云御史臺大夫。翰林學士。不云翰林院學士。世所共知也。唐人石刻。如太常光祿卿之不稱寺。正與此類。非可書而不書也。明初廢中書省。而以六部爲百僚之長。由是院寺司監皆以入銜。與唐宋故事異矣。自明中葉。古文之法不講。題銜多以意更易。由是學士大夫之著述。轉不若吏胥文移之可信。足下方以古文提唱一世。當起而正之。勿以爲無足重輕而置之也。近日古文家推秀水朱氏。予觀其集中稱知府知縣。必云知某府事。知某縣事。此宋之官制。豈可施于今日。亦是好古之病。足下以爲然乎否。

復倪敬堂書

頃從兪嘯樓舍親處。接讀手教。慰問并蒙厚儀。感媿之私。銜結肺腑。皇十二子所致賻儀。亦隨祇領。竊念皇十二子天質淳粹。至性過人。不孝陪講兩年。曾未效勺涓之益。前夏銜恤里門。艸土昏迷。不敢遽通寸啓。家居所見邸報。竝無薨逝之問。直到持齋前輩南來。方審其實。而百日已過。奔臨無自。昔賈生以梁王

勝之沒。哭泣自傷。遂至殞生。區區之忱。今古同揆。至此項致賻。係前秋之事。乃因轉展稽遲。歲華再易。未減三年之字。已成千古之悲。挂劍有懷。驂鸞永隔。撫心載慟。沒齒奚言。惟執事察其情而哀其志焉。內直諸同好。及同年諸君。不及徧啓。晤時乞道及。無任銜感之至。

此页空白

潛研堂文集卷三十四

書一

荅袁簡齋書

得手教。循環雜誦。懽喜無量。先生研精史學。於古今官制異同之故。燭照數計。洞見癥結。而猶虛懷若谷。示以所疑。俾馬勃牛溲。得備扁和之采。其爲榮幸。非所敢望。謹就問目。述其一二。惟先生詳察。夫檢校兼守判知之名。皆起於唐。但唐初所謂檢校者。雖非正授。卻辦本職事。如檢校侍中。檢校中書令。檢校納言。檢校左相之類。皆列於宰相表。與眞授者無別。而宇文士及。檢校涼州都督。魏元忠。檢校并州長史。亦是實履其任。蓋內外各官。皆得有檢校。若今署事矣。中葉以後。諸將多以軍功得檢校官。三公三師。僕射。尙書。常侍。車載斗量。有名無實。故唐書宰相表。三公三師七十一人。檢校之公師不與焉。猶使相之不列於宰相也。而自公師兩僕射六尙書兩散騎常侍。太子賓客。國子祭酒而外。它官亦罕有除檢校者。宋史所列檢校官一十有九。蓋卽沿唐末之制矣。公師之班。首太師。次太尉。次太傅。次太保。次司徒。次司空。王建由檢校太師。纔遷司徒。曹佾以檢校太師守司徒。又數年。始除守太保。然則檢校太師。尙在眞三公之下。

也。若夫行守試三者，則以官與職之高下而別。長編載元豐四年詔，自今除授職事官，竝以寄祿官品高下爲法。高一品者爲行，下一品者爲守。二品以下爲試。品同者不用行守試。偶檢柳公權書苻璘碑，其題云：輔國大將軍、行左神策軍將軍、輔國大將軍、階正二品、左神策將軍、官從三品。此高一品爲行之證也。其結銜云：朝議大夫、守尚書工部侍郎、朝議大夫、階正五品、侍郎、官正四品。此下一品爲守之證也。五代時，李琪爲宰相，所私吏當得試官，琪改試爲守，遂爲同官所糾。此試不如守之證也。判與知之分，則宋次道春明退朝錄所云：品同爲知，隔品爲判者，得之。宋初，曹翰以觀察使判潁州，蓋用隔品爲判之例。後來惟輔臣及官僕射以上，領州府事稱判，其餘皆稱知，不稱判矣。判知之外，又有云權發遣者，則以其資輕而驟進，故於結銜稍示區別。程大昌云：以知縣資序隔二等，而作州者，謂之權發遣，以通判資序隔一等，而作州者，謂之權知，是也。宋制，六曹尚書從二品，而權尚書則正三品，侍郎從三品，而權侍郎從四品，則權知與知亦大有別矣。元祐元年，文彥博落致仕，加太師平章軍國重事，潞公本以守太師致仕，今復召用，故有落致仕之命，同一落也。落職則爲罷免，落致仕則爲復用，其云落者，謂結銜內去此字也。元豐三年，彥博落兼侍中，除守太尉，蓋其時改官制，以侍中中書令爲宰相職事官，非退閑者所宜授，故落侍中而進太尉以寵之，亦非罷免之謂也。富弼呂公著之守司空，與蔡京之司空，皆眞三公也，而京不云守，則尤貴。三師三公初拜，有臨軒受冊儀，宋時居此職者，皆固辭而止，若檢校官，固無所謂冊拜也。差遣之名，

惟宋時有之。宋時百官除授有官有職有差遣。如東坡以學士知定州知州事差遣也。端明殿學士職也。朝奉郎則官也。差遣罷而官職尚存。職落而官如故。古之優禮臣工如此。非有大罪斷無儕於編戶之理。至明而待士之禮薄矣。方密之謂古宰相無印。支俸皆借翰林院印。此特謂明之大學士耳。唐宋宰相皆有印。故有分日知印之法。其文曰中書門下印。元中書令左右丞相皆銀印。若明之大學士本無宰相之名。然亦未嘗無印。明史內閣銀印直紐方一寸七分厚六分。玉箸篆文。其文曰文淵閣印。但文移用翰林院印不用此印。而方遂以爲無之耳。本朝大學士無印。文移用內閣典籍廳印。卽明之翰林院典籍也。明之閣臣皆出翰林。故典籍卽爲內閣之屬。今改典籍隸內閣。而翰林院別設典籍簿稍區而二之矣。隋書百官志官一品每歲祿八百匹二百匹爲一秩。雖未明言何匹。納檢下文有云祿率一分以帛一分以粟一分以錢。則匹當是絹匹之匹。非馬匹也。尊集體大思精。直追唐宋作者。蒙委讐校。謹就鄙見所及。證據一二。開具別紙。暑暍恐勞起居。得雨稍涼。當走謁。不宣。

再荅袁簡齋書

蒙詢秦漢賜爵及唐同三品之稱。謹按賜爵始於商鞅。以旌首功。漢時或以入粟入錢得之。而賜民爵一級。或二級。三級。史不絕書。大約公乘以下。與齊民無異。五大夫以上。始得復其身。民賜爵者。至公乘而止。爵過公乘。得移與子。若同產。同產子有罪得贖。貧者得賣與人。宣帝求漢初功臣之後。復其家。

史稱皆出庸保之中。及攷之表。則或云公乘簪褭。或云公士上造。大率皆有爵者。雖擁高爵。尙雜庸保。爵之冗濫如此。至五大夫以上。則以賜中二千石至六百石之勤事者。及列侯嗣子。然攷之史漢。自卜式桑羊而外。書賜爵者寥寥。非無爵也。賜爵不足爲榮。史家略而不書也。民爵不過公乘。而入粟之法行。則有至大庶長者。大庶長去關內侯一級耳。然鬻爵而不鬻官。官有員。爵無員。此最錯所謂出於口而無窮者也。先生謂普賜天下民爵。自惠帝始。旣云普矣。將人人有爵。又賣與何人。愚攷之。紀多云賜民爵戶一級。或不云戶者。史家省文。師古曰。賜爵者一家之長得之也。一戶惟賜一人。子姓昆弟皆不得與。固無嫌賈用不售矣。唐初以侍中中書令爲宰相。此二官者皆三品也。然它官亦有三品階。故入相而官未至侍中中書令者。必云同中書門下三品。其資望稍輕者。則云同中書門下平章事。大歷以後。升侍中中書令爲二品。自後入相者。但云平章事。無同三品之名矣。當時除三公者。固不乏人。未嘗以三品爲限。但三公不必知政事。而居宰相者。不皆二品以上官。中葉以降。竝有除侍中中書令。而不入政府者矣。若謂官不得過三品。唐志本無此文也。區區所聞。惟先生決其然否。

三荅袁簡齋書

別來又逾旬日。溽暑未退。不得時奉誨言。伏惟台候萬福。昨蒙詢及史事數則。謹就記憶所及。略陳一二。以備采擇。宋時諸州設通判。其結銜云。通判某州軍州事。元諸路總管府置同知。其結銜亦云。同知某路

總管府事。其稱某府同知。某府通判。則始於明時。亦猶宋之郡守。稱知某府軍府事。而明直稱某府知府也。通判在宋初。雖有監州之諺。然其權仍出知州之下。中葉以後。其選益輕。東坡通判杭州。寄子由詩。有餘杭別駕無功勞之句。則通判之稱別駕。宋時已然。若同知俗稱司馬。想是起於明時。然以唐制言之。別駕司馬。雖均爲刺史之佐。而司馬卻在別駕之下。更溯而上之。至於兩漢。則司馬乃典兵之官。本非郡僚。攷續漢書百官志。將軍之下。有司馬一人。其領軍皆有部曲。部有軍司馬一人。曲有軍候一人。又有軍假司馬。軍假候。其別營領屬。爲別部司馬。今人所得漢印。有軍司馬。軍假司馬。別部司馬。軍曲候諸稱。皆將軍之屬領兵者。若郡守之貳。爲丞。爲長史。無所謂司馬也。刺史之下。只有從事掾史。亦無司馬也。晉宋以降。除刺史者。必加將軍。持節都督軍事。故刺史之屬。得置司馬。隋唐改太守爲刺史。因以司馬爲郡佐。亦習焉不察耳。漢制。刺史之屬。有治中從事。別駕從事。皆州自辟除。秩止百石。較之縣令爲卑。而魯子敬稱龐士元非百里才。使處治中別駕之任。始當展其驥足者。蓋其時州牧專制一方。幕府元僚。得參生殺予奪之柄。較之百里作宰者。輕重大不侔矣。元中書省有右丞相。左丞相。有平章政事。有右丞。左丞。有參知政事。皆稱宰輔。而秉政者。丞相也。皆蒙古色目世家爲之。平章閒有用事者。右丞以下。雖曰與聞國政。其委任已輕矣。世祖之世。平章兼用漢人。成宗以後。漢人授平章。不過李孟張珪王毅三人。右丞以下。始參以漢人。然南人初無入中書者。順帝時。始有危素一人。亦僅得參政耳。色目三十一種。輟耕錄具載其目。

要其最貴者。回回畏吾。康里。唐兀。欽察。雍古。數種而已。契丹女直。謂之漢人。不在色目之列。幹耳朵者。蒙古語。猶言營盤也。太祖四幹耳朵。皆有皇后數人。元時稱皇后者。不必正宮。猶之皇子皆稱太子。宗女悉號公主也。元時各路總管府及州縣。俱置達魯花赤。王圻謂達魯花赤。國言荷包壓口。蓋取管轄之義。然元人稱州達魯花赤曰監州。縣達魯花赤曰監縣。則又有監察之義矣。遼金之世。所云一字王者。如秦王。魏王之類。皆國王也。郡王則必兩字。如混同郡王。金源郡王是也。金史百官志。諸兀詳穩一員。在部族節度使之後。諸移里董司之前。則兀亦部落之稱。古今字書。俱無兀字。記有一書讀兀作管音。亦不知所據也。客中未攜書籍。兼之多病善忘。誚漏舛錯。不知所裁。惟執事教之。

荅大興朱侍郎書

蒙閣下垂詢。以國語伶州鳩言武王克商。歲在鶉火。此周人述周事。必無差誤。而它書或云歲在己卯。或云辛卯。似不相應。大昕嘗習劉子駿三統術。於國語所云歲在鶉火。日在析木之津。月在天駟。辰在斗柄。星在天龜者。推驗其時日次度。無不脗合。古法歲星與太歲常相應。歲星自丑右行。太歲自子左行。歲移一次。周則復始。如歲星在星紀。則太歲必在子。歲星在鶉火。則太歲必在未。三統術上元起丙子歲。依歲術步之。則武王克商之年。當直辛未。孔穎達詩正義云。文王受命十三年。辛未之歲。殷正月六日。殺紂。孔疏所言。與國語歲在鶉火之文。正相合矣。自周受命以後。至於秦漢。皆有紀年可攷。非若夏商以前之茫

昧而後人譜紀年者。皆以周克殷爲己卯歲。相較差八年者。蓋古術太歲與歲星。皆有超辰之法。歲星百四十四年而超一辰。則太歲亦超一辰。積年逾久。則超年亦漸多。今人以漢高帝元年爲乙未。武帝太初元年爲丁丑。而班孟堅於漢元年引漢志曰。太歲在午。於太初元年引漢志曰。歲名困敦。孟堅所引者。西京之注記。則西京猶用超辰之法。而東漢臺官已鮮知之。故虞恭宗訢輩言太初元年。歲在丁丑。又言歲無由超辰。蓋太歲不用超辰。昉於東漢。而相沿到今。以今法溯古年。則武王克商固宜在己卯矣。然鄭康成注馮相氏十有二歲云。歲星與日常應太歲月建以見。然則今術太歲非此也。今之太歲異於古之太歲。鄭於周禮注中已明言之。非大昕臆說也。呂氏春秋維秦八年。歲在涪灘。以今法推之。秦始皇八年。當爲壬戌。而云涪灘。相差兩年。亦以太歲超辰故也。超辰之法。廢於東漢。東漢距西漢。尙在百四十四歲以內。故差止一年。其距秦始皇。則已在百四十四歲以外。故差至二年。積至周初。已閱千有餘歲。故差至八年。以今法言之。則己卯歲本不誤。而在古法則必爲辛未。不得爲己卯。若竹書辛卯。皇甫謐乙酉之說。則誕而不足信矣。閣下謂歲星在午。則太歲爲作噩。此據淮南天文訓。史記天官書之文。然淮南言太陰。史公言歲陰。俱不言太歲。太陰卽歲陰也。亦周行十二辰。而常在太歲後二位。古人制攝提格以下十二名。本言太陰所在。而後人移屬之太歲。失其舊矣。何以言之。淮南云。太陰在酉。歲名曰作鄂。歲星舍柳七星張。以六月與之晨出東方。夫柳七星張者。鶉火之次也。六月日在鶉火。歲星與日同出東方。是月斗建未。

而太歲亦在未。故鄭注馮相氏謂太歲者歲星與日同次之月斗所建之辰也。而歲名則曰作噩。此古人以太陰紀歲。不以太歲紀歲之證也。推之十二月盡然。淮南雖未明言太歲所在。而其上文云太陰在寅。寅爲建。子爲開。主太歲。則知太歲之非太陰。又知太歲常在太陰之前二辰矣。以淮南史公紀歲之例推之。則謂周克商之歲。歲名作噩。固可。要是太陰所在。非太歲所在也。漢太初元年。史記以爲闕逢攝提格之歲。此以太陰言之。而班史謂歲名困敦。則指太歲所在。讀史漢者。往往於此致疑。其實無可疑也。東漢以後。術家不用太陰。但用太歲。又去其超辰之法。于入算雖便捷。而古書之難通者多矣。鄙著史記攷異。曾一及之。而語焉不詳。茲因闕下之詢。爰述所聞以對。惟幸裁察。

與孫淵如書

去歲兩奉手書。慰問周至。足下在西曹鑿劇之地。而撰述甚富。性情當於古人中求之。謂一行作吏。此事便廢者。卽不作吏。亦未必不廢也。尊集中太陰攷一篇。不信太陰與太歲爲二。蓋用張揖廣雅之說。愚謂古人旣以太陰紀歲。天官書又謂之歲陰。卽以當太歲。似無不可。然漢志述太初改元事。旣云復得闕逢攝提格之歲。又云太歲在子。則當時實以太陰紀年。而別有太歲。昭然察矣。乃自太初而後。以太陰紀年者。僅見於天官書甲子篇。而劉歆三統術。無推太陰法。卽翼奉封事。亦似以太陰當太歲。則自太初改憲。而闕逢十名。攝提格十二名。移於太歲。相承已久。稚讓魏人。安得不云爾乎。足下謂淮南紀歲星出月。在

史漢前兩月。以爲淮南之誤。按淮南太史公皆以太陰紀歲。漢志則以太歲紀歲。兩法不同。漢志依太初術。太歲在寅。則歲星在營室東壁。以正月晨出東方。所謂歲在姬訾也。太歲在卯。則歲星在奎婁。以二月晨出東方。所謂歲在降婁也。推之十二辰皆然。此真太歲所在也。淮南史公所謂攝提格歲者。太陰在寅。太歲本在子也。其歲歲星舍斗牽牛。卽星紀之次。當以十一月出東方。淮南之文。本無誤。而史公云正月者。以天正言之。其實與淮南無別也。漢志與史公文同而實異。依石氏則與史公不異。但當云歲陰不當云太歲也。淮南與史公文異而實同。知太陰太歲之有別。則相說以解矣。古法太歲左行於地。歲星右行於天。其相應與月建月將之相應同。鄭康成注周禮。歲謂太歲。歲星與日同次之月。斗所建之辰也。今按歲星舍斗牽牛。爲星紀丑宮。十一月日躔星紀。是爲歲星與日同次之月。其月斗建在子。吾是以知太歲之本在子也。而淮南史公明云攝提格歲。吾是以知太陰太歲之必有別也。淮南云太陰在四仲。則歲星行三宿。在四鈞。則歲星行二宿。與天官書正合。晉灼改太陰爲太歲。遂有兩歲之差矣。淮南斗杓爲小歲。咸池爲大歲。大與小對。今本亦作太歲。此轉寫之譌。非別有太歲。如世俗所云月太歲也。漢碑歲在戊午。名曰咸池者。咸池右行四正。子午卯酉皆咸池所在也。足下所撰太歲歲星左右周天圖。依天官書次之。但可云太陰。或云歲陰。若指爲太歲。則恐未合於古。且與鄭康成亦相矛盾。歲星十二年而一周天。不過約其大率。其實歲行一次。尙有餘分。積至百四十四年。而行百四十五次。古人謂之超辰。服虔謂有事於武宮之歲。龍度天門。此超

辰之證也。足下不信歲星有跳辰，則左氏所紀歲在之文，不幾前後不相應乎？古法不獨歲星有超辰，而太歲亦有之。自後漢四分術行，而太歲無超辰之法，相沿到今，然通儒如鄭康成者，猶能言之。故有今稱太歲非此之語，卽如淮南元年，太一在丙子，以今法推之，當爲丁丑。漢太初元起丙子，後人亦命爲丁丑。蓋其時距後漢百有餘年，當超一辰故也。呂氏春秋，維秦八年，歲在涪灘，高氏謂秦始皇卽位八年也。以今法推之，當爲壬戌，而云涪灘者，秦初距後漢二百餘年，當超兩辰，故差二年也。又溯而上之，武王克商，歲在鶉火，先儒以爲辛未歲。見孔穎達疏而今人命爲己卯，自周初至後漢，千有餘年，當超八辰，其年數固無多寡也。古人不以甲子紀歲，亦以太歲有超辰，無一定之榦枝，不如歲星之垂象，章章可稽耳。後代棄超辰之法，而歲星不與太歲相應，則用歲星，誠不如用太歲之簡易。然而古書之難通者，遂多，則古法不可不講，故願與好古君子，盡其同異，唯足下幸教之。

荅盧學士書

來教謂續漢志述二十四氣中星，大寒旦中，當是心半，非心二半。僕初校時，但據閩本添二字，初未布算。茲以四分術推之，果是心半，始悔向來粗心之誤，受教良非淺矣。惟是尊教云，中與節相距之度，不過四十五之間，則恐未爲定率。卽以旦中一條言之，斗少至斗十一，斗十一至斗廿一，相距僅十度，參五至井十六，井十六至鬼三，相距且廿度。其故由於晝漏之長短不齊，非如日所在度之有當也。至心半之半，

刊本俱作大書。竊謂半與少大皆不滿一度之別名。當與少大強弱一例分注。它如驚蟄斗少。大暑尾十五半。白露參五半。小雪室二半。大雪壁半。諸少半字。亦皆不應大書也。上文論昏明定度一條。但云其餘四之。如法爲少。而不言半大。似亦缺漏。宜依乾象術之例。添二句云。二爲半。三爲大。方與後文相應。未審閣下以爲何如。聞文從卽日過蘇。相晤非遠。天寒珍重眠食。不宣。

又

讀閣下所校太元經云。向借得一舊本。似北宋刻。末署右迪功郎充兩浙東路提舉茶鹽司幹辦公事張寔校勘。大昕案宋時寄祿官分左右。唯東都元祐。南渡紹興至乾道爲然。蓋以進士出身者爲左。任子爲右也。而建炎初。避思陵嫌名。始改句當公事爲幹辦公事。此結銜有幹辦字。則是南宋刻。非北宋刻矣。宋史遇句當字。多易爲幹當。此南渡史臣追改。非當時本文也。去冬於吳門見司馬溫公集注太元六卷。後附許翰解四卷。舊鈔本甚完善。袁上舍又愷曾借錄其副。溫公書亦收於道藏。許解則道藏并未收也。不識閣下已見之否。

與梁燿北論史記書

足下謂秦楚之際月表。當稱秦漢。不當以楚踞漢先。儼然承周秦之統。其意誠善。然蒙未敢以爲然也。史公著書。上繼春秋。予奪稱謂之間。具有深意。讀者可於言外得之。卽舉月表一篇。尋其微指。厥有三端。一

曰抑秦。二曰尊漢。三曰紀實。何謂抑秦。秦之無道。史公所深惡也。秦雖并天下。附書於六國表之後。不以秦承周也。及陳涉起事。秦猶未亡也。而卽儕諸楚齊燕趙之列。則猶六國視之也。雖稱皇帝者再世。與楚之稱霸王等耳。表曰秦楚。言秦之與楚匹也。何謂尊漢。史公以漢繼三代。不以漢繼秦。若繫漢於秦之下。是尊秦而貶漢也。十二諸侯年表。不題周而周尊。秦楚之際。月表。不題漢而漢尊。秦楚皆亡國之餘。以漢承之。失立言之體矣。陸賈楚漢春秋。其命名不如史表之正也。何謂紀實。楚雖先亡。覆秦之社稷者。楚也。漢高初興。親北面義帝。漢王之國。又項羽封之。秦亡之後。主天下命者。非楚而何。本紀既述其事。而表又以秦楚之際目之。言天下之大權在楚也。此亦實之不可沒者也。自王子師詆子長爲謗史。宋元明儒者。訾議尤多。僕從未敢隨聲附和。蓋讀古人書。誠愛古人。而欲尋其用意之所在。不肯執單詞以周內文致也。

與梁燿北論史記書二

天官書文字古奧。非太史公所能自造。必得於甘石之傳。今世所稱甘石星經。乃後人僞託。多襲用晉隋二志。而稍爲異同。要其剽竊之迹。自不能掩。較之太史公書。猶周鼎之與康瓠也。易曰。天垂象。春秋傳曰。天事恆象。古人測星。但舉其大而明者。取象以擬百官庶物。後世臺官。增入附近微細諸星。名目雖多。轉不如古人之簡易。且如危三星。有蓋屋之象。故云危爲蓋屋。而後人別指旁小星。以實蓋屋之名。咸池本

兼五潢五車三柱而言。故云天五潢。又云五帝車舍。其匡衛甚廣。因以表西方諸宿。淮南天文訓。咸池者。水魚之囿也。又云斗杓爲小歲。正月建寅月。從左行十二辰。咸池爲大歲。二月建卯月。從右行四仲。終而復始。蓋斗爲帝車。咸池亦以五車爲匡衛。皆有運行之象。故指其所建。以定四時。天潢之義。與咸池同。潢卽池也。後人析爲數名。但以三小星當咸池。失其義矣。史公以紫宮房心權衡咸池。虛危爲天之五官。豈專指三小星而言哉。足下據晉志以糾史公。愚謂晉志星名。係後來增加。非史公之疏漏也。足下又疑西宮下缺白虎兩字。愚謂參爲白虎。已見下文。此處不當更舉。史漢未嘗以四獸領四方諸宿。或先書或後書。於例初無嫌也。

與梁燿北論史記書三

來教駁僕所論武安侯奉邑食餼一條。謂欒布所封兪。乃別一地。非清河之餼。且言縣侯必盡食一縣。反覆援引。可謂博學而明辨矣。然愚意猶有未釋然者。攷呂后封兪侯。呂它。景帝封兪侯。欒布。班表皆不言封國所在。至蘇林酈道元。司馬貞輩。始以清河之餼當之。足下疑其別有一兪地。固無不可。至謂封國必盡食一縣。不獨陳平一人。則愚請以史漢正文證之。樊噲初封舞陽侯。其後益食邑者。再後乃定食舞陽五千四百戶。則樊噲初封。未能盡食舞陽一縣也。夏侯嬰初封汝陰侯。其後益食邑者。三。乃定食汝陰六千九百戶。則滕公初封。未能盡食汝陰一縣也。灌嬰初食潁陰二千五百戶。已號潁陰侯。其後乃定食潁

陰五千戶。則灌嬰初封。未能盡食。潁陰一縣也。蕭何封鄧。本八千戶。後又益二千戶。及其後裔紹封。戶或二千四百。或止二千。或并不及二千。而鄠侯之名不改。曹參封平陽。本萬六百餘戶。及其後裔紹封。僅二千戶。亦號平陽侯。然則列侯但以封戶定其疆界而食之。此外尚有餘地。仍屬有司。理可信矣。更以後漢書證之。伏湛封不其侯。傳國至建安中始絕。而靈帝時。已封宋鄠爲不其鄉侯。則不其一縣。除伏侯食邑外。尚有它鄉也。以是推之。纒布食邑僅千八百戶。郟縣戶口。必不止此數。其爲武安食邑。亦無足異矣。漢縣本有大小之分。其大小以戶口而定。所謂萬戶以上爲令。減萬戶爲長也。陳平封五千戶。與曲逆見戶數適相等。故得盡食其縣。其餘諸公。封戶雖多。而其縣見戶。或浮於封戶之數。則不能盡食矣。非平之食封勝於蕭曹也。足下又謂陳平盡食曲逆。乃兼指亡匿戶口言之。亦恐未然。夫漢之封國。雖計戶口。仍以疆域爲斷。史公言漢初大侯不過萬家。小者不過五六百戶。後數世。民咸歸鄉里。戶益息。蕭曹絳灌之屬。或至四萬。小侯自倍。是則復業戶口。在列侯封內者。例得兼食之。不獨曲逆爲然。史何必特書於本傳耶。若陸賈之說。陳平云。足下食三萬戶侯。乃據秦時版籍言之。平旣全食此縣。故舉全盛之數。以誇其富耳。若云當時復業。真有此數。則十數年之間。斷不能頓增五倍。而休養百餘載。至元光之世。乃轉耗其半。尤無此理矣。僕於讀史。擇善而從。非敢固執己見。但以史漢參攷。封君之盡食一縣者。自曲逆而外。旣不多見。而纒布之封郟。其說始於蘇林。林去漢不遠。或有所據。故復申其義。唯足下幸教之。

潛研堂文集卷三十五

書二

與徐仲圃書

僕於輿地之學。留心廿餘年。嘗恨東晉南北朝。僑立州郡。歲增月易。名目叢複。雖以杜佑李吉甫樂史之淹博。猶且十闕其六七。不揣椎魯。思欲理而董之。而疑義紛拏。無從質正。近年始交陽湖洪孝廉稚存。今又得交足下。皆礪精地理。卓然成家。而足下譚次年表。經緯分明。於南北交爭。疆易陷復之迹。瞭如視掌。洵足補前人之闕。而爲後學之指南矣。其中尙有一二疑不能釋。請疏其大略。以備採擇。晉志元帝渡江之後。徐州所失過半。乃僑置淮陽。陽平。濟陰。北濟陰四郡。初不言置於何地。而足下以歷陽實之。徧檢晉宋齊志。歷陽竝無置四郡之事。未知足下何所據也。且晉志述渡江州郡。多不可信。卽以此條論之。上文云永嘉之亂。臨淮淮陵淪沒。石氏則是淮北旣失之後所置。其地當在淮南。而安帝紀義熙五年慕容超將慕容興宗寇宿預。陽平太守劉千載爲賊所執。是陽平在淮北。不在淮南。其難信者一。宋志淮陽陽平。濟陰北濟陰。竝在徐州部內。宋之徐州在淮北。不在淮南。其淮陽郡領甬城宿預等縣。去京都水七百陸

五百五十以道里準之。正在舊臨淮郡界。其難信者二。宋志淮陽。晉安帝義熙中。土斷立。不言元帝置。北濟陰。則宋孝建元年立。并非晉所置。其難信者三。宋志於陽平濟陰二郡。雖不言何時置。然於陽平云。故屬司州。流寓來配。於濟陰云。屬兗州。流寓徐土。因割地爲境。若渡江之初。僑人未有土斷之令。不當云割配。其難信者四。宋末失淮北。始僑立陽平於山陽。北淮陽。北濟陰於廣陵。永初以前。淮南尚無此四郡。況於元帝渡江之初乎。其難信者五。夫南渡初。尚未有此四僑郡。則歷陽之無此郡。益可信矣。宋志稱安帝改堂邑爲秦郡。晉志則以爲元帝渡江所改。并僑立尉氏縣屬焉。足下謂元帝改堂邑爲秦郡。而堂邑縣如故。安帝改堂邑縣亦爲秦縣。欲以彌縫二志之說。僕以晉宋二史參互攷之。王國寶。毛泰。劉穆之爲堂邑太守。皆在安帝之世。是安帝時。尚有堂邑郡。及劉裕當國以後。向彌。檀詔。檀祗。虞邱。進相繼爲秦郡太守。可知秦郡改名。必在義熙中。不在元帝渡江之時矣。且向彌。檀詔。檀祗。皆以秦郡太守兼北陳留內史。則北陳留與秦郡同寄治堂邑。而尉氏卽陳留屬縣。晉末尚有陳留郡。其并入秦郡。或在義熙土斷以後。而晉志謂元帝卽以尉氏屬秦郡。豈其然乎。晉世僑立州郡。皆不係以南名。義熙恢復故土。乃有北徐州。北青州。北彭城。北琅邪。北東海。北東莞。北潁川諸名。而在南州郡。猶仍故名。至永初受禪後。始詔去北加南。而晉志往往稱南徐。南兗。南豫。南青。又謂元帝置南東海。南琅邪等郡。明帝立南沛。南清河等郡。蓋唐人。不學。誤切宋志追稱之詞。以爲晉時已有此名耳。沿襲千有餘年。至僕始悟其失。頃見足下州郡表中。

頗有承用晉志者。似宜訂正。以破後來之惑。故敢獻其狂狷。惟足下裁之。

荅談階平書

得足下書。道及姚禮部駁僕漢書攷異中說秦三十六郡一條。僕所據者。班孟堅志本文。以志解志。非敢臆造。禮部執史記分郡在始皇二十六年。而略取南海諸郡。乃在三十三年。不當列於三十六郡之數。似矣。僕試卽以史記質之。則三十六郡之分。本非一年中事。如東郡則始皇五年置矣。潁川則十七年置矣。會稽則二十五年置矣。豈皆在二十六年乎。不特此也。巴蜀置於惠文。南郡。南陽。隴西。北地。置於昭襄。三川。太原。置於莊襄。則并非始皇時矣。上郡。魏所置。雲中。鴈門。代郡。趙所置。上谷。漁陽。右北平。遼東。遼西。燕所置。漢中。楚所置。則并非秦置矣。而史皆繫之二十六年者。以是歲爲兼并天下之始。封建變爲郡縣。至是遂一成而不可易。故特記之。前所置之二十餘郡。與後所增之三郡。總以三十六該之。而前後復隨文別見。古人敘事參差。不若後人之泥也。且南海三郡。不必定在三十三年。攷南越尉佗列傳。秦已并天下。略定揚越。置桂林。南海。象郡。以謫徙民。與越雜處。十三歲。其云十三歲者。據秦并天下。至二世元年數之也。王翦傳亦先言平荆地爲郡縣。因南征百越之君。而後言二十六年。盡平天下。依此二文。則二十六年分三十六郡。正當有南海三郡矣。均是史公之書。禮部援本紀以證其說。僕卽可援二傳以伸僕之說矣。史公但云分三十六郡。初未實指某某郡。班志則明言之矣。其敘漢郡國。以秦三十六郡。并高文。景。武。昭。

所增正合百有三之數。非猶有未備也。司馬彪志郡國亦云。漢承秦三十六郡。皇甫謐帝王世紀云。秦兼諸侯置三十六郡。蓋漢魏以前未有別南海諸郡於三十六之外者。別之自裴駮始。唐人修晉書祖述裴說。因有四十郡之目。相沿到今。僕謂不如班史之可信也。馬班二史述漢初事。郡名固有出於三十六郡之外者。此則諸侯私置。或二世增設。要非始皇三十六郡之舊。且亦隨置隨廢。故班志略而不言。以其不足言也。非有所缺漏也。裴駮之說不知所本。恐是誤會始皇本紀之文。若以前後文互證。則是年實止置齊琅邪兩郡耳。并前後通計之。班志豈真與太史公相矛盾哉。僕非護前而憚改。顧吏漢正文具在。難以裴氏單詞。遽詆班志爲未備。故稍申愚管。以備折衷。足下試復於禮部不識更有以啓僕之惑否。

再與談階平書

僕前札中言及秦三十六郡。鄙意但謂史公於始皇二十六年書分天下爲三十六郡。兼南海三郡在內。合前後所置言之。班志所云與史公本非牴牾耳。又引王翦南越兩傳以證略定揚越時已置此三郡。弟爲存疑之詞。初非因此并疑三十三年不當有略取陸梁地之事也。足下謂王翦南征百越之君。卽指會稽一郡。然賈生過秦云。南取百越之地。以爲桂林象郡。則百越與會稽究非一地。王翦傳先言竟平荆地爲郡縣。而後言南征百越之君。可驗百越在會稽郡之外矣。而南越傳實有與越雜處十三歲之語。足下雖善辯。但以本不可曉置之。愚謂此語非甚難曉也。當秦初并天下時。王翦南征百越。已有三郡之名。但

因其君長俾自治之。如後世羈縻之州。其後使尉屠睢略取其地。黜其君長。置官吏如內郡。則在三十二年。故本紀特書之。傳與紀互見。而兩不相妨。徐野民未悟及此。是以存疑到今。僕又讀東越列傳云。秦已并天下。皆廢爲君長。以其地爲閩中郡。與南越傳文略同。而本紀不載置閩中郡。其所以有載有不載者。閩中雖有郡名。仍以其君長治之。秦未嘗別置守尉也。南海三郡。其初置蓋與閩中同。厥後乃有任囂趙佗輩。則等於內地郡縣矣。此所以不書於二十六年以前。而特書於三十三年也。足下以爲然乎否乎。即使僕所引南越王翦兩傳。果如足下說。而秦之但有三十六郡。別無四十郡。則兩漢書有明文。不可據裴駰說以汨之。更不必因裴說之未的。而別求它郡以實之。此僕之本意也。惟足下詳察。

與姚姬傳書

昨於新城陳公子碩士所。讀所著廬江九江二郡沿革攷。以今縣推見漢疆域。所謂君子之言。信而有徵者矣。惟以廬江爲衡山改名。則猶有未慊於心者。夫淮南之分爲三。在文帝十有六年。曰淮南。曰廬江。曰衡山。皆秦九江郡地。在戰國則皆楚地也。秦之九江郡。跨江南北。楚漢之際。以江南地析置豫章郡。而鯨布封淮南兼得之。淮南厲王因布故封。文帝封厲王諸子。盡以故地還之。故廬江國兼有豫章郡。得與楚交通也。景帝平吳楚。徙廬江王賜於衡山。而廬江豫章俱爲漢郡。其衡山之爲王國如故也。武帝元狩元年。王賜以謀反誅。而國除爲衡山郡。其三年。以衡山地置六安國。自後遂無衡山之名。景十三王傳封膠東王寄少子慶爲

六安王王漢志敘衡山沿革於六安下。不系於廬江下。明乎衡山之與廬江無涉也。廬江之爲郡。在孝景初。自後別無廢省之人。伍被說淮南王安云。南收衡山以擊廬江。是衡山與廬江絕非一地。今欲并而合之。難矣。鯨布初封。史稱九江廬江。衡山豫章郡皆屬焉。攷其時。吳芮徙封長沙。以其地益布。而芮故都鄴。則當兼得江夏地。厲王子勃封衡山。亦當兼有郟軼。靳春諸縣。至武帝建六安國。分土始狹。非復衡山之舊。光武初。因省六安入廬江。若西京。則衡山自衡山。廬江自廬江。未嘗合而爲一也。讀史之病。在乎不信正史。而求之過深。測之太密。班孟堅志郡國沿革精矣。間有未備。以紀傳攷之。無不合也。孟堅所不能言。後儒闕其疑可矣。謂漢初之廬江在江南。武帝時已罷。昭宣之間。改衡山爲廬江。皆孟堅所未嘗言。所據者。僅廬江出陵陽一語。然陵陽乃鄆郡之屬縣。非淮南故地。恐難執彼單辭。以爲定案也。先生當代宗師。一言之出。當爲後世徵信。敢獻所疑。幸明以示我。

與孫鳳陽書

承示所撰鳳陽志。簡而有要。可稱佳槩。但中有存疑者數事。其一以唐分十道。皆因山川形便。鍾離在淮南。而隸於河南。爲不可解。予案唐六典。淮南道十有四州。濠居其一。元和郡縣志。稱濠州本屬淮南。與壽陽阻淮帶山。爲淮南之險。貞元中。竇參爲相。據淮割地。隸屬徐州。及張建封死。子愔爲本軍所立。常挫王師。其時朝廷幾失淮南之地。是濠之改隸淮南。實始於竇參。然吉甫已譏其不學。昧於置理之制矣。唐志

所據者。貞元以後之制。非十道之舊也。足下試采吉甫志之文。編入沿革門。則原委瞭然。可免後來之疑矣。足下又疑河南按察司行臺。不當在縣境。攷明時南北直隸。不設布按二司。而有巡守諸道。巡守道銜。皆假鄰省布按之名。此行臺蓋巡道之行署。鳳陽與河南接壤。故寄銜於河南。非真河南按察也。

鄞縣志局與同事書

史家之例。以列傳爲重。其列於儒林文苑者。皆其次焉者也。元人不通史法。乃特翹道學之名。欲以尊異程朱諸人。後來無可充道學者。而無識之輩。競以儒林爲榮。今志局所擬入儒林者。未必悉孚公議。且如王厚齋。四明文獻之宗。而不列之儒林。豈厚齋之學行。不如高閔黃宗明乎。若謂厚齋以官高。當入列傳。則高閔袁燮父子。班秩不在厚齋之下。何以仍入儒林也。袁桷張時徹。沈一貫之入文苑。似有意抑之。然列傳諸人。豈皆粹然無瑕者。魏收所謂揚之升天。按之入地。此淺夫所爲。昔人所譏其穢者。而躬自蹈之。吾不解也。寶慶延祐兩志。皆不立儒林文苑諸目。羅願之志新安。施宿之志會稽。潛說友之志臨安。亦無此名也。嘉靖志於儒林文苑外。更增淳德雋異之名。尤爲冗設。愚意當循胡袁二志之例。總題之曰人物。但以時代爲次。不分優劣。既遵古式。又息爭端。有尙友古人之識者。自能別其孰爲大賢。孰爲小賢也。

荅王西莊書

得手教。以所撰述於崑山顧氏。秀水朱氏。德清胡氏。長洲何氏。間有駁正。恐觀者以試訶前者爲咎。愚以

爲學問乃千秋事。訂譌規過。非以訾毀前人。實以嘉惠後學。但議論須平允。詞氣須謙和。一事之失。無妨全體之善。不可效宋儒所云。一有差失。則餘無足觀耳。鄭康成以祭公爲葉公。不害其爲大儒。司馬子長以子產爲鄭公子。不害其爲良史。言之不足傳者。其得失固不足辯。旣自命爲立言矣。千慮容有一失。後人或因其言而信之。其貽累於古人者不少。去其一非。成其百是。古人可作。當樂有諍友。不樂有佞臣也。且其言而誠誤耶。吾雖不言。後必有言之者。雖欲掩之。惡得而掩之。所慮者。古人本不誤。而吾從而誤。駸之。此則無損於古人。而適以成吾之妄。王介甫鄭漁仲輩。皆坐此病。而後來宜引以爲戒者也。十七史商權。聞已刊成。或有譌字。且未便刷印。乞將樣本寄下。

與洪稚存書

足下札言國語日月會于龍虺。已攷一字當之。予幼讀東京賦。卽疑虺與疚協韻。未得其義。後讀廣韻四覺部。犯訓龍尾。又與豚同。乃悟虺爲犯之譌。廣雅云。豚。臀也。故龍尾亦有龍犯之稱。然犯豚皆漢人俗字。依說文當爲涿。涿者。流下滴。與臀義相近。蜀先主戲張裕云。諸毛繞涿居。而裕以潞涿應之。明乎涿卽豚也。古音涿如篤。故轉爲鬪音。東方朔傳。鶴俛啄與竇轂爲韻。易。良馬逐。釋文亦有胄音。是其證也。足下所攷之字。未審與僕有異同否。願明以教我。

與洪稚存書二

僕留意三國疆域有年。常欲作志。以補承祚之闕。蜀吳屬橐粗具。將次第魏事。今讀尊製體大思精。僕數倍已輟所業。讓足下獨步矣。其中有數事。或可備葑菲之采。敢略陳之。歷陽有當利浦。謂因王濬書有風利不得泊之語。以爲名。此說本於樂史寰宇記。攷其實。殊未然。孫討逆傳。稱劉繇遣張英屯當利口。周瑜傳亦云。將兵迎策。從攻橫江。當利皆拔之。則當利之名。漢末已有之。豈待王濬平吳。乃得名乎。酒泉之福祿縣。漢時本名祿福。班史及石刻曹全碑。皆其明證。至三國猶然。龐涓傳及皇甫謐列女傳。竝云。祿福長尹嘉。續漢志偶愼到二字。而晉志因之。又敦煌之淵泉。淵譌爲拚。涪陵之漢葭。葭譌爲髮。此皆不可不正者也。漢陽之爲天水。蓋魏初所改。魏明帝紀。張郃。楊阜。鄧艾。諸葛亮。姜維。諸傳。無稱天水爲漢陽者。艾傳又有天水太守王頎。豈皆史臣追改乎。晉志謂晉始復名天水者。殆未可信。惟足下進而教之。

荅洪稚存書

得執事書。知頃承恩命。入直三天。當今經師人師。孰有先於執事者。深爲吾道之幸。又述親藩時復記憶賤名。然僕病廢已久。近則耳目益曠。既舉動須人掖持。鈞天舊游。茫如隔世。徒增不能奮飛之歎耳。僕所攷秦三十六郡。竝據漢志本文。而姬傳輔之諸君。皆不謂然。今執事亦有是言。蓋據晉志秦四十郡之文。於裴駟所說三十六郡。雖斥其妄。而實取之。唯易內史爲郟郡而已。僕攷魏晉以前。言秦地理者。但言三十六郡。未有言四十者。史記秦始皇二十六年。秦始并天下。分天下爲三十六郡。謂廢封建。立郡縣。始於

此非謂三十六郡皆是年所分也。若細攷之，則是年平齊所置，祇齊與琅邪兩郡耳。并前置之三十一郡，後置之三郡，總計之，故云三十六也。史公但言分三十六郡，而不列其目。孟堅則明言某郡秦置，某爲秦某郡，合之，正得三十六。其末云：本秦京師爲內史，分天下作三十六郡。漢興，以其郡太大，稍復開置，又立諸侯王國。武帝開廣三邊，故自高祖增二十六，文景各六，武帝二十八，昭帝一，訖於孝平，凡郡國一百三。志所稱增者，增於三十六之外，非增於四十之外也。史公言三十六郡，孟堅亦言三十六郡，許慎說文高誘淮南注，應劭風俗通，皇甫謐帝王世紀，司馬彪郡國志，皆言秦三十六郡，是秦未始有四十郡也。言四十郡者，始於唐人修晉書，其實本於裴駟。駟據始皇取陸梁地，在三十三年，故不數南海三郡，而別求它郡以實之。後人又取閩中郡以足四十之數，遞相祖述，牢不可破者，千有餘年矣。執事欲以郟郡當三十六郡之一，然孟堅明言東海郡高帝置矣，信它書不如信孟堅也。漢志於武陵郡云高帝置，不云故秦黔中於丹陽郡云故鄣郡，不言秦是駟所增，無一可信，不獨內史之爲妄，劉原父刊誤雖多違失，其云秦三十六郡，無鄣郡，則合於漢志，恐未可斥爲邪說也。執事又謂閩中一郡不宜遺漏，此亦未然。攷史記南越閩越二傳，置閩中及南海三郡，竝在秦初并天下之日。王翦傳平荆地爲郡縣因南征百越之君卽謂置四郡事其時雖有郡名，仍不廢其君長。其後遣尉屠睢取陸梁地，誅其君，設南海守尉等治之，比於內郡，故得列於三十六郡之數。若閩中則仍無諸搖分治之，竊意黔中亦當類是。孟堅所以不取也。其它紀傳述漢初事，所舉郡名，若鄣若

郟若吳若東陽之類。皆楚漢之際增置。非復始皇之舊。且不久即廢。故漢志略而不書。唯鄆郡至武帝始改名丹陽。故志稱故鄆郡。明乎非秦亦非漢也。陳項初起之日。漢未興而秦二世猶在。故亦可稱秦置。要不在三十六郡之內。苟知秦本無四十郡。則裴駟之謬。不辨自明。而諸家紛紛補湊。皆可以不必矣。執事以爲然乎否乎。幸詳示之。

又

宋志。南梁郡。睢陽縣所治。卽二漢晉壽春縣。後省。僕向疑太元收復以後。僑立梁郡。不更立淮南郡。與壽春縣。執事以爲淮南南梁二郡。晉末當竝立。其并合實在永初以後。今檢劉敬宣傳。義熙五年。出督淮西。其結銜云。淮南安豐二郡太守。梁國內史。則其時尙有淮南郡。有郡則必有所領之縣。僕向所疑。今乃豁然。執事之益我良多矣。至謂二郡之合。在宋永初以後。則恐未然。攷義熙八年。土斷揚豫。見謝晦傳是年。向靖戍壽陽。傳稱安豐汝陰二郡太守。梁國內史。不云淮南太守。是淮南已并入梁郡。不待永初也。蓋其時割丹陽之于湖縣爲淮南郡境。志稱晉末卽義熙八年也因割壽陽縣爲梁郡實土。而淮南郡移於江南。壽陽不復爲縣矣。晉宋時。刺史鎮戍之地。若姑孰懸瓠礪礪滑臺之類。皆非縣名。但言鎮壽陽。不足以爲置縣之證。

此页空白

潛研堂文集卷三十六

書四

與戴東原書

孫愐唐韻序稱前後總加四萬二千三百八十三言。今檢廣韻卷首云凡二萬六千一百九十四言。廣韻本於唐韻。不應廣韻所收之字轉倍於唐韻。若然則雍熙之所修者當云刪韻。不當云廣韻矣。意孫愐序所云增加者兼注中字而言。邵長蘅遽謂孫愐增字至四萬有奇。似可未信。惟高明示之。

與謝方伯論平水韻書

某向有所疑。茲願聞於典謁者。近儒論韻學者皆謂今韻二百六部。併爲一百七部。始於平水劉淵。今案劉淵壬子新刊禮部韻略。不見於欽定四庫書目。惟邵長蘅古今韻略卷首歷敘所見韻書。曾載之。然某五十年來。徧訪南北藏書家。俱無有著錄者。獨吳門黃孝廉家有平水新刊韻略五卷。係元刊本。前載河間許古序。乃知爲平水王文郁所撰。序末題正大六年己丑。則金哀宗年號也。於宋爲紹定二年。其時金猶未亡。至淳祐壬子。則金亡已久矣。己丑在壬子前二十四年。淵所刊者。殆卽文郁之本。或失其序文。而

讀者誤以爲淵所作耳。黃公紹韻會敘例，並舉江南毛晃、江北劉淵兩家，而每部增字於毛，則云毛氏韻增於劉，則云平水韻增。然則劉淵乃刊平水韻之人，而後人乃以平水屬之劉淵，毋乃誤耶？且使淵而果宋人也，在稍通古今者，豈有慕於元海之名而效之耶？惟坊賈鑄工，未嘗學問，乃無足怪耳。然某究以未見劉書，不敢決其然否。浙中博洽之彥，多在閣下幕府，試一爲咨訪，順風之呼，或可得此書下落，以訂向來沿習之譌，幸閣下留意焉。

與談階平書

昨見足下讀論語一篇，引釋文屢空力從反，疑空有龍音。予按廣韻集韻三鍾部，俱不收空字，古書亦無讀空爲龍者。此必傳寫之譌。檢毛詩釋文，屢盟削屢婁豐，皆音力住反，乃悟力從本力住之譌。陸氏爲屢音，不爲空音也。屢空之空，古人皆讀平聲。李頎詩：數年作吏家屢空。誰道黑頭成老翁。王安石詩：五噫尙與時多忤。一笑兼忘我屢空。此其明證。李壁注介甫詩，引論語屢空注：空，匱也。空苦縱切。今作平聲用。季章未攷唐人詩，故疑介甫誤讀。然亦可證宋時讀論語屢空字爲去聲矣。空讀去聲，當爲苦貢切。而李云苦縱切，則又昧於東冬送用之別。胡炳文四書通音，空爲力縱切，尤謬。蓋惑於釋文誤本，又泥於當讀去聲，輒改從爲縱，而不知力與空非雙聲，不能成切也。孟子空乏其身，孫宣公無音，則孫亦不讀爲去聲。朱文公於論語屢空，孟子空乏，俱未有音，則亦讀平聲。文公與季章同時，猶能守古音，勝於季章多矣。

蒼孫淵如觀察書

得四月六日手教。并示蒼江處士書稿。所云西法每事必與古聖相反。誠切中歐邏巴之病。至論中星斗柄之同異。則僕非專門。不敢措一詞。僕近日好言輿地。不言象緯。以目眊夜不能見星。知於此事無緣耳。史記十二諸侯年表。始共和元年。終敬王四十三年。今刊本有庚申及甲子字。足下斷以爲史遷正文。詆古人不以甲子紀元之說。僕思之。恐有未安。古術百四十四年而超一辰。則共和元年。必不直庚申。東漢以後術家。不用超辰。徐廣晉人。以共和之初爲庚申。固無足怪。但不可以誣史公耳。太陰太歲之辨。尊見旣與鄙意不合。僕今亦不復言。各尊所聞。聽後賢決其然否。獨於此猶復饒舌者。則以六國表。周元王元年。徐廣曰乙丑。秦楚之際。月表。秦二世元年。徐廣曰壬辰。後兩表之干支。皆徐所注。則此表之干支。必出於徐無疑也。其最上列干支一格。殆宋以後校刊者妄增。後兩表亦無之。攷徐注之例。惟於每王元年紀干支。此表弟一格。每十年輒書甲戌甲申甲午甲辰甲寅甲子字。顯係後人所爲。意在便於尋檢。不特非史公本文。并非徐意也。足下所言。將以取信士林。不當留此罅隙。故復陳芻言。以備采擇。

與馮星實鴻臚書

執事注蘇文忠公詩。正王施查三家之誤。而補其漏略。可謂豪髮無遺憾矣。施氏元本。春帖子在端午帖子之後。查本始易其次。以僕攷之。兩帖子皆元祐三年所進。是年閏在十二月。諺所云一歲兩頭春者也。

其正月已酉朔。據子由元日宿齋詩。今歲初辛日正三。明朝風氣漸東南。還家強作銀幡會。雪底蒿芹欲滿籃。是正月三日辛亥祈穀。四日壬子立春也。公於時已差禮部知貢舉。例當鎖院。故不及供帖子。其闕十二月十五日丁巳爲己巳歲之立春節。公次韻劉貢父春日賜幡勝詩。有臘雪強飛纔到地之句。此立春在臘月之證也。任注元祐三年戊辰作。正謂此詩作於戊辰臘月。非謂戊辰之春也。施氏編此詩於戊辰歲。木無差誤。查氏強作解事。移此詩於己巳卷首。并將春帖子移於端午之前。則真誤矣。劉貢父集中題云。呈子瞻沖元內翰。子開器資舍人執事。據許將傳。知成都府。元祐三年。再爲翰林學士。謂將於三年方旋京。未必立春時即在朝。疑任注有誤。僕攷東坡內制集。有元祐三年四月十九日宣詔。許內翰入院口宣。是則正月立春。許固未在朝列。若閏十二月立春。正與坡公同直。任注本無誤也。年譜先生生於景祐丙子十二月十九日。不見干支。執事亦疑而未決。僕以遼志朔攷證之。是年十二月實乙巳朔。則公生日當爲癸亥。施元之以爲壬戌者。殊未足信。伏惟詳察。

與邱艸心書

讀所作周因於殷禮二句題文。後大結有後世得天下必以征誅爲正之語。此本諸宜興儲中子文。僕初亦甚以爲然。今乃知其不可爲訓。殆明時士大夫欲尊崇其太祖。駕乎唐宋開創諸君之上。故有是論。儲氏習聞而不加察爾。攷唐虞三代皆封建之世。其土地人民。天子與諸侯共之。天子不甚尊。諸侯不甚卑。

處茅茨土階。食土簋土鏞。而以匹夫匹婦之飢溺爲己患。固未知有天下之足樂也。唐虞得舜禹而行禪讓。殷周遇桀紂而行征誅。當時皆知其非富天下。故不特舜禹爲聖人。卽湯武亦不可謂之非聖人也。自秦人廢封建爲郡縣。遂以天下爲天子私有。竭四海以奉一人。盡改古昔淳朴之俗。欲爲子孫萬世之利。迨其後嗣不肖。天怒人怨。豪傑之士。桀其亂而攘取之。其起于編戶者。則託征誅之名。其起于權臣者。則託禪讓之名。要其初皆因利桀便。尙詐力而違仁義。非有除暴安民之心也。其傳世短促者。姑置勿論。若漢唐宋明開國以後。規模整肅。粲然可觀。雖無濬哲欽明之德。實有安民和衆之功。則推之爲三代之下之賢君可也。奚必較量其起事之正否。而上下其手乎。世徒見禪讓者之悖于舜禹。遂疑征誅者之近于湯武。曾不思率土之濱。莫非王臣。以甕牖樞樞之子。而輒生覬覦神器之思。此王法之必不容者。而覲然自謂得其正乎。彼右漢明而左唐宋者。其亦昧于理矣。且卽以漢明兩代較之。秦楚仇敵之國。秦之滅楚。距陳勝起事。僅十有三年。沛公世爲楚人。背秦未爲不義。若明太祖。則自祖父以來。久入元版圖矣。不得以漢相例。就令有以解之。而與漢起事者。有陳勝項籍諸人。與明起事者。有韓林兒徐壽輝諸人。衆人逐鹿。而一人得之。將以一人爲正。衆人爲僞乎。抑并此衆人而皆得爲正乎。昔南巢墾野之役。未聞有與湯武爭王者。故婁敬張良。謂陛下得天下。與周異。漢祖未嘗以爲忤也。漢明之與唐宋。相去直伯仲間耳。何得正不得正之別哉。孔子言雖百世可知。蓋主三綱五常而言。至于易姓改物。變態非一端。聖人固不能

預知要亦不外此兩種窠臼。聖人雖惡曹馬之妄學舜禹，斷不喜張獻忠、李自成之妄學湯武也。儒者立言，當爲萬世生民慮，吾恐征誅之慘，更甚于禪讓，故不可以不辨。

荅嚴久能書

來教以漢書銅陽縣孟康音紂，不常有紅反字，引盧校經典釋文爲左證，旣明白矣。僕少壯時，聞故友吳山夫戴東原之言，謂孟康本音紂紅切，小顏謂音紂非是，及校漢書，卽用兩君緒論。晚歲讀抱經先生校本，其時攷異久經刊刻，是兩說者疑未敢決，故不復訂正，非有意護前也。足下引吾家廣伯說，謂東與尤侯聲近通用，則愚以爲未必然。古書一字可兼數音，未聞彼韻可合此韻。漢儒云某與某聲相近，特就一字之聲言之，卽六朝所謂雙聲也。雙聲與疊韻判然不同，奈何因一兩字聲偶相近，輒欲并其韻而通之乎？聲音本於文字，文相從者謂之正音，聲相借者謂之轉音，正音一而已，轉音則字或數音，正音如宗族昭穆雖遠，而實出一本，則引而同之，故喉舌唇齒音不同，而合爲一部，轉音如婚姻，夫之與婦，至親也，而婦之族不可以混夫之族，故音之轉，必清濁舒斂同位同等，乃可假借，其它同部之字，仍風馬牛不相及也。顧亭林論古音分部最有倫理，而毛大可妄爲通韻之說以攻之，夫使韻而可通，則亦不必言韻矣。卽以東鍾一類言之，東冬江也，陽庚也，清青也，蒸也，顧氏析爲四類，而毛通爲一部，旣泛濫而不可訓矣。依廣伯所舉，則與尤侯又聲近可通也，試引廣伯之例而通之，番禺之禺，轉爲魚容切，鬼容區卽鬼臾區也。

從與卽德惠戎讀如汝。是魚虞亦相近也。左傳晉伯宗。二傳作伯尊。莊子。導大窾。向秀讀窾爲空。是真文至元先亦相近也。書夔夔齊栗。卽史記之劬劬。封龍山亦作飛龍山。艤讀若宰。是支微灰亦相近也。以一二字之聲近而引以爲通用之例。古今尙有正韻乎。古音直如特。直九反。當讀如投之上聲。而紂紅反亦讀如同。卽謂孟康音紂亦取同之轉音。而非如廣伯聲近之例也。僕與廣伯素無一面。恨生前未與盡其同異。故敢復于足下。唯足下審之。

荅周松靄同年書

久未奉書左右。伏想撰述日富。道遠不獲追隨講席。聞所未聞。良深悵罔。大製十三經音略。於聲音清濁開合之理。剖析入微。唯是方音師授各殊。足下所指誤讀之字。敝鄉卽有未誤者。尺素不能飄縷也。前聞足下深詆亭林顧氏古音。而以吳才老叶韻爲善。私億足下尊崇考亭。不欲立異耳。今讀毛詩叶音補正一篇。於朱傳駁辨極多。卽以服叶蒲北反言之。扶服讀匍匐。經典既有明證。轉輕脣爲重脣。於字母亦無觸背。再以有狐候人六月諸篇證之。服與職德同韻。亦復何疑。而足下必改符弗反。以從本母。夫三十六母出于唐末。又在陸法言孫愐之後。足下旣知六朝後出之書。不可以繩三百篇。又何必以晚出之字母。繩三百篇耶。足下所譏于亭林者。特謂其不講字母。今才老與朱子。已不能免於訾議。則又何責乎亭林。此僕之所以不敢附和也。承索拙序。自媿才非元晏。不足以增太沖聲價。故遲回久之。無以下筆。伏唯垂

宥。

與程秀才誓

承以所著易源待正彙相示。僕於經義素非專門。先天無極之愷。尤所不解。今讀足下書。所謂欽其寶。莫能名其器者也。竊嘗思之。宣尼學易。但云可以無大過。其贊顏氏子曰。有不善。未嘗不知。知之。未嘗復行。聖賢學易。不過欲保此身。使無大過而已。小過雖聖人未敢自信爲必無也。故曰。震无咎者存乎悔。又曰。无咎者。善補過也。聖人唯自覺其有過而悔之。卽已不覺而人告之。亦恍然爲戒。卽悔卽改。此不遠復。无祇悔之所以元吉也。若夫亢而有悔。迷而終凶。雖聖人亦未如之何也矣。古之聖賢。求易于人事。故多憂患戒懼之詞。後之儒者。求易于空虛。故多高深窈妙之論。聖人觀易。不過辭變象占四者。今舍象占而求卦畫。又舍卦畫而求畫前之易。欲以駕文王孔子之上。自謂得千聖不傳之祕。由是自處至高。自信至深。謂已之必無過。且患人之言其過。辯論滋多。義理益昧。豈易之教固若是乎。此僕之所以不敢言易也。

潛研堂文集卷三十七

傳一

內大臣一等公諡忠勇佟公傳 史館作

佟國綱。滿洲鑲黃旗人。祖養正。太祖天命四年。由撫順來歸。六年。從征遼陽。以功授遊擊。世襲。駐朝鮮界之鎮江城。其年七月。中軍陳萬策潛通明將毛文龍。令別堡民詐稱兵至。大譟。城中驚擾。萬策乘亂執養正。殺其子豐年。及從者六十人。以叛。養正不屈。被害。雍正元年。贈太師。追封一等公。諡忠烈。父圖賴。一名盛年。襲遊擊。以軍功累加世職。至三等精奇尼哈番。官至兵部承政。定南將軍。固山額真。以太子太保致仕。卒。諡勤襄。圖賴生孝康章皇后。康熙十六年。推恩外戚。追封一等公。雍正元年。贈太師。國綱其長子也。狀魁梧。善騎射。初任一等侍衛。襲三等精奇尼哈番。擢正藍旗漢軍都統。襲父爵。一等公。授內大臣。都統如故。吳三桂之謀逆也。其子應雄在都下。立紅巾爲號。約日起事爲內應。事覺。命國綱統禁軍捕之。應雄伏誅。康熙十四年。察哈爾布爾尼叛。山西駐防蒙古多叛。逃出口者。以國綱爲安北將軍。鎮宣府。旣至鎮。宣布聖諭。整飭邊防。人心帖然。特以爲安。察哈爾平。召還京。仍以內大臣兼鑲黃旗漢軍都統。時議設漢

軍火器營復命統之。因定連環本柵之法。以教練焉。二十七年五月。與領侍衛內大臣索額圖。理藩院尙書阿爾尼等。使俄羅斯。議立薑界事。軍出瀚海。會厄魯特與喀爾喀搆兵道阻。乃召還。明年春。復出塞。抵色冷江。秋七月。及俄羅斯使臣費陶多爾等。會于牙克薩城下。遣人往返。議久不決。國綱語同事者曰。彼倚長江之險。且秋艸易枯。我軍難留。故遲時日。以要我也。如示遠人以誠。身履其地。彼計沮矣。卽日屯諸軍山上。從輕騎渡江。以要之。使臣色動。猶以未請命爲辭。國綱從容示之曰。我皇上體天地好生之心。懷及爾國。息兵便民。俾各安業。汝國亦仰體聖意。乃乞重望大臣能任事者。分立薑界。爲萬世永安計。今彈丸黑子之地。不敢自專。必待請而後行。是萬里奔命。窮年無已時也。使臣見其詞嚴正。不可奪。卒如命立薑界。振旅而還。二十九年。厄魯特犯邊。上命和碩裕親王福全爲撫遠大將軍。國綱以內大臣參贊軍務。率火器營爲前鋒。厄魯特聞大軍至。遣人詭稱議和。潛偵虛實。國綱詣中軍曰。彼以款我也。兵法無約而請和者。謂之謀。賊情叵信。必速戰。遂定戰期。八月己未朔。大軍列陣而前。賊于烏蘭布通。縛駝結陣。以待國綱。謂其部下曰。今日正男子報國揚名之秋。我與若。父子兄弟也。我不敢愛身而先之。爾曹其勉旃。遂先登。摧其駝陣。賊逃入林中。國綱麾兵獨進。大破其衆。國綱中烏鎗。歿于陣。是夕。厄魯特不能軍。翼日遁去。聖祖聞國綱薨。震悼。輟朝。遣內大臣賜金五千兩。暨鞍馬。櫬還之日。敕諸皇子郊迎。復諭曰。舅舅社稷重臣。爲國捐軀。朕甚愍焉。將親臨弔奠。國綱子孫族人。詣闕固辭。乃止。賜祭四壇。謚曰忠勇。御製碑文立。

于慕道。其略曰。爾賦性貞純。秉心淵塞。親居元舅。而敬以持身。位列上公。而謙能服物。入則虔共宿衛。出則筦領禁軍。迺者小醜構爭。近徇邊圉。三軍聲討。簡佐元戎。屬賊鋒之既挫。將棄壘以潛奔。爾猶擐甲直前。提戈獨進。銳志彌堅。金石壯氣。逾薄虹霓。誓掃陸梁。永清朔漠。豈期上將。遽殞師中。夫爾以肺腑之親。心膂之寄。秩崇望峻。勞久勳高。假令偕衆旋軍。亦可從容奏愷。而乃義存奮激。甘蹈艱危。人盡如斯。寇奚足殄。惟忠生勇。爾實兼之。其見褒美如此。長子鄂倫岱襲一等公。詔別賜拜他拉布勒哈番。加一拖沙喇哈番。令其第三子夸岱襲焉。雍正元年。敕立家廟。加贈國綱太傅。鄂倫岱仕至領侍衛內大臣。緣事正法。以夸岱襲一等公。卒。子那謨圖襲。鄂倫岱子補熙。漕運總督。介福。經筵講官。禮部左侍郎。兼翰林院掌院學士。初。養正之來歸也。例入漢軍。康熙二十七年。國綱上疏言。臣家本係滿洲。臣高祖達爾哈齊。貿易邊境。明人誘入開原。比太祖高皇帝遣使入明。臣叔祖修養性。備述家世。求使者代奏。卽蒙太祖諭云。朕福金修佳氏。塔本巴顏之女。爾修姓兄弟。分散入漢之故。朕知之久矣。及大兵克撫順。將臣族人。居佛阿拉之地。不加差使。臣叔祖得尙宗女。賜號施武里額駙。令與修佳氏之巴都里孟阿圖諸大臣。考訂支派。敘爲兄弟。臣家族籍旣明。請賜改隸滿洲。而同時正白旗漢軍內大臣和碩額駙華善。亦疏言。臣高祖布哈。原姓瓜爾佳氏。明成化閒。授建州左衛都指揮僉事。臣曾祖阿爾松阿。嘉靖閒。襲父職。臣祖石翰。移居遼東。臨卒。遺命諸子。立功以歸本國。及太祖高皇帝。兵取廣寧。臣父石廷柱。開城門歸順。太祖見而喜曰。此

我國人也。特賜御用鞍馬。太宗文皇帝知臣父本係滿洲。故命爲滿洲甲兵額眞。後又命爲統領漢軍額眞。累擢至一等伯。臣家世實係滿洲。事並下戶部。戶部議將國綱華善及族人改歸滿洲。仍留於漢軍旗下。修氏石氏二族文武官俱留見任。其編審冊內改稱滿洲。詔從之。其後敕修三朝國史。聖祖仁皇帝親定滿洲功臣百一十五人。國綱父圖賴及石廷柱並與焉。

都統贈一等伯傅公傳

史館作

傅清。滿洲鑲黃旗人。姓富察氏。父李榮保。內務府總管。追封一等公。傅清初由藍翎侍衛。遷三等待衛。除鑾儀衛雲麾使。乾隆元年。遷鑾儀使。二年。除正黃旗滿洲副都統。五年。出爲鎮守天津總兵官。未幾。仍授副都統。命駐西藏辦事。還京。復爲天津總兵官。十三年。遷古北口提督。十四年二月。調固原提督。十月。改授都統。與左都御史拉布敦同駐西藏。時西藏郡王朱爾墨特那木札爾潛蓄異志。與準噶爾相結。而謀害諸喇嘛。欲獨據其地。傅清密以狀陳奏。十五年十月。遂與拉布敦定計。誘朱爾墨特那木札爾至通司岡。稱奉上命。數其罪。誅之。逆黨羅卜藏札什等聞之。率衆數千。突入署內。放鎗礮。達賴喇嘛遣番僧救護。不得入。傅清中鎗。創甚。卽自盡。事聞。上召王公滿漢大臣諭之曰。從前頗羅鼐恭順。料理藏中事務。一切安帖。皇考加恩。由台吉封爲貝勒。伊感激我朝恩厚。彌益恪誠。朕卽位以後。封爲郡王。後因年力就衰。朕詢以孰堪爲嗣。伊奏稱長子輭弱。又已出家。次子朱爾墨特那木札爾。人尙強幹。能勝彈壓。因令其承襲。

迨伊奏事一二次以後。朕於其詞意之間。知非伊父居心可比。日後必生事端。諭駐藏大臣留心體察。傅清前經駐藏。爲伊等所敬服。遂令前往。且慮其勢孤。益以拉布敦。乃朱爾墨特那木札爾。心益狂悖。將伊長兄車布登圖害。誣以叛逆。又與達賴喇嘛素。有仇讐。旣戕其兄。遂欲害藏中不順伊之班第達等。其勢將延及達賴喇嘛。獨居其地。雄長一方。近遂將塘汛文書。禁絕不通。悖逆益著。傅清拉布敦。稔知其姦。摺請便宜從事。以絕後患。於十月初八日。奏到。朕以僅二大臣。孤懸絕域。未可輕舉。批令俟班第更換拉布敦到藏日。會同達賴喇嘛。及藏中大格隆等。明正其罪。以申國法。乃傅清等未及接到諭旨。卽于十月十三日。傳朱爾墨特那木札爾。到通司岡。加以誅戮。而傅清。拉布敦。旋爲伊屬下卓呢羅卜藏札什所害。總督策楞奏到。朕深爲憫惻。不覺涕零。因思傅清。拉布敦。若靜候諭旨遵行。或不至是。但朱爾墨特那木札爾。反形已露。倘不先加誅戮。傅清等亦必遭其荼毒。則傅清。拉布敦之先幾。籌畫。殲厥渠魁。實屬可嘉。非如霍光之誘致樓蘭而斬之也。夫臨陣捐軀。雖奮不顧身。然尙迫以勢所不得不然。如傅清。拉布敦。揆幾審勢。決計定謀。其心較苦。而其功爲尤大。以如此實心爲國之大臣。不保其令終。安得不倍加軫惜。邪。傅清。拉布敦。著加恩。追贈爲三等伯。入賢良祠。昭忠祠。春秋致祭。伊等子孫。給與一等子爵。世襲罔替。以示朕褒忠錄庸之至意。竝將伊二人爲國捐軀之大節。明白宣示。使天下共知其不得已之苦心。否則好事喜功者。借此二人爲口實。而事外無知之人。又有議其擅開邊釁。而仍邀國家如此厚恩者。朕豈肯令是

非倒置若此哉。十六年四月。復諭內閣曰。前駐藏都統傅清。左都御史拉布敦。因朱爾墨特那木札爾逆謀顯著。先事翦除。奮不顧身。忠誠卓越。俱已加恩贈卹。入祀賢良祠。昭忠祠。不知者或訾二人冒險邀功。且議朕爲酬庸過厚也。今據策楞班第等奏。朱爾墨特那木札爾自立名號。潛遣其心腹堅參札錫等。通款準噶爾。稱策旺多爾濟那木札爾爲汗。且求其發兵至拉達克地方。以爲聲援。幸值準夷內潰。所遣使人。回藏被獲。得其逆書。并餽獻諸物。是其陰蓄異志。勾結準夷。罪不容誅。設非二臣協力同心。決計先發。則其貽害藏地。將不可言。是二臣之心甚苦。而有功于國家甚大。應特建雙忠祠。合祀二人。春秋致祭。丕昭勸忠之典。

陳忠愍公家傳

公諱福。字箕演。其先江寧人。父尙智。明末官榆林副總兵官。以拒李自成戰歿。葬於寧夏衛。因占籍延綏。公少倜儻。有謀略。國初。以武舉從寧夏總兵官劉芳名麾下。勦香山賊有功。授守備。隸鑲藍旗都統李國翰麾下。攻階州。蒲城。諸路。皆有功。加游擊銜。尋授四川遵義鎮游擊。駐兵順慶。順治十五年。大兵入川。公以所部從。斬獲甚衆。加參將銜。康熙二年。巨盜劉二虎。郝搖旂。李來亨等。出沒楚蜀間。蹂躪居民。總督李國英。請會兵討之。公得檄。以次年春。從西安將軍傅哈禪出征。手斬劉二虎於天池寨。攻郝搖旂於黃艸坪。禽之。其秋八月。又從靖西將軍穆里瑪。追擊李來亨於茅麓山。來亨自燒死。餘黨殲焉。論偏裨功。公居

第一授三等輕車都尉世職。遷四川成都城守副將。會打箭爐苗寇警。總督蔡毓榮奏改夔州協副將。討平之。十年。攝重慶鎮總兵官事。十二年。擢陝西寧夏鎮總兵官。公入覲請訓。卽赴鎮任事。家屬尙留重慶。明年。逆藩吳三桂據滇南叛。四川亦應賊。吳逆素知公驍勇。遣使好言誘公。公斬其使以聞。賊乃劫公家。百口爲質。遣使誡公曰。不從者。一門無噍類矣。公慷慨謂僚友曰。吾志吞逆賊。豈爲妻子計耶。立斬之。遣弟壽賈書入奏。天子嘉公忠亮。知大義。擢陝西提督。仍領寧夏鎮事。授其弟奇參將。壽以廩膳生。特授寶應縣知縣。王輔臣者。平涼大帥。潛與賊應。據城以叛。攻陷定邊城。十四年春。詔公與總督哈占合兵取之。先是。寧夏兵被調征蜀。去者十六七。其留者多怯懦。莫敢前。公諭以忠義。申令將士。有不進者斬。卽日上馬啓行。三月。至靈武。分遣部下。復惠安。韋州。安定。三堡。親統兵與蒙古索諾木台吉軍。合圍花馬池。別遣兵略定遠。皆多所斬獲。賊朱龍以衆援花馬池。我軍邀擊之。賊以奇兵出我後。腹背受賊。我軍益奮。斬僞都司王一龍於陣。朱龍不能支。遁走。花馬池賊勢孤。乃下。六月。進復甄井。安邊諸砦。七月。揚威將軍阿彌達奏言。逆賊王輔臣。率精銳與秦州逃寇。屯聚平涼慶陽。依山爲固。請遣大將軍貝勒董鄂等。會平涼。而遣提督陳福。速取定邊固原。以斷其援。詔從之。公自花馬池進圍定邊。鑿濠四面以困賊。朱龍復自綏德來援。公遣將掩擊於沙家澗。生得朱龍父子。而定邊僞副將倪光德。亦爲其黨。脅乞降。卽斬光德。與龍父子軍前。王輔臣旣失定邊。乃乞撫以緩我師。朝廷察其詐。立遣將軍張勇赴秦州。會大將軍貝勒董鄂。

入平涼。而命公出固原夾擊之。八月。公進兵平遠。禽斬僞官二十有二人。捕首虜二千餘級。獲輜重器械無算。再進。斬僞參將陳啓元。遂奪其城。是月。又以舉王屏藩逆書。進公爵三等男。公謝。乞上提督印。專領寧夏鎮事。詔不允。九月。進兵固原。中衛副將賈從哲游擊張元經臨陣先退。公劾其罪。斬以徇於軍。議者或言公所部宜并力赴平涼。詔以問公。公奏言。若先趨平涼。則固原賊必乘間斷我糧道。非萬全之計。莫如先攻固原。挫其鋒銳。俾賊自顧不暇。然後留兵守固原。臣自以精兵會平涼。報可。公遂督師西進。屬歲暮大雨雪。公督進益急。暮抵惠安堡。下令五鼓會食。急趨固原城下。後者斬。是時賊將來降者多在軍中。潛誘軍士爲亂。夜半鼓譟入營門。衛士皆解散。公倉卒未持兵刃。遂薨於軍。時十二月二十二日也。事聞。天子震悼。命總督趙良棟按亂首。得參將熊虎等四人。皆斬以徇。追贈公爵。諡曰忠愍。賜檀香木爲首。以葬。加祭二壇。御製詩一軸。建祠寧夏。賜祀田十頃。俾家焉。賜世襲三等子。以公弟壽子世怡襲。超擢公弟奇爲天津總兵官。十八年冬。奇上疏言。臣兄福捐命疆場。妻子留蜀。生死未卜。乞詔征蜀諸將蹤跡。後三年。四川平。弟壽爲鴻臚寺少卿。復奏請入蜀。訪兄子。得之萬點山中。廬舍偪仄。壽號泣而入。夫人猶不肯。切告以故。乃大哭。呼其子世琳出。與壽相抱哭。左右與隸無不灑涕。壽還都。請以襲爵還世琳。上召見世琳。問以母子流離狀。世琳言。吳逆怨臣父。斬其使。殺臣家數十口。然終欲招致之。故繫臣母子重慶獄。重慶守鄭某知臣父必不附賊。陰釋之。臣出山後。聞鄭闔門自縊矣。臣母子潛伏山谷。草衣木食。經七八

年乃得復見天日。因免冠叩頭。泣下嗚咽不成聲。上憫歎久之。卽除直隸三屯協副將。歷古北口總兵官。鑾儀使。卒。子益嗣。三十六年。上西巡。駐蹕寧夏。遣大臣索常泰奠公墓。雍正八年。詔入祀昭忠祠。益由三等侍衛。出爲直隸固關參將。官至雲南。楚姚蒙景總兵官。卒。子大用嗣。今爲江南提督。論曰。昔新城王文簡公。典試入蜀。與公交。稱公爲儒將。越三年。而公以死節聞。夫儒者。明於大義之謂。雅歌投壺。輕裘緩帶。儒之末節耳。公身經百戰。所向無前。有英衛之風。及滇逆侏張。全蜀失守。平涼固原。皆爲賊巢。公以孤軍。介其閒。謀國忘家。累斬賊使。忠義之忱。炳如皦日。天子委以心膂。倚爲長城。費祿未備。乎郭循。桓侯竟隕。乎張達。哲人云亡。痛矣悲哉。然而恩賚重泉。賞延奕世。姓氏入名臣之傳。俎豆永昭。忠之祠。生榮死哀。公實兼之。夫衛霍功高。一再傳而失侯。而公之後嗣。皆能以功名自奮。豈非忠孝之門。必有餘慶。天道罔昭。昭可信邪。大昕與公會孫樹齋先生善。徵讀公家傳。爲敘次之。以志景仰之忱。俾百世之下。聞者興起焉。

文淵閣大學士兼禮部尙書王公傳

公諱揆。字藻儒。號顥庵。太倉州人。明建極殿大學士文肅公錫爵之曾孫。翰林院編修衡之孫。太常寺少卿時敏之第八子也。年十七。補博士弟子。康熙丙午。舉于鄉。庚戌。成進士。選庶吉士。孝感熊文端公爲館師。特器重公。與歸安孫編修在豐。有雙珠之目。散館。授翰林院編修。乞假歸省。丁生母沈太夫人憂。服闋。還朝。主乙卯山東鄉試。遷左春坊左贊善。乞假歸。居太常憂。喪葬如禮。服闋。補右贊善。充日講起居注官。

上以江浙人文之地。提學道不得人。改用翰林官。令九鄉會舉。由是吉水李公振裕。被命視學江南。而公得浙江。取士公明。浙人有窮通翁之謠。言所取皆寒士宿學而能文者也。報滿。擢翰林院侍講。三轉至侍讀學士。庚午。主順天鄉試。超遷內閣學士。甲戌殿試。充讀卷官。音吐闕朗。上傾聽不倦。及館選日。上御保和殿。故事。惟大學士侍殿上。餘皆立階下。特命公與同直學士三人入侍。咨詢人才。後遂以爲例。遷戶部侍郎。充經筵講官。時西安大同開捐例。因緣爲姦者多。公防檢有方。胥蠹斂手。筦寶泉局。不名一錢。轉吏部侍郎。首禁臨選。駁查臨掣買籤之弊。某織造之弟。以賄得南海令。公扣其缺曰。法自近始。吾不能散法。徇勢要也。江南十府糧道缺出。有候補監司武國檻者。欲得之。議官時人多屬意于武。公曰。此陞缺。非選缺也。班次一紊。後卽爲例。繫一人者小。繫銓政者大力。持不可抵暮。武以千金餽公。且訂後效。麾而去之。故香山令張令憲。父子死賊難。朝廷追卹予蔭。承蔭者其長孫進也。年滿咨部。部議歷年太久。恐有假冒。格不行。公昌言曰。令憲父子。以兩命博一蔭。今以年久黜之。教忠之謂何。乃與尙書澤州陳公侍郎崑山徐公別議。以上卒從公等議。御史鄭惟孜。以科場浮議。多出太學。疏請監生就試本省。毋留京師。九鄉初不然其說。惟孜再疏堅執。衆無以難。公曰。太學之設。三代以來。未之或廢。柰何以一時流弊。舉興賢育才之地而空之乎。鄭議竟寢。遷刑部尙書。先是各司定讞。不錄漢供。公言。本朝官制。兼設滿漢。欲其彼此參酌。今供詞俱非漢語。是非曲直。漢司官何由知之。若隨聲畫諾。漢官便爲虛設矣。令嗣後錄供。兼滿漢稿。

永爲例。是時州縣奸民多撫細事。赴部控訴。公言。朝廷設官有體。惟元惡大愆。司寇行法。其餘皆有司之事。非可越俎而代也。或虞旗人非州縣能制。則現設理事官。上之督撫監司。亦足彈壓。何至千百里外。掣對簿。大者淹斃牢狴。小者失業破家。而所爭止于簿物細故。非欽恤制刑之意也。乃請禁止。改工部尙書。轉兵部。又轉禮部。公任事日久。徧歷六曹。每蒞官。必告同事曰。某於公事。知無不言。言無不盡。言之而聽。固善。不聽。必愚見之誤也。亦不敢固執。然此爲事介兩可者言也。若確見其失。萬不可假借者。諸公自爲之。某不能唯唯聽命也。同列皆敬重公。事有不決。俟公一言乃定。是時士子以上六十萬壽。請開恩科。事下禮部。同列以舊例所無。難之。公曰。以萬年之聖主。當六旬之大慶。此豈有成例可援乎。若以糜費爲嫌。則民間家長生日。子孫僮僕。尙不惜出所有。招集賓客。矧富有四海。而區區計及於此。遂如所請。以上立命舉行。公在翰林。已負公輔之望。及爲六卿。眷注益渥。天下皆謂公且暮入相。而公回翔喉舌之地。垂二十年。淡泊恬退。夷險一節。上益以賢公。康熙五十一年。拜文淵閣大學士。兼禮部尙書。仍兼經筵講官。閣臣例不兼經筵。公在講幄久。敷陳得體。特有是命。國朝大學士兼經筵者。惟崑山桐城澤州。及公而四。通州增置倉廩。科臣奏請開捐。下內閣九卿議。公與安溪李文貞公。皆不畫題。而極陳捐納之弊云。臣每見鄉里童駮。一旦捐資。儼然民上。或分一縣之符。或擁一道之節。朝章國故。從未經心。官箴民隱。何曾注念。不惟濫觴名器。亦且爲累地方。宜禁止以塞僥倖之路。杜言利之門。特諭。所奏深合朕心。飭九卿再議。

明年八月主禮部會試其冬以疾請解開務御批卿但安心調養朕同事老臣漸少實不忍言明年春病稍愈卽入直得旨再加調養不必每日到閣五十七年孝惠皇太后升祔議者以孝康皇太后升祔已久欲位其次公曰皇上聖孝格天曩者太皇太后祔廟時不以躋孝端之上今肯以孝康躋孝惠之上乎議者不從公言上果以爲非是令改正焉五十八年元旦日食詔停止朝賀廷臣以交食一定之數不足爲災欲固請受賀公言聖人敬天無微不謹仰成君德正在此等乃止六十年三月以陳請建儲忤旨率長子奕清伏闕待罪凡五日詔奕清赴軍前效力而公仍留內閣公自以待罪之身不敢起視事其冬車駕自熱河回鑾公迎至石槽上遣內監慰問甚至明年元日諸大臣具摺上壽公亦未敢列名上還其摺令列公名乃奏翼日賜宴太和殿宴畢召入西煖閣賜坐慰勞尋詔視事如故公之忠直無它腸至是乃大白及聖祖升遐公宿閣中朝夕哭臨悲哀逾節病日劇輿歸第世宗御極之元年正月上疏乞休詔以原官致仕仍留京備顧問其禮遇如此公嘗言黃霸爲丞相勳名減於治郡時論者惜之吾受恩至深非奉行文書可以塞責故於預建國本陳奏至再至三觸冒九死而不悔又嘗密奏請減蘇松浮賦御史張建策請於浙江開礦公密疏乞禁止皆未嘗告人也及被譴日詔出公摺付內閣衆始知之素有人倫之鑒文臣如范時崇陳瓚朱軾李陳常武臣如穆廷枻杜呈泗皆公所薦舉後多知名楊編修繩武者公門下士也其言曰公風度端凝儀觀外朗左目有痣赤如丹砂由詞臣登宰輔皆出特簡不由援引外溫和而

內剛正。單寒後進。以文求謁。接之藹如。而要人炙手可熱者。屏勿與交。退食之暇。不廢絲竹。一面之知。或推食解衣予之。而脂膏之地。未嘗染指。世固有色厲內荏。言清行濁。寒士不能登其堂。而不免屈節于貴倖。故人不能分其惠。而不免受金于莫夜者。此公之罪人也。世以爲知言。公兩子。長奕清。詹事府詹事。次奕鴻。河南按察僉事。

內閣侍讀嚴道甫傳

嚴長明。字冬友。號道甫。江寧人。幼讀書。十行竝下。年十一。臨川李閣學紱。典試江南。聞其早慧。欲見之。因介熊編修本往謁。李隨舉子夏二字令對。卽應聲曰。亥唐。李大奇之。謂方侍郎苞。楊編脩繩武曰。此將來國器也。公等善視之。遂執經二人之門。及補縣學生。學使夢侍郎。以國士目之。侍郎知其貧。問所需。長明曰。貧乃士之常。聞廣陵馬氏多藏書。願得一席爲讀書計耳。因薦之。盧運使見曾。立延致之。是時。東南名士。多假館馬氏齋。長明虛心質難。相與上下其議論。遂博極羣書。乾隆二十七年。天子巡幸江南。長明以獻賦召試。特賜舉人。授內閣中書。甫任事。卽奏充方略館纂脩官。以書局在內廷。許懸數珠。中書在書局。得懸數珠。自此始也。一日。戶部奏賦役全書所載。雜項錢糧名目煩多。請并入地丁項下。內閣已票擬依議矣。長明言於劉文正公。統勳曰。雜項既經折色。卽爲正供。若并去其名目。異日如薪紅茶藥之類。更有需用。必復加徵。是重困民也。劉公曰。不圖後生有此讜論。卽令駁止之。因薦入軍機處行走。傳文忠公恆

亦器重之。樞廷有重難事，輒委決焉。嘗扈蹕木蘭，大雪中失橐駝，并所裝物，求之不獲。越一日，一人牽駝而至，且謝罪。問之，乃故軍機蘇拉。緣事遣配者，問何以知爲吾物？曰：軍機官披羊裘者，獨公一人。今篋無它裘，非公而誰？問既竊，何以復還？曰：恐公寒耳。勞以錢而遣之。上嘗問軍機章京中人才可用者，傅公對曰：人才可用者多，若有守有爲，可繼胡寶琮者，嚴長明一人耳。長明內直日久，諳悉典故，尤務持平允。雲南糧儲道羅源浩，虧銅廠銀萬一千兩，又分賠屬員汪大鏞銀一千兩，有旨加罰十倍，以一年爲限。逾限卽正法。羅已納正項十有一萬矣，仍有分賠六萬未完，而限垂滿。羅呈乞展限，詔下軍機大臣與刑部查辦。時劉文正公掌刑部，方主會試入闈，諸公相視，莫能決。適有行在宣諭軍機大臣事，長明卽詣貢院，搥鼓求見劉公，宣諭畢，因從容曰：羅觀察之限已迫，俟公出闈，恐無及矣。其所欠者，分賠屬員之項，昨見吏部檔，汪大鏞捐復，赴補直隸，屬員旣邀寬釋，且得官，而上司乃坐極刑，可乎？卽於袖中出請寬限稿，求畫押。劉公義而許之。長明出示諸公，列銜會奏，果奉俞旨，令汪大鏞分繳欠項，而羅得出獄矣。擢內閣侍讀，歷充通鑑輯覽一統志、熱河志纂脩官，長明於蒙古托忒、唐古特文字，一見便能通曉。嘗奉命直經呪館，更正繙釋名義。蒙古源流諸書，書成輒進秩焉。以父憂去官，尋丁母憂，哀毀過禮，免喪後，引疾不出。築室三楹，顏曰歸求艸堂。藏書三萬卷，金石文字三千卷，日吟咏其中。海內求詩文者，踵相接，從容應之，無倦色。嘗語學者曰：士不周覽古今載籍，不徧交海內賢俊，不通知當代典章，遽欲握筆撰述，縱使信今亦

難傳後其自命如此。畢中丞沅巡撫陝西，招至官齋，爲文字交，因得游太華，終南之勝，詩文益奇縱，所得金石刻益富。在秦中十載，撰次西安府志八十卷，漢中府志四十卷，皆詳贍有法。晚歲爲廬江書院院長，卒年五十七。生平著述有歸求艸堂詩文集、西清備對、毛詩地理疏證、五經算術補正、三經答問、三史荅問、淮南天文太陰解、文選課讀、文選聲類、尊聞錄、獻徵餘錄、知白齋金石類籤、金石文字跋尾、石經攷異、漢金石例、五岳貞珉攷、五陵金石志、平原石蹟表、吳興石蹟表、素靈發伏、墨緣小錄、南宋文鑑、奇觚類聚、八表停雲錄、養生家言、懷袖集、吳諧志。凡二十餘種。子觀晉，皆以讀書世其家。論曰：予友曹學士仁虎有言：政事可以文飾，惟文學不可假借。風節或激於一時而成，惟文學非積久不能致。予與侍讀交廿餘年，聽其議論，經緯古今，混混不竭，可謂閱覽博物文學之宗矣。同歲召詔得官者，歛程晉芳、魚門、上海趙文哲、損之、長洲吳泰來、企晉、上海陸錫熊、健男、彬彬爾雅，皆述作之選，盛矣哉。

此页空白

潛研堂文集卷三十八

傳二

嚴先生衍傳

嚴先生衍字永思嘉定人。明萬歷中補縣學生。與李流芳龔方中友善。時邑中諸名宿皆以詩文自名。先生獨專心古學。恥以詞華炫世。年四十有一。讀司馬溫公資治通鑑而好之。晨夕探索。至忘寢食。又以溫公著書意在資治。故朝章國政述之獨詳。而家乘世譜紀之或略。其於人也顯榮者多。而遺逸則略。方正者多。而節俠則略。丈夫者多。而婦女則略。乃援引正史及它書以補之。或補爲正文。或補爲分注。其補正文之例有二。有通鑑所已載。而事或闕而不周。文或簡而不暢。則逐節補之。有通鑑所未載。而事有關於家國。言有係於勸懲。則特筆補之。其補分注之例有三。一曰附錄。事雖可采。而或涉於瑣。或近於幻。故不入正文。一曰備攷。通鑑之所載如此。它書之所載如彼。雖兩不相合。而事屬可疑。故兩存之。一曰補注。胡身之注所未備。或有譌舛。則以己意釋之。其所取材。則十七史居十之九。稗官野史居十之一。而要以法戒爲主。其有關勸懲。雖小史必錄。苟無所取義。雖正史亦刪。要使學者欲攷興亡。則觀政於朝。欲知淳

薄。則觀風於野。欲樹宏猷。則法古人之大道。欲修細行。則拾往昔之餘芳。人無隱顯。道在者爲師。行無平奇。濟物者爲尙。蓋其自序如此。又謂周社雖滅。秦命未膺。昭襄雖強。不當遽以紀年。朱梁石晉之惡。浮於黃巢。周雖彼善於此。然北漢未亡。柴氏豈得臣之。故於周赧入秦之後。改稱前列國。五季迭興之世。改稱後列國。進蜀漢於正統。黜武氏爲附載。此又取紫陽綱目之義。以彌縫本書之闕者也。當時無通史學者。咸笑以爲迂。唯黃淳耀歎以爲絕倫。而談允厚爲之參校史傳。攷訂遺漏。先生嘗謂允厚曰。人之聰明。百倍於我者有之。才學千倍於我者有之。而不能成此書者。不如我之一也。子之一不如我。而聰明過我。我所以不可無子也。書成。允厚爲之序。且擿通鑑違失若干事。謂日食地震水旱蝗饑郊天祀廡行幸還宮。命相封王。皆通鑑所慎重而書者也。而漢以前缺者十之一。漢以後缺者十之三。宋孝武大明五年初立。馳道自閭闔門至朱雀門。又自承明門至元武門。所謂南北兩馳道也。及孝武崩。乃罷之。而通鑑但書罷。不書立。是爲無首。李憲據淮南稱帝。光武遣揚武將軍馬成擊之。圍憲於舒。建武六年。馬成拔舒。憲亡走。其軍士帛意斬憲而降。封帛意爲漁浦侯。通鑑於馬成拔舒。帛意斬憲事。闕而不書。是爲無尾。秃髮儁檀爲乞伏熾磐所滅。虜其太子虎臺。以虎臺妹爲后。其後熾磐后與虎臺謀殺熾磐。事露皆見殺。通鑑於晉義熙十年。已預書熾磐殺虎臺。至宋景平元年。又詳書之。豆盧欽望爲文昌右相。本在聖歷二年八月。而通鑑於神功元年八月。聖歷二年八月兩書之。其罷爲太子賓客。本在久視元年二月。而通鑑於聖歷元

年二月。久視元年二月。兩書之。聖歷元年十一月。始置控鶴監。吉頊與張易之。張昌宗皆爲控鶴監供奉。而通鑑於是年三月。便書頊與二張同爲控鶴監供奉。失其序矣。晉永和三年。趙麻秋攻枹罕。寧戎校尉張璩固守大城。太元元年。苻堅伐涼州。張天錫遣征東將軍掌據。率衆三萬軍於洪池。攷十六國春秋。與晉書載記。此二事本是一人之事。但載記作張璩。十六國春秋作常據。通鑑先書張璩。後書常據。而又譌常爲掌。名與姓俱歧矣。毛寶子穆之。小字虎生。而通鑑於建元二年書穆之。寶之子。於太和四年書虎生。寶之子。前稱名。後稱字。宋武陵王贊。小字智隨。而通鑑於泰始六年書智隨。其後又書贊。名與字相歧矣。晉咸和八年。書慕容皝遣庶弟建武將軍幼稚。討母弟仁於平郭。兵敗。幼稚爲仁所獲。至咸康二年。仁敗。則云慕容幼慕容稚皆東走。幼中道而還。是分一人爲二人。晉元興二年。姚興遣使者梁斐張構使沮渠蒙遜。而通鑑書秦遣使梁構至張掖。是合二人爲一人。宋元嘉七年。魏人攻拔虎牢。司州刺史尹沖死之。而通鑑謂沖與滎陽太守崔模降魏。且爲攷異以申之。謂崔模仕魏爲武陵男。宋書謂抗節者誤。夫宋書以模爲抗節。誠誤。至尹沖之死。則宋魏史有同辭。奈何因模而併誣沖乎。唐中宗崩。遺詔使相王旦輔政。韋濫與宗楚客欲韋后臨朝。議削相王輔政之語。蘇瓌正色拒之。曰。遺詔是先帝意。安可更改。濫楚客大怒。竟削之。瓌遂稱疾不朝。故睿宗卽位。下詔褒稱之。曰。頃者遺恩顧託。先意昭明。姦回動搖。內外危逼。獨申讜議。實挫邪謀。此瓌不從韋宗之證也。通鑑削去稱疾不朝四字。改云懼而從之。何其冤也。又如張

紘還吳迎家。道病卒。當在建安十七年。孫權徙治建業以後。而通鑑系於黃龍元年。徙都建業之下。亦爲失次。梁大寶元年。二月至四月。紀日干支顛倒。且有一月而再書丙午者。是不若紫陽氏盡去之之爲愈矣。其譏胡注之誤。如晉孝武嗜酒。流連內殿。醒日旣少。通鑑譌作醒治。而注卽云醒而治事之日少。是不考晉本紀也。北齊幼主禪位於任城王湝。自稱守國天王。通鑑譌守國爲宋國。而注云齊猶未亡。不應遽改國號。宋當是宗國。是不考北齊書也。周宣帝問鄭譯曰。我脚杖痕。誰所爲也。譯曰。事由烏丸軌。宇文孝伯。因言軌捋鬚事。胡誤以事由烏丸軌爲句。宇文孝伯屬下讀。因注云。孝伯何出此言。是誣孝伯也。先生與允厚。於史學皆實事求是。不肯妄下雌黃。其所辯正。皆確乎不可易。宋季元明儒家。好讀綱目。如尹起莘。劉友益。王幼學。徐昭文輩。皆淺陋迂腐。雖附綱目以傳。轉爲本書之累。其有功於通鑑者。胡身之而後。僅見此書耳。

閻先生著璩傳

先生諱若璩。字百詩。先世居太原縣西寨邨。五世祖始居淮安。祖世科。萬曆甲辰進士。布政司參議。父修齡。郡學生。先生少口吃。入小學。讀書千遍。猶未熟。同輩咸歎其鈍。年十五。冬夜讀書。有所礙。憤悻不肯寐。漏四下。寒甚。堅臥沈思。心忽開朗。自是穎悟異常。是歲補學官弟子。一時名士。如李太虛。方爾止。王于一。杜于皇輩。皆折輩行與交。覃究經史。深造自得。嘗集陶貞白。皇甫士安語題其柱云。一物不知。以爲深恥。

遭人而問。少有寧日。其立志如此。年二十。讀尚書至古文二十五篇。卽疑其僞。沈潛三十餘年。乃盡得其藏結所在。作尚書古文疏證八卷。其最精者。謂漢藝文志言魯共王壞孔子宅。得古文尚書。孔安國以考二十九篇。得多十六篇。楚元王傳亦云逸書十六篇。天漢之後。孔安國獻之。古文篇數之見於西漢者如此。而梅賾所上。乃增多二十五篇。此篇數之不合也。杜林馬鄭皆傳古文者。據鄭氏說。則增多者。舜典。汨作。九共。大禹謨。益稷。五子之歌。胤征。典寶。湯誥。咸有一德。伊訓。肆命。原命。武成。旅獒。冏命。凡十六篇。而九共。有九篇。故亦稱二十四篇。今晚出書無汨作。九共。典寶等。此篇名之不合也。鄭康成注書序。於仲虺之誥。太甲。說命。微子之命。蔡仲之命。周官。君陳。畢命。君牙。皆注曰亡。而於汨作。九共。典寶。肆命等。皆注曰逸。逸者。卽孔壁書也。康成雖云受書於張恭祖。然其書贊曰。我先師棘下生子安國。亦好此學。則其淵源於安國明矣。今晚出書。與鄭名目互異。其果安國之舊耶。又云。古文傳自孔氏。後惟鄭康成所注者。得其真。今文傳自伏生。後惟蔡邕。石經所勒者。得其正。今晚出書。昧谷。鄭作柳谷。心腹腎腸。鄭作憂腎陽。劓。則劓。剝。鄭作臄。宮。劓。割。頭。庶。剝。與真古文既不同矣。石經殘碑遺字。見於洪造隸釋者。五百四十七字。以今孔書校之。不同者甚多。碑云高宗之饗國百年。與今書之五十有九年異。孔敍三宗。以年多少爲先後。碑則以傳序爲次。則與今文又不同。然後知晚出之書。蓋不古不今。非伏非孔。而欲別爲一家之學者也。班孟堅言。司馬遷從安國問故。故堯典。禹貢。洪範。微子。金縢諸篇。多古文說。許慎說文解字。亦云其稱書孔氏。

今以史記說文與晚出書相校。又甚不合。安國注論語。予小子履。以爲墨子引湯誓。其辭若此。不云此出湯誥。亦不云與湯誥小異。然則予小子履云云。非真古文湯誥。蓋斷斷也。其注雖有周親不如仁人句。於論語則云親而不賢不忠則誅之。管蔡是也。仁人謂箕子微子。來則用之。於尙書則云。周至也。言紂至親雖多。不如周家之少仁人。其詮釋相懸絕如此。此豈一人之手筆乎。又云。古未有夷族之刑。卽苗民之虐。亦祇肉刑止爾。有之。自秦文公始。僞作古文者。偶見荀子有亂世以族論罪。以世舉賢之語。遂竄之泰誓篇中。無論紂惡不如是甚。而輕加三代以上。以慘酷不德之刑。何其不仁也。荀卿曰。誥誓不及五帝。司馬法言有虞氏戒於國中。夏后氏誓於軍中。殷誓於軍門之外。周將交刃而誓之。當虞舜在上。禹縱征有苗。安得有會羣后誓師之事。此亦不足信也。司馬法曰。入罪人之地。見其老弱。奉歸無傷。雖遇壯者。不校勿敵。敵若傷之。藥醫歸之。三代之用兵。以仁爲本如此。安得有火炎崑岡。玉石俱焚之事。旣讀陳琳檄吳文云。大兵一放。玉石俱碎。鍾會檄蜀文云。大兵一發。玉石俱碎。乃知其時自有此等語。則此書之出魏晉間。又一佐也。又云。武成篇先書一月壬辰。次癸巳。又次戊午。已是月之二十八日。復繼以癸亥甲子。是爲二月之四日五日。而不冠以二月。非今文書法也。洛誥稱乙卯。費誓兩稱甲戌。此周公伯禽口中之詞。指此日有此事云爾。豈史家紀事之例乎。又云。書序。益稷。本名棄稷。馬鄭王三家本皆然。蓋別是一篇。中多載后稷與契之言。揚子雲法言孝至篇云。言合稷契之謂忠。謨合臯陶之謂嘉。子雲親見古文。故有此言。晚

出書析臯陶謨之半爲益稷。則稷與契初無一言。子雲豈鑿空者邪。其辯孔傳之僞云。三江入海。未嘗入震澤。孔謂江自彭蠡分而爲三。共入震澤者。謬也。金城郡。昭帝所置。安國卒於武帝時。而傳稱積石山在金城西南。豈非後人作僞之證乎。傳義多與王肅注同。乃孔竊王非先有孔說。而王取之也。漢儒說六宗者。人人各異。魏明帝詔令王肅議。肅乃取家語孔子曰。所宗者六。以對。肅以前未聞也。而僞傳已有之。非孔竊王而何。康熙元年。始游京師。尙書龔公鼎孳爲之延譽。由是知名。旋改歸太原故籍。爲諸生祭酒。崑山顧先生炎武游太原。以所撰日知錄相質。卽爲改訂數條。顧虛心從之。十七年。應博學宏詞科試。不第。在都門。與汪編修琬交。汪著五服考異成。先生糾其謬數條。汪意不懌。謂人曰。百詩有親在。而喋喋言喪禮可乎。先生應之曰。王伯厚嘗云。夏侯勝善說禮服。謂禮之喪服也。蕭望之以禮服授皇太子。則漢世不以喪服爲諱也。唐之姦臣。以凶事非臣子所宜言。去國恤一篇。識者非之。講經之家。豈可拾其餘唾乎。徐尙書乾學。因問於經。亦有徵乎。先生曰。按雜記。曾申問於曾子曰。哭父母有常聲乎。申。曾子次子也。檀弓。子張死。曾子有母之喪。齊衰而往哭之。夫孔子歿。子張尙存。見於孟子。子張死。而曾子方喪母。則孔子時。曾子母在可知。記所載曾子問一篇。正其親在時也。徐大歎服。卽邀至邸。延爲上客。每詩文成。必屬裁定。曰。閻先生學有師法。非吳志伊輩可望。合肥李公天馥。亦言詩文不經百詩勘定。未可輕易示人。及徐公奉敕修一統志。開局洞庭山。旣又移嘉善。復歸崑山。先生皆預其事。先生於地理尤精審。凡山川形勢。州

郡沿革瞭若指掌。嘗曰：孟子言讀書當論其世。予謂并當論其地。少讀孟子書，疑滕定公薨，使然友之鄒。問孟子何緩不及事，及長大親歷其地，乃知故滕國城在今縣西南十五里，故邾城在今鄒縣東南二十六里，相去僅百里，故朝發而夕至，朝見孟子，而暮即反命也。因撰四書釋地四卷，釋地餘論若干篇。又據孟子七篇，參以史記諸書，作孟子生卒年月考一卷。嘗言孔門從祀，顏曾之外，當廣爲十二哲。德行三人，閔子騫、冉伯牛、仲弓，言語三人，宰我、子貢、有若，政事三人，冉有、季路、公西華，文學三人，子游、子夏、子張。以論語孟子證之，確不可易。又謂先儒以大學傳文出於曾氏門人之手，但見誠意章引曾子說，謂古者弟之於師，方稱子耳，不知禮記四十九篇稱曾子者一百一，爲曾申，餘皆曾參。則是記禮者之通稱，不必弟子謂其師。若謂大學止一引，與它篇屢引者不同，則禮器內則亦止一引，豈二篇亦曾子門人作乎？孟子七篇於孔門高弟，或名之，或字之，或子之，而稱曾子者二十二，益驗其爲通稱也。又言檀弓載季武子之喪，曾點倚其門而歌一事，爲記者之妄。春秋昭公七年，季孫宿卒，孔子年十七，曾點少孔子若干歲，雖不可知。然論語叙其侍坐，次于子路，則必少於子路矣。孔子年十七時，子路甫八歲，點不過六七歲童子，烏有倚國相之門，臨喪而歌之事乎？又嘗舉朱氏論語孟子集注之誤，如季文子始專魯政，不待武子，子糾兄而非弟，曾西子而非孫，武丁至紂凡九世，而非七世，昭陽敗魏，取八邑，而非七邑，不衣冠而處，見說苑，非家語，農家者流，見漢書，非史遷，去魯司寇，則適衛而非適齊，滅夏后相，則寒浞而非羿，敬叔弟也，非懿

子之兄。顯與近也。非遠人之謂。魯有少施氏。則孟施當亦其氏。不當以施爲語聲。聞者歎其精確。世宗皇帝在潛邸。聞其名。手書延至京師。握手賜坐。呼先生而不名。日索觀所著書。每進一篇。未嘗不稱善。疾革。請移就外。留之不可。乃以大牀爲輿。上施青紗帳。二十人舁之出。安穩如牀簣。不覺其行也。卒年六十有九。時康熙四十三年六月八日。世宗遣使經紀其喪。親製挽詩四章。復爲文祭之。有云。讀書等身。一字無假。孔思周情。旨深言大。僉謂非先生不能當也。平生長於考證。遇有疑義。反覆窮究。必得其解。乃已。嘗語弟子曰。曩在徐尙書邸夜飲。公云。今晨直起居注。上問古人言使功不如使過。此語自有出處。當時不能答。予舉宋陳良時有使功不如使過論。篇中言秦伯用孟明事。但不知此語出何書耳。越十五年。讀唐書李靖傳。高祖以靖逗留。詔斬之。許紹爲請而免。後率兵破開州蠻。俘禽五千。帝謂左右曰。使功不如使過。果然。謂卽出此。又越五年。讀後漢書獨行傳。索廬放諫。更始使者勿斬。大守曰。夫使功者不如使過。章懷注。若秦穆公赦孟明而用之。霸西戎。乃知全出於此。甚矣。學問之無窮。而人尤不可以無年也。子詠亦能文。

胡先生渭傳

先生諱渭。初名渭生。字肫明。世爲德清人。曾祖友信。明隆慶戊辰進士。廣東順德縣知縣。所謂思泉先生也。父公角。天啓甲子舉人。先生年十二而孤。母沈攜之避寇山谷間。十五爲縣學生。試高等。充增廣額。屢

赴行省試。不得售。乃入太學。嘗館益都馮相國邸。篤志經義。尤精於輿地之學。崑山徐尙書乾學奉詔修一統志。開局洞庭山。延請常熟黃儀子鴻。無錫顧祖禹景范。山陽閻若璩百詩。及先生分纂。因同縱觀天下郡國之書。先生素習禹貢。謂漢唐二孔氏。宋蔡氏。於地理多疏舛。如三江當主鄭康成說。庾仲初之言。不可以釋禹貢。浮于淮泗達于河。河當從說文作荷。滎波既豬。波當從鄭康成本作播。梁州之黑水。與導川之黑水。不可溷而爲一。乃博稽載籍。及古今經解。考其同異而折衷之。依經爲訓。章別句從。名曰禹貢錐指。凡二十卷。爲圖四十七篇。於九州山川形勢。及古今郡國分合同異。道里遠近夷險。犁然若聚米而畫沙也。漢唐以來。河道遷徙。雖非禹貢之舊。要爲民生國計所繫。故於導河一章。備考歷代決溢改流之跡。且爲圖以表之。其留心經濟。異於迂儒不通時務者遠矣。嘗謂詩書禮春秋。皆不可無圖。惟易無所用圖。六十四卦二體六爻之畫。卽其圖也。八卦之次序方位。則乾坤三索。出震齊巽二章盡之矣。安得有先後天之別。河圖之象。自古無傳。何從擬議。洛書之文。見於洪範。五行九宮。初不爲易而設。作易圖明辨十卷。又言洪範古聖所傳。漢儒專主災異。以替史矯誣之說。亂彝倫攸斁之經。害一洛書之本文。具在洪範。宋儒靚爲黑白之點。方員之體。九十之位。且謂範之理通於易。劉牧以九爲河圖。十爲洛書。蔡元定兩易其名。害二。洪範元無錯簡。後儒任意改竄。移庶徵。王省惟歲以下。爲五紀之傳。移皇極。斂時五福。至作汝用咎。及三德。惟辟作福以下。爲五福六極之傳。害三。作洪範正論五卷。又作大學翼真七卷。言格物致知。

之義釋在邦畿章內。本無闕文。無待於補。皆卓然有得。非異趣以爲高者。康熙四十三年。聖祖仁皇帝南巡。先生撰平成頌一篇。并禹貢。雖指獻諸行在。有詔嘉獎。召至南書房直廬。賜饌。御書者年篤學。四大字。賜之。儒者咸以爲榮。甲午歲正月九日卒於家。年八十有二。從子會恩。從先生學。由進士及第。官至刑部尙書。孫彥穎。翰林院編修。

萬先生斯同傳

萬先生斯同。字季野。鄞人。高祖表。明都督同知。父泰明。崇禎丙子舉人。鼎革後。以經史分授諸子。各名家。先生其少子也。生而異敏。讀書過目不忘。八歲。在客座中。背誦揚子法言終篇。不失一字。年十四五。取家所藏書。徧讀之。皆得其大意。餘姚黃太沖寓甬上。先生與兄斯大。皆師事之。得聞鼓山劉氏之學。以慎獨爲主。以聖賢爲必可及。是時甬上有五經會。先生年最少。遇有疑義。輒片言析之。束髮未嘗爲時文。專意古學。博通諸史。尤熟於明代掌故。自洪武至天啓實錄。督能闡誦。尙書徐公乾學聞其名。招致之。其撰讀禮通考。先生預參定焉。會詔修明史。大學士徐公元文爲總裁。欲薦入史局。先生力辭。乃延主其家。以刊修委之。元文罷。繼之者。大學士張公玉書。陳公廷敬。尙書王公鴻緒。皆延請先生。有加禮。先生素以明史自任。又病唐以後設局分修之失。嘗曰。昔遷固才旣傑出。又承父學。故事信而言文。其後專家之書。才雖不逮。猶未至如官修者之雜亂也。譬如入人之室。始而周其堂。寢。憂。溷。繼而知其蓄產禮俗。久之。其男

女少長。性質剛柔。輕重賢愚。無不習察。然後可制其家之事。若官修之史。倉卒而成於衆人。不暇擇其材之宜。與事之習。是猶招市人而與謀室中之事也。吾所以辭史局而就館總裁所者。惟恐衆人分操割裂。使一代治亂賢姦之迹。暗昧而不明耳。又曰。史之難言久矣。非事信而言文。其傳不顯。李翱曾鞏所譏。魏晉以後。賢姦事迹暗昧而不明。由無遷固之文是也。而在今則事之信尤難。蓋俗之偷久矣。好惡因心。而毀譽隨之。一家之事。言者三人。而其傳各異矣。況數百年之久乎。言語可曲附而成。事迹可鑿空而搆。其傳而播之者。未必皆直道之行也。其聞而書之者。未必有裁別之識也。非論其世知其人。而具見其表裏。則吾以爲信。而人受其枉者多矣。吾少館於某氏。其家有列朝實錄。吾讀而詳識之。長游四方。就故家長老求遺書。考問往事。旁及郡志邑乘。雜家誌傳之文。靡不網羅參伍。而要以實錄爲指歸。蓋實錄者。直載其事與言。而無所增飾者也。因其世以考其事。覈其言。而平心察之。則其人之本末。十得其八九矣。然言之發。或有所由。事之端。或有所起。而其流。或有所激。則非它書不能具也。凡實錄之難詳者。吾以它書證之。它書之誣且濫者。吾以所得於實錄者裁之。雖不敢謂具可信。而是非之枉于人者鮮矣。昔人于宋史。已病其繁蕪。而吾所述。將倍焉。非不知簡之爲貴也。吾恐後之人。務博而不知所裁。故先爲之極。使知吾所取者有可損。而所不取者。必非其事與言之真。而不可益也。建文一朝。無實錄。野史因有遜國出亡之說。後人多信之。先生直斷之曰。紫禁城無水關。無可出之理。鬼門亦無其地。成祖實錄稱建文闔宮自焚。

上望見宮中煙起。急遣中使往救。至已不及。中使出其屍于火中。還白上。所謂中使者。乃成祖之內監也。安肯以后屍誑其主。而清宮之日。中涓嬪御。爲建文所屬意者。逐一毒考。苟無自焚實據。豈肯不行大索之令耶。且建文登極二三年。削奪親藩。曾無寬假。以至燕王稱兵。犯闕。逼迫自殞。即使出亡。亦是勢窮力盡。謂之遜國可乎。由是建文之書法。遂定在都門十餘年。士大夫就問無虛日。每月兩三會。聽講者常數十人。於前史體例。貫穿精熟。指陳得失。皆中肯綮。劉知幾鄭樵諸人。不能及也。馬班史皆有表。而後漢三國以下無之。劉知幾謂得之不爲益。失之不爲損。先生則曰。史之有表。所以通紀傳之窮。有其人已入紀傳而表之者。有未入紀傳而牽連以表之者。表立而後紀傳之文可省。故表不可廢。讀史而不讀表。非深于史者也。康熙壬午四月卒。年六十。所著歷代史表六十卷。紀元彙考四卷。廟制圖考四卷。儒林宗派八卷。石經考二卷。皆刊行。又有周正彙考八卷。歷代宰輔彙考八卷。宋季忠義錄十六卷。六陵遺事一卷。庚申君遺事一卷。羣書疑辨十二卷。書學彙編二十二卷。崑崙河源考二卷。河渠考十二卷。石園詩文集二十卷。予皆未見也。乾隆初。大學士張公廷玉等。奉詔刊定明史。以王公鴻緒史稿爲本。而增損之。王氏稿大半出先生手也。

陳先生祖范傳

陳先生祖范。字亦韓。自號見復。常熟人。少習舉業。有師法。年廿三。補縣學生。歲科試。輒占高等。弟子著錄

者日衆。雍正元年，黃侍郎叔琳典試江南，中式皆一時名士。先生與嘉定張公鵬翀、宜興任公啓運、當塗徐公文靖、才尤高。試文傳誦徧海內。其秋，試禮部中式。鄉先達有欲翼而起之者，忽足蹇不得預殿試。歸里。明年補行正科，當赴廷對。親朋皆力勸之。先生曰：吾少無溫飽之心，徒勞苦奚爲者？及今尙可止。過此則義不當止，勢又不得自止矣。於是儼屨華匯之濱，槌戶讀書。生徒裹糧相從，與吟社諸老倡和。月一讌集，居數年。有詔天下設書院以教士，諸大吏聞先生通儒，爭先延請爲師。先生勉應之。在蘇州紫陽書院三年，訓課有法。士子至今思之。又主徐州之雲龍、安慶之敬敷、揚州之安定。或一年，或二年，輒辭去。曰：士習難醇，師道難立。且此席似宋時祠祿，仕而不遂者處焉。吾不求仕，而久與其列，爲汗顏耳。乾隆十五年，天子崇尚經術，特詔內外大臣薦舉經明行修之士。於是雅知先生者，交章列薦。明年，上命閣部大臣於所舉中核其實。允孚者得四人。先生裊然居首。其三人，則無錫顧棟高、金匱吳鼎介、休梁錫璵也。得旨皆授國子監司業。先生與顧公以年老不任職，卽家拜受新命。朝野咸以爲異數云。又三年卒於家。年七十有九。所撰述有經咫一卷、文集四卷、詩集四卷、掌錄二卷。先生於學務求心得，不喜馳騁其說。與古人爭勝，尤恥勦襲成言，以爲己有。蓋合於論語之君子儒焉。其論易不取先天之學，謂易本隱以之顯，學易者務舍顯而求隱，未求文字先觀圖象。且帝出乎震一節，方位顯然，以數往知來爲先天圖之注脚。未免牽合。儒者於經所無則信之，於經所明言則疑之，何也。論詩謂朱子不信小序，是其謹慎處，亦卽其師心。

自用處詩之體格。古今不同。作詩之故。亦古今不同。古時君民朝野。不若後代之闊絕。指陳時事。諷切宮闈。不若後代之忌諱。朱子以後代詩人之習。上觀三百篇。故於小序。覺其迂闊牽強而難信也。謂論語賢賢易色。主夫婦而言。賢賢如關雎之窈窕淑女。君子好逑。車蓋之辰。彼碩女。令德來教。好德非好色。故云易色也。造端夫婦。道理甚大。若賢人之賢。交友一倫。已包之矣。又言世俗有非禮之禮。三承重也。繼嗣也。葬服也。古者人子有爲父後。不爲父後之分。漢時詔令。尙云賜爲父後者。爵一級。爲後者。承爵祿。奉宗祀。而傳之以重者也。應爲後之子亡。則適孫承之。而謂之承重。今士大夫不世爵。旣無重可傳。而漫於喪訃。立長孫承重之條。遂駕名諸父之前。禮果然乎哉。古之爲人後者。後其繼別之宗耳。宗不可絕。是以後之。若餘人無子。不皆立後。其資財入宗子之家。以宗子祭無後故也。自宗法廢。而收族之道亡。資財無所入。勢必立其近屬。以奉祭祀。然風俗澆薄。無資財者。委而去之。稍有絲粟之貽。卽攘臂而爭。此禮所稱與爲人後者。與賁軍之將。亡國之大夫。同其可恥者也。古之葬有常期。過期而不能葬。則主喪者不除。唯改葬則總者。不可以無服。送至親也。今葬無常期。遠者至一二十年。爲子者不能守。未葬不除之禮。卽吉已久。忽焉返其初喪之服而葬。是以僞事其親也。喪事有進無退。而如此。不亦舛乎。必不得已。假用改葬之總。事畢而除之。或亦亡於禮者之禮也。或問祖父母之喪。父爲長子。旣服之矣。未及葬而父死。及其葬也。嫡孫承重可乎。先生曰。古無除喪而後葬者。故有改葬之服。而無葬服。無葬服。又安得有爲葬而承重之服。

且承重云者。承先祖之重。而爲之重服也。假使前已承重於居喪之時。今沿承重之名以葬可也。若未承重於居喪之日。忽承重於除喪後之葬。於實既不符。且沒其父之曾居父母喪也。尤不可也。又問甲爲庶出。既貴封其母。母後甲而亡。甲之子議所服。或曰宜如父在爲祖父母期。或曰宜如父歿。嫡長孫爲祖父母服重。二者安從。答曰。禮時爲大。古人嚴厭降之義。生母服最輕。禮失而母以子貴。遂僭而並嫡。至明太祖之制極矣。然至今承用之。此時也。若論禮之大常。雖服期已失。厭降之義。若論居喪者之自處。則有因時爲宜稱者矣。父而存爲其母斬衰三年。明以來之時制也。父歿而用適長孫爲祖父母服重之制。於律雖無明文。亦無明禁。體其父之隱而爲之服重。於心亦甚安。觀過知仁。君子當憐而予之。必格以嫡庶之分。斥爲不睦。試思身爲庶子。旣不可卑其母。身爲庶子之子。又可卑其父之母乎。又與人論史記。謂班孟堅譏子長先黃老而後六經。此子長述其父說則然。其所撰五帝本紀。贊首推尙書。列傳開端云。載籍極博。猶考信于六藝。可謂之後六經乎。列老子於申韓。而進孔子爲世家。稱老子不過云古之隱者。而於孔子曰可謂至聖矣。至聖之稱。至今用爲廟號。匹夫而躋世家。卽世世襲封之兆也。弟子七十餘人。合爲一傳。卽堂廡從祀之端也。以孟荀表諸子。又隱然以孟子爲主。韓退之荀孟醇疵之辯。子長已有先覺。竊謂孔氏之道。得子長而始定一尊。雖從祀廟庭。亦不爲過。而班氏譏之。雖代父受過。子長不辭。然不能不爲之表白也。同縣王侍御峻。顧主事鎮。孫主事夢達。湯進士愈。先後游其門。皆知名。

惠先生士奇傳

惠先生士奇字天牧一字仲孺。世居吳縣東渚邨。祖有聲。明末以諸生貢入太學。里居著書。以九經訓子弟。父周惕始遷居葑門之香水溪。登康熙辛未進士。選翰林院庶吉士。改密雲縣知縣。先生之生也。父夢貴人來謁。視其刺。乃東里楊文貞公。遂以文貞名。年十二能詩。有柳未成陰夕照多之句。大爲先輩激賞。弱冠爲諸生。不就省試。或問之。則曰。胸中無書。焉用試爲。於是奮志讀書。晨夕不輟。遂博通六藝。九經。經文。國語。戰國策。楚辭。史記。漢書。三國志。皆能闇誦。嘗與名流會。坐中有客前請曰。聞君熟于史。漢試爲誦。封禪書。先生朗誦終篇。不失一字。合坐皆歎服。戊子舉鄉試第一。明年成進士。選庶吉士。散館。授翰林院編修。癸巳乙未會試。再充同考官。聖祖嘗問廷臣。誰工作賦者。閣學蔣公廷錫以華亭王公頊。齡仁。和湯公右曾。及先生三人名對。其後湯公掌翰林事。詞臣擬撰文字。皆送先生改定。然後進呈。己亥正月。太皇太后升祔禮成。特命祭告炎帝陵。舜陵。故事。祭告使臣。學士以上乃得開列。先生以編修與焉。洵異數也。庚子秋。主湖廣鄉試。得夏力恕等九十九人。多知名士。其冬復奉督學廣東之命。下車日。焚香設誓。不妄取一文。不妄徇一情。頒條教以通經爲先。士子能背誦五經。背寫三禮。左傳者。諸生食廩。童子青其衿。嘗言漢時蜀郡辟陋。有蠻夷風。文翁爲蜀守。選子弟就學。遣雋士張寬等。東受七經。還以教授。其後司馬相如。王褒。嚴遵。揚雄。相繼而起。文章冠天下。漢之蜀。猶今之粵也。於是毅然以經學倡。三年之後。通

經者漸多。文體爲之一變。世宗御極。復命留任三年。粵士皆晁躡雀躍。爭棄兔園冊。專事經籍。而通經者愈多。其爲文章。郁郁莘莘。比於江浙矣。又謂今之校官。古博士也。博士明於古今。通達國體。今校官無博士之才。弟子何所效法。訪諸輿論。得海陽進士翁廷資者。卽其疏題補韶州府教授。將以誘進多士。吏部以學臣向無顯補官員之例。格不行。奉旨。惠士奇居官聲名好。所舉之人。諒非徇私。著照所請補授。後不爲例。在任遷右春坊右中允。超擢侍講學士。轉侍讀學士。任滿還都。送行者如堵牆。旣去。粵人尸祝之。設木主。配食先賢。潮州于昌黎祠。惠州于東坡祠。廣州于三賢祠。每元旦及生辰。諸生咸肅衣冠入拜。其得士心如此。丙午冬。還朝。丁未五月。奉旨修理鎮江城。卽束裝赴工所。棄產興役。所修不及二十分之一。以產盡停工。罷官。今天子卽位。有旨調取來京。引見。以講讀用。所欠修城銀兩。得寬免。丁巳六月。補侍讀。時已垂老。耳漸聾。己未春。以病告歸。辛酉三月卒。年七十有一。先生盛年兼治經史。晚歲尤邃於經學。撰易說六卷。禮說十四卷。春秋說十五卷。其論易曰。易始于伏羲。盛于文王。大備於孔子。而其說猶存於漢。不明孔子之易。不足與言文王。不明文王之易。不足與言伏羲。舍文王孔子之易。而遠問庖犧。吾不知之矣。漢儒言易。孟喜以卦氣。京房以適變。荀爽以升降。鄭康成以爻辰。虞翻以納甲。其說不同。而指歸則一。皆不可廢。今所傳之易。出自費直。費氏本古文。王弼盡改爲俗書。又創爲虛象之說。遂舉漢易而空之。而古學亡矣。易者象也。聖人觀象而繫辭。君子觀象而玩辭。六十四卦皆實象。安得虛哉。其論春秋曰。春秋三

傳事莫詳於左氏。論莫正於穀梁。韓宣子見魯春秋曰：周禮盡在魯矣。然則春秋本周禮以記事也。左氏褒貶皆春秋諸儒之論。故紀事皆實。而論或未公。公羊不信國史。惟篤信其師說。師所未言。則以意逆之。故所失常多。要之左氏得諸國史。公穀得之師承。雖互有得失。不可偏廢。後世有王通者。好爲大言。以欺人。乃曰：三傳作而春秋散。於是啖助趙匡之徒。爭攻三傳。以伸其異說。夫春秋無左傳。則二百四十年。盲焉如坐闇室之中矣。公穀二家。卽七十子之徒。所傳之大義也。後之學者。當信而好之。擇其善而從之。若徒據孟子盡信書。則不如無書之說。力排而痛詆之。吾恐三傳廢而春秋亦隨之而亡也。左氏最有功於春秋。公穀有功兼有過。學者信其所必不可信。疑其所必無可疑。惑之甚者也。其論周禮曰：禮經出於屋壁。多古字古音。經之義存乎訓。識字審音。乃知其義。故古訓不可改也。康成注經。皆從古讀。蓋字有音義相近而譌者。故讀從之。後世不學。遂謂康成好改字。豈其然乎。康成三禮。何休公羊。多引漢法。以其去古未遠。故借以爲況。賈公彥於鄭注。如飛矛扶蘇。薄借棊之類。皆不能疏。所讀之字。亦不能疏。輒曰從俗讀。甚違不知蓋闕之義。夫漢遠於周。而唐又遠於漢。宜其說之不能盡通也。況宋以後乎。周秦諸子。其文雖不盡雅馴。然皆可引爲禮經之證。以其近古也。幼時讀廿一史。於天文樂律二志。未盡通曉。及官翰林。因新法究推步之原。著交食舉隅二卷。言測日食者。先求食限。食限必在兩交。去交近則食。遠則否。有入食限而不食者。未有不入食限而食者也。古法不能定朔。故日食或在晦。說者謂日之食。晦朔之間。月之食。

惟在望。此知二五而不知十也。日月有平行。有實行。有視行。日月之食。亦有實食。有視食。實食者。日月在天相揜之實度。視食者。人在地所見之初虧。食甚復圓也。古術或知求實行。莫知求視行。皆知求平朔。莫知求實朔。故不能定朔者。以此。七政有高卑。故有恆星天。有五星天。有日天。有月天。古人以恆星最高。遂指恆星爲天體。新法於恆星天之外。又有宗動天。合於九重之數。宗動者。七政之所同宗也。沈括謂日月星辰之行。不相觸者。氣而已。此不知歷象者也。如日月有氣而無體。則月焉能揜日哉。日高而月下。五星亦有高下。高下既殊。又焉能相觸乎。春秋日有食之既。既者。有繼之辭。非盡也。新法謂之金錢食。日大月小。月不能盡揜日光。故全食之時。其中闕然。而光溢於外。狀若金錢也。又撰琴籟理數考四卷。其略云。十二律。黃鐘下。小呂爲陽。蕤賓至應鐘爲陰。陽用正而陰用倍。蕤賓長。小呂短。黃鐘中。自古相傳之舊法也。晉永嘉之亂。有司失傳。梁武帝始改舊法。黃鐘長。應鐘短。小呂中。由是陽正陰倍之法絕。漢魏律。籟小呂一均之下。徵調黃鐘爲宮。有小呂無蕤賓。故假用小呂爲變徵。黃鐘籟之黃鐘宮爲正宮。小呂籟之黃鐘宮爲下宮。徵最小而以爲宮。故爲下宮。隋鄭譯遂以黃鐘正宮當之。擅去小呂用蕤賓。以附會先儒宮濁羽清之說。夫宮濁羽清者。指下徵調而言。譯改爲正宮。是以歷代之樂。皆患聲高。隋唐以來。惟奏黃鐘一均。而旋宮之法廢矣。古法盡亡。獨存于琴籟。籟孔疏密。取則琴暉。琴之十二律。起於中暉。籟之七音。生於宮孔。黃鐘籟從宮孔。黃鐘始。一上一下。終於蕤賓。琴自中暉。黃鐘始。一左一右。終於十暉。小呂餘籟及琴

放此書成。惟嘉定王進士恪見而喜之。餘皆莫能解也。所著詩有紅豆齋小草。詠史樂府。及南中采蓴歸耕。人海諸集。晚年自號半農居士。鄉人因其齋名稱紅豆先生。子七人。棟最知名。

王先生懋竑傳

王先生懋竑。字與中。寶應人。世爲儒家。叔父式丹。以詩文知名海內。宋尙書瑩。巡撫江南。選刻江左十五子詩。以式丹爲首。康熙四十二年。登進士第一人。授翰林院修撰。世所稱樓村先生者也。先生少從叔父學。卽自刻厲。篤志經史。恥爲標榜聲譽。康熙戊子。舉鄉試。又十年。成進士。年已五十一矣。在吏部乞就教職。授安慶府學教授。雍正元年秋。以薦被召引見。特授翰林院編修。在上書房行走。時同直者滿洲福公敏。徐公元夢。高安朱公軾。漳浦蔡公世遠。皆負一時重望。而先生尤邃於經術。元元本本。有扣卽應。明年春。以母憂去官。特賜內府白金爲喪葬之費。諭以治喪畢卽來京。不必俟三年服滿。先生素善病。居喪哀毀踰禮。明年入都謝恩畢。遂以老病辭歸。時年未六十也。性耿介恬淡。少時嘗謂友人曰。老屋三間。破書萬卷。平生志願。於斯足矣。歸田後。杜門著書。當路要人。雖素親厚。未嘗以竿牘及之。同年生高星源嘗謂之曰。君無過人處。但本色耳。晚年較定朱文公年譜。於文集語類。考訂尤詳。謂易本義前九圖。筮儀及家禮。皆後人依託。非文公所作。其略云。朱子於易。有本義。有啓蒙。與門人講論甚詳。而此九圖。曾無一語及之。九圖之不合於本義。啓蒙者多矣。門人何以絕不致疑也。本義之叙畫卦云。自下而上。再倍而三。以成

八卦八卦之上。各加八卦。以成六十四卦。初不敢參以邵子之說。至啓蒙則一本邵子。而邵子所傳止有先天圖。即六十四卦方圓圖其伏羲八卦圖。文王八卦圖。則以經世演易圖推而得之。同州王氏。漢上朱氏。易皆有此二圖。而啓蒙因之。至朱子所自作橫圖六。則注大傳及邵子語於下。而不敢題云伏羲六十四卦圖。其慎重如此。今乃直云伏羲八卦次序圖。伏羲八卦方位圖。伏羲六十四卦次序圖。伏羲六十四卦方位圖。是孰受而孰傳之耶。乃云伏羲四圖。其說皆出邵氏。按邵氏止有先天一圖。其八卦圖後來所推。六橫圖。朱子所作。而以爲皆出邵氏。是誣邵氏也。又云。邵氏得之李之才。李得之穆修。穆得之希夷先生。此明道叙康節學問源流如此。漢上朱氏。以先天圖屬之。已無所據。今乃移之四圖。若希夷已有此四圖者。是并誣希夷也。文王八卦。說卦明言之。本義以爲未詳。啓蒙別爲之說。而不以入於本義。至於乾天也。故稱乎父一節。本義以爲揲蓍以求爻。啓蒙以爲乾求於坤。坤求於乾。與乾爲首兩節。皆文王觀於已成之卦。而推其未明之象。與本義不同。今乃以爲文王八卦次序圖。又孰受而孰傳之耶。卦變圖。啓蒙詳之。蓋一卦可變爲六十四卦。彖傳卦變。偶舉十九卦以爲說爾。今圖卦變。皆自十二辟卦而來。以本義考之。惟訟晉二卦爲合。餘十七卦皆不合。其非朱子之書明矣。筮儀之文。亦不類朱子。士冠禮。特牲饋食。少牢饋食禮。筮者皆西面。惟士喪禮。筮宅以不在廟。故筮者北面。今直云筮者北面。見儀禮。朱子豈不見儀禮者。而踰謬若是耶。自直齋陳氏謂本義首列九圖。未著揲法。疑即筮儀學者遂以九圖揲法爲本義原本所有。而不知

其爲後人依託也。家禮載於行狀。其序載於文集。其成書之歲月。載於年譜。其亡而復得之由。載於家禮附錄。似無可疑者。李公晦叙年譜。謂家禮成於庚寅。居祝孺人喪時。乃文集答汪尙書與張敬夫呂伯恭書。論祭儀祭說。往復甚詳。汪呂書在壬辰癸巳。距庚寅僅二三年。家禮既有成書。何爲絕不之及也。陳安卿錄云。向作祭儀祭說。甚簡而易曉。今已亡之矣。則是所亡者。乃祭儀祭說。而非家禮明矣。文集語錄。自家禮序外。無一語及家禮者。惟與蔡季通書。有已取家禮四卷納一哥之語。此儀禮經傳通解中家禮六卷之四。非今所傳之家禮也。勉齋作行狀。在朱子沒後二十餘年。其時家禮已盛行。又爲敬之所傳錄。故不欲公言其非。但其詞略而不盡。其書家禮後。謂經傳通解未成。爲百世之遺恨。則其微意亦可見矣。後人雖云尊用其書。實未有能行者。故其中謬誤。多不及察。今按家禮云。非嫡長子。則不敢祭其父。若與嫡長同居。則死而後。其子孫爲立祠堂於私室。且隨所繼世數爲龕。俟其出而異居。乃備其制。此據禮支子不祭之說。然死而立祠私室。勢有難行。假令支子有四五人而同居。則將立四五祠堂。不知何地可以容之。又云。生而異居。則預於其地立齋以居。如祠堂之制。死則以爲祠堂。此於古無所據。生而自爲祠堂。已非人情。子爲父立。則尤不可。紫陽所定之書。恐必不爾也。士冠禮鄭注云。廣謂禰廟。主人將冠者之父兄也。賈疏云。家事統于尊。祖在則祖爲冠主。蓋以父言。則祖爲禰廟。以祖言。則曾祖爲禰廟也。家禮改以繼高祖之宗子爲主。其非宗子之子。則冠不於禰之祠堂。而於高祖之祠堂。而主人亦非將冠者之親父兄。

不亦遠於禮乎。後世封建既廢，無別子爲祖，繼別爲宗之例。凡爲大宗者，其始皆繼高祖之宗也。然傳之六世以後，則當云大宗，而不得僅云繼高祖之宗。其二世以下，繼高祖之宗。五世則遷，故曰小宗。今家禮一以繼高祖之宗爲主人，以大小宗論，則去大宗而就小宗，以遠近論，則舍同父之兄弟，而就同高祖之三從兄弟，進退皆不可矣。告遷于祠堂一條云：族人有親未盡者，遷于最長之房，尤爲無義。夫支子不祭禮也。今使最長之房，主高祖之祭，其爲繼曾祖之宗，則向不得祭高祖者，而今反得祭其爲繼祖之宗，則曾祖且不得祭，其爲繼禰之宗，則祖且不得祭，其爲繼祖之宗之支庶，則禰并不得祭，而今反得祭其高祖，此說之不可通者也。且繼曾祖之宗以下，本無高祖之龕，將別爲龕以祭之乎？抑竟置於所虛之龕乎？若繼禰之支庶，則並無祠堂，其將祭於寢乎？況高祖而下，必不止一房，最長之房既卒，又有一次長之房，是使高祖之主，流轉於支庶之家，而遷徙莫知所定，豈敬宗收族之義乎？語類沈僴錄云：或問嫡孫主祭，則須祧五世六世祖廟主，若叔祖尙在，乃是祧其高曾於心安乎？曰：只得如此。古人立法，一定而不可易，以是推之，則謂遷於最長之房者，必非朱子之書也。同邑朱澤溲潛心朱學，據答南軒書云：敬貫動靜，而以靜爲本，謂必從主敬，以透主靜消息。先生辨之曰：人之有動靜也，猶其有呼吸也。靜則必動，動則必靜，論其循環，則有互根之妙。論其時節，則有各致之功。朱子已發未發說，作於己丑，有以靜爲本之語。甲午乙未以後，不復主此說矣。主靜之指出於濂溪，而朱子內申作濂溪書堂記，己亥作隆興祠記，癸卯作詔

州祠記。癸丑作邵州祠記。俱不一言主靜。蓋敬可以貫動靜。而靜不可以該動。專言靜則偏矣。先生於諸史皆有考證。實事求是。不爲抑揚過當之論。其考孟子書齊人伐燕事。謂通鑑據孟子以伐燕爲齊宣王。而宣王卒於周顯王之四十五年。又三年。慎覲王元年。燕王噲始立。又七年。齊人伐燕。則不可以爲宣王事也。於是上增威王之十年。下減潛王之十年。以就伐燕之歲。其增減皆未有據。而仍以燕人畔爲潛王時。則與孟子亦不合。不知孟子七篇所言齊王。皆潛王。非宣王也。潛王初年。兵強天下。與秦爲東西帝。其所以治國者。亦必有異矣。孟子謂以齊王由反手。王由足用爲善。皆道其實。而其好勇好貨好色。不能自克。末年之禍。亦基於此。後來傳孟子者。改潛王爲宣王。以爲孟子諱。蓋未識此意耳。孟子去齊。當在潛王之十三年。四年。下距潛王之歿。更廿五六年。孟子必不及見。公孫丑兩篇。皆稱王而不稱諡。乃其元本。而梁惠王兩篇稱宣王。其爲後人所增無疑矣。先生撰述已刻者。白田艸堂集廿四卷。朱子年譜若干卷。讀史記疑。則子嘗於金陵嚴氏齋見之。

此页空白

潛研堂文集卷二十九

傳三

惠先生棟傳

惠先生棟字定宇號松厓侍讀學士士奇之次子初爲吳江學生員復改歸元和籍自幼篤志向學家多藏書日夜講誦自經史諸子百家雜說釋道二藏靡不津逮父友臨川李公紱一見奇之曰仲孺有子矣學士視學粵東先生從之任所粵中高才生蘇珥羅天尺何夢瑤陳海六時稱惠門四子常入署講論文藝與先生爲莫逆交至於學問該洽則四子皆自以遠不逮也及學士毀家修城先生往來京口飢寒困頓甚於寒素遭兩喪不以貧廢禮中年課徒自給陋巷屢空處之坦如雅愛典籍得一善本傾囊弗惜或借讀手鈔校勘精審於古書之真僞瞭然若辨黑白乾隆十五年詔舉經明行修之士總督尹文端公黃文襄公交章論薦有博通經史學有淵源之稱然先生於兩公非有半面識也年五十後專心經術尤邃於易謂宣尼作十翼其微言大義七十子之徒相傳至漢猶有存者自王弼興而漢學亡幸存其略于李氏集解中精覃三十年引伸觸類始得貫通其旨乃撰次周易述一編專宗虞仲翔參以荀鄭諸家之義

約其旨爲注。演其說爲疏。漢學之絕者。千有五百餘年。至是而粲然復章矣。書垂成而疾革。遂闕革。至未濟十五卦。及序卦雜卦二篇。然先生之緒言具在。好學深思之士。因其義例。推而演之。闕者尙可補也。孔氏正義。据馬融陸績說。以爻辭爲周公所作。與鄭學異。其所執者。明夷六五云。箕子。升六四云。王用享岐山。皆文王後事也。先生獨能辨之。於明夷之五曰。箕子。當從古文作其子。其古音亥。亦作其。劉向云。今易其子作芟。茲荀爽據以爲說。讀其子爲芟。茲其與亥。子與茲。文異而音義同。三統術云。該闕于亥。華萌于子。該芟亦同物也。五本坤也。坤終於亥。乾出於子。用晦而明。明不可息。故云其子之明夷。馬融俗儒。不識七十子傳易之大義。讀其爲箕。蓋涉彖傳而譌。五爲天位。箕子臣也。而當君位。乖於易例甚矣。謬種流傳。兆於西漢。博士施讎讀其爲箕。蜀人趙賓述孟氏之學。以爲箕子明夷。陰陽氣無箕子。其子者。萬物方芟。茲也。賓據古義。以難諸儒。諸儒皆屈。於是施讎梁邱賀皆嫉之。孟喜與讎賀同事。田王孫喜未貴而學獨高。喜所傳易家。候陰陽災變書。得自王孫。而賀惡之。謂無此事。語聞於上。宣帝遂以喜爲改師法。中梁邱之譖也。讎賀嫉喜。而并及賓。班固作喜傳。亦用讎賀之單詞。皆非實錄。劉向別錄。猶循孟學。故馬融俗說。苟爽獨知其非。復用賓古義。而晉人鄒湛。以漫衍无經譏之。蓋魏晉以後。經師道喪。王肅詆鄭氏。而禘郊之義乖。袁準毀蔡服。而明堂之制亡。鄒湛譏荀譖。而周易之學晦。鄧書燕說。一倡百和。何尤乎後世之紛紜也。於升之四曰。文王爻辭。皆據夏商之制。春秋傳引夏書。惟彼陶唐。帥彼天常。有此冀方。服虔云。堯居

冀州。虞夏因之。禹貢冀州治梁及岐。爾雅云。梁山晉望也。諸侯三望。天子四望。梁山爲晉望。明梁岐皆冀州之望。此王謂夏后氏受命告祭。非文王也。其說乾之四德曰。元者天地之始。說文。元从一。道立於一。造分天地。化生萬物。乾之初九。積善在下。陽氣始生。東方爲仁。故云善之長。陰陽交而後亨。乾之九二。當上升。坤五爲天子。故文言再言君德。經凡言亨者。皆謂乾坤交也。乾六爻。二四上匪正。坤六爻。初三五匪正。乾變坤。化六爻皆正。成兩既濟。故云各正性命。保合太和。和卽利。正卽貞也。經凡言利貞者。皆爻當位。或變之正。或剛柔相易。惟既濟一卦。六爻皆正。故云剛柔正而位當。雜卦篇所謂既濟定也。卦具四德者。七。乾坤變化而成兩既濟。屯三爻變。革四爻變。皆成既濟。隨三四易位。成既濟。无妄三四易位。上爻又變。而成既濟。臨二升居五位。三爻又變。而成既濟。故皆言元亨利貞也。其論占筮之法曰。易稱天下之動貞夫一。故卦爻之動。一則正。兩則惑。京氏筮法。一爻變者爲九六。二爻以上變爲八。晉公子得貞屯。悔豫皆八。乃三爻變。不稱屯之豫。而稱八。穆姜遇艮之八。乃五爻變。不稱艮之隨。而稱八。所謂貞夫一也。七者著之數。八者卦之數。著圓而神。卦方以知。神以知來。知以藏往。知來爲卦之未成者。藏往爲卦之已成者。故不曰七而曰八。春秋內外傳。無筮得某卦之七者。以七爲著之數。未成卦也。又因學易而悟明堂之法。撰明堂大道錄八卷。禘說二卷。大略謂說卦帝出乎震。帝者五帝也。在太微之中。五德相次。以成四時。聖人法之。立明堂爲治天下之大法。明堂有五室四堂。室以祭。天堂以布政。王者承天統物。各於其方以聽事。謂

之明堂月令。今所傳月令是也。古之聖人。生有配天之德。沒有配天之祭。故太皞以下。歷代所禘。太皞以木德。炎帝以火德。黃帝以土德。少皞以金德。顓頊以水德。王者行大享之禮於明堂。謂之禘。祖宗其郊則行之南郊。禘郊祖宗四大祭。而總謂之禘者。禘其祖之所自出故也。鄭注大傳。不王不禘。及詩長發。大禘則箋皆云。郊祀天。是郊稱禘也。周頌雖序云。禘太祖也。鄭箋云。太祖謂文王。是祖稱禘也。劉歆云。大禘則終王。是宗稱禘也。董子曰。天地者。先祖之所出也。禘者。禘其祖之所自出。故四大祭皆蒙禘名。禘禮上邇遠祖。旁及毀廟。下逮功臣。聖人居天子之位。行配天之祭。推人道以接天。而天神降。地示出人鬼格。夫然而陰陽和。風雨時。五穀熟。草木茂。羣生成遂。物无疵厲。所謂既濟定也。先儒皆以明堂上有靈臺。下有辟雍。四門有太學。穎容春秋釋例云。太廟有八名。肅然清靜。謂之清廟。行禘祫。序昭穆。謂之太廟。告朔行政。謂之明堂。行饗射。養國老。謂之辟雍。占雲物。望氣祥。謂之靈臺。其四門之學。謂之太學。其中室謂之太室。總謂之宮。盧植注禮記亦云。明堂卽太廟。與靈臺辟雍。古法皆同一處。近世殊異。分爲三耳。而晉時袁準。著論非之。昧于古制矣。王者覲諸侯。或巡守四岳。則有方明。方明者。放乎明堂之制也。亦謂之明堂。荀子所謂筴明堂於塞外。以朝諸侯。戰國時。齊有泰山明堂。卽方明也。周書朝諸侯。則于明堂。儀禮覲諸侯。則設方明。故虞禮六宗。而覲四岳羣牧。周禮方明而覲公侯伯子男。六宗方明。卽明堂六天之神。鄭氏謂天之司盟。非也。自明堂之制不詳。而禘禮亦廢。鄭氏知園丘方澤之爲禘。而不知爲明堂六帝。王肅又誤據魯

禘改禘爲宗廟之祭。無配天之事。故魏明帝謂漢氏四百餘年。廢無禘祀也。禘行於明堂。明堂之法。本於易。中庸言至誠可以贊化育。與天地參。此明堂配天之義也。又有易漢學七卷。易例二卷。皆推演古義。鍼砭俗說。有益於學者。於書有古文尙書考二卷。謂孔壁中古文。得多十六篇。內有九共九篇。析之爲二十四。鄭康成所傳之二十四篇。卽孔壁真古文。東晉晚出之二十五篇。與漢書不合。可決其僞。唐人詆鄭所傳爲張霸僞造者。妄也。今文太誓三篇。其略見於太史公書。史公從安國問故。其載當可信。唐人尊信晚出之太誓。而以今文太誓爲僞。亦非也。於春秋有左傳補注六卷。自序云。嘗見鄭康成之周禮。韋宏嗣之國語。純采先儒之說。未乃下以己意。令學者審其異同。杜元凱春秋集解。雖根本前修。而不著其說。又其持論閒與諸儒相違。於是樂遜序義。劉炫規過之書出焉。今刺取經傳。附以先世遺聞。宗韋鄭之遺。前修不揜。效樂劉之意。有失必規。而於古今文之同異。辨之尤悉云。其注秦穆姬屬賈君。用唐尙書說。以賈君爲申生妃。令尹薦艾獵。用世本說爲叔敖之兄。同盟於亳城北。用服虔本。證亳爲京之譌。塹防門而守之。廣里。用續漢書及京相璠說。以防門廣里爲地名。吳句餘。用服虔說。以爲吳子餘祭。萬者二人。用吳仁傑說。二人當爲二八。臧文仲廢六關。訓廢爲置。讀如公羊廢。其有聲者之廢。皆前人所未及道也。又言公羊有嚴顏二家。蔡邕石經所定者。嚴氏春秋也。何邵公所注者。顏氏春秋也。石經公羊末云。桓公二年。顏氏有所見異辭云云。僖公三十年。顏氏言君出則已入。今何本皆有之。又云。顏氏無伐而不言圍者。非取邑。

之辭也。今何本亦無之。以此知何所注者。顏氏本也。鄭康成注三禮。引隱二年。放於此乎。隱三年。登戾之。桓十一年。遷鄭焉。而鄙留。皆與何氏異。與石經同。蓋鄭所據者。嚴氏本也。又云。應邵風俗通。稱穀梁爲子夏門人。楊士勛謂受經于子夏。案桓譚新論云。左氏傳世。遭戰國寢藏。後百餘年。魯穀梁亦爲春秋。殘略多所違失。然則穀梁子非親受經于子夏矣。古人親受業者。稱弟子。轉相授者。稱門人。則穀梁子子夏。猶孟子之子子思。故魏麋信注穀梁。以爲與秦孝公同時也。楊士勛言穀梁作傳。傳孫卿。卿傳魯人申公。申公傳博士江翁。案孫卿齊潛襄時人。當秦之惠王。則在其後。卿所著書。言天子廟數。及賻贈襚舍之義。述春秋善胥命。而言盟詛不及三王。諸侯相見。仁者居守。皆本穀梁說。其言傳孫卿信矣。隱元年傳。成人之美。不成人之惡。僖廿二年傳。過而不改。是謂之過。廿三年傳。以不教民戰。則是棄其師。今皆在論語中。傳所載。與儀禮二記合者尤多。故鄭康成云。穀梁善於經也。其論論語曰。宣尼言述而不作。於魯論見之。鄉黨一書。半是禮經。堯曰數章。全書訓典。論君臣則人言不廢。譏無恆則南國有言。於善人爲邦。則曰誠哉。是言於隱居行義。則曰吾聞其語。素絢唐棣。逸詩可頌。百官冢宰。古典可稽。出門如見大賓。使民如承大祭。此胥臣多聞之所述也。視其所以。觀其所由。察其所安。此文王官人之所記也。克己復禮。左氏以爲古志。己所不欲。勿施於人。管子以爲古語。見小問篇參分天下而有其二。周志之遺文也。今逸周書即周志也在程典篇陳力就列。不能者止。周任之遺言也。推此言之。聖人豈空作哉。其論爾雅曰。釋詁釋訓。乃周公所作。以教成王。故

詩稱古訓是式。漢時謂之故訓。又謂之詁訓。詁訓者。雅言也。周之古訓。仲山式之子之雅言。門人記之。爾雅以觀于古。故又謂之爾雅。俗儒不信爾雅。而仲山之古訓。夫子之雅言。皆不存矣。又撰九經古義十六卷。討論古字古言。以博異聞。正俗學。益都李進士文藻。見其書而善之。爲鋟板粵中。李與先生亦素不相識也。予嘗論宋元以來。說經之書。盈屋充棟。高者蔑棄古訓。自誇心得。下者勦襲人言。以爲己有。儒林之名。徒爲空疏藏拙之地。獨惠氏世守古學。而先生所得尤深。擬諸漢儒。當在何邵公服子慎之間。馬融趙岐輩不能及也。先生少時。已好撰述。有王文簡公精華錄。訓纂二十四卷。盛行於世。論者以爲過於任淵之注山谷。李壁之注荆公焉。有太上感應篇注二卷。證其爲魏晉人所作。亦經好事刊刻。又有後漢書補注十五卷。九曜齋筆記二卷。松厓筆記二卷。予皆見之。其周易本義辯證五卷。松厓文鈔二卷。及諸史會最。竹南漫錄。則未之見也。其弟子知名者。江聲。余蕭客。皆布衣通經學。江於尙書。用功尤專云。先生卒於戊寅五月。年六十有二。

江先生永傳

江先生永。字慎修。婺源人。少就外傅。與里中兒治世俗學。一日。見邱濬大學衍義補。書中多徵引周禮。奇之。求諸積書家。得寫周禮正文。晨夕諷誦。爲諸生數十年。榷戶授徒。束修所入。盡以購書。遂博通古今。尤專心於十三經注疏。自壯至老。丹黃不去手。嘗一游京師。同郡程編修恂。延主其邸。桐城方侍郎苞。素以

三禮自負聞先生名願一見見則以所疑士冠禮士昏禮中數事爲問先生從容置答乃大折服荆溪吳編修絅於儀禮功深及交先生質以三禮中疑義往復辯難歎曰先生非常人也休寧戴震少不譽於鄉曲先生獨重之引爲忘年交震之學得諸先生爲多乾隆壬午歲三月十三日卒年八十有二所著有周禮疑義舉要六卷禮記訓義擇言六卷深衣考誤一卷禮經綱目八十八卷律呂闡微十一卷春秋地理考實四卷鄉黨圖考十一卷讀書隨筆十二卷古韻標準六卷四聲切韻表四卷音學辯微一卷推步法解五卷七政衍金水二星發微冬至權度恆氣注歷辨歲實消長辯歷學補論中西合法擬草各一卷近思錄集注十四卷讀書好深思長於比勘於步算鍾律聲韻尤明其論歲實消長曰日平行於黃道是爲恆氣恆歲實因有本輪均輪高衝之差而生盈縮謂之視行視行者日之實體所至而平行者本輪之心也以視行加減平行故定氣時刻多寡不同高衝爲縮末盈初之端歲有推移故定氣時刻之多寡且歲歲不同而恆氣恆歲實終古無增損也當以恆者爲率隨其時之高衝以算定氣而歲實消長可勿論猶之步月行者先有平朔平望之策以求定朔定策而此月與彼月多於朔策幾何少於朔策幾何不必計也其論黃鍾之宮曰呂氏春秋稱伶倫作律先爲黃鍾之宮次制十二筒以別十二律黃鍾之宮者黃鍾半律後世所謂黃鍾清聲也唐時風雅十二詩譜以清黃起調畢曲琴家正宮調黃鍾不在大絃而在第三絃合于古者黃鍾宮爲律本之意聲律自然古今不異也國語伶州鳩論七律而及武王之四樂夷則

無射曰上宮黃鍾太簇曰下宮蓋律長者用其清聲律短者用其濁聲古樂用均之法雖亡而因端可推韓子外儲篇曰瑟以小絃爲大聲大絃爲小聲雖詭辭以諷然因是知古者調瑟之法黃鍾大呂太簇夾鍾姑洗仲呂蕤賓用半而居小絃林鐘夷則南呂無射應鍾用全而居大絃也管子書五聲徵羽宮商角之序亦如此其論古韻曰考古音者昉于吳才老崑山顧氏援證益精博然顧氏考古之功多審音之功淺顧氏分古音爲十部猶未密也真諄以下十四韻當析爲二部而先韻半屬真諄半屬元寒考之三百篇用韻畫然侯之正音近幽當別爲一部虞模部之隅渝驅婁等字蕭豪部之蕭寥皐好等字皆侯幽之類與本部源流各別三百篇亦畫然侵覃以下九韻亦當以侈斂分爲二部而覃鹽半屬侵半屬嚴添蓋平上去三聲皆當爲十三部入聲當爲八部而三代以上之音始有條不紊也論今韻曰平上去三聲多者六十部少亦五十餘部惟入聲祇三十四部或謂支至咍蕭至麻尤至幽無入聲崑山顧氏古音表又反其說於是舊有者無舊無者有皆拘于一偏蓋入聲有二三韻而同一入者如東尤侯同以屋爲入真脂同以質爲入文微同以物爲入寒桓歌戈同以曷末爲入之類按其呼等察其偏旁參以古音乃無憾也其說易卦變曰卦變之義言人人殊當于反卦取之否反爲泰泰反爲否故曰小往大來曰大往小來是其例也彖傳言來言下言反者自反卦之外卦來居內卦也言往言上言進言升者自反卦之內卦往居外卦也其論春秋軍制云儒者多稱井田廢而兵農始分考春秋之世兵農固已分矣管仲參國伍鄙

之法。齊三軍出之士鄉十有五。公與國子高子分率之。而鄙處之農不與也。爲農者治田供稅。不以隸于師旅也。鄉田但有兵賦。無田稅。姒後世之軍田屯田。此外更無養兵之費。晉之始惟一軍。旣而作二軍。作三軍。作五軍。旣舍二軍。旋作六軍。後爲四軍。以新軍無帥而復三軍。其旣增又損也。蓋除其軍籍。使之歸農。若軍盡出于農。則農民固在。安用屢易軍制乎。隨武子曰。楚國荆尸而舉。商農工賈。不敗其業。此農不從軍之證也。魯之作三軍也。季氏取其乘之。父兄弟盡征之。孟氏取半焉。以其半歸公。叔孫氏臣其子弟。而以其父兄歸公。所謂子弟者。兵之壯者也。父兄。兵之老者也。皆其素在軍籍。隸之卒乘者。非通國之父兄子弟也。其後舍中軍。季氏擇二。二子各一。皆盡征之。而貢之于公。若民之爲農者。出田稅。自仍然歸之君。故哀公曰。二吾猶不足。三家雖專。亦惟食其采邑。豈嘗使通國之農。盡屬己哉。陽虎壬辰戒都車。令癸巳至。此近都之民爲兵之證。其野處之農。固不爲兵也。其論深衣之制。曰。後儒爲深衣圖考者數十家。大率踵裳交解十二幅之譌。而續衽鉤邊。致滋異說。考玉藻篇言衽當旁。則非前後之正幅矣。鄭氏注云。衽謂裳幅所交裂也。則在旁名衽者交裂。而餘幅不交裂也。續衽者。裳之左旁。連合其衽。鉤邊者。裳之右旁。別用布一幅。斜裁之。綴于後衽之上。使鉤曲而前。以揜裳際。漢時謂之曲裾。故鄭注云。鉤邊。若今曲裾也。其解論語攝齊升堂曰。古者諸侯三朝。外朝治朝。皆有位而無堂。古之朝儀甚簡。日出視朝。君與卿大夫士相揖而朝。事畢。君反乎路寢。卿以下各就治事之所。君召與圖事。乃入內朝。內朝有堂有寢。孔子攝

齊升堂。謂內朝。非治朝也。路門爲君乘車出入之地。故考工記云。路門不容乘車之五。治朝在路門外。若治朝有堂。礙於車行矣。禮記言雨霑服失容則廢朝。此亦治朝無堂之證。先生於經傳制度名物。考稽精審多類。此歿後一年。詔修音韻述微。尙書秦文恭公。請於朝。令江南督臣。檄取先生所著韻書三種。進呈貯館。以備采擇。丙午。江南鄉試。以鄉黨篇命題。士子主先生說者。皆得中式。由是海內益重其學。

戴先生震傳

戴先生震。字東原。休寧人。少從婺源江慎修游。講貫禮經制度名物。及推步天象。皆洞徹其原本。旣乃研精漢儒傳注。及方言說文諸書。由聲音文字以求訓詁。由訓詁以尋義理。實事求是。不偏主一家。亦不過騁其辯。以排擊前賢。嘗謂今人讀書。尙未識字。輒薄訓詁之學。夫文字之未能通。妄謂通其語言。語言之未能通。妄謂通其心志。此惑之甚者也。論者又曰。有漢儒之經學。有宋儒之經學。一主於訓詁。一主於義理。此愚之大不解者。夫使義理可以舍經而求。將人人鑿空得之。奚取乎經學。惟空凭胸臆之無當於義理。然後求之古經。求之古經。而遺文垂絕。今古縣隔。然後求之。詁訓。詁訓明則古經明。而我心所同然之義理。乃因之而明。古聖賢之義理。非他。存乎典章制度者是也。昧者乃岐詁訓義理。而二之。是詁訓非以明義理。而訓詁胡爲。義理不存乎典章制度。勢必流入於異端曲說。而不自知矣。又嘗與友人書云。僕數十年來。得於行事者。立身則曰不苟。待人則曰無憾。事事不苟。猶未能遠恥辱也。念念求無憾。猶未能免。

怨尤也。其得於學者，不以人蔽己，不以己自蔽，不爲一時之名，亦不期後世之名。凡求名之弊有二，非培擊前人，以自表襮，卽依傍昔儒，以附驥尾，二者不同，而鄙吝之心同。是以君子務在聞道也。今之博雅能文章，善考核者，徒株守先儒而篤信之，如唐人所譏，寧言周孔誤，不道鄭服非。此非志乎聞道者也。其私智穿鑿者，卽不自表襮，而學不師古，積非成是，惑以終身，無鄙吝之心，而失與之等。其於道亦遠矣。講明正道，修辭立誠，以俟後學，其或聽或否，或傳或墜，或尊信或非議，所不計也。性介特，多與物忤，落落不自得，年三十餘，策蹇至京師，困於逆旅，餽粥幾不繼，人皆目爲狂生。一日，攜其所著書過予齋，談論竟日，旣去，予目送之，歎曰：天下奇才也。時金匱秦文恭公蕙田兼理算學，求精於推步者，予輒舉先生名。秦公大喜，卽日命駕訪之，延主其邸，與講觀象授時之旨，以爲聞所未聞。秦公撰五禮通考，往往采其說焉。高郵王文肅公安國亦延致先生家塾，令其子念孫師之。一時館閣通人，河間紀太史昀、嘉定王編、修鳴盛、青浦王舍人昶、大興朱太史筠，先後與先生定交。於是海內皆知有戴先生矣。乾隆壬午，中江南鄉試，明年試禮部，不第。薄游汾晉間，會汾州修郡志，朱方伯珪請先生任其事，乃博稽史籍，駁正舊志之譌，謂汾陽於漢爲茲氏縣，戰國時屬趙，不屬魏，漢時屬太原郡，不屬西河郡，後魏太和八年，改六壁鎮置西河郡，治茲氏城，而西河之名移於此。酈道元注水經，以武侯浮西河事繫之夏陽，子夏陵及廟室繫之郃陽，而於謁泉山及文水，絕不涉及。子夏設教事，張守節李吉甫輩始指爲魏之西河，子夏退老居此，皆非其實。青

甫又謂黃初二年於漢茲氏縣置西河郡。卽今州理。不知魏晉之西河皆治離石。非茲氏。吉甫又謂周宣帝於此置汾州。大業三年廢汾州。不知周隋之汾州皆非西河郡境。吉甫元和郡縣志敘述最有法。而猶有舛謬甚矣。地理之不易言也。癸巳歲天子開四庫館。妙選校讐之職。總裁諸公疏薦先生。以鄉貢士入館。充纂修官。特命與會試中式者同赴廷對。乙未夏授翰林院庶吉士。先生起自單寒。獨以文學爲天子所知。出入著作之庭。館中有奇文疑義。輒就咨訪。先生爲考究顛末。各得其意。以去。先生亦思勤修其職。以稱塞明詔。經進圖籍。論次精審。晨夕披檢。靡間寒暑。竟以積勞致疾。丁酉夏卒於官。年五十有五。平生無他嗜好。惟專於讀書。雖詞義鉤棘難曉者。一再讀之。輒已渙然冰解。旁觀皆驚爲宿悟。要由精誠所致。其學長於考辯。每立一義。初若剏獲。及參互考之。果不可易。後儒多言易亂於費直。先生以漢書證之曰。藝文志易經十二篇。施孟梁邱三家。十二篇者。經上下二篇。十翼十篇。此三家所同也。儒林傳云。費直易無章句。徒以彖象繫辭十篇之言。解說上下經。蓋費氏不自立章句。其解說經。卽用十篇之言。而十二篇之目未嘗改也。劉向以中古文易校施孟梁邱經。或脫去无咎悔亡。惟費氏經與古文同。初不言篇題。與諸家異。後人誤讀儒林傳。輒咎費氏改經不察之甚也。周禮大馭。右祭兩軹。祭軌。注云。故書軹爲軹。杜子春云。軹當爲軹。軹謂兩轄。或讀軹爲簪筭之筭。先生辨之曰。軹當從。或讀如筭。杜君改爲軹。與轄內之軹二名混淆。非也。以轄釋轂端之軹。亦非也。軹者車輪。軹者轂末。轄者軸末。後代字書并軹字無之矣。祭軌

字刊本多譌爲軌。毛公釋濟盈不濡軌云。自鞞以上爲軌。陸德明依說文別之。以軌从九。車轍也。軌从凡。車式前也。依傳意宜音犯。若音犯。則字當作軌。以韻考之。又不合。疑漢時軌軌二字相溷。毛君殆誤併二字爲一與。其述明堂之制曰。明堂五室十二堂。故曰明堂月令。中央曰太室。正室也。一室而四堂。東堂曰青陽。太廟。南堂曰明堂。太廟。西堂曰總章。太廟。北堂曰元堂。太廟。四隅之室。夾室也。四室而八堂。東北隅之室。元堂之右夾。青陽之左夾也。其北堂曰元堂。右个。東堂曰青陽。左个。東南隅之室。青陽之右夾。明堂之左夾也。其東堂曰青陽。右个。南堂曰明堂。左个。西南隅之室。明堂之右夾。總章之左夾也。其南堂曰明堂。右个。西堂曰總章。左个。西北隅之室。總章之右夾。元堂之左夾也。其西堂曰總章。右个。北堂曰元堂。左个。凡夾室前堂。或謂之箱。或謂之个。左氏傳。寘饋於个。杜云。个。東西箱。是也。个者。兩旁之名也。古者宮室之制。前堂後室。有夾。有个。有房。惟南嚮一面。明堂四面闔達。亦前堂後室。有夾。有个。而無房。禮。婦人在房。明堂非婦人所得至也。四正之堂。皆曰太廟。四正之室。共一太室。故曰太廟太室。世之言明堂者。有室無堂。不分个夾。失其傳矣。春秋昭二十二年。十月。王子猛卒。而其夏。秋已兩書王猛。說者莫得其解。先生曰。王猛與鄭忽。皆以國氏者也。王者。諸侯目王畿之辭。非天王之號。春秋凡書王。獨列國之書其國。書天王。猶列國之書爵。故王人與列國書人。同爲微者。王猛與鄭忽。同爲以國氏。忽未卽位。而出奔歸。不得書爵。書世子。正其復國也。王子猛未卽位。稱王。故卒稱王子。若先正其號曰王。不得復稱王子矣。周髀言北極。

璿璣四游。又言正北極。樞璿璣之中。後人多疑其說。先生解之曰。正北極者。魯論之北辰。今人所謂赤道極也。北極璿璣者。今人所謂黃道極也。正北極者。左旋之樞。北極璿璣。每晝夜環之而成規。冬至夜半。在正北極下。是爲北游所極。日加卯之時。在正北極左。是爲東游所極。日加午之時。在正北極上。是爲南游所極。日加酉之時。在正北極右。是爲西游所極。此璿璣之一日。四游所極也。冬至夜半。起正北子位。晝夜左旋一周。而又過一度。漸進至四分周之一。則春分夜半爲東游所極。又進至夏至夜半。爲南游所極。又進至秋分夜半。爲西游所極。此璿璣之一歲。四游所極也。虞夏書。在璿璣玉衡。以齊七政。蓋設璿璣以擬黃道極。後世失其傳也。今人所用三角八線之法。本出於句股。而尊信西術者。輒云句股不能御三角。先生折之曰。周髀云。圓出於方。方出於矩。矩出於九九八十一。三角中無直角。則不應乎矩。無例可比矣。必以法御之。使成句股而止。八線比例之術。皆句股法也。嘗謂儒者治經。宜自爾雅始。世所傳郭注。已刪節不全。邢疏又多疏漏。如釋言。桄。充也。六經無桄字。鄭注樂記。孔子閒居。皆訓橫爲充。橫。桄古通用。書光被四表。漢書引作橫被。今孔傳猶訓光爲充。文譌而義不殊也。釋言。麻。廕也。卽詩不可休思之休。釋木。桑柳醜條。卽詩蠶月條桑之條。莊子云。已而爲之者。已而不知其然。當從釋詁解。已爲此。其考證通悟多如此。水經注譌舛久矣。王伯厚引經文四事。其三事皆注之溷於經者。則經注之淆。南宋時已然。先生獨尋其義。例區而別之。云經文每一水云某水出某郡縣。此下不更舉水名。注則兼及所納羣川。故須重舉。經云

過某縣者。統一縣而言。注則詳言所逕委曲。故有一縣而再三見者。經據當時縣治。善長作注時。縣邑流移。是以多稱故城。經無言故城者也。經例云過。注例云逕。以是推之。經注之淆者可正也。閻百詩。顧景范。胡朏明。雖善讀古書。猶未悟斯失。先生始釐正之。同時頗有狂而不信者。予深贊成其說。今武英殿所刊。用先生校本。海內始復見此書之真面目焉。先生在書局。校定五經算術。海島算經。孫子算經等書。皆官爲板行。其所撰述。有毛鄭詩考正四卷。考工記圖二卷。孟子字義說三卷。方言疏證十三卷。原善三卷。原象一卷。句股割圓記三卷。策算一卷。聲韻考四卷。聲類表九卷。屈原賦注九卷。文集十卷。則曲阜孔戶部。繼涵爲刊行之。

漑亭別傳

漑亭姓錢氏。名塘。字學淵。一字禹美。世居嘉定之望仙橋。曾大父惟亮。廩膳生。與先奉政公爲從祖昆弟。生太學生衡臣。有三子。彥昭早卒。彥輝永輝皆太學生。漑亭爲永輝長子。甫在抱。而彥輝撫以爲後。始就傅。習舉業。出語便不凡。旣補博士弟子。與諸澱。輪汪綉。青王鶴谿。王耿仲唱和。爲古今體詩。卽爲王西莊光祿。王蘭泉侍郎激賞。然漑亭意慊然猶未足。不欲以詞人自命。及選拔入成均。試闕下歸。益肆力於經史之學。乾隆四十五年。舉江南鄉試。對策爲通場第一。明年成進士。需次當得縣宰。而漑亭自以不習吏事。呈吏部。願就教職。選授江寧府學教授。公務多暇。益刻苦撰述。於聲音文字。律呂推步之學。尤有神解。

體素羸弱。夏月常畏寒擁絮。而考辯精到。議論風生。不假公明三斗酒也。春秋五十有六。終於江寧官廨。漑亭著律呂古義六卷。自序云。古之律傳而尺不傳。律法待尺以爲用。尺不傳。則律不傳矣。自荀勗以劉歆銅斛尺爲周尺。載於史志。莫有知其非者。予得盧僂尺。知勗所謂周尺之卽漢尺。復得周尺。知漢尺之非周尺。因周尺以求律尺。得今車工尺之八寸一分。蓋周本八寸尺。不可以制律。律必用十寸尺。卽昔人所云夏尺者。然則周不能自用其尺制律。後人顧必曰周尺哉。古律當無異度。周必因乎夏商。夏商必因唐虞。十寸尺之爲二帝三王時律尺。明矣。周尺傳而律尺傳。律尺傳而古律已無不傳。其愈於用漢尺也。不遠乎。然予之爲此書。非徒傳古尺而已。兼以明律法焉。夫累黍尺之千二百。不能實八百十分之管也。考律之不必千二百黍也。徑三分之積。不盈八百十分也。周黼之非兼用八寸十寸尺也。後周玉律。至隋而失其本數也。雅樂燕樂之調法不同也。中管調器之非律呂元聲也。校律之用尺積也。今權之用何度也。皆律家所當知者也。不知實管之宜異黍。則容受必不符。不知考律之用方侖。則黃鐘必非八百十分。不知徑三分之積六百四十分。則必以方徑爲員徑。不知周黼止用十寸尺。則聲不能中黃鐘之宮。不知玉律之積數增多。則隋志錯誤之故不明。不知雅樂燕樂異調。則郊廟與房中無別。不知中管之非元聲。則八音俱乖本律。不知校律用尺再乘方。則得數必舛。不知今權所應之度。則不能審古物之應律與否。如是而律不可通矣。夫言律必求其實。用律之數。寓於度量權衡。而其聲應乎金石絲竹。律本無不通。故

以是數物爲其用。通則有法焉。卽黃鐘之律是也。故曰爲萬事根本。其明算篇曰。算莫難於算圓。圓周者。圓冪之本也。以方容圓。徑同而周異。圓周之有圓冪。若方周之有方冪。故周異則冪亦異。倍其徑者四其冪。則初以爲周者。繼以爲冪矣。以方周除圓周而十之。亦卽圓之冪也。由是定爲方圓之率。任所得之爲方爲圓。無不可以推。知其所未得。而術有古今疏密之不同。古術方周四則圓周三。是冪亦方四而圓三也。至劉徽注九章。推得圓周三一四有奇。而去其餘數。故徽術算冪亦方四而圓三一四也。後人知古術之疏。以徽術爲密。依而用之。雖間有修改。要不離此率。自予觀之。亦未見其密也。試度取一物之徑。命之爲一。則周且至三一六以上矣。夫古術泥於陽奇陰偶之說。其疏固宜。徽術則本之割圓。割圓之術。有觚有弧矢。其算之也。有半徑與弦半徑。常爲大弦。而迭爲句股。以求其小弦。半徑爲小弦所截成弧矢。有弧矢則半徑不盡。半徑不盡則小弦不盡。而割圓之以爲弧者。卽小弦也。弦直而弧曲。合之以爲周。非其類矣。周之爲物。如環無端。割而爲觚。必且無盡。而割圓不能無盡也。斯則名爲周。而實非周也。而又不能無所棄。始之開方。以求大股也。可開而至於無盡也。旣以其不能盡而棄之。後之開方。以求小弦也。亦可開而至於無盡也。復以其不能盡而棄之。有所棄則非全數矣。徽之割圓也。止於九十六觚。其於股。於矢。於小弦。固皆曰餘分棄之。是以二尺爲方之圓周。尙以六分半有奇爲小弦。夫以如環之圓。而以六分以上之小弦。九十六之以爲周。謂其與圓合體也。其孰能信之。是故求圓周者。可無割圓也。度之亦略近矣。度

法絲豪以下常無象而不可以名。則有一術焉。更密於度周。而可以相代者。曰十倍其徑。幕以爲周。幕而已。我蓋得之於方。方之徑。幕卽圓之徑。幕也。方之周。幕猶圓之周。幕也。唯以十六爲十。是已。數皆以十成。而權衡獨以十六。卽其理也。是故徑幕一。則方周幕十六。而圓周幕十。徑幕十。則方周幕百六十。而圓周幕百。是爲周徑之幕。異位而同名。夫如是。則圓幕至十倍。卽周爲徑。而十倍其徑以爲周矣。是反覆不衰之術也。舊術。周幕不足。徑幕之十倍。故反覆之。則必衰。衰不衰。何足深論。顧如方之容圓。有舒促。何容圓無舒促。則無如此術矣。是術也。可不用比例。而得周徑與方圓。不出乎乘除進退。以開方而已矣。求周徑者。徑自乘而十乘之。卽周之自乘。周自乘而十除之。卽徑之自乘。求方圓者。方自乘而十六除之。復十乘之。卽圓之自乘。圓自乘而十六乘之。復十除之。卽方之自乘。所得皆平方開之也。舊唯周徑有幕。今則方圓之幕。又有幕。然皆因數以立術。非爲術以設數也。然則其數幾何。曰。術在數。可不言也。以徑一爲例。則徑幕百。周幕千。而方幕之幕十萬。圓幕之幕六千二百五十。是爲徑一。則周三一六有奇。而方百者。圓七九零也。立圓立方。何如。曰。亦不過三一六爲圓。則六爲方而已矣。其較度篇曰。晉志列十五等尺。以晉前尺爲主。謂之周尺。玉海列六等尺。以司馬公所摹高若訥漢泉尺爲主。謂之周尺。其時漢尺之外。實未見周尺也。今曲阜孔氏所藏漢慮僦銅尺。建初六年八月造。當今工匠尺七寸四分。與晉志云。晉前尺卽劉歆鍾律尺。建武銅尺者。正同。卽司馬公家周尺。亦無不同也。周尺今藏曲阜顏氏。以今匠尺校之。長六寸

四分八釐。昔人以漢尺爲周尺者非也。周有八寸十寸尺。以顏氏尺四分加一。得今匠尺之八寸一分。是爲古十寸尺。昔人謂之夏尺。別於周也。商尺。蔡邕言長九寸。鄭樵言長一尺二寸半。按考工記。夏后氏世室度以步。般人重屋度。以尋。步長六尺十寸尺也。尋長八尺八寸尺也。殷制用尋。明別無般尺矣。蓋二尺三代同用也。蔡說出自臆撰。鄭樵則據三司尺言之。三司尺。范景仁謂之黃帝時尺。雖未可信。要非宋始有之。以漢尺推算。當長一尺三寸五分。卽今匠尺也。三司尺之八寸一分。卽古十寸尺。十寸尺制律。三代當同。愈於用漢尺遠矣。又著史記三書釋疑。於律秣天官家言。皆究其原本。而以它書疏通證明之。律書上九商八羽七角六宮五徵九數語。注家皆不能曉。小司馬疑其數錯。漑亭據淮南子太元經證之。始信其確不可易。又以淮南天文訓一篇。多周官馮相保章遺法。高氏注頗闕略。罕所證明。作補注三卷。以闡其旨。晚年讀春秋左氏經傳。精心有得。作古義若干卷。以補杜氏之闕。且糾其謬。其所作古文曰述古編四卷。詩曰□□齋吟稿。皆刊刻行世。漑亭少時執經於先君子。予長於漑亭七歲。相與共學。予入都以後。漑亭與其弟埒。及子弟大昭相切磋。爲實事求是之學。蘄至於古人而止。比予歸田。而漑亭學已大成。每相見。輒互證其所得。吾邑言好學者稱錢氏。而漑亭尤羣從之白眉也。惜其未及中壽。而撰述或不盡傳。因仿魏晉人別傳之例。述其事目如右。

潛研堂文集卷四十

傳四

汪南有傳

孔子傳恆之六五曰。婦人貞吉。從一而終也。夫子制義。從婦凶也。男帥女。女從男。夫尊妻卑。禮之大經。乃一介之士。束修自好。名湮沒不章。何可勝算。獨爲節婦之夫者。言行無所表見。而史家傳列女。牽連得書。以制義之夫子。轉賴從一之婦以傳。此又理之變也。蕭山汪進士輝祖之繼母王氏。生母徐氏。以雙節旌門。予旣爲銘。刻之石柱矣。已乃出其所述先人登仕君事狀。讀之悚然曰。世安得此長者乎。輝祖賢而有文。且誠孝人也。其言故可信。登仕諱楷。字南有。一字皆木。先世自婺源遷鄞。又遷蕭山之大義村。君少從蔣季眉先生學。舉子業。試不利。棄去。習法家言。旣而曰。刻深者不祥。思損吾福。又棄去爲賈。以羨置薄田百畝。屬弟收租入養父母。而納貲爲官。選得河南淇縣典史。典史主縣獄。故時囚之繫者。獄卒奴使之。食常不飽。衣垢不得滌。有病不及時療。官數日一至。檢獄具。它弗問。君在縣日省囚。而問其疾苦。獄卒不得苛虐。囚無瘐死者。丞簿以下。例不受民詞。黠者藉事恐獨。取其酬。上官以其俸薄而所取少。不禁也。君自

廉俸外無所取。常屑蕎麥和米爲飯。佐以豆腐羹。妻妾親紐箴以給。僚友多嗤之。曰：我輩佐雜。欲入循吏傳耶？家中豈少麥飯豆羹作官如此？不如早歸。君乾笑而已。亦不與辨。在職八年。以親老引疾歸。歸則弟私鬻所置田垂盡。或言受產者率以博籩句致。告之官可復。君終不言。父歿。罄所有營喪葬。又爲弟償所負惡少錢。生計大窘。乃跳身遊嶺南。無所遇。益鬱鬱。遂病死。番禺年四十有六。乾隆五年十二月十五日也。輝祖早慧。能讀書。君隨事啓牖之。嘗問兒讀書何爲。曰：欲爲官。卽正色曰：兒誤矣。爲官不如爲人。作人好。雖不官不失爲人。卽得官。必不爲人。詬詈。一日。兩窰器墮地。薄者毀。乃取完者示其子曰：若彼厚如此。則亦完矣。君之立心如此。蓋幾於古之不言而躬行者。昔漢文稱絳侯東陽侯爲長者。周嘉郡功曹耳。光武亦稱爲長者。行誼是取。尊卑奚分。予特表而出之。其與曹世叔劉長卿之流。僅以妻傳者異矣。

李靜叔傳

李文淵字靜叔。益都人。生九月而能言。蚤孤。嘗詈其師。母邢笞之數十。乃折節讀書。以古人爲師。視流輩鮮當其意者。補縣學生。有名。靜叔事母孝。就養左右。非應試未嘗一日宿于外。母多疾。而靜叔知醫。故母尤倚之。歲丙戌。靜叔病。母持其手泣曰：爾死。吾何生爲？靜叔亦泣對曰：兒無患也。靜叔夢雨雹及己。身覺以語妻。妻曰：聞姑言夢雹者喪父母。非吉徵也。未十日。母果病。靜叔強起視藥。目不交睫者數日。母歿。靜叔委頓苦出。間哭無時。病遂劇。自爲文誌其墓。又月餘死。旣含而蘇。然毀瘠日甚。明年春卜葬。其母有日。

矣。先期靜叔復病。自度不能送葬。日夕哭。至嘔血不止。比葬。舉家扶柩出。惟一醫者守之。靜叔不食。亦不語。閱三日卒。以衰經斂。年止二十有六。靜叔之兄素伯。工古文詞。故靜叔亦好爲古文。所著論辨說。凡二十餘篇。嘗言昌黎韓氏之說。後人陰祖而陽絀之。如云性有三品。而後云所以爲性者五。曰仁禮信義智。蓋已分氣質理義而二之矣。後人謂分氣質理義而言性。自宋儒始。何也。呂東萊疑西銘爲兼愛。以其言一視同仁。而未及篤近舉遠也。然則原人一篇。兼西銘之旨而過之矣。後人尊西銘。而不及原人。又何也。又言唐詩于本朝事。每無所忌諱。猶變雅之遺也。忠厚如宋。而蘇子瞻猶以詩下獄。至白樂天爲樂府。諷時政。遂召入翰林。唐詩所以不可及者。豈獨字句之工哉。其議論有根據而不苟同。多類此。靜叔旣沒。同學私謚之曰孝悼子。

論曰。禮言毀不滅性。懼人之過情而忘其身也。雖然。古之執喪。水漿不入口者三日。擗踊無數。杖而後能起。其守禮而不勝喪者。固宜有之矣。孝子之事親也。知盡禮而已。生死非所計也。予旣嘉靜叔之孝。又悲其有志於古人之學。而天不假年。遂以毀死。乃爲敘其事。毋使無述於後云。

奚孝子傳

予嘗讀南史。載會稽郭世通。仁孝之風。行於鄉鄰。鄰村大小。莫有呼其名者。而其子原平。又稟至行。宋元嘉中。勅改所居獨楓里爲孝行里。及游浙東。訪永興之故址。未嘗不想見其人。羅店在吾邑之東偏。今析

屬寶山縣。故民奚士本秀林。以孝行旌門閭。自其未旌之先。鄉里無不知有奚孝子者。秀林歿。而其子緝營。又以孝稱。鄉里稱奚孝子。與昔無異也。吾鄉有郭原平。而不爲表而出之。可乎。緝營字聖輝。幼入塾。從師受業。講論語至父母之年。不可不知。輒歔歔隕涕。師大奇之。曰。非是父不生。是子成童時。母沈邁疾。醫云難治。緝營潛剖麩肉作湯。以進母。果瘳。及授室後。母病革。夜偕其妻朱。向北斗稽顙。乞減算以代。母既歿。緝營常宿父所。秀林年七十餘。冬月惡寒。緝營夜抱父足達旦。父歿。或勸以入粟求仕。則曰。吾父以貧廢學。布衣終身。吾敢納粟希頂帶乎。兩弟早歿。撫遺孤如所生。女兄嫁某氏。貧不克自存。同堂妹適某氏。早寡。皆依緝營以活。分宅居之。而婚嫁其子女。皆承秀林之志也。其它剏義學。平糶施糶。多可紀者。寶山令李公元奮。田公聯芳。皆嘗題扁贈之。子增慶亦能亢其宗。昔原平爲郡守。蔡興宗所敬。欲舉其次息爲望孝。史家以爲美談。今緝營老矣。當事有舉會稽故事。求望孝於奚氏。其必在增慶矣夫。

周山人傳

山人姓周氏。諱顯。字晉瞻。芷巖其自號也。世居嘉定城南。性磊落不羈。而未嘗與物忤。家無儋石儲。而未嘗以衣食累人。讀書不應科舉。而於畫獨有神解。仿古賢山水人物。皆精妙。尤好畫竹。興酣落筆。風枝雨葉。無不曲肖。吾邑自朱松隣父子。以畫法刻竹。厥後有沈兼。吳之璠。周乃始諸人。皆精其藝。山人更出新意。作山水樹石叢竹。用刀如用筆。不假稿本。自成邱壑。其皴濃淡坳突。生動渾成。畫手所不能到者。能

以寸鐵寫之。當時以爲絕品。山人亦雅自負。其運刀時若絲髮未稱。意雖垂成。亦斧以斯之。山人多髯而善飲。自號髯癡。富人慕其畫。或致金幣。不卽得。偶然欲畫。畫成隨手乞人。無矜色。人有延致之者。或留半年數月。或到卽辭去。嘗游齊魯間。與單朱翁交。相得。朱將往江南。山人附其舟歸。朱之兄方令嘉定。山人不知也。抵吳門。始知之。不告而歸。朱令異而訪之。避不見。逮朱去任。卒於蘇。乃幅巾往弔而哭之。其介特多此類。少時嘗病瘡。一夜醉歸。逢老叟衣冠甚異。出一丸藥啖之。五藏皆煖。忽失叟所在。經昔猶有異香。自是宿疾盡去。終身無纖介之疾。年八十餘。善飯健步。不異少年。乾隆三十八年卒。年八十九。族子笠字牧山。亦工畫山水。晚以藝事游淮揚間。諸公爭出重價購之。吾鄉近日言畫者。稱大小周二。

方節婦傳

方節婦毛氏。常熟方炳先之妻。炳先死。節婦慟幾絕。意若不欲生者。舅姑止之曰。若死。奈兩老人與弱子何。節婦乃不敢言。比葬。將奠於墓所。家貧。僅以一筐載兩肴。而無執筐者。計莫出。或欲試節婦志。謂曰。若能守邪。若卽執筐行。不能守。毋徒自苦爲。節婦卽執筐涕泣之墓上。立雨中。向墓呼號。誓終身爲方氏婦。觀者咸太息。有泣下者。其事舅姑有禮。終身無詬諍聲。所事姑。炳先之後母也。以哭子失明。節婦晝夜舐之。數月。一目復明。子曰。恆益。少時節婦教之極嚴。嘗曰。人謂孤子當姑息。吾意殊不然。子不才而貽先人羞。乃不如無子也。節婦年二十九而寡。至九十七乃終。子孫遂昌大矣。雍正元年。有司上其事於朝。有詔。

旌表建坊於阜城門外。乾隆二十二年，節婦之孫春熙，以進士官吏部，請假省父母，拜節婦於堂上。時年九十餘，視聽猶不衰。僉曰：節孝之報也。以孫貴，推恩累贈宜人。論曰：予聞常熟梅李鄉有方孝子煥，先嘗割股醫其父，問之吏部，乃知卽炳先弟也。夫子事後母，能得其歡者，尠。方氏之後母，哭子至於失明，知炳先之善事其親矣。節婦能成其夫之志，事尊章，撫藐孤，支持數十年，以昌其後，其高行安可及哉。

夏烈女傳

烈女夏氏，吳縣廩貢生開鸞之孫，儒士汧之女。世居太湖濱之金墅鎮，幼有至性，父母甚愛之。許字長洲王本石，未昏而本石夭。烈女聞之，卽不飲食，母令之食，以不飢對。母察其舉動如常時，弗之防也。其夜，母已就寢，烈女易衣裳，縫紉上下，連屬訖。褰母帳視之，母問兒何不睡，曰：欲再看吾母耳。又至弟妹所，泣下。若將別者，歸至房，自經。家人莫之知也。詰旦，戶未啓，母呼之不應，排闥視之，大駭，比斂，顏色如生，衣領間微露紅紙，出之，則王氏聘帖也。時乾隆十四年四月廿六日，年二十有六。又六年，本石兄衣言迎其柩合葬烏龍山之南麓。癸丑秋，顧子禮璜爲予述其事，去烈女之歿四十餘年矣。

論曰：女子之義，從一而終，女而未嫁，聖人固不以從一之義責之也。而或終其身不肯字，甚且甘以身殉，彼其誠一之至，視死如歸，務求乎心之所安，是亦巾幗中之夷齊矣。夫孝與節一也，女之孝者，莫烈於曹娥，先緒是兩女者，豈非可以無死者哉。君子不強人以所難，而尤樂道人之善，此予所以賢烈女而樂爲

之傳也。

施節婦傳

節婦朱氏。□□人。處士企汾之女。年十五。嫁國學生施鎬元。鎬元長節婦五歲。幼有羸瘵疾。數咯血。久之。疾且殆。節婦手自調藥。焚香願以身代。終不起。節婦痛夫不年。且無子。泣不食。舅姑撫之曰。汝夫家嗣也。異時聲洪有子。當以後汝。汝其勿悲。聲洪。鎬元仲弟也。又六載而聲洪生子克仁。既咳而名。卽養於節婦所。克仁稍長。就傅。還必問晝所讀何書。燈下課之覆誦。節婦紡棉花遲之。書聲與軋車聲常相答也。其事舅姑甚謹。姑疾。侍左右不解帶者三年。及卒。號泣曰。吾早寡。依姑以活。姑死。何以生爲。每朝夕奠。輒嗚咽失聲。族鄙咸哀異之。節婦今年四十有六歲。守節者三十年。

論曰。古之稱婦德者。曰德言容功。而節義不與焉。不得已而以節義稱。非女士之所樂聞也。雖然。共姜之詩。列於經。班昭之誡。著於史。以閨閣之賢。而令所天姓氏。藉以不朽。其榮多矣。施上舍聲洪。博聞耆古。與予善。爲述節婦事甚備。故采而著之。施氏世居吳縣之洞庭山。今爲嘉定人。

節行錢孺人傳

孺人姓錢氏。嘉定縣外岡里人。歲貢生巢縣訓導麟之曾孫。太學生衍之孫。太學生楷之女。而寶山學附貢生朱鐘勳之元配也。幼而端靜。不苟言笑。祖母曹太孺人特所鍾愛。八九歲。通孝經及女誡。稍長。習鍼

齋不假女師。自然精妙。其歸於朱也。事尊章以禮。親戚咸稱爲賢婦。鐘勳者古能文。有聲庠序。讀書率至夜分。孺人親縫紉。或紡木棉。篝燈相助。未嘗有勍色。洎夫亡。孺人方娠。慟哭誓以身殉。姑王太孺人力止之。越三月。免身。泣謂姑曰。吾事畢矣。撫棺一慟。氣息垂盡。亟延醫診之。曰。心脈絕矣。遂卒。年□十□。子淮。太學生。

太史氏曰。孺人於予爲族姊。予幼時隨侍先奉政公館。族父家。孺人尙在室。所居甚偪仄。言笑之聲。未嘗聞於外。足跡未嘗一踰闔也。古者嫠婦稱未亡人。蓋同穴之誼。勇於速死。孺人方盛年。家計饒裕。而志在從夫地下。之死靡悔。其節行有足多者。紀之彤管。何謝古人哉。

吳孝婦傳

吳孝婦徐孺人。先世自錢塘遷於吳。祖大晟。誥授中憲大夫。父宗潮。早世。孺人幼習詩禮。有識度。大父欲試之。召諸女及女孫輩。陳珠琲於几。令各自擇取。孺人最後取其下者。年十九。歸同邑國學生吳廷鏗。事舅姑如父母。姑嘗遭危疾。閱數醫不能治。孺人潛取金刀。剗臂上肉二片。急投湯劑中。血流霑袖。姑服之得瘥。孺人初不自言也。及姑歿。哀戚盡禮。率娣婦持門戶。壹遵先姑遺規。兩小姑在室。撫視教導。以至遣嫁。雖慈母弗是過焉。敬事夫子。內政嚴飭。所生子女。雖甚愛。有小過。未嘗假以詞色。每誡諸子曰。汝曹讀聖賢書。勿視爲口頭語。出言毋詛。坐立勿跛倚。小節不謹。卽下流之漸也。性寬厚。善遇婢使。壺外不聞鞭

答聲於乳媪之子。必時其飲食。曰：若舍若子而食吾子。吾忍飢若子乎？年三十有二卒。時乾隆四十四年四月二日也。有子三人：嘉泰、長洲、縣學生。嘉濟、嘉源、國學生。季子嘉淦。側室所生也。

論曰：自唐陳藏器本艸拾遺。言人肉可療瘵。而刳股者。遂不絕於史冊。獨昌黎韓氏排之。以爲毀支體。非聖賢所爲。是大不然。夫忠孝一理也。納肝漆身之事。聖人未嘗爲。而後世罕有議其非忠者。何獨於親而惜其肌膚。況肌膚本受於親者乎。自古求忠臣。必於孝子之門。重責人以忠。而靳予人以孝。非持平之論也。昌黎之論。特謂朝廷不當旌門以表異之耳。匹夫匹婦。行孝於家。豈冀異日之褒揚而爲之。雖不旌其門。其孝自不可沒也。嘉泰從子游。有志讀書。想其母懿行。弗彰。請予爲之傳。予故題之曰孝婦。亦遵前史之例云爾。

此页空白

潛研堂文集卷四十一

碑

紀王廟碑

由嘉定城而南五十里。吳松江之陰。有紀王廟者。祀漢紀將軍。村人奉以爲土地之神。吳俗祀土地神多稱爲王。曰紀王者。從毗俗之稱也。謹按王以身死事。免漢高帝于大難。智勇忠義。赫赫在人耳目。滎陽立廟祀之。世世血食。若大江以南。疑王生平足跡所未至者。予讀陸務觀渭南集。載乾道元年直敷文閣知鎮江府方滋言。府故時祀紀侯爲城隍神。莫知其所由始。然實有靈德。以芘其邦人。願有以褒顯之。有詔賜廟額曰忠祐。則王之廟食江南。由來舊矣。紀出自姜姓。子孫以國爲氏。漢初有紀成者。與王並爲將軍。一死好時。一死滎陽。史漢皆不爲立傳。莫詳其里居世系。成子通。以父死事侯襄城。而王之後嗣無聞。意者史家表次功臣。猶有漏落歟。抑以無後而賞不及歟。將漢誠少恩。妨功害能之臣。抑其賞而不行歟。然傅靳蒯成之傳。具在。讀史者罕能誦其全文。獨王之事。閭巷皆能言之。可知垂名之遠。不在乎列傳與否。襄城之侯。閱四世以無後國除。而王廟食百世。始自滎陽。逮于江左。又知食報之長。不在乎得侯與否也。

然則天之所以待忠義者固不厚乎。予少時授徒塢城東顧氏。往來過斯廟。拜謁神像。肅然起敬。屈指垂三十年矣。乾隆甲午夏。村中耆老寓書京師。令予文其麗牲之石。因作神絃曲。俾春秋歌以侑祀。其辭曰。神之來兮雲間。風颯颯兮晝寒。黃屋兮左纛。呼萬歲兮前導。憤王兮重瞳。玩之兮掌中。身雖焚兮不朽。立廟食兮長久。江之南兮東海涯。魂魄游兮無不之。聰明兮正直。尸而祝兮社而稷。神具醉兮福我民。俾孝弟兮睦婣。不鬪兮不訟。朝出耕兮夜誦。木棉黃兮藍艸青。嘉穀蕃兮蟲不螟。操豚蹄兮報祀。歲其有兮自今始。

甘肅提刑按察使司按察使宋公神道碑

公諱弼。字仲良。別字蒙泉。山東德州人。先世有諱性者。仕明至刑部右侍郎。佐夏原吉治浙西水利有功。曾祖炳。肅州兵備。按察司僉事。祖兆李。郟城縣教諭。贈儒林郎。父來會。贈奉政大夫。公少而英特。補博士弟子。歲科試。恆屈其儕。故事。學使者間歲拔諸生之秀者。州縣學各一人。貢成均。自郟城至公三世。皆登斯選。士林榮之。乾隆三年。舉順天鄉試。十年。成進士。改庶吉士。散館。授翰林院編修。未逾月。御試乾清宮。入高等。方擬擢用。以父憂去職。服闋。還朝。充武英殿提調。續文獻通考纂修官。以省母請假。家居數年。事生送死以禮。還朝。署日講起居注官。扈從南巡。宣示御製詩。輒與賡和。再充續文獻通考纂修官。同事十數人。皆公後進。徵文獻者。咸以公爲歸。性勁直。不隨人俛仰。酒酣縱談古今。意氣豪邁。然非先哲法言。不

道也。錢塘梁文莊公總裁書局。論議或與公不合。公往復辨證。必盡其說。文莊始雖愠而卒推服之。二十八年。御試正大光明殿。引見。有旨令以原官休致。而總裁諸公合詞奏公學問篤實。著述專勤。請留之。書局由是供職如故。三十年。遷右春坊右贊善。其秋。授分巡鞏秦階道。陛辭。召見。奏事大稱旨。到官。卽往伏羌。徵禮諸縣。察地震民被災者。振之。明年。調整飭甘肅道。所治在嘉峪關內七十里。當西域孔道。使者往來無虛日。公訪問西域風土物產。古人所未紀者。各綴以詩。凡百篇。募民願徙烏魯木齊者。得三百戶。公親勞而遣之。出關無一人滋事者。盜匿高臺山。詭云采金。旬日聚三百餘人。公聞之。親率兵仗捕其魁。置之法。雪山文殊口水暴至。注肅州南郭。壞民廬舍。公登城具牲牢爲文祭之。水果止。玉門之牛尾山出硫磺。朝議令肅州募民采煉。以供巴里坤軍用。初未有定數也。州募商煉得三十萬斤。報布政司。司移問安西提督。則荅以歲需不及二千斤。而州續得磺又三十五萬斤。有奇。布政司以州擅動庫銀。所貯磺無所售。日久且黷敗。將責償于官吏。公檢州庫舊磺經三十餘年無黷敗者。乃上議制府曰。安西重鎮也。儲火藥宜多。提標諸營。歲取磺巴里坤哈密二庫。儲之可補官庫之乏。頃聞烏魯木齊遣人購磺肅州。是安西歲需不止二千。宜於玉門縣貯三十萬斤。以待安西各標。及烏魯木齊之用。甘肅提鎮兩標。歲取磺肅州。州見貯僅支三四歲。宜分二十萬斤貯之州庫。又甘肅所屬諸鎮。皆于蘭州買磺。州存磺亦少。若令赴買玉門。而減直以予之。則餘十五萬斤。亦可分銷。議上。事得行。果便。公之通達政體多此類。三十三年三月。

擢甘肅按察使。下車益以廉公自持。與僚屬言必咨民生利病。課政之勤惰爲殿最。而痛抑其奔競者。治案牘。恆至夜分。不假手賓友。嘗行金縣。有司供張甚盛。答其僕而撤之。公具奏。請陛見。旣得旨。以九月上道。行至洛陽。遘疾。十月二十九日卒于寓舍。春秋六十有六。啓其槨。無餘財。故人子知洛陽縣張君映台。實經紀其喪云。公少以才名雄齊魯間。登館閣二十年。優游著作之林。若將終身。及聖天子付以方岳之任。正身率下。事有利于官民者。排羣議爲之一矯。俗吏媵嬰。醜靡之習。天奪之年。未竟其用。要古所稱有守有爲者。公實兼之。世多訾儒生迂闊。不通世務。豈不謬哉。公之學博而醇。詩文皆有法度。所著詩集八卷。思永堂文稿四卷。撰集山左詩百餘卷。廣川詩鈔二十卷。州乘餘聞二卷。家故貧。教授生徒自給。旣貴。弟子著錄益衆。分教庶吉士凡三科。恆以師道自尊。少所假借。家居時。巡撫白公鍾山。延主灤源書院。遠近負笈從之。公教人爲文。尙先正程式。勿逐時好。而取科第者轉多。歲己卯。大昕典試山左。榜出。書院生中式者十有八人。公喜甚。貽以詩。有云。伊予久伏處。馮軾觀羣閥。決勝卜其長。億占每幸中。亦一時美譚也。夫人劉氏。賢而能治家。先一歲卒。子二人。荔藻。女三人。以三十五年三月戊寅朔。合葬于馮家砦祖塋之次。先期。公之長婿張子治。致書乞銘公墓道之石。大昕於公爲後進。同在書局。又同直講筵。與公爲文字交有年。故不敢辭。銘曰。

猗宋氏。哲人繼。漢司空。唐太尉。公之先。潞長子。徙安德。今幾世。學早成。五經笥。少所可。寡所嗜。老著作。師

後輩文章醇。經濟備。秦隴西。國右臂。撫吏民。布威惠。古存百千歲。

爲徒宦亦遂。生也直。視松楸。鬱佳城。長河裔。其人

鎮守江南狼山總兵官左都督前提督廣西全省

軍務總兵官許公神道碑

鎮守江南狼山鎮總兵官前廣西提督易州許公之葬其

孤子宏猷。清猷。宣猷。等。既請禮部侍郎倪公承

寬爲銘。納隧中。復踵予門。泣請文其神道之石。予以內直。

無暇。久不克爲。而清猷等請益勤。乃列公生平

言行尤著者。俾歸勒石。以慰孝子之思。公歛人也。自曾祖榮

祿公始徙保定之滿城。後又徙易。三世皆以

公貴。封贈階至一品。公以乾隆元年登進士。授御前侍衛。歷

江西贛州左營遊擊。廣信營參將。廣東督標

左營參將。肇慶協城守副將。調廣東督標中軍副將。以太夫

八憂去官。服除。補湖北黃州協副將。擢鎮守

江南壽春總兵官。調江西南贛總兵官。遷提督廣西全省總兵

官。以公事註吏議。當鑄級。仍授江南狼山

總兵官。積階至榮祿大夫。春秋六十有一。終於通州官舍。公歟。

歷中外三十餘年。精勤如一日。文武僚屬

皆推誠相與。終始無間言。視兵民一體。未嘗以刻覈從事。其在

信。遇歲旱。米價翔踊。民待賑者十室而

九。郡守適以事它出。知縣不敢任其事。公遽以狀白行省。出積穀

數千斛。減價糶之。民乃得安。在肇慶日

增城。民王亮臣等聚衆謀逆。公奉制府檄入藍分華峯諸山場。搜

沈巢穴。皆駢首就擒。無一漏網者。公初

莅贛州。有威惠。及總戎南贛。兵伍聞公至。皆相戒曰。勿欺許公。粵

左控交趾。右界滇黔。蠻獠錯居。瘴癘

時作公巡歷兩鎮七協及諸土司關隘。率兩歲而徧。輕裝減從。未嘗以供億滋累。柳州駐節之所。秋冬恆多火災。公閱城廂內外多艸舍。而兵士所處什居六七。卽奏請支公庫生息銀。假與兵士。令各以陶瓦覆屋。行之數年。火患遂止。公又以效力武舉難。以得缺。因與制府議。計通省千把。出五缺之後。補用武舉一人。又以粵西距京遼遠。部推武職。到任。動輒經年。事多稽閣。奏請照它省預保之例。得旨允行。大兵之征緬甸也。詔粵西協濟戰馬。先後凡二千餘匹。公督率所屬。具芻藁以次遞送。又致火藥數萬斤。並如期而至。公又陳請赴永昌軍營自效。上以粵西要地。資公彈壓。優詔不許。公在狼山。夏旱。率屬步禱烈日中。已而得雨。盛暑。親至海口呂四場閱水師戰船。教以陣法。竟以積勞成疾。至不起。嗚呼。可謂勤于王事也已。公事親孝。方在宿衛。聞父榮祿公之訃。一晝夜馳三百餘里。至家。號慟欲絕。季弟蚤卒。撫其孤如己出。居鄉。恭儉退讓。嘗訪友郊外。乘一騎。一童子自隨。見者不知爲貴人也。其它敦交好義。多有可稱述者。不具書。公諱成麟。字瑞符。號慶堂。考存智。祖考天霖。曾祖考有倉。皆未仕。夫人同里崔氏。生子二人。國學生。宏猷。附貢生。清猷。側室畢孺人。生子二人。國學生。宣猷。徽猷。女四人。皆適士族。孫二人。元會。保定府學生。元愷。曾孫一人。其葬以某年月日。銘曰。

桓桓許公。萬人俊。敦詩說禮。學自奮。胸藏六韜。演八陣。對策大廷。科第進。宿衛三殿。恭以慎。進止位不失。尺寸。宣力江右。初啓輒。分閩嶺。外益有聞。帝眷優渥。方鎮肘。後常繫斗大印。令肅千軍。整鞮鞞。惠孚百

城頌齟齬。灘江清深。狼山峻。紀公威德。磨不磷。服官千載。篤忠藎。甲子甫周。數何靳。佳城鬱鬱。松柏隱。我文紀實。可傳信。

封資政大夫大理寺卿加十四級王公神道碑

大昕弱冠後。卽從當代賢士大夫游。竊取其緒論。得粗知古人立言之旨。其交最久而莫逆於心者。則今大理寺卿王公昶也。所居相距不百里。嘗扁舟往訪。升堂拜母。修子姓禮。大理嘗語予曰。吾先子志希古人。不求聞譽于世。每言孔門四科。言語政事文學皆在德行之次。顏子居陋巷。終日不違如愚。孔子獨贊其賢。謂羣弟子莫能及。漢黃叔度。徐孺子。管幼安。皆終身隱約。而行誼在三公之上。蓋行之修者。於人世文章功業。有弗藉焉。而富貴利祿。更無足言矣。大理又言。某就傳後。每夕。先子輒授以通鑑事十數條。次夕。令覆講。必精熟乃已。又取古來名臣碩儒。自屈子而下。訖于明季。凡百有二十人。手錄其本傳。俾誦習之。題曰百世師錄。某謹藏篋中。月讀一過。手澤尙如新也。大昕旣重大理之賢。因是知其淵源有自。大理以進士召試。入官典司樞要。出參滇蜀軍事。飛書艸檄。出入矢石間者十載。及愷旋敘功。進登九列。以文臣賜戴孔雀翎。恭遇孝聖憲皇后升祔禮成。覃恩。誥贈其考資政大夫大理寺卿。加十四級。今春從駕有事。泰東陵。還朝。乃上書陳情請假。歸治先人窀穸事。天子嘉許。卽於二月奉太夫人還里門。卜以七月壬辰。葬資政公于崑山縣之雪葭灣。以元配陸夫人祔。從先人之兆也。先期具書狀請大昕爲文表於神道。

昔歐陽子瀧岡之表自爲之文大理今之歐陽子也乃不自爲而求之友者謙也中朝鉅公之能文者多矣獨求之家居退閒之故交欲其可信也大昕雖不文其何可辭謹按資政公諱士毅字鴻遠曾祖懋忠自浙江之蘭溪遷於青浦城西十八里珠家角蓋在泖水之陽祖之輔考璵皆以大理貴累贈至資政大夫公九歲而孤奉母沈太夫人日必具酒肉自奉則取其最艱者伯兄出爲人後而貧不自給常分錢米遺之仲兄沒無後公歲時設主祭必泫然流涕其治家有法婢子年十四五以上不令侍左右旣長貧不克贖者還其券而遣之里中無賴子挾小嫌過門戟手罵遣人謝之弗與校好行善或授以功過格守之數年忽曰此道家言也儒者自有法乃擇六經語類而列之以爲謹身寡過之方其目十有二自是動中規矩行無瑕尤幾于古之不言而躬行者公卒於乾隆九年八月二十二日春秋六十四初贈文林郎內閣中書舍人加一級再贈奉直大夫吏部考功司主事加一級三贈至今官娶陸夫人後公口年歿春秋口十有口初贈孺人再贈安人三贈夫人側室錢氏初封太孺人再封太安人三封太夫人有子一人卽大理公也孫女一適吳縣監生嚴榮銘曰

圓泖之水黝而深清冲然善下潤物無形允矣君子如水不竭潔匪近名虛能容物以古爲師與天爲徒環堵蕭然樂亦在吾德修于身克昌厥後綸誥蜜章襲及祖考井棹旣卜樂哉斯邱鄉里聚觀車前八騶富貴匪榮文行是尙飲水知源百世是仰

詹事府詹事盧公神道碑

詹事盧公之葬也。其孤孫達蔚。不遠三千里。踵予門。求文志其墓。又請爲文刻諸墓道之石。某舉禮部試。謬爲公所薦。及登館職。公又爲教習。旣而同直講筵。同列學士。公嘗舉歐公與王禹玉事。作詩見贈。又嘗置酒召門下士。從容言身後之文。當屬之錢生。在苒二十年。公久歸道山。而某亦衰病。脫朝籍者數年矣。言猶在耳。其敢忘諸。謹按公諱明楷。字端臣。晚年以鈍齋自號。世居贛州之寧都縣。今縣升爲州。直隸江西行省。故公爲州人。由選拔貢生。中順天鄉試。授翰林院待詔。登進士第。改庶吉士。授編修。遷侍讀。又遷侍講學士。復左轉侍讀。進右春坊右庶子。復爲侍講學士。此公之資歷也。初入武英殿充校對。後由纂修提調而至總裁官。初入詞館協修記注。尋爲日講起居注官。由署而充。在講幄十有四年。嘗預刊修經史。及律呂正義續文獻通考。昭忠列傳。皆爲纂修官。主陝西河南兩省鄉試。及順天武鄉試。及同考會試。總裁武會試。教習庶吉士。稽察右翼覺羅官學。提督河南學政。此公之差遣也。諸館纂修官。皆詞臣久次者爲之。公以貢生。校刊經史。特與纂修諸公一體列名。公爲庶常日。遇慶典。推封祖父。同輩廕得從六品階。公獨以前修書議敍加級。得五品誥。樂部向以諸王部院大臣兼領。公在侍讀。奉旨撰擬樂章。特兼樂部行走。其爲學士也。適閣學多奉使在外。卽命公直內閣。代閣學批本。此公之榮遇也。公少而孤露。苦志植學。以成其名。博習經史。蘊釀爲文詞。法度必準先民。相國蔣文恪公慕其名。延致之。凡經進廣和之作。多

屬公點定。在詞館。遇大典禮。進賦頌。輒爲諸公傳誦。尤精於律呂。清濁高下。審辨不失毫黍。所撰樂章。播之管絃。列於法部。此公之文藝也。公於制義。鑒裁精審。每入棘闈。焚膏校閱。惟恐不及。故所甄拔。號稱得人。在中州視學。抑浮競。崇實學。所選拔士。皆擇其名實相副者。此公之鑒識也。公和平樂易。善戲不虐。雖家人未嘗見其疾言遽色。朕審于義利之辨。苞苴之餽。不至其門。梯媒之語。不入于耳。家無長物。而口不言貧。尊師重友。久要不忘。旣沒而故交。知舊多行哭失聲者。此公之厚德也。公生于康熙四十一年九月八日。終于乾隆三十一年八月十五日。春秋六十有五。其葬以乾隆四十七年十月二十六日。夫人曹氏。祔焉。其世系子姓之詳。則於墓志見之。故不復書。銘曰。

金精翠微。峨峨百丈。是生偉人。儀觀儁朗。囊括百氏。擷其菁華。大放厥詞。而法而葩。有司拔尤。升之太學。遂直內殿。經史分校。律呂之編。公與考稽。荀阮房范。宿悟與齊。迺舉京兆。待詔禁苑。擢第南宮。載登三館。鸞頭侍直。職在記言。曲江風度。中朝聚觀。再踐學士。論思清切。出持冰鑑。入趨瑣闥。天子有命。汝長宮僚。文學侍從。班資最高。公今已逝。公名不沒。茶山之詩。容齋之筆。陽都城南。鬱狀新阡。達者有後。相爾嗣孫。

宗人府丞曹公神道碑

宗人府府丞汾陽曹公學閔之葬。禮部侍郎朱公珪。旣爲銘其藏。而公子錫齡。祝齡。復遺書請予文。其麗牲之石。予與公同登進士。久而以道義相取。譬諸艸木。臭味無差池也。公又嘗稱予文。以爲有法。述德感

舊後死者之責。其何敢辭。謹按公字孝如。號慕堂。曾大父復琦。大父應璽。父曰英。皆以公貴。贈中議大夫。太僕寺少卿。加一級。公幼孤。勤苦自立。舉辛酉科鄉試。甲戌成進士。改翰林院庶吉士。在館六年。授檢討。即充武英殿纂修官。以院長奏入院辦事。改補河南道監察御史。是時準噶爾回部初入版圖。公奏請增修大清一統志。以昭本朝畏懷之盛。有詔允行。轉刑科給事中。又轉吏科掌印給事中。會三輔亢旱。公奏請清理刑獄。將朝審三次。緩決人犯。減等發落。即日召見。下詔施行。公在臺垣八年。所陳奏皆有闡朝廷掌故。及於民生吏治有裨益者。累擢鴻臚寺少卿。光祿寺少卿。通政司參議。太僕寺少卿。初公在給事。言會試舉人宜徑由州縣出結送部。以防展轉需索。事下禮部議格。及是復奏。申前說。上以卿寺無言事之責。且近明季爭辯陋習。下部議。降三級用。頃之復補鴻臚寺少卿。扈蹕熱河。召見。詢歷官本末甚悉。尋遷內閣侍讀學士。會天子勅建辟雍。告成。將行臨雍禮。而公昔於御史時。曾以此事入告。上憶公前奏。特旨嘉獎。令吏部於應陞缺出。請旨擢用。明年正月。詔於乾清宮賜千叟宴。公年六十有七。得預。有御製詩刻。及鳩杖文綺之賜。尋擢宗人府府丞。稽察覺羅右翼宗學。九寺列卿。惟宗丞班次最高。公由學士躡次得之。實異數也。公體素羸弱。中歲得導養術。神氣完固。而素不耐寒。嗽逆時作。遂有止足之志。是歲十月。陳請解任。詔以元官致仕。公性耽山水。未第時。往來吳越。縱游東南諸名勝。及登仕籍。三十餘年。公事之暇。輒與三四知己。出國門游賞。如潭柘。戒壇。祕魔厓。香界寺。往往流連信宿。或策蹇行冰雪中。觀者以爲神。

仙中人治家質素金玉玩好之具不陳于側午後輒掃地焚香觀心調息超然有塵外之想生平不臧否人物而胸中界限分明嘗曰人各有所偏但當棄短取長否則無一人可交矣詩文皆摭寫性情不事藻飾晚年課子讀書尤以浮華馳逐爲戒故諸子咸以文學自奮公雖移疾脫朝簿而長子方官詞垣侍養如意公旣樂而安之因令次子旋里營菟裘爲終老計旣而喘嗽加劇以乾隆五十有二年十二月八日終於京邸春秋六十有九夫人任氏丁酉科武舉宗讚之女長子錫齡乙未進士翰林院編修次祝齡己酉恩科進士戶部額外主事孫八人汝淳汝瀾汝淵汝沆汝洵汝涵汝藻汝淳孫女五人公學行誠篤未嘗讟訐求名而居家莅職清慎無玷當代名流咸慕與之交而介然不可干以私在都下時正陽門外失火延燒數千百閒鄰里焦燬殆盡獨公屋巋然無恙人以爲厚德之報云銘曰

宗正之司總以維藩承哉其貳三品崇班堂堂曹公樂易坦白木天瀛州柏臺梧掖敷歷五寺遂陟宗卿介不絕俗直非近名公有封事天子嘉只公旋引疾天子兪只知止不殆老氏所云葆真恬淡以養谷神億同唱第二百四十唯公與我氣同志合聞義相告有過亦規四海元伯千秋鍾期恆榦雖辭令譽長在馬鬣是封過者下拜

潛研堂文集卷四十二

墓誌銘一

巡撫福建兵部右侍郎都察院右副都御史前太子少保協辦大學士刑部尚書莊公墓志銘

上御極之四年。詔以廷試進士。撰擬頌聯。獻諛非體。且啓請託之弊。命大臣集議。制策當取通達治體。以漢鼂錯。董仲舒。唐劉蕡。宋蘇軾。爲式。於是番禺莊公。以第一甲第一人登第。讀卷日。拆號得公名。天顏喜甚。引見。授翰林院修撰。入直南書房。越三年。公弟有信成進士。引見。公適以起居注官侍直。上顧問公。遂得選庶吉士。其冬。兄弟同請告歸省。海內傳爲盛事。假滿還朝。遷右春坊右中允。進翰林院侍講。遷侍講學士。擢光祿寺卿。丁資政公憂。卽家拜內閣學士。服闋入都。遷兵部右侍郎。提督江蘇學政。轉戶部右侍郎。召還供職。尋充江南正考官。再視學江蘇。卽除江蘇巡撫。莅事六載。丁太夫人艱。扶柩南行。有詔擢江南河道總督。以居憂未之任。坐在蘇日罰贖事失當。逮繫法司。論如律。詔特贖罪。令護喪還籍。後赴軍臺自効。方詣謫所。中途卽授湖北巡撫。歲餘仍調江蘇巡撫。未行。復調浙江巡撫。莅事四載。復調江蘇。加太子少保。逾年擢刑部尚書。協辦大學士。仍留辦巡撫事。乙酉冬。入都供職。未幾。坐劾段成功事。逮問。頌繫

半載有餘。復授福建巡撫。乾隆三十二年七月二日。寢疾終於福州官署。享年五十有五。公以文學侍從之臣。荷聖天子深知。出膺節鎮。誓以清勤自勵。初在江蘇。晝接見僚屬。夜治文書。或至漏盡不少休。癸酉夏秋之交。淮揚諸郡水。公親往察勘。撫卹得旨。截漕百二十萬石。出帑銀五百萬兩。以備振濟。民乃得蘇。乙亥。大江南北復以災告。公草奏自言。奉職無狀。數干天和。并陳諸揀荒之策。上皆允行。所費內府白金凡千餘萬。督率屬吏。檢視給散。胥役不得侵漁。明年夏。民多病疫。公首捐俸錢。令有司察民病者。予藥。死者予槥。并檄管內。推其法行之。湖北督撫並駐武昌。公事往往齟齬。公在楚歲餘。與總督碩公和衷共濟。始終無間。人以爲難。及撫浙之始。浙西三郡以風雨蟲傷。米價騰踊。而江南亦歉。商販不至。公奏請動司庫銀三十六萬。委官往湖廣採買。有旨命留湖南漕米十五萬石。并碾倉米五萬石。連浙糶濟。富戶知楚米將至。價不得踊。米亦漸出。而自冬徂春。米之來自楚者。舳艫相望。分撥諸郡。減直以售。歲雖儉而民不饑矣。錢唐江入海之處。有三壘。曰南大壘。曰中小壘。曰北大壘。乙丑以後。水行中壘者十餘年。已卯歲。改趨北大壘。公承詔抵海寧。閱柴石塘。登尖山。渡江。周遭履勘。首以購芻薪。加築土堰。添建坦水。爲請。旣而水勢直齧塘根。以預備得無患。又奏復海塘兵。專司負薪。運土。整石。下椿。設守。備一員。千把。外委十二員。分界防守。省民夫無算。海寧之老鹽倉。向以土活沙浮。祇立柴塘。壬午歲。聖駕南巡。議改石塘。命相國劉文正公統勳。今相國高公晉。與公先往察勘。果以活沙不能立椿。上復親歷隄上。指示形勢。令修柴塘。增

坦水加薪價。公承命鳩工庀材。尅期蒞事。又用前人竹絡之法。編竹爲篾。寔以巨石鱗次櫛比。以衛塘根。其秋風潮大作。石塘間有崩裂。而柴塘獨無恙。公之力也。是時秋霖之後。水漲久不退。公親往嘉湖兩郡。察勘。知水歸太湖之道多淤。而太湖下流亦多壅闕。因請浚烏程長興境內七十二澗。并遣官至江南。按行三江故道。疏入。尋有改撫江蘇之命。公遂親往探尋脈絡。得其要領。建議大修三江水利。具摺入告。其略云。太湖北受荆溪百瀆。南受天目諸山之水。爲吳中巨浸。而分疏之大幹。則以三江爲要。三江者。吳淞江。婁江。東江也。東江自宋已湮。明永樂間。別開黃浦。寬廣足當三江之一。今亦謂之東江。三江分流。經吳江。震澤。吳元。崑山。新陽。青浦。華亭。上海。太倉。鎮洋。嘉定。十二州縣之境。其間港浦縱橫。湖蕩參錯。大概觀之。無處不可分洩。似亦可安於無事。然百節之通。不敵一節之塞。數港之洩。不及一江之壅。其勢必有所阻。查太湖出水之口。不特寶帶橋一處。如吳江之十八港。十七橋。吳縣之鮎魚口。大缺口。爲湖水穿運。河入江之要道。今亦不無淺阻。又如入吳淞之龐山湖。大斜港。九里湖。澱山湖。溲浦。向稱寬深。足資宣洩。者。爾來小民貪利。徧植菱蘆。圈築魚蕩。亦多侵占。劉河。古之婁江也。今河形大非昔比。舟楫來往。必艱。舟待潮。崑山外濠。爲婁江正道。淺狹特甚。蘇州之婁門外。江面僅寬四五丈。偶遇秋霖。衆水匯集。江身淺窄。先爲潦水所占。俟其消退。然後湖水得出。爲之傳送。而上游已漫淹矣。東南財賦重地。水利民生大計。若及早治之。事半功實倍。今籌所以治之之法。當於運河以西。凡太湖出水之口。皆爲清釐占塞。俾分流

無阻。其運河以東。三江故道。惟黃浦見在深通。但於泖口挑去新漲蘆墩三處。足資宣洩。其吳淞江自龐山湖以下。婁江自婁門以下。凡有淺狹阻滯之處。宜濬治寬深。令上源所洩之數。足相容納。其江身所有植蘆。插斷。及冒占之區。盡數剷除。嗣後仍嚴爲之禁。則水之停蓄有所。傳送以時。並卽以挑河之士。加培圩岸。見有插座。去海太近。難於啓閉者。酌量改移。庶渾潮不入。清水盛強。而海口之淤。亦將不挑而自去。總計所需。雖覺浩繁。然散在十二州縣。通力合作。實亦無多。民間聞有此舉。咸樂趨事。願以民力爲之。但分段督修。仍須官董其成。且工費繁多。若待鳩集財力。而後興工。不無稍稽時日。仰懇聖恩。准予公項內先行動支興工。仍於各州縣。分年按畝徵還。則民力旣紓。工可速集。奏入報可。於是選紳耆賦工役。先疏橋港。次及河身。菱蘆魚蕩之圈占者。除之。城市民居之不可毀者。別開月河以導之。工始于癸未之十二月。至甲申三月告成。凡用白金二十二萬有奇。公再撫蘇。有旨仍兼管浙江海塘。先後增築魚鱗石塘。凡若干丈。松江太倉沿海亦有石塘。而土塘居什之八九。公請如浙塘之法。編竹篾。實石護塘根。以禦海潮。公之盡心于水利海塘。其大者如此。其撫福建也。預誠族人居晉江者。勿至省。卽至。遣門者謝之曰。我爲封疆大臣。嫌疑當避。且俟去此之日。再相見。今則不敢也。洎公之薨。晉江宗人始來會哭。咸稱公之公正。爲不可及。維公奮跡嶺海。以文學登巍科。不及十年。而躋九列。貳六卿。皆聖明親擢。不由薦援。天子察公識度闊遠。材任公輔。東南重地。膺委寄者十有餘年。入領尙書。遂參大政。中間兩遭顛躓。賴天子仁聖。終

保全之。重建節旄。恩禮罔替。天不假年。未臻中壽。然海內士夫。識與不識。聞公名。靡不歎羨。謂科目得人
之盛也。嗚呼休哉。公生而穎異。少爲諸生。試輒冠其曹偶。好吟詠。日有程課。書法圓勁。出入顏平原。趙吳
興之間。片楮隻字。人爭藏弄。以爲榮。在禁林日。經進詩文。數被獎賞。及車駕省方。公以方岳大臣。遽從。輒
命廣和御製詩篇。上幸嘉興之煙雨樓。特召公至行營。給札聯句。詩成。書以勒石。羣臣莫及焉。公諱有恭。
字容可。號滋圃。先世爲晉江望族。父資政公。始徙居粵。今爲番禺縣人。曾祖某。祖某。父奕仁。皆以公貴。贈
資政大夫。江蘇巡撫。夫人楊氏。某公之女子。一士斌。國子監生。女二。附貢生何文通。壬午舉人。龍川縣教
諭羅永楠。其婿也。公沒後九年。公子士斌卜窆窆於某鄉之原。以某月日葬。先期屬大昕爲銘。大昕久從
公遊。今奉使嶺南。又得會公之葬。奚敢以不文辭。銘曰。

九曜降精。生傑人。驪騮得路。鸞鳳窠。讀書百篇。筆有神。大廷對策。陳萬言。龍頭首擢。侍從班。文章經濟。夙
抱全。手持玉尺。分判均。三吳善類。推獎勤。帝曰汝諧。撫吾民。百城保障。氣若春。水旱拯恤。無因循。清波可
活涸。輟鱗築塘。捍海土石堅。或編竹絡。槌菱薪。震澤底定。三江分。原委脈絡。細討論。尾閭勿壅。流沄沄。惠
流越角。兼吳根。出乘八騶。擁節幡。入長六曹。參絲綸。平生溫飽。志不紛。盤錯歷盡。能自完。封川莫。南海倫。
瓊山邱。江門陳。科名事功。相後先。惟公兼之。在一身。崇岡鬱鬱。宰木繁。千秋萬歲。名不湮。

光祿大夫經筵講官太子太保刑部尚書秦文恭公墓志銘

太子太保尚書秦公。以經術篤行知名海內。起家詞苑。官登極品。歲甲申四月。以疾請解任。溫旨不許。八月。復具疏乞回籍調治。詔允所請。仍懸缺以待。公既受命。買舟南下。疾遂革。以九月九日己時薨于滄州。訃聞。天子軫惻。賜白金千兩。庀喪具。令有司議卹典祭葬如制。諡曰文恭。明年春。車駕南巡。至無錫。幸寄暢園。御製詩。有養痾旋里人何在。撫景愀然是此間之句。寄暢園者。公家別業也。上追念舊臣。形于翰墨。如此。公可以不朽矣。其九月。孤子編修泰鈞等將葬公于某原。先期遣一介走京師。述公遺言。請大昕爲文誌其墓。大昕于公爲年家子。又嘗主公邸第。日月不居。知己云逝。文雖不工。其何敢辭。謹按公諱蕙田。字樹峯。號味經。宋贈龍圖閣直學士觀之二十六世孫。世居無錫爲右族。雍正初。析無錫置金匱縣。故公爲金匱人。曾祖考德澄。祖考松齡。順治乙未進士。日講官起居注。左春坊左諭德。考易然。常州府學生。妣顧氏。本生考道然。康熙己丑進士。日講官起居注。翰林院編修。改禮科給事中。妣徐氏。胡氏。生母浦氏。三世皆以公貴。贈光祿大夫刑部尚書。妣皆一品太夫人。公以乾隆元年賜進士第三人及第。授翰林院編修。入直南書房。丁浦太夫人憂。服闋。補原官。教讀上書房。遷侍講。進右春坊右庶子。改通政使司右通政。擢內閣學士。遷禮部右侍郎。丁給諫公憂。服闋。補禮部左侍郎。調刑部右侍郎。轉左侍郎。兼理國子監算學。充經筵講官。擢工部尚書。兼理樂部。調刑部尚書。加太子太保。累階至光祿大夫。公至性過人。方未遇時。給諫公以藩邸事。牽連頌繫。十餘年間。檻車南北。炎雨悲風。吏卒雜前。公隨侍膝下。百方營護。夜分就

寢流涕交頤。然不令給諫公知之。及通籍之始。朝。廷赦書屢下。給諫公猶不得援例寬釋。公以新進詞臣。輒伏闕陳情。乞以身贖。其略云。臣本生父某。身罹重罪。已荷天恩曲宥。祇因催追銀兩。力不能完。仍行圈禁。迄今九載。年已八十。衰朽不堪。本年五六月內。侵染暑濕。瘡癩時作。寒熱交攻。奄奄一息。幾至瘵斃。羈所。情關骨肉。痛楚難忍。臣雖備員禁近。而還顧臣父。老病拘幽。既無完解之期。更無久存之望。方寸昏迷。不能自主。誠不忍昧心竊祿。內慙名教。伏惟皇。上矜慎庶獄。有一錢可原者。概予寬釋。當此聖明孝治之朝。更逢薄海祝網之日。惟有籲懇鴻慈。格外鑒宥。丐臣父八旬垂死之年。得以終老牖下。臣願革去職銜。効力犇走。以贖父罪。奏入。天語嘉歎。遂有寬釋之詔。而未完之銀亦併豁免。由是給諫公優游林下者又十年。公受詔感泣。誓以身許國。而上亦鑒公忠孝。有大用公之志矣。公在學士時。陳科舉學校六事。在禮部。練習掌故。夙夜匪懈。在刑部。執法平允。尤爲上所倚重。同僚或持異議。公援引律例。必如所擬。乃已。遇司屬。嘖笑不苟。其以才能見者。則薦引之不遺餘力。衆莫不憚其嚴而服其公也。公歿之後。部中讞獄。偶不當。上輒舉公名。歎惜不置。以是知公之盡心于職矣。公立朝三十年。治事以勤。奉上以敬。剛介自守。不曲意徇物。公退則杜門。謝賓客。著書不異爲諸生時。後進有通經嗜古者。獎借不去口。蓋天性然也。公幼而穎悟。及長。從給諫公子京邸。何屺瞻。王若林。徐壇長。諸先生咸折輩行與之交。中歲居里門。與蔡宸錫。吳大年。尊彝。龔繩中。爲讀經之會。嘗慨禮。經名物制度。諸儒詮解互異。鮮能會通其說。故于郊社。宗廟。宮。

室衣服之類。尤究心焉。上御極之初。江陰以偽文定公領國子監事。薦公篤志經術。可佐教成均。既而直內廷。課皇子講讀。益以經術爲後學宗。嘗言釋經者舍經以談道。非道也。離經以求學。非學也。故以窮經爲主。而不居講學之名。生平所爲文。號味經窩類稿者。凡若干卷。而說經之文居其大半。公夙精三禮之學。及佐秩宗。考古今禮制。因革以爲禮。自秦火而後。漢儒保殘守缺。什塵存一。朱子生于南宋。嘗有志編次朝廷公卿大夫士民禮爲當代之典。而所撰儀禮經傳通解。體例未備。喪祭禮又續自黃氏。楊氏未克竟。朱子之志。迺按周官吉凶軍賓嘉之目。撰爲五禮通考二百六十二卷。先經後史。各以類別。凡先儒所聚訟者。一一疏其脈絡。破其癥結。上探古人制作之原。下不違當代之法。殫思二十餘年。藁易三四而後定。自言生平精力盡于是焉。少喜談易。謂易者象也。先儒詳于言理。略于言象。故撰周易象義日箋若干卷。又謂詩三百篇。古人皆被之管絃。漢魏以降。始生八其傳。然天籟之發。今猶古也。因與同志講求。欲以今曲歌古詩。庶協詩樂合一之旨。又以近代聲韻之書。未有善本。奏請刊正。上命公與武進劉公任其事。公建議言古韻二百六部。今併爲一百七韻。如元與魂。韻當析爲二。殷韻宜併入真韻。不當入文韻。上聲拯韻去聲證韻。宜分出各自爲韻。又考定四聲表。兼采山顧氏婺源江氏之說。欲通古音于等韻。時公已遭疾。而往復辨論。猶斷斷不置也。公之著述。其大者如此。若夫律呂算數。以及醫方堪輿星命家言。皆泝流窮源。得其要領。雖專門名家者。亦歎以爲莫及。嗚呼。可謂有體有用者已。公生于康熙壬午十月十九日。歿

時年六十有三。夫人侯氏。太學生某之女。封一品夫人。子四人。長泰鈞。乾隆甲戌進士。翰林院編修。次復鈞。長殤。次鼎鈞。太學生。次上鈞。女二人。長適雲南劍川州知州嵇承豫。孫男二人。沐日。沐恩。孫女六人。銘曰。

西神峨峨。二泉粼粼。造物鍾英。生偉人。雙孝之澤。流十世。啓佑祖考。清華繼。惟公至行。爲士宗。歷艱而享純孝。通明刑十載。邦憲司。三刺三宥。公無私。斯人一去。難再得。同朝靈傷。至尊惜。政事文學。一身兼。沒而言立。公何慙。城西新阡。卜云吉。千秋識之。字不滅。

詹事府詹事盧公墓誌銘

詹事府詹事兼翰林院侍讀學士寧都盧公。以乾隆三十一年八月十五日終于京邸。春秋六十有五。子立瀛。立淇。扶櫬歸里。越十有七年。兩公子亦先後下世矣。諸孫等始卜十月二十六日。葬公於州城南第一橋之新阡。公嘗買彭氏故園爲讀書之館。至是撤其館而爲兆域焉。以公之樂斯邱也。先期。次孫達蔚踵門來求文志公墓。大昕公門下士。知公最深。其何忍辭。乃泣而序之曰。昔錢文僖公言朝廷之官。雖宰相之重。皆可雜以它才。惟翰林學士。非文章不可。歐陽文忠公嘗亟稱之。公以閱覽博物起家。翰林待詔。由館職登學士。陟宮尹。立朝二十餘年。無一日離文字之職。入侍講幄。出司文衡。朝廷大著作。輒預撰述。非老于文學。安能上結主知。若此哉。公初以諸生選拔入成均。選充武英殿校對。會詔刊正十三經二十

二史諸總裁言公學問周洽。讐勘精審。遂得與纂修之列。纂修官皆詞臣爲之。公以貢生預焉。蓋異數也。和碩莊親王尙書張文敏公受詔編次律呂正義。又薦公爲纂修官。張公嘗語人曰。盧君妙解律呂。當今之蔡中郎。阮仲容也。尋舉順天鄉試。試授翰林院待詔。辛未歲成進士。改庶吉士。卽充武英殿纂修官。明年散館。授編修。又明年典陝西鄉試。又明年充會試同考官。分教庶吉士。轉武英殿提調官。充日講起居注官。又明年遷侍讀。又明年擢侍講學士。又明年協辦內閣學士批本事務。充武會試副總裁官。遂爲武英殿總裁官。又明年左遷侍讀。又明年典河南鄉試。時同受命者侍讀學士朱公珪。階資皆在公前。而轉爲公副。其冬和碩莊親王等奏公兼樂部行走。撰擬樂章。樂部皆部院大臣兼之。公以五品詞臣廁其間。尤異數也。又明年遷右春坊右庶子。典順天武鄉試。又明年復爲侍講學士。又明年提督河南學政。閱三載。任滿還朝。其明年三月擢詹事。公年五十始登第。登第後無歲不霑恩渥。位躋三品。駸駸柄用。而遽以積勞致不起。悲夫。詹事古稱宮相。今則職務清簡。而特爲詞臣最高之班。由侍從擢卿貳者。往往踐歷此職。不久卽遷去。其文學尤異。上意方鄉用。而旋終于此者。三十年間。惟嘉定張公鵬翀及公兩人。此海內所深惜也。公博涉羣書。不名一家。詩文春容和雅。無粗厲抑塞之習。屢主文柄。抑奔競。崇實學。所甄拔多知名之士。於樂律易卜尤極敏悟。嘗依焦氏易林。言人休咎多奇中。雖專門弗逮。公接物甚和。而持身嚴正。輕財尙義。不爲家人生計。初入都。張文敏公。蔣文恪公。皆器重公。引爲上客。終未嘗少干以私。同邑宋

嗣南公受業師也。既歿，數分金遺其孤，及視學河南，廨內猶爲宋設位，朝夕拜之。王進士龍篆，客死都下，葬西便門外，公爲立享堂祭產，每寒食，輒往拜其墓。其篤于故舊多此類。公諱明楷，字端臣，號鈍齋。世居江西寧都州。大父不瑕公，贈奉直大夫，父式夏公，贈中憲大夫。夫人曹氏，榮祿大夫，左都督，廣東三江協副將凱伯公之女，生子貴家，而能屏華綺，事親相夫，皆中禮法。先公八年卒，誥贈恭人。子立瀛，壬午舉人，立淇，丙子舉人，江蘇布政司庫大使，立沅，有至行，母沒，慟哭九十五日，不食而死。州人所稱盧孝子也。女二人，孫男五人，達荀，州學生，達蔚，今更名嗣智，國子監生，達蓮，達燕，達口，孫女若干人，曾孫若干人。銘曰：德可以潤身，文足以經世，其鼓篋橋門也，祭酒詔爲異人，其簪筆內殿也，至尊許爲才子，登記言之內史，兼批勅之學士，詹事之長，視古承旨，方謂陟八座而贊黃扉兮，胡爲夢陰堂之講而遽止此也。日涉之園，先生藏焉，千秋而後，想見其軼鄒枚而追虞揭也。

工部左侍郎汪公墓誌銘

乾隆四十有八年夏六月十有九日，工部左侍郎持齋汪公卒。春秋六十有六，公素康強無疾，是日黎明，猶偕諸大臣入朝，啓事畢，入署釐務如常，還寓，猶手一編，初昏就寢，少選呼之，不應，則已逝矣。公之將誕也，祖榮祿公夢紫衣僧持錫杖求宿，及生，狀貌如夢，觀其怛化之際，豈所謂夙根不昧，得大自在者耶。孤子編修學金，扶榭南旋，以明年某月日葬公於州城北二十四都琅港之原，屬大昕爲文誌公之墓，大昕

初入館。公已爲學士。公忘分引進之。嗣後講筵書幄。皆獲隨公步武。又同居西苑。賜園有年。知公行事爲詳。謹案公諱廷璵。字衡玉。別號持齋。世爲新安右族。四世祖始徙太倉。後析州爲縣。始占籍鎮洋焉。曾祖壽堯。祖溥。父之恆。種德蘊素。積厚而光。以公貴。累贈榮祿大夫。妣皆一品夫人。幼而穎悟。初補博士弟子員。學使桐城張公廷璐奇其文。曰。它日名位不在吾下。公初名璠。張公易以今名。且加廷字。欲引爲昆弟行也。辛酉。舉鄉試。丁卯。考充咸安宮教習。試卷進呈。欽定第一人。並諭閱卷大臣曰。來科會元。得如此文可矣。戊辰。會試中式。殿試讀卷日。公名在第五。天子親擢第三人。及第授翰林院編修。卽充會典續文獻通考兩館纂修官。庚午。充河南鄉試正考官。辛未。散館。御試一等。壬申春。特開鄉會恩科。充湖南正考官。復命甫踰月。御試翰詹諸臣于正大光明殿。以納涼賦爲題。作者多規撫上林子虛鋪陳宮殿苑囿。公獨以宵旰憂勤民事立言。特擢一名。超授侍講學士。充日講起居注官。又充會試同考官。又充武會試副總裁官。一歲之中。恩命頻仍。而公益以銳進爲愆。持重謙抑。無幾微矜炫意。癸酉。充福建正考官。事畢。請假歸省。二親尋奉命督學福建。公訪知閩省多頂冒之弊。由於童生衆多。一縣或考數場。遂有一人重疊與考。以啓弊混。公檄令每郡添建考棚。併爲一場考之。夜分卽起點名。稽察嚴密。此弊遂革。丙子。丁艱。回籍。己卯。服闋入都。再奉督學福建之命。時公需次補缺。未與開列。卽承簡用。尋補侍讀學士。讀學班在講學之右。惟見任得轉補。公以候缺得之。亦異數也。時功令初用詩帖。生童狃于土音。眇諧律度。公親爲

講究聲病。由是能詩者漸衆。壬午冬。任滿還朝。癸未。御試翰詹。公列二等一名。特賜文綺二端。尋擢少詹事。甲申。入直上書房。侍皇六子講席。公謹慎嚴肅。非禮不動。開陳經義。詞達意周。是冬。賜紫貂裘一襲。每歲終。賜御書福字。及鹿尾黃羊。冰魚文雉諸物。首歲。曲宴重華宮。唐和天章。則有如意端硯之賜。端午。則有紗葛宮扇香囊。立春進帖子。則有絹紙湖筆硃墨。錫賚便蕃。歲以爲例。乙酉。充湖北正考官。丙戌。遷詹事。再遷內閣學士兼禮部侍郎。戊子。奉命督學江西。辛卯。還朝。壬辰。充會試副總裁官。放榜後。復扃門閱墨卷。備取中書學正若干名。所甄拔率多績學之士。甲午。教習庶吉士。丙申。以金川平定。奉命之山東。江南浙江。祭告嶽鎮。及先代陵寢。禮成。請假歸省。時胡太夫人年逾八十。神明不衰。公衣錦稱觴。門外列八騶。鄉閭稱爲盛事。丁酉。充江西正考官。未撤闈。又奉督學順天之命。三輔密邇。輦下歲時。得與朝賀。公屢蒙召對。暇日。仍至上書房。戊戌。擢工部右侍郎。仍留學政之任。時承德府初建文廟。兼設考棚。公於大駕避暑前。趨往考試。畢。率生徒迎駕。翼日。隨駕詣文廟。行釋奠禮。特被宮紗文綺之賜。熱河士子鄉試。另編字號。自此始。其冬。丁胡太夫人艱。戴星南奔。喪葬盡禮。辛丑。公子編修君登進士。與公甲第恰同。稽諸故事。四百年來。惟王文肅公與子緱山。兩世皆第二人登第。科名盛事。均在吾州。海內所未有。公在里門對賀客。不色喜。寓書編修。助以敦品飭行。無忝科名。未嘗稍有夸耀也。壬寅。入都。仍署工部左侍郎。直上書房。兼四庫全書總閱。癸卯。奉命如盛京。恭送冊寶。方諏吉啓行。而公已長逝矣。公平生持躬以謙。接物以

誠治家以儉服官以勤無輿馬服玩之好無絲竹讌遊之樂風度凝重言笑不苟自登上第歷官卿貳皆九重親擢不由援引向來翰詹御試首選不三四年已陟八座公爲學士十餘年再試優等始得序遷其安於平進如此久直禁近小心慎密退食之暇校勘圖史蕭然如諸生時性不妄交卽素相知形迹亦落落嘗曰聖人稱善交必曰久敬燕昵諠浪交道之媿也爲文以典重條暢爲主不蹈纖穠艱澀之習主持文柄幾無虛歲同朝莫能及焉公初娶凌夫人文學口口之女繼娶王夫人壬戌進士兵部郎中廬州府知府歲之女賢明善治家公得一心奉公無內顧憂者繫夫人之力子一人卽編修君由庚寅恩科舉人授內閣中書協辦侍讀事辛丑進士及第授翰林院編修充四庫全書分校議敘遇缺開列先用女三人長許字項佾旄早卒次適顧增光季適錢東璧大昕長男也孫二人彥博甲辰召試欽賜舉人內閣中書彥國縣學生孫女一適陸受秩銘曰

泰山北斗衆所尊景星卿雲爲世珍維公巨手燕許倫胸羅三倉二酉文筆落堯典生民篇巍科直上鰲峯顛讀書中祕譽益振九天給札集衆仙揮灑千言日未曛御筆親擢第一人嘉爾規頌思不羣學士峻擢異命巾校文棘闈玉尺掄先民圭臬分荆循其於視學尤精勤三物六行誨之諄屏除譁囂還樸淳虎闈入直尊所聞規行矩步禮法遵經師人師并一身桓榮稽古榮則均宮端進秩參閣綸四庫甲乙預討論三館吉士教育殷冬官作貳卿月新程功執度法不愆廿載內直溫樹春一條冰樣頭銜勻玉堂才子

宮花鮮科名接武嘉話傳年過六十髮未宣忽焉解脫返自然不朽何必非千年琅港之水九曲蟠宰木鬱然吉且安昔聞下馬董相墳誰其嗣之平陽阡

太子太保兵部尚書湖廣總督世襲二等輕車都尉畢公墓誌銘

嘉慶二年秋七月庚午兵部尚書湖廣總督世襲輕車都尉鎮洋畢公以疾終於辰陽行館公久在行間助勞懋著及移駐楚南籌畫善後之策苗境救寧上聞公積勞邁疾手足不仁卽馳賜上藥諭以安心調攝公自念受恩深重且當三楚多事不敢以私誤公力疾視事有加無瘳遂致不起遺疏入告九重軫恤加贈太子太保諭祭如禮文通武達生榮死哀可謂令德考終也已諸孤奉公匱歸吳門里第越明年三月十有八日卜新阡於吳縣靈巖鄉上沙里以元配汪夫人祔禮也大昕與公同里閭先後入館閣論文道古數共晨夕晚歲雖雲泥分隔而公不忘久要書問屢至每有撰述必先寄示茲諸孤述遺言請文刻諸貞石大昕泫然不敢辭按狀公諱沅字纓蘅一字秋帆自號靈巖山人先世居徽之休寧明季避地蘇之岷山又徙太倉州後析置鎮洋縣遂占籍焉曾大父泰來公大父見峯公父素庵公皆厚德敦行識者謂其後必大公自少穎悟甫六歲母張太夫人手授毛詩離騷過目卽成誦十歲審聲韻十二習制舉義十五能詩稍長讀書靈巖山從沈文愨公德潛惠徵君棟游學業益邃弱冠後游京師乾隆十八年中順天鄉試又四年授內閣中書大學士傅文忠公一見器重卽令入直軍機處公練習掌故治事識大體樞

庭諸公咸以公輔期之。二十五年會試中式。名在第二。及廷對。纒纒數千言。議論剴切。上親擢第一。是歲始定新進士前十名於讀卷日。引見。公儀觀秀偉。進止有度。天顏甚喜。臚唱授翰林院修撰。館中經進文字多出公手。皆典重有體。遷右春坊右中允。再遷翰林院侍讀。充日講起居注官。轉左春坊左庶子。三十二年。上親耕藉田。御觀稼臺。公侍直。奏對稱旨。宣示御製詩。給筆札令賡和。詩成進覽。稱善。是冬授甘肅鞏秦階道。召見。諭曰。汝軍機舊屬。達於政治。不徒文學優長也。到官。卽留辦新疆經費局。又從總督出嘉峪關。察勘屯田。自木壘河至吉木薩。往返數萬里。途中多紀行詠古之篇。尋調安肅道。三十六年。擢陝西按察使。入覲。具言甘肅頻年苦旱。狀有旨諭督臣加意賑卹。并免積欠四百萬兩。尋擢陝西布政使。兼護巡撫印務。時大兵征金川。由陝入蜀。公督理臺站。饋餉充足。三十八年。河渭洛三水溢入朝邑界。公馳往。分別賑卹。全活甚衆。擢陝西巡撫。歲旱。禱太白山。得甘雨。清理八旗及提標馬廠空地。募民開墾納賦。爲賞卹之用。又奏修西嶽廟。及元聖周公墓。訪其後裔。置五經博士一人。以奉祀事。涪涇陽龍洞渠。在陝六載。兼署西安將軍者再。署陝甘總督者一。特賜戴孔雀翎。恩遇之隆。漢大臣莫及焉。丁張太夫人艱。甫及一年。上以陝西任重。復起公署巡撫事。會甘肅回賊陷河州。逼蘭州城。公檄調滿漢兵先後赴援。又請簡八旗勁旅。令大臣總統援應。及事平。上曰。畢某在陝西。聞甘省逆賊滋事。卽能悉心調度。事事妥協。並有先辦。而與朕旨相合者。實屬可嘉。著賞給一品頂帶。其後平涼逆回復倡亂。攻掠通渭靜寧。驛道梗塞。公

復調兵助勦。又分兵出間道。繞其後。俾不得他竄。公之盡心國事。不分畛域。多此類也。五十年。調河南巡撫。是時河南北頻年苦旱。而河水泛溢。壞民田廬舍。公既受命。卽奏請截留漕運。以平市價。諸州縣被災戶。展賑兩月。其徵收未完銀米。視被災分數。或全免。或緩徵。俱得允行。自後積水漸消。禱雨輒應。歲獲豐稔。又奉命詣桐柏山求淮源。公躬履嶄崟。尋其脈絡。繪圖以進。特蒙嘉獎。御製淮源記。述其事。尋賞穿黃馬褂。擢湖廣總督。未行。以伊陽拒捕案被議。仍留巡撫任。五十二年。河決睢州。溢寧陵。商邱。永城。鹿邑。柘城。諸縣。詔大學士阿文成公臨視。會同籌畫。自夏迄冬。凡五閱月。而歲事撫卹災黎。蠲緩借種。全活無算。明年。河北三郡旱。遵旨撥運米麥。減價平糶。又濬治百泉。丹河。九道堰。引水溉田。尋授湖廣總督。時江水異漲。溢入荊州城。下游州縣。亦多淹沒。訪得江心有窖金洲。阻塞水道。爲上游之害。亟命拔去蘆葦。居民毋得占據。仍於北岸築壩。逼溜南趨。以資保護。賑卹被淹人戶。城垣堤岸。衙署兵房。次第修葺。又革除鹽課陋規。禁絕私販。每歲溢銷十數萬引。五十九年。入覲天津行在。賜御製詩。隨於幄次。賡和。自陳早衰多病。乞京職自效。溫諭不允。是秋。以湖北姦民傳教案。左遷山東巡撫。臨清館陶諸州縣被水。遵旨加兩倍賑卹。豁免秋糧。及本年漕米。委員於豐收處糴糧。食存貯。以備來歲平糶。六十年春。恩詔普免各省民欠。公查出東省節年所欠。正耗銀四百八十七萬有奇。常平社倉米穀五十萬有奇。咸奏除之。時已得再任。湖督之命。拜奏而後行。其勇於任事。無遷延顧望如此。初入楚境。聞苗疆有警。卽馳赴常德。籌畫轉餉。旣

而大學士嘉勇公福公四川總督和公先後到楚檄調六省兵會剿供支日不下數萬公移駐辰州督運軍儲輸將相繼大兵旣擒首逆吳半生等乾州永順永綏保靖諸苗五百餘寨先後詣辰乞降公承詔撫諭咸感泣叩頭而去嘉慶元年春湖北枝江賊起詭稱白蓮教而宜都長陽長樂教匪一時應和四出焚掠公馳赴枝江與巡撫惠公調兵進剿連破蕭家巖栗子山長嶺沖諸寨時北省標營兵皆調赴苗疆姦民乘虛誘集匪徒分擾諸縣當陽保康來鳳竹山相繼失陷詔諸大帥分路攻剿而公與將軍舒公攻當陽卽選驍勇扼山隘殲其外援三千人賊悉力死守公親督將士以火箭火彈射入城中燒其礮臺及蓄聚七月克東門賊退守西北復擊殺殲二千餘人擒其僞帥縣境悉平事聞賜賚優渥賞輕車都尉世職復馳至襄陽督同鎮道邀擊賊於青河口破之時征苗大學士貝子福公總督和公相繼殂謝公密奏乾州已復首逆就擒惟石柳鄧未獲而以十萬之衆駐守蠻瘴苗人見有重兵生計無資石逆轉得從中煽誘不若因其窮困許以自新酌節裁撤苗寨官兵而於四面設兵防守其有出外滋事及同類讐殺者用以苗攻苗之法可不再煩兵力詔下其章於軍中議之未幾大兵破平隴斬石柳鄧等遂詔公馳往湖南籌議善後及撤兵事二年春抵乾州周歷三廳撫諭苗寨清釐民苗地畝給還耕種咸伏地感泣各歸生業各省兵亦次第撤回公遵旨留駐辰州與巡撫姜公提督鄂公會奏請移提督駐辰州而以辰州協駐乾州洞庭協駐常德又於花園汛添設一鎮以永綏協保靖營隸之它要隘之處撥兵屯守聯絡控制其

苗寨酌設土弁。以資約束。又估修城堡營房。賑撫難民。卹贈殉難官弁。及紳士婦女。皆得旨。勅部議行。而公以炎瘴致疾。食少事煩。未極大年。此海內識與不識。靡不驚怛墮淚者也。公識量閎遠。喜愠不形於色。遇僚屬以禮。議事不執己見。人人皆得盡其言。若大疑難事。衆莫識所措者。公沈機立斷。雖萬口不能奪。久莅方面。職事修舉。不以察察爲明。亦不以煦煦要譽。所薦拔多至大僚。或在同列。亦未嘗引爲己功。公天性純孝。旣貴。自傷祿不逮養。賴母氏教誨成立。迎養官齋。修潔白之膳。及張太夫人棄世。遇諱日。哀慕出涕。嘗陳情上前。御賜經訓克家四大字。隨於靈巖南巒。築樓以奉御書。旁建張太夫人祠堂。俾子孫毋忘所自。與竹癡梅泉兩弟。友愛無間。視諸姪如己子。兩妹早寡。爲置產贍其孤甥。俾克有成。生平篤於故舊。尤好汲引後進。一時名儒才士。多招致幕府。公務之暇。詩酒唱酬。登其門者。以爲榮。性好著書。雖官至極品。鉛槧未嘗去手。謂經義當宗漢儒。故有傳經表之作。謂文字當宗許氏。故有經典文字辨正書。及音同義異辨之作。謂編年之史。莫善於涑水。續之者有薛王徐三家。徐雖優於薛王。而所見書籍猶未備。且不無詳南略北之病。乃博稽羣書。考證正史。手自裁定。始末訖元。爲續資治通鑑二百二十卷。別爲考異。附於本條之下。凡四易稿而成。謂史學當究流別。故有史籍考之作。謂史學必通地理。故於山海經晉書地理志。皆有校注。又有關中勝蹟圖記。西安府志之作。謂金石可證經史。官跡所至。搜羅尤博。有關中州山左金石記。詩文下筆立成。不拘一格。要自運性靈。不違大雅之旨。有靈巖山人詩集四十卷。文集八

卷。公生於雍正八年八月十八日。春秋六十有八。汪夫人淑慎有壺德。候補知府□□女。先公三十年卒。子三人。念曾。候補員外郎。早沒。次嵩珠。一品廕生。候補員外郎。次鄂珠。候選員外郎。女四人。長適陳暉。次許字秦□□。次許字孔慶鎔。次未許字孫二人。蘭慶。承襲二等輕車都尉。芝祥。候選員外郎。曾孫二人。銘。曰。

咨牧命虞。分陝翼周。十連有帥。統小諸侯。魏晉暨唐。職均名別。都督總管。節度觀察。峴首羊杜。秦塞范韓。先後禦侮。爲國屏垣。猗與畢公。懋德之裔。文章潤身。溫飽非志。南宮首選。北闕臚傳。風度凝重。儼若神仙。智方行圓。明體達用。三館楷模。中朝梁棟。帝曰汝諧。試之監司。盤根錯節。利器無虧。乃撫三秦。冰澄月朗。籌邊餉軍。萬里指掌。乃撫汴洛。載修河渠。荒政具舉。黔首以蘇。乃撫齊魯。正躬率下。廣宣皇仁。民抃而舞。江漢之滸。控扼蠻荆。公督餽餼。士飽馬騰。潢池偶警。親提桴鼓。胸有甲兵。人百其武。負嵎猶鬪。一鼓而殲。露布星馳。錫命用占。苗逆已擒。苗民來格。公承廟謨。爲永久策。出入叢箚。涉歷瘴雲。遮道羅拜。共戴尊親。迺撤貔貅。迺設屯戍。夔燧罔驚。籬藩孔固。大星忽隕。梁木其傾。楓宸悼惜。崇班晉膺。公之恩榮。勳名終始。頒祭尙方。澤及孫子。硯山之陽。水木明瑟。某水某邱。舊游髣髴。井椽是卜。公其樂茲。我文紀實。或無媿詞。

潛研堂文集卷四十三

墓誌銘二

江西道監察御史王先生墓誌銘

先生姓王氏諱峻字次山號良齋蘇州常熟縣人大父應祥父志學俱以先生貴贈文林郎翰林院編修先生少敏慧讀書數行俱下年十八補博士弟子才名籍甚同里宋君玉才與先生最相善並受業於陳見復先生一時稱爲王宋旣而入都以國學生應京兆試中雍正元年恩科舉人明年試授內閣中書尋登進士第改翰林院庶吉士充一統志纂修官五年散館授編修七年典浙江鄉試十年典貴州鄉試乾隆元年典雲南鄉試先後甄拔號稱得人明年詔開言路遊朝官有清望者俾居臺諫之職而先生以名史官改授江西道監察御史拜命三日卽抗章劾臺長官素行不叶人望罷之當是時先生直聲震都下先生感上知遇能用言方具疏艸累數千言未及上而太夫人之訃至遂戴星而歸杜門養疴者十餘年學益富品益高弟子著錄者日益衆當事爭延先生爲士子師於揚主安定書院於徐主雲龍書院而於蘇之紫陽書院尤久以古學提唱後進所賞識後多知名性剛褊視時俗依阿齷齪畏蒞者流不欲姑與

爲伍。而人有一事一節之長。則稱賞不置。有三代直道之遺焉。尤精地理之學。談九州山川形勢。曲折向背。雖足跡所未到。咸瞭如指掌。嘗謂水經正文。與注混淆。欲一一釐正之。而唐以後水道之變遷。地名之同異。鄙注所未及者。則摭正史及傳記小說。近代志乘以補之。名曰水經廣注。手自屬藁。未暇成也。詩古文直抒性靈。不加雕琢。書法初宗北海。後師東坡。晚年自謂窺古人用筆之意。所書碑碣。盛行吳下。片楮隻字。人知珍之。先生壯年崇尚氣節。慨然欲有爲于世。旣以病廢。不欲出山。則思見之著述。而天不假年。未竟其業。旣沒之後。有與先生善者。刻其所著良齋詩文集若干卷。行于世。雖未足以盡先生。亦略見先生之概已。先生久登清要。不名一錢。歸田後。猶以教授自給。清風特操。當於古人中求之。春秋五十有八。乾隆十六年二月十七日。終於里第。家貧子弱。久未克葬。頃歲。季子淮安府桃源河務同知本智。乞歸養。母乃卜辛亥歲臘月十四日。葬先生於某鄉之原。距先考塋若干步。遵遺命也。配馮宜人。教子有法。今壽躋百齡。康強逢吉。大吏入告。行有旌門之榮。子二人。禮縣學生。先卒。本智由盱眙知縣遷今官。女一人。壻朱聲。孫口人口某官。大昕少而鈍拙。無鄉曲譽。先生聞其可與道古也。薦之。使學於紫陽書院。先生於諸生中。最賞者廬三數人。顧獨稱大昕不去口。先生歿垂四十年。而大昕來主紫陽。遵守先生教規。罔敢有懈。先生之葬。與執紼焉。東漢墓銘。多由門生刊述。俛仰今昔。音容如存。而衰老無成。孤負知己。援筆泫然。情見乎詞。銘曰。

尙湖之水。清且直兮。誰其似之。夫子之德兮。少可于俗。多師于古。有所不爲。合乎狷者。孔翠以文。鷹隼以威。位未酬德。沒而名垂。退之諛墓。古人所譏。先生之銘。斯無媿詞。

翰林院侍讀邵先生墓誌銘

歲丙戌之秋。翰林院侍讀太倉邵先生請告歸。將出都門。諸與先生善者。咸至其邸。敘別。先生素清羸。善病。年未及者。輒有懸車之思。嘗屬工畫者。畫己小像。取陰鏗鈞晚欲收綸之句。題曰收綸圖。乞一時名流賦詩。其高致如此。乃歸未及一載。嬰疾遂不起。嗚呼。世方競于功名。而獨尙恬退。其所取者廉矣。宜不爲造物者之所忌。而亦靳之。不得如志。此又理之不可知者也。先生諱嗣宗。字鴻歲。別號蔚田。先世居休寧。號東門邵氏。祖光龍。始遷於太倉。以潛德篤行稱。考學詩。本生考學易。並以先生貴。誥贈奉直大夫。翰林院編修。加三級。先生幼穎異。在傅不勤。年十八。補博士弟子。歲科兩試。輒屈其儕輩。時同里毛先生宣夔。亦以文名。州人稱能文者。必首毛邵。歲辛酉。以選拔貢生舉本省鄉試。壬申。聖母皇太后萬壽。特詔開科。以秋八月會試。主司海寧陳文勤公於闈中得先生卷。大賞異之。手定第一。及程墨出。醇厚典重。海內翕然奉爲圭臬。吾州自建治以來。試禮部第一者。明代則陸太常鈺。王相國錫爵。吳祭酒偉業。本朝百餘年間。惟先生而已。廷試。賜進士出身。改庶吉士。散館。授翰林院編修。充咸安宮官學總裁。以病乞假。假滿。補原官。擢右春坊右中允。轉左春坊左中允。進翰林院侍讀。先生在詞垣十有餘年。朝章典故。咸所諳習。分

修續文獻通考。用力尤勤。及詔修宗室王公勳績表。大學士劉公統勳。委先生專司其事。舉凡起例。較若列眉。書成進御。深蒙嘉獎。僉謂先生不去。駸駸乎向用。而先生以積勞致疾。賦遂初矣。性耿介。儼居宣武門外。公退却掃。終日門無雜賓。分校鄉會試。各一分教。庶吉士者三。獎成後學。循循不勸。自爲諸生。常授徒。自給。既貴。門弟子著錄益衆。大都皆束修自好之士。或藉以標榜。干進者。則拒勿通也。其教子弟。則曰。君子持身。無過廉儉二字。不儉則不廉。不廉則無恥。聞者以爲篤論。所著詩曰。一枝菴吟稿。養餘齋吟稿。皆藏于家。先生生於康熙四十九年八月二十六日。卒於乾隆三十二年閏月三日。春秋五十有八。配趙宜人。先卒。子二人。士潔。士洙。皆太學生。女一人。適乙酉科副榜貢生王璫。孫三人。先生既沒之明年八月。孤士潔等奉匱葬於新塘之原。以趙宜人祔禮也。大昕以同郡後進。與先生同在書局有年。知先生之生平爲詳。乃敍而銘之曰。

行修而文腴。志芳而貌臞。清而不絕乎俗。貴而不易其初。知止知足。亦元亦儒。貞石可泐。嘉名弗渝。

虛亭先生墓誌銘

外舅虛亭先生之葬。以乾隆四十四年十一月二十一日。先期。西莊鶴溪使來告曰。先文毅公墓志。其女夫周益公。實爲之文。今先君子井椁既卜。援吾家故事。屬銘於子。大昕曰。以益公之文。猶不自名。而託張真甫名。況庸下如大昕者。夫何敢。頓首固辭。不獲已。乃泫然出涕。敍之曰。先生諱爾達。字通侯。號虛亭。姓

王氏先世與宋太尉魏國文正公旦同出。文正從子元始居崐山縣之新漕里。數傳至左朝請大夫崇政殿說書葆卽文毅公文毅九傳至明監察御史遜。遜子復亦官監察御史。小御史之曾孫國子監司業同祖。司業生處士逢年。竝知名前代。先生曾祖在畿縣學生。是惟處士之孫。祖鎮圭。皇贈修職郎。考焜。康熙丙子舉人。丹徒縣儒學教諭。贈通議大夫。通議始卜居嘉定。而先生猶以新陽籍應試。新陽本崐山析置。示不忘本也。先生同產四人。齒最居少。事通議孝謹無違。通議官丹徒。獨攜先生自隨。依倚如左右手。伯兄蚤歿。與邱嫂同居。終身無閒言。叔兄素失愛於通議。銜憾數加陵侮。先生受之無忤色。鄉黨稱道焉。性疎直。易怒亦易解。嘗面斥人過。頰項皆赤。少選復與响。响好語忘其人之蓄怨也。平生不善治產。往往盡無斗儲。然吟詠未嘗輟。遇極作惡事。姑置之。或隱几坐。須臾熟寐。醒後便不復記矣。讀書好瀏覽。不爲章句學。弱冠後補博士員。試輒冠其等。食廩餼。爲諸生祭酒。屢試行省。不見讎。中歲以後。乃專意於教子。以爲文章者不朽之盛事。科舉之學。非可以傳後也。故導之以詩古文。又以爲詞章之學。可以潤身。未可以言道。故進之以經學。近三十年來。東南士大夫言古學。多推嘉定。而嘉定之好古學。自王氏始。西莊旣貴。先生優游林園。日手一編。不置。或招朋舊。爲真率會。斗酒脫粟。無異老儒。好作詩。以放翁後山爲師。寓意目前。多自得之趣。書法險勁。不肯作圓輒態。春秋七十有六。以乾隆三十三年五月二十八日捐館。誥封通議大夫。光祿寺卿。加一級。夫人朱氏。江寧府儒學訓導金銓之女。誥封淑人。先五年卒。事尊章甚孝。處

約而好施。先生之家事治。繫淑人是賴。先生有賢子二人。長鳴盛。甲戌進士。第二人及第。官至內閣學士。兼禮部侍郎。左遷光祿寺卿。學者稱西莊先生。次鳴韶。新陽縣學生。號鶴溪。子女子二人。長適縣學生顧我澍。季卽大昕妻。孫男女若干人。大昕年十五。應童子試。先生亟賞其文。西莊亦謂子可與共學。因許以愛女。招爲館甥。嘗言李彥平。范致能。周子充。皆吾先世門塔。所以期許甚厚。先生好譽兒。又兼譽予。人或笑之。則曰。久當信我言。今荏苒四十年。文稍有名。而德不加修。九原可作。媿其曷勝。銘曰。學不必用。蘊而益純。古訓是式。以遺後人。豈惟後人。邑中之彥。聞其風者。古學大闡。夏駕之西。車塘之原。宰木鬱然。四尺新阡。太邱壇耶。老翁泉耶。君子之澤。終勿諼耶。

中書舍人吳君墓誌銘

乾隆十有六年春。車駕巡幸江浙。觀民設教。典禮畢舉。士大夫作爲歌頌。獻之行在。天子命江浙學政。選其優者召試。而親甲乙之。於浙江得士三人。曰嘉善謝墉。岷城錢塘陳鴻寶。位人秀水王又曾。穀原於江南。得士六人。曰懷寧蔣雍。植秦樹。全椒吳煇。荀叔長洲褚寅亮。摺升休寧吳志鴻。沁可常熟孫夢達。中伯而予以譴劣。亦與數中。有詔之九人者。皆授以內閣中書舍人之職。中書故稱清望官。亞於詞林。非由科甲出身者不得與。九人之中。惟中伯已登進士。其八人皆諸生也。特賜之舉人。俾得應禮部試。天下莫不榮此九人者。謂制科以來。未有此曠典也。諸人旣受命。以是歲先後入京。僦直內閣。獨子與摺升沁可以

明歲始至而沁可之至。又在後與之言。端重而愿慤。介然有所守。君子人也。其六月。置酒於峴城寓邸。九人者皆至。痛飲甚樂。嗣後或一月。或半月。輒小集。中書舍人例閒三日。一入直。閱十日。則持被宿于直廬。它日無事。則相從談詩文。雜以談嘲。泥酒取飲。蓋無日無之也。旣而峴城以進士入翰林。中伯遷宗人府主事。兩人蹤跡少疎。又二年。予與穀原同登進士。予承乏詞館。穀原改官禮部。未幾。乞假去。而苟叔亦移疾去。偶以公暇。過諸君談諧。泥飲如平時。然較之往日。差希矣。又三年。沁可歿于京邸。予入哭。盡哀。九人之中。遽摧其一。痛逝者之不可作。蓋慨然有聚散之感也。又五年。穀原訃至。遙設位哭之。又一年。復哭中伯于京邸。同時來唁者。惟峴城秦樹。及予三人而已。嗟呼。彈指十餘年間。聚首歡宴。歷歷如昨日。而死者三之一。其他或聚或散。如風中萍。來去靡定。欲求曩者高會之盛。邈如隔世。悲夫。悲夫。沁可休寧人。僑居蕪湖。生於康熙五十七年某月日。歿於乾隆二十二年某月日。春秋四十。配某氏。沁可未歿之前十日。予過其寓齋。沁可課幼女讀唐人絕句詩。略能上口。令拜予作男子揖。世俗言以此厭無子也。沁可長于小篆。工刻私印。好作詩。嘗與予在圓明園直廬聯句。賦冰茶數十韻。頗爲好事者所傳云。銘曰。古今才人患不達。一經皓首困帖括。省方召試求真才。親收九人君其一。文苑傳。選舉志。君之名。垂奕世。

翰林院檢討毛君墓誌銘

君諱式玉。字伊人。乾隆六年。以諸生舉于鄉。又十一年。試禮部中式。又二年。廷試。賜同進士出身。改庶吉

士。又三年。授翰林院檢討。又一年。御試詞臣。君名入三等。以本官致仕。又三年。天子幸五臺山。君獻詩。行在稱旨。仍以本官召。是歲某月某日。卒於官。年口十有口。惟毛氏世占籍萊州府之掖縣。自明以來。世爲簪纓甲族。父貢。官潁州知州。祖羆。曾祖偉。皆以潁州貴。贈如其官。階奉直大夫。妻李孺人。繼妻單孺人。子某。君貌皙而羸。望之如不勝衣。叩其學。淵然不竭。家無甌石儲。而聚書多善本。好爲古文。嗜金石刻。以翰林歸田日。嘗騎驢裹糧。入天柱山。徧拓元魏高齊碑。道旁觀者。不知其爲貴人也。初入詞垣。讀國書。不數月。悉究其旨。強記絕人。同輩就君質所疑。各如其意以去。少詹事德爾泰公。分教國書。歎曰。今之巴克什也。居京師。不與要人往來。閉門却掃。人莫窺其際。葬以某年月日。同年生嘉定錢大昕爲之銘。銘曰。稷下談士。急功喜夸。君獨恂恂。與古爲徒。再入承明。不爲數奇。文而不年。天乎何尤。

封榮祿大夫內閣學士兼禮部侍郎加二級前翰林院庶吉士內閣典籍尹公墓誌銘

乾隆五十年正月。天子詔舉聖祖皇帝宴千叟故事。集王大臣官員士民。年六十以上者。錫宴乾清宮。於時。誥封榮祿大夫。前內閣典籍蒙自升公。以就養京邸。特准入宴。與一品大臣列坐丹墀東。天顏咫尺。仰瞻溫霽。禮畢。捧所賜杯盤以出。復賜靈壽杖。如意數珠。貂皮文綺諸物。異數優渥。朝野歎羨。公籍隸滇南。距京師萬里。又久辭就簿。得預嘉會。洵千載一時也。越二年九月乙丑朔。終於京邸。春秋七十有三。長子內閣學士壯圖。扶藪南歸。縷經踵門。述公遺言。屬子文其誌石。嗚呼。公子同年友也。俯仰三十餘年。升沈

零落觸緒增感。公與予皆寡交。而獨以行誼相取。予歸田十載。朋舊多不通尺牘。惟公與曹宗丞慕堂。緘問不絕。自公云亡。慕堂繼逝。而予益無賴矣。彙德之詞。其何敢辭。公諱均。字佐平。先世河南懷慶人。明兵科給事中。革以言事謫雲南太和縣丞。因占籍蒙自。曾大父若時。明季諸生。大父文熾。康熙丁卯舉人。兵部主事。父宗梁。康熙丁酉舉人。廣西桂林府同知。兩世皆誥贈榮祿大夫。妣皆一品夫人。公幼入小學。卽不逐童兒嬉戲。每家慶徵歌演劇。常挾冊獨坐一室中。年十九。補縣學生。歲科試。輒冠其偶。癸酉秋鄉試。主司於遺卷中得公卷。大奇之。遂與鄉薦。明年成進士。選翰林院庶吉士。又三年散館。仍歸進士班。乃援河工例。改選內閣中書。未及補。而丁內艱。服闋入都。又久之。始得缺。在職九載。執事勤恪。以俸次轉典籍。記名以主事用。丁酉歲京察。以年老去職。時閣學已官御史。就養子舍。灑然自得。初封朝議大夫。江南道御史。加二級。再封通議大夫。太僕寺少卿。加二級。三封榮祿大夫。內閣學士。加二級。公之初登第也。向例釋褐進士。先由王大臣揀選。以備館職。是科雲南入選。僅建水倪君高甲一人。及引見。上顧閣臣曰。尹某勝於倪多矣。何以不在選中。遂得預館選。旣而倪君山吏部擢監司。公尙踰躋仕路。人咸以爲數奇。及晚年。階封一品。康強逢吉。乃信聖天子鑒賞自有真也。公事親孝。父殯松皋。去城六七里。公結廬殯側。三載。晝歸侍太夫人。暮則返倚廬。雖寒暑雨雪無閒。因自號松皋居士。及奉太夫人合葬。適大雷雨。匠役皆走避。公撫棺危立。不遑寸步。羣從子弟亦罔敢離次。踰時雨止。遂克成禮。昆弟五人。門無異財。視昆弟之子。

如己出。節縮俸入。以葺宗祠。經畫井井。可垂永久。生平最惜物力。自奉極淡泊。而篤於故舊。慷慨無少吝。爲諸生時。應秋試。中途遇故人。物故卽解囊爲治殯斂。留一日乃行。官京師日。鄉前輩通政楊公如松。病革。適其子以事被逮。其子婦扣門告以急難。公亟偕醫往。楊已不起。卽爲理喪具。并轉屬刑部。保釋其子。俾就苦次。楚雄王貢生鎬。臥病逆旅。已劇。公往視之。泣以後事相託。公令迨至己寓。延醫治之。數月而痊。鎬感泣。請受業爲弟子。鄉人落魄無所依。及旅櫬未返者。輒爲區畫。得生還歸葬者甚多。好飲豆湯。每月必命數設。呼子若孫共啖。曰。此吾鄉味。若曹卽富貴。慎勿忘也。公與閣學同官京師。父子入直。常共載一車。諸城劉文正公聞而歎曰。尹舍人可謂以清白遺子孫矣。夫人伍氏。戶部員外郎士祺之孫女。貢生正期之女。淑慎明達。白首相敬。累封一品夫人。子五人。壯圖。乾隆丙戌進士。今爲內閣學士。兼禮部侍郎。會圖。增廣生全圖。廩貢生。慶圖。健圖。皆國學生。女二人。壻曰楊雲官。曰伍東垣。孫男十四人。孫女九人。銘曰。易稱積善。家慶有餘。黃金盈籬。不如詩書。於維榮祿。如漢萬石。不言躬行。德隅抑抑。文章派別。一家所師。科第拾芥。爲國羽儀。清華之選。世重館閣。公皆履之。依然孤落。南山有橋。本固枝繁。過庭貽訓。爰大其門。承歡廿載。就養左右。熙熙怡怡。齊眉皓首。紫泥申錫。一品班崇。考甫是則。三命滋恭。帝有恩言。錫宴千叟。公預其閒。稽首拜手。手捧上尊。徐步天衢。又何錫之。鳩杖數珠。矍鑠斯翁。觀者屬目。何以致之。義方之勛。人生三寶。曰儉與慈。不爲物先。公實兼持。易簣之辰。神明未昧。屈指舊游。尙及吾輩。素車萬里。歸于松楸。

諸孤攀號泣血紛流。深谷有遷。令聞難沫。同心之言。俾勒幽室。

日講起居注官翰林院侍講學士曹君墓誌銘

翰林院侍講學士曹君習菴。予同里總角交也。君之高祖母。予曾祖姑。而予曾祖母。則君高祖姑。君之尊人檀濟公。爲先大父入室弟子。予又受業於檀濟公。君少於予三歲。相視若昆弟然。已而同客吳門。先後以召試通籍。又同在詞館。應制詩文。互相商榷。游覽宴集。出入必偕者。蓋四十年。予視學東粵。僅半載。奉諱歸里。遂不復出。又十餘年。習菴亦視學於粵。臨行貽書告予。謂任滿日。當乞養南歸。相從尋山水之盟。乃到任僅半載。奉太夫人之諱。馴至不起。嗚呼。當代失一大手筆。聞者無不盡傷。況交親至厚如予者乎。孤子臣晟。以誌銘見屬。誼不可辭。君諱仁虎。字來應。別號習菴。本姓杭氏。世居嘉定之周公邨。十世祖維德。幼孤。依母氏居外家。子孫因以曹爲氏。五世祖元嘏。移居城西之外岡。高祖國正。贈武德將軍。曾祖錫命。康熙壬戌。武進士。湖廣撫標中營游擊。祖源。歲貢生。以君貴。累贈中憲大夫。始移居縣城。父檀濟公。文行爲士林推重。弟子著錄最盛。歲貢生。候選訓導。以君貴。誥封奉直大夫。晉贈中憲大夫。母程氏。累封太恭人。君少而好學。沈靜不妄。出一語。而於所讀書。悉能貫串。同邑王君鳴盛。少負才。俯視儕輩。獨僑君與予爲二友。年十六。補博士弟子。學使蒲州崔公紀。有奇才之目。中丞覺羅雅公樗亭。選高才入紫陽書院肄業。州縣以君名應。時青浦王君昶。與予亦同入院。三人者。食則同爨。夜則聯牀。而長洲吳君泰來。上海

趙君文哲及王君鳴盛數過從相與鏃厲爲古學君在院尤久院長沈文愨公數稱其詩學使寧化雷公鎡舉君優行乾隆二十二年聖駕南巡君獻賦行在召試列一等特賜舉人授內閣中書僦直之暇刻意吟咏未嘗造請貴游二十六年成進士改翰林院庶吉士散館授編修君詞賦久爲海內傳誦及在禁林每遇大禮高文典冊多出其手館閣代言之文院長輒委屬艸皆典重清切宜古宜今擢右春坊右中允充日講起居注官扈蹕盤山有奉敕賡和諸作遷翰林院侍講轉侍讀進右春坊右庶子擢侍講學士五十一年奉命視學廣東與平少詹恕交代少詹爲諸生時嘗受業於君粵人傳爲美談明年程太恭人終於官署君方按試連州不及視含殮聞訃晝夜號泣甫市月竟以毀卒時乾隆五十二年八月八日距生於雍正九年五月五日春秋五十有七娶陸氏繼娶申氏董氏皆前卒子臣晟女二人君起家儒素以文字受主知久列承明著作之廷京察常居一等兩遇大考皆列二等教習庶吉士凡七科前後典鄉試者二分校順天鄉試者一分校會試者三總裁武會試者一後進得其品題便成佳士舟車所至乞詩文者屢滿戶外博極羣書精於證據詩宗三唐而神明變化一洗粗率佻巧之陋格律醇雅醞釀深厚卓然爲一時宗少時與王吳趙諸君唱酬彙刻其詩流傳海舶日本國相以餅金購之在京華與館閣諸同好及同年友爲詩社率旬日一集或分題或聯句或分體每一篇出傳誦日下今所傳刻燭炙硯二集是也其事二親孝所得俸錢分寄諸弟無私藏焉所著詩有宛委山房春槃瑤華倡和秦中雜稿轅韶鳴春諸集

又有蓉鏡堂文稿二十四氣七十二候考。轉注古音考。學士在唐宋時預聞機密。今則專以文字爲職。然亦惟鴻筆麗藻。斯與職稱。學優如君。其不謂之眞學士也夫。銘曰。

威鳳五采。鳴于朝陽。詞臣報國。厥惟文章。漢廷枚馬。鄴下陳王。詩歌元白。制誥常楊。慶歷歐梅。元祐蘇黃。虞楊范揭。高楊徐張。淵哉若人。文苑之英。名位未極。令聞不忘。誰其銘之。疇昔鴈行。竹林路杳。懸河淚滂。

李南澗墓誌銘

己卯之秋。予奉命主山東鄉試。得益都李子南澗。天下才也。填榜日。按察沈公廷芳在座。起揖。賀予得人。越三日。南澗投刺請見。與語竟日。所見益奇於所聞。南澗與人交有終始。雖交滿天下。獨喜就予。在京都日相過從。其歸里也。每越月逾時。手書必至。得古書碑刻。或訪一奇士。必以告。及出宰劇縣。在七千里之外。奔走瘴癘。簿書填委。而書問未嘗輟。飄緜千百言。從不假手幕客。予嘗夢遊南澗官齋。覺而書至。意甚異之。殆所謂同氣相求者。去歲南澗自粵西貽予書。言生癰於尻。甚劇。自後久不得音問。又數感惡夢。今冬。其弟文濤使來告曰。吾兄以去年八月四日病癰終於官舍。遺命不作行狀。以自編年譜。乞先生銘其墓。嗚呼。南澗果死矣。世豈復有此才哉。南澗諱文藻。字素伯。一字莖畹。晚又號南澗。先世自棗強遷益都之春牛街。祖元盛。父遠。皆以南澗貴。贈如其官。南澗天姿俊朗。年十三。從父遊曹家亭子。作一記。做赤壁賦。已有思致。十五學爲詩。二十一補縣學生。好博覽。今古不爲世俗之學。所至必交其賢豪長者。旣以第

二人舉鄉薦。明年會試中式。又明年成進士。廷對策博瞻。爲進士最。以補試例不與進呈之列。然讀卷官交口歎賞無異詞。久之謁選得廣東恩平縣知縣。到任後奉檄署新安縣。又奏調潮陽縣知縣。以海疆三年俸滿。保薦擢廣西桂林府同知。未及一年而沒。其居官以清白強幹稱。嶺南俗多竊牛。牛皮色相似。雖獲盜多不承。有司無如之何。南澗始至。令有牛之家各於牛角印烙私記。凡赴墟賣牛者。牙僧以印烙登簿。以印付買主。如告失牛。先以印呈官。官遣役持印驗墟簿。無得隱者。大府善其法。下所部行之。陽江民劉維邦。以母病延道士作法。借鄰人刀十柄。縛梯上以驅祟。吏索錢不遂。取刀送縣。誣以不軌。南澗奉檄往勘。廉得其實。白於上官。釋之。未幾。陽江令以它事被劾。銜南澗甚。遣親信僕潛至恩平。欲探陰事。中傷之。居兩月。無所得。乃已。潮陽民好械鬪。往往殺傷多人。南澗至。則懸鉦於堂上。有將鬪者。令地保馳入城。擊鉦以告。立往拘治。衆則散矣。自是械鬪稍息。縣故有東山書院。延進士鄭安道爲師。購經史子集數十種。以教學者。潮陽與海陽揭陽。俗稱三陽。仕其地者多致富。南澗去官之日。囊橐蕭然。還至番禺。命工摹光孝寺貫休畫羅漢四軸以歸。曰。此吾廣南宦橐也。性好聚書。每入肆。見異書。輒典衣取債致之。又從友朋借鈔。藏弄數萬卷。皆手自讐校。無輒近俚俗之本。於金石刻搜羅尤富。所過學宮寺觀巖洞崖壁。必停驂周覽。有僕劉福者。善椎拓。攜紙墨以從。有所得。則盡搨之。嘗乘舟出迎總督。小憩南海廟。命僕拓碑。策燭竟夜。比曉。問總督舟已過矣。其詩古文皆自攄所見。不傍人門戶。視近代模擬膚淺。以爲大家。蔑如也。

然口不道前輩之短。以爲非盛德事。過嶺後。治公事。日不暇給。而詩益工。郵亭僧院。信筆留題。雖與隸皆知爲才子也。生平樂道人之善。鄉先正詩文可傳者。必撰次表章之。元和惠定宇。婺源江慎修。皆素未相識。訪其遺書刊行之。德州梁鴻翥。窮老而篤學。月必誦九經一過。鄉里咸目爲癡。南澗一見奇之。爲之延譽。遂知名於世。其在嶺表。士子以文就質無虛日。獨稱欽州馮敏昌。順德胡亦常。張錦芳。作嶺南三子歌。其獎借後進。誠有味乎言之也。予嘗戲論南澗有三反。長身多髯。趑趑如千夫長。而胸有萬卷書。一也。生長於北海。官於南海。二也。洪思著書。欲以文學顯。而世稱其政事。三也。嗟呼。以南澗居家之孝友。當官之廉幹。與友之誠信。固已加人一等。乃其所篤嗜者文章也。文人之病。恆在驕與吝。而南澗獨否。使其得志。必能使古之文士。有以永其傳。今之文士。不致失其所。而竟不遂。此吾所以爲斯世惜也。悲夫。悲夫。南澗娶邢氏。先卒。繼室周氏。生子三人。章。郵。章。棉。章。姚。俱幼。女子三人。銘曰。

偉哉李生。文中之雄兮。四部七略。羅心胸兮。名登甲科。官至五品。不爲庸兮。胡爲不與石渠蘭臺之選。以昌其文。乃以能吏終兮。昔裴幾原。自占死期。不過戊戌歲。任彥升。常恐不過五十。果四十九而云逝。嗟哉李生。年壽適與同兮。恆幹不可留。修名永無窮兮。廣固之里。宰木翳如。千秋萬歲。過者下馬曰。才子之幽宮兮。

日講起居注官翰林院侍講學士邵君墓誌銘

嘉慶紀元之春。餘姚邵君二雲。自左庶子擢翰林院侍講學士。兼文淵閣直閣事。君以懿文碩學。知名海內。及被召入四庫館。總裁倚爲左右手。朝廷大著作。咸預討論。每經進書籍。九重未嘗不稱善。迴翔清署。二十有餘年。至是始轉四品。乃以編書積勞成疾。疾且愈矣。醫者誤投藥。遂不起。實六月十五日。春秋五十有四。訃至吳下。予爲位哭之慟。因憶乙酉秋。予奉命典試浙右。靳取奇士不爲俗學者。君名在第四。五策博洽冠場。僉謂非老宿不辦。及來謁。纔逾弱冠。叩其學。淵乎不竭。予拊掌曰。不負此行矣。越六年。禮部會試第一。賜進士出身。乾隆三十八年。有詔編次四庫書。思得如劉向揚雄者用之。宰相首以君名入告。召赴闕。除翰林院庶吉士。充纂修官。逾年。授編修。久之。御試翰詹諸臣。君名列二等。遷右中允。四轉而至。今職。嘗預修國史。萬壽盛典。八旗通志。校勘石經春秋三傳。由文淵閣校理。進直閣事。充日講起居注官。總裁咸安官官學。提調國史。典鄉試者一。教習庶吉士者再。階由儒林郎至中議大夫。君少多病。左目微眚。清羸如不勝衣。而獨善讀書。數行俱下。寒暑舟車。未嘗頃刻輟業。於四部七錄。無不研究。而非法之書。弗陳于側。嘗謂爾雅者。六藝之津梁。而邢叔明疏。淺陋不稱。乃別爲正義。以郭景純爲宗。而兼采舍人樊劉李孫諸家。郭有未詳者。摭它書補之。凡三四易稿而始定。今承學之士。多舍邢而從邵矣。自歐陽公五代史出。而薛氏舊史廢。獨永樂大典采此書。君在館會粹編次。其闕者采冊府元龜諸書補之。由是薛史復傳人閒。予嘗論宋史紀傳。南渡不如東都之有法。寧宗以後。又不如前三朝之粗備。微特事迹不完。卽

褒貶亦失實。君聞而善之。乃撰南都事略。以續王偁之書。詞簡事增。過正史遠甚。畢尙書沅。續宋元通鑑。常就君商榷。輒歎曰。今之道原貢甫也。君生長浙東。習聞蕺山南雷諸先生緒論。於明季朋黨。奄寺亂政。及唐魯二王起兵本末。口講手畫。往往出于正史之外。自君謝世。而南江文獻。無可徵矣。君所著又有孟子述義。穀梁正義。韓詩內傳考。皇朝大臣諡述錄。輜軒日記。皆實事求是。有益于學者。君至性過人。事親喪葬盡禮。篤于故舊。久要不忘。性狷介。不踏權要之門。以教授生徒自給。退食之暇。執經者環侍左右。君隨問曲諭。人人皆得其意。君亦以師道自任。莫敢以非義干者。詩文操筆立就。淵博奧衍。自成門戶。有南江詩文稿。君諱晉涵。字與桐。二雲其號。大父向榮。康熙壬辰進士。父佳銑。增廣生。皆以君貴。贈中憲大夫。元配口恭人。子秉恆。乘華。卜葬君于某鄉某原。先期來請銘。於戲。自四庫館開。而士大夫始重經史之學。言經學則推戴吉士震。言史學則推君。君於國史。當在儒林文苑之列。朝野無閒言。而知之最先者。予也。予比歲衰病。嘗預戒兒輩。必求二雲銘我。孰意天寔祝予。轉以才盡之筆。納君穿中也。此所以泫然而失聲也。銘曰。

浩浩南江。導源岷山。厥生名儒。特立絕羣。陽明以功。黎洲以文。誰與參之。其在二雲。名冠南宮。書校東觀。爲真學士。爲良史官。槐鼎何慕。竹帛常尊。著書滿家。自信千年。古三不朽。言其一焉。溝澮易涸。視此原泉。

此页空白

潛研堂文集卷四十四

墓誌銘三

山東曹州府桃源同知彭君墓志銘

致政兵部尙書長洲彭公之冢嗣。山東曹州府桃源同知諱紹謙。乾隆三十六年。請假省親。以公年高。假滿遂不出。越四年。以疾終於葑門里第。尙書公諸子。皆賢而文。而桃源於家爲令子。於官爲循吏。德優而未盡施。其歿也。公哭之慟。而親故僚友。靡不盡傷。越丁酉歲十一月丁丑。卜葬於吳縣十二都下六圖雅宜山下。卽元配繆宜人之塋。而合祔焉。先期。嗣子希韓述事狀。乞大昕爲之銘曰。

彭氏之先。實始江西。明初徙吳。科第蟬聯。維高大父。皇朝進士。作宰長寧。文與行備。生子修撰。首舉南宮。廷對第一。以待講終。侍講之子。鄉飲大賓。光祿大夫。錫封紫宸。實生尙書。會狀兩元。踵乃祖躅。近古罕倫。官躋一品。未耄歸田。詔列九老。賜遊香山。五丈夫子。君爲長兄。厥諱紹謙。字之濟光。幼順乎親。左右就養。讀書萬卷。瞭若指掌。丁卯鄉舉。仲弟同登。再黜禮部。乃就銓衡。詔往試哉。作令於東。初攝陽穀。秋漲暴衝。親往督振。以蘇乏窮。里正地方。按戶籍充。吏不假手。民以爲公。後失其法。乃至訟凶。假牧平度。移攝荏平。

奄遘內憂。奔號戴星。中月禫除。起知新城。湖壤窪下。地棄不畊。假民子種。秔稻是執。計頃百餘。灌漑用利。青沙之泊。設隄爲防。曰彭公堤。民永不忘。在官三載。改治汶上。變輅時巡。供頓無曠。南旺之西。有宋家窪。水潦所滌。廢爲汙萊。久議宣洩。恐妨下游。羣口附和。築舍道謀。君規隄南。故河可疏。折而南出。微山諸湖。以鋪水法。廣深積筭。下游所受。長不盈寸。繪圖上府。大吏允諾。六旬畢工。厥利溥哉。成賦之地。三千頃餘。昔委巨浸。今稱上腴。丙戌秋霖。水溢禾稼。申請振卹。民無饑者。大府考績。以卓異舉。保甲令行。姦無容所。他盜入境。詰而擒之。詔特引見。擢遷同知。曹州桃源。毗連宋魯。以君分治。爲劇郡輔。姻親引嫌。循例改補。乞假覲省。一堂春煦。晨昏子舍。養日方長。五十而慕。樂未渠央。五十有一。百歲甫半。孟冬下旬。遘疾捐館。伯子希韓。次曰希曾。希彥。希仲。叔季相承。伯也舉鄉。校書武英。女子子六。咸締簪纓。夫人繆氏。庶常之子。洗馬之孫。相敬以禮。善事君姑。宜於築里。螽斯繩繩。戚鄰稱美。先歿八載。卜葬斯阡。今開厥兆。合祔宜焉。疆圉作謠。歲十一月。丁丑。旣望。筮云其吉。惟君孝友。施於有政。敦族全交。言必顧行。閑家一編。以代庭誥。非苟知之。亦已允蹈。帝眷吏治。謂宜顯揚。才而不年。未旣所藏。羸博之葬。誰能忘情。述銘慰公。百世有徵。

湖北荆宜施道前翰林院修撰陳公墓志銘

乾隆五十有二年六月二十七日。湖北荆宜施道前翰林院修撰。陳公永齋。卒於里第。春秋五十有一。越三年。將卜葬於吳縣某鄉。九世祖儔敏公。賜塋之旁。先期。公之仲弟中書舍人希哲。屬予志其墓石。蔣上

舍業咸亦爲之請。乃按故兵部侍郎蔣公元益所述家傳敘次之。公諱初哲。字在初。別號永齋。世居蘇州之吳縣。自僖敏公以文學經濟歷官都察院左都御史。爲明正統中名臣。厥後代有文學。隱而未曜。曾大父元揚。好善。能教其子。大父震。品學醇厚。從故學士何義門先生游。號爲入室弟子。贈中憲大夫。父樹勳。博通古今。沈毅闊達。以國學生游秦閩間。公卿皆折節延爲上客。相國尹文端公總督兩江。尤器重之。嘗語人曰。立巖有體。有用人也。以公貴。封中憲大夫。公幼有異稟。弱冠已負文譽。補元和縣學生。乾隆二十五年。舉鄉試。益潛修古學。與仲弟希哲。以詞賦相淬厲。吳中有二陳之目。三十年。聖駕南巡。昆弟竝以獻賦。召試行在。仲弟名列高等。授內閣中書。而公以論譔寫一字。置乙等。亦得文綺之賜。二十四年。會試中式。廷試條對詳贍。纒纒千餘言。而書法尤端重不苟。讀卷大臣擬列第二。上嘉其切直。特擢第一。元和分縣以來。登狀元者自公始。而封君與王太恭人具慶在堂。年未及耆。鄉閭誇爲盛事。授翰林院修撰。分習國書。公一過目。卽曉其竅要。閱二年。散館。復列第一。上喜曰。漢人中不易有此。尋充方略館纂修官。入直武英殿。兼協修起居注。益以勤慎稱。三十八年。詔開四庫館。公復與修纂。每校一書畢。卽條其撰述本旨。評論當否。悉中肯綮。時館臣例得薦贍錄生數人。公所舉皆寒素士。總裁諸城劉文正公。新建裘文達公。咸歎其公正。尋充文淵閣校理。再充會試同考官。一充陝西鄉試正考官。兩遇京察。俱列一等。四十三年。特授湖北荆宜施道。甫莅任。遇歲歉。卽捐廉以振饑者。明年。江水暴漲。溢沙市隄。公令吏民載土囊權塞。

之親履隄上。督視七晝夜。水漸退。民居得無恙。又明年。出俸錢加築隄。隄益以固。歲旱。依春秋繁露祈雨法。又步禱龍神廟。雨應時降。荊州向有權關使者。歲一更易。稅額屢缺。上令裁去。以大吏兼轄。督撫奏公領其事。檢束吏役。勿分外需索。稅額既足。商民亦無怨言。四十八年。丁王太恭人憂。奔喪旋里。越二年。又丁封君憂。殯斂之禮。壹遵古法。故宅在城東隅。公與仲弟各拓數楹。以爲封君娛老之地。至是遵遺命。悉以讓季弟同哲。而各買新宅。公所居在古雪術。於屋旁築樓三間。擬奉先人粟主爲家祠。而庭中稍置坡石。顏曰小蓬瀛。有柄心物外之志。工垂成。而奄忽下世。悲夫。國初詞臣。沿明舊制。凡進士第一人。無外用者。今天子慎重吏治。內外一體。遂有以大魁而授監司者。自會稽梁公國治。鎮洋畢公沅。及公而三。然兩公皆曾轉坊局。公直以修撰得之。以是知上之將大用公。而銜恤痛深。旋復摧折。此朝野所深惜者也。公初娶張恭人。壬申舉人鵬之女。早卒。繼娶蔣恭人。例贈奉政大夫。仙根之女。善文翰。庀內外事甚飭。人以爲得賢內助。子兆雄。早卒。次兆炎。孫若芝。俱幼。公以儒學登上第。而內行淳備。孝友任卹。人無閒言。家居不喜與長吏還往。亦不臧否人物。遇故舊。謙抑自下。識度宏遠。人莫窺其際。詩文沖和恬雅。似其爲人。書法似顏魯公。晚年不輕下筆。友朋得其寸楮。爭藏弄之。銘曰。

鳳翔千仞。鵬搏九霄。毛羽旣成。攬身最高。木天芸閣。珠玉揮豪。匪惟文章。經濟克劭。盤根錯節。小試孟勞。霖雨一滴。膏澤崇朝。溫飽匪志。行誼足式。歷試無玷。斯爲全德。天不假年。中道而息。大名旣成。遑爭晷刻。

鬱鬱佳城。僖敏之側。青松白雲。垂聲無極。

贈儒林郎刑部雲南司小京官加一級補瓢韓先生墓志銘

吳中文獻之家。首推雲東韓氏。二百年來。文采風流。照映藝林。振振公姓。人各有集。非徒以膏梁華腴。炫世俗也。補瓢先生諱騏。字其武。實文懿公之從子。被服儒素。學有師法。五歲能辨四聲。始入塾。聽伯姊誦唐人詩。默記不失一字。師大驚曰。異日風雅材也。長而記誦闕博。爲文下筆立成。顧俠君太史。一見奇之。呼爲小友。巡撫儀封張清恪公。課士紫陽書院。擢寘第一。在庠序名稱籍甚。狀淡于榮利。恥爲俗學。好吟咏。恬淡真率。一以陶謝爲師。春秋佳日。招朋舊賦詩飲酒。戶外之履恆滿。晚歲學益純邃。嘗製補瓢歌云。志士勤補拙。學人善補過。老夫志短學亦荒。但補山瓢惜瓢破。亦近于有道之言矣。其事親有禮。居父憂年已五十一矣。三年處外。過時而哀。從子暢蚤失怙恃。親撫育之。以至成立。治家嚴肅。博奕之具。不陳於側。乾隆十九年九月下旬。捐館。春秋六十有一。初娶王安人。再娶顧安人。皆早卒。三娶陳安人。後二十七年乃卒。教子孫必登于禮法。鄉黨稱賢母焉。子二人。鍵。歲貢生。議敘通判。是升。附監生。敕封儒林郎。女三人。壻程遵義。畢楚玉。蔣曾燧。孫男濤。附監生。崧。廩膳生。對。丁酉選拔貢生。特授刑部雲南司七品官。崧巖俱幼。先生歿之二年。卜葬吳縣香山祖塋之右。又二十四年。以孫崧貴。賙贈儒林郎。又三年。將奉陳安人之匱。啓先生窆而祔焉。先期。是升屬其子崧乞予銘。予少從先生游。得與忘年交之列。先生儀觀豐偉。多

識掌故。與談鄉先哲軼事。娓娓不勸。羣從多以科第得官。獨躑躅無所遇。狀身歿而名益彰。詩文流播人口。且有文孫登朝。繪章寵錫。賁及重泉。古人云。第五之名。何減驪騎。由今觀之。蓋有過之無不及也。銘曰。吳之巨族。雲和韓濟。生種德啓後人。後先宗伯名大振。公之王父。廚俊倫。觝排馬阮。幾遘屯。鄉人表德稱貞文。厥考樂志大耋臻。鄉飲五豆。領衆賓。先生早充博士員。晚乃循例貢成均。孝乎惟孝。溫清勤。頤神典。索栖衡門。詩詞脫手無垢氛。石田磐室。堪比肩。辭世卅載。名未湮。江湖有集。萬口傳。有子若孫。才軼羣。贈階六品官。白雲松楸鬱鬱。香山原。如防如屋。四尺墳。文苑耆舊。其人存。

內閣中書舍人邵君松阿墓志銘

常熟邵氏。當高宗朝。昆弟四人。先後入館閣。並以才名傾動日下。論者比諸唐京兆竇氏。宋鄱陽洪氏。明吳郡皇甫氏焉。而子姓相繼登科。文采勿替。較之昔賢。殆有過之。君諱齊熊。初名炳。字方虎。號耐亭。晚歲又自號松阿。誥封奉直大夫。晉贈朝議大夫。韡之子。贈奉直大夫。晉贈朝議大夫。甲臨之孫。封儒林郎。可佳之曾孫。君幼有識鑒。弱冠。喜從鄉先生游。尤爲陶太常晚聞。汪贊善杜林所器重。贊善遂以孫女妻焉。年十九。入縣庠。乾隆十二年。中江南鄉試。是時兩兄。岷園叔。六。皆先入翰林。明年。弟闈谷亦館選。君三試禮部。不見售。十九年。御試內閣中書。君名入選。所賦紅藥當階翻詩。傳誦都下。君長身玉立。儀觀秀偉。而志趣高簡。入直之暇。研窮經史。鍵戶如儒生。所與往還。皆一時名宿。以文章氣節相砥礪。貴游夸毗子弟。

或慕與交。竟日不交一語也。在綸閣時。朝廷大典禮例。得進呈詩冊。君所製歌頌。博大淵雅。尤得頌揚之體。丁外艱。旋里。尋遇生母時。太恭人憂。執喪累年。哀戚如禮。服闋後。以程太恭人年高。樂與昆弟奉侍。遂不入都供職。趨承晨昏者。幾二十年。君昆弟皆治古文。而君好之尤專。謂文必本于學與行。然後爲有物之言。古人立言。皆有益於人心風俗。否則譫言長語。祇足以長浮華。用以阿世。則可用以經世。則未也。嘗選唐宋以來古文十八家。名曰文繫。於唐得三家。退之子厚。習之於宋。取七家。永叔。明允。子瞻。子由。子固。同甫。晦庵。於元取一家。伯生。於明取四家。景濂。正學。伯安。熙甫。而以國朝汪荅文。方靈皋。陶晚聞。三家繼焉。獨惡王安石之文。謂其意主爭勝。言涉矜夸。觀其文。知其人之悖。可戒不可法也。所著隱几山房稿十六卷。禮記考義十六卷。隱几山房七錄若干卷。生平敦孝友。以型家。明義利。以正俗。一言一動。必依於法度。春秋七十有七。終於里第。實嘉慶五年八月十有七日。配汪孺人。左春坊左贊善。應銓孫女。雍正己酉。副貢某之女。明慧有婦道。前卒。子聖珪。乾隆戊子舉人。女適同邑張培俱。早卒。嗣孫廣融。乾隆乙卯舉人。曾孫淵耀。淵獻。淵穎。銘曰。

邵望出歛。乃遷海虞。四傳而後。枝葉紛敷。君與昆季。式大其閭。木天薇省。棣萼聯趨。青紫匪戀。循陔孔愉。年周甲子。猶奉板輿。品以行遠。文與道符。著書滿家。質而不夸。疇昔定交。冊載有餘。我神久瘁。君顏尙腴。今春訪我。攜曾孫俱。詫其蚤慧。可慰桑榆。玉棺俄降。執紼在途。納銘幽室。終古弗渝。

顧桐井墓志銘

吳縣顧文學蕤砥行立品爲文不隨逐時好蓋儒而君子者也其父國學生桐井君既沒將葬持事狀請予爲之銘蕤肄業紫陽在弟子行以予言爲信義不可辭也按狀君諱應昌殿舍字也桐井號也行第五又自號五癡也先世自金陵遷吳五傳至國本明季貢生祀鄉賢私諡貞孝先生者君之高祖父也長洲縣學生竑其曾祖父也考授州同漸其大父也國學生階升其考也君性孝友父病延醫百方療治用一劑必辨論至當而後進自是遂精于醫常有奇效處方不用難得藥懼以僞亂真也有弟患漏經年君親爲敷藥日四五次雖臭腐弗憚也弟死遺孤尙幼一日旁舍失火舉家驚惶君抱姪置妻懷中曰善視之勿令怖子女雖環泣弗顧也姻黨有以爭鬪訟者縣令偏袒欲以立愛爲名詢諸預議者衆莫能對君正色曰生前或有立愛死後知誰愛邪令以其言直遂弗能奪也君幼羸弱術者皆謂不壽初就傅母夫人戒勿多讀傷氣其師獨異之曰此子雖多病然甚孝必能延年勿慮也君生于雍正乙卯卒于嘉慶丙辰行年六十有二也夫人汪氏候選詹事府主簿大經之女亦名族也有子二人長蕤而繁季也女四人嚴秉芝汪超倫毛塚施光暨其壻也郡城之某鄉某原君所藏也某年月日葬之期也銘曰維士有志重義輕利君雖不試孝友自厲維蓄之深維守之欽楹書貽後以俟天譴

潛研堂文集卷四十五

墓誌銘四

封通議大夫日講起居注官文淵閣直閣事翰林院侍讀學士加三級陸公墓誌銘

文淵閣直閣事大理寺卿陸公錫熊以博洽通儒承天子知遇山郎官入詞垣領袖四庫書局洊登學士遂列九卿逢國大慶推恩三世尊人通議公方就養京邸踰七望八神明不衰大理嘗被召預重華宮聯句賜御題楊基淞南小隱畫卷公以里居在淞江南因自號淞南老人以識君恩閱數載大理復蒙上賜御題老年詩卷公賦詩恭紀有淞南小隱成佳話更喜新題老少年之句朝野莫不榮之公性耽山水不耐拘束在都下未久輒策蹇南歸所居日涉園本明陳太僕所蘊別業清曠饒水石之趣公更治數椽顏曰傳經書屋日焚香宴坐其中春秋佳日招一二親串賦詩談讌不異少壯時乾隆四十八年十二月四日無疾而逝春秋七十有八大理奉諱奔喪哀戚盡禮卜吉於次年十二月丁酉葬公上海縣西南二十七保鳳皇橋之新阡以張曹兩淑人附焉禮也先期踵門乞大昕爲文銘其墓大昕與大理托道義交廿餘年於公修猶子之敬其敢以不文辭謹按公諱秉笏字長卿一字葵霑世爲華亭望族元末有承事

郎子順者始析居上海之馬橋。五傳至文裕公。以文章翰墨知名海內。文裕之從曾孫曰起鳳。明天啓辛酉副榜。皇朝贈中議大夫。布政司參議。卽公會大父也。大父鳴球。廩監生。累贈中議大夫。翰林院侍讀學士。加二級。父瀛齡。雍正癸卯拔貢生。石埭縣儒學教諭。累贈通議大夫。翰林院侍讀學士。加三級。陸氏文獻舊門。石埭公學行尤高。公幼承庭訓。年七八歲。已知作文。嘗製詩賦雜禮文各數篇。裝小冊。置懷袖中。署曰陸某稿。親舊見者。以爲非常兒。弱冠補縣學生。辛酉歲。援例入成均。中式順天鄉試。公所作制義。高古有法度。聲名籍甚。七上春官。不遇。然未肯稍降其格。最後應丙戌會試。時大理方直樞廷。先已典試山西。公猶低頭聽唱名引試。揮灑千言。不見老人衰憊之氣。平生雖澹於榮利。而文字結習。志不少衰。如此。公博涉經史。不名一家。尤惡俗學。專已守殘之陋。故大理承公緒論。益自殖學。以大其門。公事親以禮。與人交有信。貴而能謙。持躬治家。皆可爲世法。以大理貴。誥封奉政大夫。刑部直隸司員外郎。加一級。進封中議大夫。翰林院侍讀學士。加二級。再晉通議大夫。翰林院侍讀學士。加三級。初娶張淑人。縣學生大本之女。卒於雍正十年八月三日。春秋二十有五。繼娶曹淑人。工科給事中諱一士之女。工吟咏。與公拈題唱酬無虛日。有晚晴樓詩稿行世。卒於乾隆八年八月廿日。春秋三十有五。再娶曹淑人。卽給事季女。三淑人皆有禮法。鄉鄰稱女宗。子一人。卽大理也。女五人。壻曰凌松心。王時夏。張坤孫。朱文炯。趙熾。孫男五人。夔。盾。夔。堯。夔。夷。夔。勳。夔。勻。係女二。曾係女二。銘曰。

公生名門。績學有聲。誦芬詠烈。若士衡兮。克敦孝行。肇精經旨。模楷人倫。若公紀兮。江湖泊宅。文史跌宕。手定叢書。若魯望兮。內助之懿。雖穆有禮。比肩唱酬。若東美兮。公有賢子。領大著作。并判廷尉。若伯玉兮。鶴髮未皤。鸞誥疊封。壽考康寧。若放翁兮。鳳皇之橋。佳城若防。耆舊名德。久而不忘。季寧有墓。近在雲間。誰其踵之。夫子之阡兮。

贈儒林郎翰林院編修加一級晉贈奉政大夫刑部河南司主事加二級馮君墓誌銘

古聖之言孝也。曰揚名於後世。以顯父母。夫揚名者一己之事。而其父母之賢。亦因有賢子而益顯。此孝所以居六行之首也。若夫由父而推之。以及其祖。則禮傳所謂大夫以上則知尊祖者。而世遂以後有達人。知其積善之有自。昔東坡爲大父廷評行狀。稱其制行甚高。後世信之無異詞。藉非有賢子孫。則廷評之行。或未必大顯於後。先聖垂教。豈欺我哉。刑部河南司主事。前翰林院編修欽州馮敏昌。今之有道而文者也。今春奉父諱。奔喪南旋。道出吳門。素衣冠踵予門。告曰。吾父之葬。學士大興翁公。已爲之銘。唯先大父潛德未曜。茲以某列官於朝。賙贈五品。將勒石墓道。以斬不朽。謹譔次行狀。請吾子一言表之。案狀君諱經邦。字憲萬。姓馮氏。世籍廣東廉州府之欽州。國初。大兵平嶺嶠。而海氛尙未靖。君之曾大父仁溥。大父日明。避寇轉徙。父子相失。祖妣彭。拮据奉姑。拾木實自茹。而以糗糲進姑。鄉里稱曰孝婦。大父負遺骸。閒道歷叢山中。未至家。過一嶺。假寐道旁。夢神告之曰。此地可葬。遂權厝焉。負土成墳。人以爲孝感。父

應祥以勤儉起家爲太學生時州中有所謂大役者凡州官公私支應皆責里長取辦大約如宋之衙前當是役無不破家者太學慨然率同志訴諸大吏其弊遂革而家因以落君工於制藝爲博士弟子與兩弟相切磋文日益有名及兩親沒後絕意進取或勸之輒泫然曰求祿以養親也親歿矣何役役爲乃卜築於州西九十里天馬山之南雅邨顏其室曰半畝居闢城趣軒環植花竹屋後倚山高松數十株深林掩映不見赤日暇則招二三知己吟詠風月盡醉乃已有陶靖節王無功之風春秋五十有九無疾而逝夫人李氏生子達文由歲貢生候補訓導歷署開建臨高花縣教諭事側室黃生達忠達元孫十人曾孫十三人刑部在諸孫中最長且賢髫齡時君尤鍾愛親自課讀擇古人嘉言懿行可師法者俾誦習之以故刑部學有原本年十二而游庠弱冠而名滿海內刑部工古文詞讀其狀質直有先民規矩援坡公之例自足以壽世而猶假手於予刑部之謙也抑以予不善諛墓中人言之而人或見信故轉有取於老鈍之筆邪然則刑部尊祖之意尤可感矣

贈奉政大夫黃松石先生墓誌銘

予少時卽聞錢唐黃松石先生名又見所作篆隸淳厚有古法益欣慕之晚乃得交其子小松郡丞始知淵源所自今夏小松奉梁太宜人諱扶櫬將歸里先遣其兄子元鼎踵門來告曰先君及陳太宜人以乾隆二十二年葬本縣上泥橋之阡某方僮穉誌石未備今吾母不幸棄養謹卜日啓先兆而合葬焉敢

句文納諸穿中。予受其事狀。讀之。喟然曰。此孝義獨行傳人物也。按狀。先生諱樹穀。松石其字。晚歲游孔林。得楷木之癭。攜歸。名其齋。亦以自號。世居杭州之錢唐。六世祖汝亨。明江西提學參議。學者稱寓林先生。大父佑銓。縣學生。父兆泰。贈徵仕郎。先生性敏慧。童時賦綠牡丹詩。卽爲士林傳誦。家貧。隨北游。侍起居。惟謹。比壯。以筆耕自給。奔波南北。爲甘旨之計。父歿於保定旅邸。先生自里門。衰絰泝江。渡河。至棗林。遇大水。泛溢。行旅斷絕。跣足行泥淖中。沙石所觸。血常濡踝。至河間。覓舟不可得。附蟹舟行。遭大風。幾覆溺者再。始達保定。訪瘞棺所在。水嚙露前。和起之已朽。乃號泣。函骨以歸。冒雨買三尺竹。自扶跣行。七晝夜。抵德州。始得附舟南返。繪涉水負骸圖。以志痛。王虛舟吏部題其卷。比於古之虞趙焉。參議公寓林講堂。久圯。卽其地。葺爲廣仁義學。聚書數萬卷。以資學者。先世手澤散落。遇片紙隻字。必質衣購之。少耽經史。於六書尤有神悟。篆隸用筆渾古。婁縣張文敏公。推爲第一手。詩文詞翰。名重公卿。有欲以經明行修薦者。辭不應。其於友誼尤篤。以緩急告者。傾囊無吝色。視其家。無擔石儲也。母喪。過時猶哭。竟以得病。春秋五十有一。以乾隆十六年九月二十七日卒。以子貴。累贈奉政大夫。所著有格物考。河防私議。百衲琴清華錄。楷癭齋集。初娶陳宜人。諱蘇。字若蘭。國學生某之女。幼事母。以孝聞。合巹之夕。雙燭忽燼。其一心知不祥。未及四月而卒。年一十有八。時康熙五十九年四月二日也。繼娶梁氏。諱瑛。字梅君。處士師燧之女。賢而有文。事兩世姑。能得其歡。課諸子萬卷樓中。一燈熒熒。輒至達旦。好吟詠。而集句詩尤工。曾刻入

大雅集。先生之捐館也。宜人手撰行狀數千言。委曲真摯。門生故友見者。咸閣筆。晚歲就養山左官舍。年逾八秩。神明不衰。曩時所誦習者。默記不失一字。仁恕好施。子冬月常製衣以待凍者。恭遇覃恩。誥封太宜人。嘗語郡丞曰。吾家自少參公後。策仕者唯汝一人。此汝父積善所致。慎無忘清白家風也。乾隆六十年閏二月五日卒。年八十有九。長子庭。國學生。坐累謫塞外。卒。次經。早卒。次易。今官兗州府運河同知。卽小松也。次童。國學生。孫男三人。元鼎。元長。元禮。孫女五人。銘曰。

蓼莪之思兮。銜恤靡至。萬里負骸兮。瀕險而濟。匪文繡而富兮。匪軒冕而榮。端孝之謚兮。孚於鄉評。有子亢宗兮。唯慈訓是謹。畫荻諄諄兮。曰惟崇公之訓。贈秩五品兮。資重泉。胖合良兮。吉且安。千秋萬歲兮。比於瀧岡之阡。

何桐蓀墓誌銘

錢唐何元錫夢華。與余交十年矣。今冬卜葬其尊人明經君於西湖普福嶺之陽。啓元配陸孺人之窆。而合祔焉。先期至吳踵門。屬銘其藏。夢華篤志古學。尤嗜金石刻。當援瀧岡西山阡表之例。自爲之文。而偏有取於衰鈍之詞。豈以予性朴直不苟諛人。文雖未工。詞或可信乎。按狀。君諱紀堂。字山甫。一字桐蓀。先世自上虞遷於杭。曾祖喬雲。康熙丙辰進士。嘗作令湖南。劾議免四十二州縣無名稅。失大吏意。然楚人至今尸祝之。秩滿行取。常授主事。卽請告歸。以著書終其身。祖玉梁。雍正癸卯進士。翰林院編修。文章爲

一時宗仰。世所稱樟亭先生也。父熊。雍正乙卯鄉薦。知廣西之宜山。湖南之祁陽二縣。皆有治聲。君少而明悟。爲大父鍾愛。長從吳雲巖修撰學。爲詩文才思清贍。學使長洲彭公啓豐。取入郡庠。援例貢成均。應南北鄉試。屢薦輒不售。內行淳摯。孝事祖母及二親。禮無違者。及父官粵西。祖母以道遠不欲就養。君在家侍奉溫清。晨夕甘旨無闕。何氏宗枝蕃衍。多貧不能葬者。計七十餘。君聞而惻然。請於父。擇地序昭穆。葬之。性忼慨。勇於赴人之急。而不責其償。其客山左也。有馬別駕登鰲者。假貸數千金。卽傾囊予之。無幾。何別駕歿。遺孤貧不能自存。君卽焚其券。雖以此致困。終不悔也。君精於醫術。候三部脈。處方劑。應手輒愈。愈後亦弗求報。春秋六十。以乾隆五十九年六月二十八日卒。有詩稿二卷。道樞書屋隨筆十卷。又有續活溪志四卷。則侍親祁陽所葺也。娶陸孺人。淑懿有賢德。以乾隆三十九年五月十八日卒。春秋四十。陸孺人生四子。元銓。府學生。元錫。元鼎。皆候選縣主簿。元昌。國學生。蚤卒。側室王氏。生元鉅。元符。皆幼孫一人。瀛銘曰。

綬之若若。沒則已焉。抱璞在躬。久而道尊。南陽伯求。廬江子季。第五之名。何減驃騎。淵哉若人。詩禮舊門。文不偶俗。德以潤身。族屬雖分。皆吾一脈。掩七十棺。歸於窀穸。良友告匱。傾貲貸之。友死子弱。折券置之。李錄厚德。歐表一行。以今況古。方策同炳。澄湖汪汪。宰木蒼蒼。有子而賢。積善其昌。

布衣臧君墓誌銘

臧氏望出東莞。其後遷浙之長興。又自長興遷江南之武進。國朝有諱琳者。以名諸生。精研經術。著書滿家。學者稱玉林先生。是爲君之曾大父。生子晉。晉生若彩。若彩子卽君也。君諱繼宏。字世景。晚自號厚庵。少有至性。年十三失母。號慟如成人。每晨夕伏柩側。屏息諦聽。曰。吾母其復生乎。旁人嗤其癡。弗爲止。既長。以家業日落。奔走服賈。然造次必依於忠信。嘗爲某氏持錢。同事瞰其家孤寡可欺。欲以計吞之。君度力不能禁。慨然曰。受人之託。坐視其敗而不言。是與同惡也。卽攜襍被辭去。中歲節縮衣食。稍稍自給。營業考妣及先世。五殯同時安窆。誠信有加。三黨之無倚者。分所有贍之。平生好扶助人。事變倉猝。傾囊相濟。不計其人之償否。亦不責異日報也。嘗訪友長沙。渡江。兩舟並行。遇暴風。一舟先覆。同舟者惶怖無人。色君慰之曰。死生有命。雖恐懼無益。靜以待之可耳。其教子極嚴。有過扑責不少恕。延端士爲之師。課以舉子業。晚歲謂子鏞堂曰。文章當從經典來。汝等能續我祖玉林公之傳。吾願足矣。又言吾身後勿作佛事。天堂地獄。當於生前善惡決之。禮懺作樂。徒爲比邱輩作快樂場耳。嘉慶元年七月九日。以疾終於家。春秋六十有九。娶章氏。子鏞堂。常州府學生。次鱣堂。禮堂。屺堂。孫一人。始餘姚廬學士。召弓。數與子言鏞堂之賢。因與定交。及君之葬。鏞堂述事狀乞銘。故不得辭。銘曰。玉林遺書。伏而未出。什襲至君。手澤無失。君有賢子。校而錄之。士林快覩。尊爲經師。惟子之賢。由君之教。不言躬行。孝乎惟孝。豐西之鄉。四尺其封。善必有後。允哉是翁。

嚴半庵墓誌銘

予與歸安嚴文學元照交有年矣。予假館吳門。相去僅兩日程。聞其家多藏書。而尊人善教子。乘興欲往。訪之。輒以事阻不果。今冬元照墨綬。至予館舍。稽顙而言曰。吾父以今年六月十三日棄養。行且卜葬。思所以不朽吾親者。惟先生之文是賴。予辭不獲已。乃卽其行狀稍詮次之。按吳興嚴氏本貫平江之嘉定。明洪武初。有達卿者。避亂至歸安之石冢村。始占籍焉。有子曰毅。毅生敬。官監察御史。河間長蘆運鹽使。敬生齡。齡生字。宇生茹。茹生贈奉直大夫刑部員外郎而泰。而泰生縣學生正思。正思生府學生欽。欽無子。以弟之子縣學生爾琪爲後。卽君曾大父也。大父躬逢德清縣學廩生。父秉謙。府學廩貢生。候選儒學訓導。母嵇孺人。生子四。君最幼。弱齡有至性。甫九歲。聞兄殤。號慟不食者三日。族黨咸異之。讀書警悟。初習制義。下筆頃刻千言。成童後。患痰積久之不愈。父母恐其苦思致疾。乃納粟爲國子監生。父嘗命主出納管鑰。數年。纖毫無所私。父喜。別賜之千金。及父病瘵經歲。君出所賜金。買人葠和藥以進。未嘗私一錢也。性慷慨。喜周人之急。雖解衣稱貸。不少惜。爲人排難解紛。必盡力。有負之者。亦弗與校。中年以後。困于外侮。所向恆不如意。又艱于得子。年四十始得子元照。甚慧。三四歲卽能作擘窠書。君喜甚。思所以教子者。則曰。浮而不實。非學也。於是聚書數萬卷。遇宋元槧本。不惜重價購之。元照旣長。延名師督課。舉業之外。兼及羣籍。旣入膠庠。有名矣。則又曰。博而不精。非學也。士以通經爲本。窮經必通訓詁。而文字聲音。則

又訓詁之所由出。舍古訓而以意說經。大道之多岐。必始此矣。元照遵其訓。於是有娛親雅言之作。每辨論古義。必進質於君。而後筆之。遇有排擊先儒過當者。則又誠之曰。辨而爭勝。非學也。議論深刻。非徒招忌。亦恐損福。不願汝曹效之也。元照以高才生。試行省。屢躓。人或以爲病。君則曰。窮達自有命耳。古人以少年登科爲不幸。姑盡其在我可矣。噫。今世教子弟者。汲汲於利祿。讀世俗浮濫之文數百首。便可弋獲。視通經學古之儒。指爲迂闊。何怪乎士風之日薄乎。予故舉君之教子以爲法。君諱樹萼。字茂先。一字半庵。年六十有七。以嘉慶五年六月十三日卒。元配許氏。次陳氏。次亦陳氏。次莊氏。俱無子。篋室范生一子。卽元照。歸安縣學生。孫男二人。培。均。女二人。銘。曰。

懸黎在握。世所寶兮。不如。有子之率教兮。袍笏盈床。衆所好兮。不若鉛槧之可樂兮。鞠子之勞兮。未食子之報兮。維。令名之劭兮。庶以榮厥考兮。

郭肯構墓誌銘

三晉以孝友世其家者。曰平遙郭氏。五世同居。門無異財。縣學生樸村肯構兩翁。寔董其家政。每督學使者至。輒旌其門以示勸。士大夫無不翕然稱之。今春。肯構翁卽世。將卜塋于城東十里之長寧原。其從子興讓狀其行事。乞余銘。興讓與余同年進士。卽樸村翁之子也。讀其狀。質而無溢美。故樂得而書。君諱大址。肯構其字。始祖思忠。自陝西渭南縣徙平遙之王郭村。其十世孫曰三耀。三耀生縣學生紹儀。紹儀生

三子長爾強。是爲樸村之考。季爾翰寔生君。故君子樸村爲從父昆弟。君少樸村一歲。總角時食同器。臥同榻。入塾同硯席。旣冠同籍學宮。自壯至老。晨夕相依。其友愛雖同產。不是過也。君狀貌嚴重。鬚長尺餘。事親孝。交友信。視端行直。非禮不動。家世同爨。食指繁多。而樸村翁性曠澹。事無大小。悉委之君。每辨色卽起。諸子姓上堂。問起居。惟謹。婚嫁喪祭。必裁以禮。平居服用。皆取儉朴。惟課子弟讀書。必延名師。一門羣從。學業皆有師法。平遙三百年來。以進士起家者。自興讓始。君之教也。興讓之孫。于君已親盡。君撫視之。如己出。有過失。輒加箠楚。君旣不以屬疎引嫌。家人亦帖然無少嫌也。姑之子某。負官錢二百緡。吏逮治之急。旦夕且瘐死。君賣白金詣縣庭。代輸之。事得釋。諸姑之孫以貧告者。君出貲數百金。俾各作生計。折閱殆盡。無慍色。或諷君不善殖財。則曰。吾家藉先世遺產。頗饒足。彼雖遠戚。自吾祖視之。皆外孫曾也。吾敢私先人所有哉。君生于康熙三十二年六月十三日。卒于乾隆二十九年三月十六日。春秋七十有二。配高氏。子男一人。于京。國學生。女三人。適國學生梁理。介休縣學生范韜光。國學生張應璠。孫男三人。豐型。豐烈。豐孚。銘曰。

子壯出分俗。自秦別籍異財。始弟昆。戚單服。盡行路均。不念厥初。同一身。范道根。李聖伯。五世同居。表史冊。誰其繼之。平遙郭千秋。萬載眎貞石。

孝廉蔣君墓誌銘

乾隆庚子秋。餘姚邵二雲侍讀。典試粵西。得人最盛。全州蔣君德載其一也。予嘗訪粵士文行兼備者於二雲。二雲輒舉君名。予故耳熟焉。而未之相識也。今冬。君之兄郡司馬雲亭來告君之訃。且狀其行。乞予銘。讀之。泫然。知二雲之言不我欺也。君諱勵容。德載其字。世居全州萬鄉龍水村。州中言望族者。必首蔣氏。父振黎。直隸慶雲縣知縣。有子六人。君次在五。少靜默寡言笑。而善承親意。慶雲公嘗指以語宗人曰。是兒孝我。處伯仲間。怡怡愉愉。自幼至壯。如一日。讀書潛玩義理。遇有疑滯。反覆思之。恆達旦不寐。久之。亦譟然以解。尤愛宋儒書。博觀約取。務在切近易行。爲文直抒所見。不喜爲帖括揣摩之陋。諸兄強之應試。補博士弟子。年三十六。舉於鄉。公車屢上。輒躓。吏部注選知縣。需次南還。平生無聲色靡曼之好。無機械狙詐之習。重義輕利。篤舊慎交。徜徉山水間。泊如也。與司馬幼同學。勸善規過。相敬如執友。司馬攝青浦令時。君往視之。適歲暮徵漕粟。君入廡鈎稽簿籍。閱視斗斛。雖滑吏莫敢上下其手。君娶曹氏。無子。年五十有一。以乙卯正月十八日。終於里第。遺言以司馬第三子啓錦爲後。卽以其年某月日。葬。二雲爲予乙酉典試所得士。君出其門。與予有通家之誼。不敢以不文辭。銘曰。

惟漢舉士。興考察廉。家修無玷。束帛乃占。近代鄉貢。登於禮部。名曰孝廉。實則未副。恂恂蔣君。佩實銜華。內行淳篤。潔白無瑕。軒冕匪榮。名教自樂。沒而名稱。豈爭且莫。金盆之原。佳城鬱然。過者必式。曰。惟真孝廉之阡。

嵇靜園墓誌銘

君諱文揆。字大醇。一字靜園。無錫人。文華殿大學士。贈少保文敏公之曾孫。文淵閣大學士。贈太子太師文恭公之孫。翰林院侍讀。晴軒公之嗣子。自文恭公以上。勳德具載國史。君天資雋爽。好豪飲。視阿堵物。若無所覩。隨手散去。亦不甚惜。中歲遵川運例入貲。當得府經歷。掣籤試用江西。嘗委署南昌。吳城同知。饒州景德同知。廣信弋陽縣丞。終未得實缺。君嘗自言。吾官當至四品。壽至八十。卽與君厚者。亦謂君之門地才氣。必能副斯言也。乃奔走簿領十餘年。訖無所遇。鬱鬱不自聊。年四十七。卒於弋陽官舍。娶同邑鄒氏。子一人。國子監生峻。女二人。長適歸安縣學生嚴元照。次許字程。孫男一人。女二人。憶予初入詞館。文恭公方位少宰。以後進禮通謁。卽荷獎借。以詩古文相期許。每有經進文字。輒招與討論可否。其後十餘年。予與晴軒同侍直上書房。寅入酉出。寒暑無閒。課誦之暇。相與縷述家事。不異昆弟。旣而各有視學之命。予往嶺南。晴軒往關西。宦迹邈隔。音問遂疎。予奉諱歸里。遂不復出。晴軒任滿還朝。未幾捐館。傷其無子。聞以弟兵部長子爲後。亦未得謀面也。乾隆庚戌。予以祝嘏抵都門。文恭公時爲首揆。親訪予寓邸。談諧如平時。以予之鈍劣疎懶。尙在元老記憶之中。古道良可感已。及文恭公薨。予適以病。未與執紼。私心恆以爲歉。今又聞君之訃。孤子峻踵門求銘。俛仰交情。轉瞬四世。老成久逝。蘭蕙俄摧。而予亦頽然將老。昔人云。旣痛逝者。行自念也。悲夫。銘曰。

相門世嫡。而官以八品止。膂力方剛。而算不盈四紀。生未相識。歿銘其藏。述德感舊。以誌不忘。

潛研堂文集卷四十六

墓誌銘五

國子監學正戴先生墓誌銘

乾隆四十有八年三月十四日。國子監學正。上元戴先生卒。春秋五十有九。嗚呼。先生今之經師也。往歲壬午。與族人東原。同舉于鄉。一時有二戴之日。予與東原交最久。東原歿後。始得交先生。而意氣相投。猶東原也。先生之子衍。善衍範。又嘗從予遊。乞予志墓。其何敢辭。先生諱祖啓。字敬咸。別字東田。後更以未堂自號。先世居徽之休寧。明萬歷中有諱顯傑者。始自江西徙江寧。曾祖進忠。贈文林郎。祖天章。上元縣生員。贈朝議大夫。父濬。增廣生。先生少穎悟。世父學士雪村。公教以書史。記誦之餘。卽能講解。弱冠以後。遂潛心經義。有志于儒者體用之學。於四子書用功尤深。凡精義語類。及大全之說。皆博觀而審擇之。所作舉業文。精深博大。一以先民爲師。吳門楊文叔。高郵夏禮谷兩先生。先後主鍾山書院。皆嘆以爲異才。然浮沈諸生中者。十有五年。舉鄉薦。累試禮部。輒不遇。而學益高。望益重。甲午歲。陝西巡撫畢公。慕其名。延爲關中書院院長。凡攷課甄別升降之規。皆取決于先生。日有程。月有課。視生徒如子弟。隨材善誘。各

有進益。嘗曰：我無它愛憎，惟真讀書立品者，文或未工，亦優獎之。大要欲合文章學問人品爲一也。居數月，弟子著錄日衆，安西迪化諸州來學者趾相接。畢公乃奏于朝，言戴某學術純正，訓迪有方。六年後，如有成效，乞格外推恩，酌用。得旨報可。戊戌，試禮部，成進士，例授中書科舍人，仍還關中。明年，先生在院六載矣。畢公援前奏，復薦諸朝，引見之日，特試四書文一篇，有旨以國子監學正學錄用。既拜命，需次歸里。未到選期，奄忽不起。嗚呼！書院始于宋初，本鄉學也。世宗皇帝始頒詔立書院于行省治所，合一省之秀者，延名師教之，擬於古諸侯之國學。先生主講席有年，道尊而教行。牧伯咸薦，天子親試，將以爲太學之師。視胡翼之之遇，殆過之矣。海內方以爲真先生復出，而竟止于此。悲夫！悲夫！平生篤志經籍，議論一以宋儒爲宗，所著尙書協異、尙書涉傳、春秋四測、老子新解各若干卷，文集又若干卷，性不妄取，而常濟人之乏。嘗舉大父語以勸子弟，云：利于人，亦利于己者，亟爲之；不利于人，不利于己者，勉爲之；利于己，不利于人者，勿爲也。娶黃孺人，辛酉舉人元鑑之女子四人，衍善。上元學附生衍範、國子生衍緒、衍士、女子三人。壻曰丁酉副貢生王芾，曰己亥科舉人方遵軾，曰試用州同阮坦，孫男二人，孫女二人。銘曰：

俗學之弊，急於功利，口誦程朱，而行與悖。卓哉先生，文與行兼，規矩允蹈，泥淖弗濂。研思六經，旁及子史，不苟異同。要衷於是，牧伯禮請，爲諸生師。夫子之稱，徧于關西，教成入覲，天顏有喜。俾官成均，分教胄子。濟濟槐市，企踵云來。胡不旒期，梁木遽摧。先生逝矣，典刑猶在。學成一鄉，名動四海。九江信都，歿而道尊。

遺書無恙。昌爾子孫。

優貢生候選儒學訓導楊君墓誌銘

國家立學校崇儒術。選京朝官提督學政。三年一更代。將受代。例擇通省人士。文行兼優者三四人。或二三人。升之成均。以示勸也。夫鄉試三載一舉。大省解額或多至百餘人。然徒錄其文。未及其行。惟學使薦舉優行。擇之精。故得之尤難。幸而得之。又或名與實不相應。以予所見。名實允副者。其惟吾友楊君鐵齋乎。蓋自平湖陸清獻公講學東南。恪守攷亭。不爲它說所搖動。論者推爲本朝儒宗第一。君私淑清獻。尊而信之。又嘗從陸聚。綴編修遊。與上下其議論。故博涉羣書。得其要領。編修之歿。君爲文祭之。謂朱子後大儒。無如南吳北許兩公。魯齋墨守寒泉遺論。草廬作諸經纂言。則別有心得。有魯齋以干城朱子。然後異說不得逞。有草廬以推廣朱子之學。然後儒家不局於專門訓詁之陋。蓋以清獻方魯齋。而以草廬擬編修也。而君生平學行。宗仰所在。斷可識矣。君生而穎敏。五歲授以漢魏六朝詩。卽能背誦。時族兄進士錫恆。豪於飲。一日。宗人小飲。指謂君曰。弟試誦詩一首。吾當飲一杯。君卽應聲誦數十篇。無一字誤。進士連引釀。遂至沈醉。舉坐驚異。及長。補金山縣生員。文日益有名。十應鄉舉。同考薦卷者四。終不遇。學使晉寧李公因培。舉君優行。明年。聖駕南巡。召試詩賦。入二等。有內府文綺之賜。聲名隱然動江左。而不得一官。命也。君之舉優行也。與吾邑曹中允仁虎同薦。李公有春華秋實之目。中允旋登進士。列侍從。君獨躋

踰場屋。以升貢太學。當得儒學訓導。未及官而遽沒。然公論具在。固不以顯晦分優絀也。君事親孝。居喪自大小斂。至祥禫。壹遵家禮儀節。嘗與友人論喪禮。謂記云。居喪未葬。讀喪禮。既葬。讀祭禮。此爲平日未讀禮者言也。儀禮十七篇。素所誦習。何待苦由中始佔畢哉。張子言居喪。它書不可觀者。謂非聖之書也。讀聖賢書。未必越于禮外。聖賢之學。寧以居喪而遂忘之。其議論通達如此。教授生徒。各隨才器。誘掖之所成就者尤衆。性耽著述。丹黃不去手。於四書詩書易小學。皆有劄記。於春秋有四傳存疑。于三禮有臆說。又有觀理編。律呂指掌圖。鐵齋偶筆。詩文雜著。合若干卷。君初名開基。字履德。其後更名履基。而仍其字。鐵齋。其自號也。曾祖國訓贈奉政大夫祖黼。一名貫甫。江西臨江府同知。父升。歲貢生。候選儒學教諭。先世居平湖。後徙婁縣之張堰。雍正初。析婁之南境爲金山縣。今爲金山人。夫人陸氏。都察院左僉都御史某之孫。平湖縣學生某之女。早卒。君壯失偶。終身不更娶。子運昌。縣學生。女嫁婁縣學生馮孝錫。孫男一人。女一人。君春秋六十有三。以乾隆四十年閏月十九日。終於家。以其年某月日。葬於某鄉某原。銘曰。鑿之深。而成淵也。綆之修。而及泉也。玉粲之璫兮。上燭天也。終韞于櫝。璞自完也。讀父之書。有子賢也。謂客莫嘲。後有子雲也。

孝廉胡君墓誌銘

嶺以南才士。予所識者三人。欽州馮敏昌。魚山順德張錦芳。藥房及胡亦常。同謙以詩經舉於鄉。出

吾友益都李南澗之門。其來京師。介南澗書訪予。與之言詩文源流。洞中癡結。它日讀其所作詩。超然獨
遑。脫棄凡近之格。既下第南歸。與休寧戴東原同舟。至富春江。乃別。舟中盡鈔東原所著書。攜歸。將刊之
東粵。抵家後。手書報予。欲壹其志於經術。予益聳然異之。無幾何。藥房以書報同謙死矣。且述其事狀。乞
予爲銘。已而南澗書至。復以爲言。乃撫其略書之。同謙姓胡氏。亦常其名。贈文林郎翰林院庶吉士景輝
之曾孫。贈承德郎吏部主事炳之孫。丙辰進士翰林院庶吉士吏部驗封司員外郎傑之子。性冲淡淵默。
與鄉人處。由由然不見臧否。而抗志希古。不欲爲一鄉一國之士。方吏部捐館時。同謙年尙少。能自刻厲。
以殖其學。事母何太安人孝。有郭外田數十稜。最其歲入。悉以奉母。晨夕甘旨無缺。夫婦終歲厭粗糲。自
若。嘗購書盈篋。索直數鎰。謀諸婦。脫釵質錢償之。不敢私取田之所入。其於詩妙悟天成。不由師授。能於
南園諸公外。自成一家。魚山嘗謂人曰。吾粵詩人。曲江之後。當推海雪。繼海雪者。其豸浦乎。豸浦。同謙所
居。因以自號者也。同謙生於乾隆癸亥某月日。以癸未三月廿四日卒。年止卅有一。其卒也。以歸舟盛暑。
中鈔書多啜瓜果解渴。得胃寒疾。歸而益劇。竟至不起。死之日。有四女而無男。後數月。妾遺腹舉一子。名
應科。又明年五月。母何太安人卒。應科亦殤。嗚呼。同謙之日。其不得瞑矣夫。悲夫。悲夫。銘曰。
榕之不材。其大蔽牛。蘭之猗猗。秋風敗之。豸浦之原。四尺墳兮。恒幹久棄。神明存兮。

孝廉范君墓誌銘

予歸田後慕四明天台之勝數往來甬上與其鄉賢士大夫游所尤心折者孝廉范君莪亭也君性樂夷澹外和內介以圖籍爲生活以友朋爲性命予嘗偕一二同志訪君甕天居出所藏明賢墨迹品題其高下茗椀爐香相對竟日不知世間有徵逐游戲事君又熟於鄉邦文獻予纂鄞志數就君咨訪傾困出之無倦色古所謂直諒多聞之友君殆兼有之比年久不相見而尺素歲率一再至今春吾家竹初先生書來達君之訃而孤子懋賢等復狀君行實乞予志其銘爰次而敘之四明范氏出宋尙書右僕射忠肅公之裔忠肅子員外郎公麟始家於鄞迄今六百餘年代有顯人爲鄞甲族君諱永祺字鳳韻別字莪亭康熙甲辰進士湖北通城縣知縣內閣中書某之曾孫府學廩膳生某之孫國學生某之子幼而敏悟未弱冠補博士弟子屢應省試輒斥而文益有名以食餼久次列歲貢年六十始中式浙江鄉試主司以得名宿相慶而君引疾不赴計偕遂以孝廉終君博覽強記好收藏明代及國朝名公尺牘自碩輔名儒忠臣孝子文人逸士以及閨閣方外靡不收錄攷其時代爵里行誼別爲序錄以寓論世尙友之旨其仕宦顯達而爲清議所斥者翰墨雖工棄勿錄也工於漢唐篆隸尤精摹印遠近得者咸什襲珍之甕天室成集蘭亭字爲七言律二篇東南名士屬和者數十家一時傳爲佳話其內行修謹言動必依規矩宗族鄉鄰推重無間言春秋六十有九以乾隆六十年十二月廿日卒娶朱孺人再娶黃孺人皆先卒子四人懋賢懋穎懋楫懋樹伯季補縣學生餘皆太學生女一人壻曰水溶孫十六人曾孫一人銘曰

學之博也。蔚乎薦紳之型。行之敦也。叶乎州里之評。猗大器之晚成。而澹乎其居貞。雲養弗升。水冽弗盈。以昌其名。

張蔚園墓誌銘

君姓張氏。諱大受。字若谷。一字可之。蔚園其自號也。先世自無錫遷居常熟。曾祖雲昌。明中書舍人。祖廷華。鄉飲賓。父文揚。僮好義。交游皆賢士大夫。陶編修貞一嘗爲作家傳。稱九如處士者也。君所居。卽瞿文懿公故第。始生之夕。處士夢文懿授以筆。曰。以畀爾子。六歲就傅。穎悟絕倫。十二卽能詩。十三丁母陳孺人憂。日跪木主前。誦金剛經。三年無間。五經博士言先生德。堅教授里中。君與陶太常正靖。嚴觀察有禱。俱稱入室弟子。益都趙贊善執信來吳中。君以詩文請質。許爲國士。并賦詩書筆贈之。十九補太倉州學生。明年試高等。食餼於庠。與沈編修淑約入山讀書。學成乃出。未幾。丁處士君憂。沈亦聯登鄉會榜。不果斯約。以貢入成均。與番禺莊相公有恭。同邑孫主事夢達。襆被蕭寺。以道義相期。勉未嘗持一刺。走貴人門也。鄉先達蔣文恪公。欲延爲師。乘小車往訪。屏跡不見。累試京兆。無所遇。復歸里門。從學者日益衆。乾隆十六年。天子首舉南巡之典。君獻頌行在。文采博瞻。以籍貫誤注。不得預。召試之列。自是無仕進之志。而造詣益醇。鄉邦有大利病。輒倡議究其可否。先是大吏建議築兩縣沿海石塘。君言築隄捍潮。本以衛民。今所定塘基。乃在濱海三五里以內。綿亘百廿餘里。所占皆膏腴之產。徙人廬舍。毀人墳墓。

不知凡幾。且築塘之土。必取諸近地。計塘身及起土之所占田。殆將萬畝。國家會計久定。雖灘沙懸課。往往以漲補灘。未得遽議豁免。此所占田。既無漲可補。勢必加派於通邑百姓。未得護田之益。先有加賦之累矣。因貽書蔣文恪公。纚纚千餘言。指陳尤切。其見義敢言。通曉治體如此。惜乎未得尺寸之柄。而以明經終老也。以乾隆三十四年八月十日卒。春秋七十有一。配黃氏。國子監生朝珍女。未嫁時。割胷肉愈母疾。汪孝廉元亮爲之傳。子二人。曰應麟。曰應祥。戊子舉人。孫夔。有學行。能世其家。君所撰述甚富。中年燬於火。今遺文四卷。夔所搜輯也。其葬在錦峯山麓。耐處士穴之左。銘曰。

士不榮世。宜昌其文。文無難易。有本則傳。剽賊偏駁。外強中乾。剪綵之花。雖多弗鮮。猗歟蔚園。本本原原。楹書零落。拾遺抱殘。志存開濟。非苟而言。鄉人尸祝。久而勿諼。匪直也文。其行允敦。我撫其實。式表墓門。

潛研堂文集卷四十七

墓誌銘六

廣東雷州府知府馮公墓誌銘

嗚呼。此故中憲大夫廣東雷州府知府前整飭洮岷兵備道甘肅按察副使代州馮公之墓。始公由戶部郎舉。堪任道府。引見得陝西甘州府知府。陛辭請訓。世宗憲皇帝大賞異之。特賜御書。及貂皮湖筆紫金錠諸物。越四年。以公事吏議當降調。總督劉文恪公等奏請留公。疏入。上曰。馮某老成諳練。係朕記名幹員。不特應留府任。卽道員亦可用之。卽照所請行。劉公奉詔。驚歎曰。上真知人。今上御極之十六年。車駕幸江南。公時爲蘇州同知。執事行在。一日。宮門出片紙。書公與掣鹽同知李某名。傳問總督黃文襄公曰。兩同知居官孰優。文襄以公名對。因有雷州府之命。蓋聖人在上。酌民言而飭吏治。一改唐宋明重內輕外之陋。雖萬里之遠。若在堂闈。治行善否。無異燭照數計。而如公者。亦可謂能舉其職者也。公幼能文。年十七。遊京師。貫順天籍。爲諸生。已而改歸本籍。中雍正元年恩科鄉試。明年成進士。又二年。補戶部江南司主事。遷河南司員外郎。奉命典陝西已酉科鄉試。得人稱盛。其任甘州也。西陲方用兵。羽書旁午。公星

夜馳之官。經理糧運無乏。軍器手自料檢。皆中程式。嘗被檄攝甘肅州安西三道。所治道里。去府回遠。公來往其間。百事皆舉。一時綰四印。未嘗稍形竭蹶也。乾隆三年。遷平慶道。按察司副使。次年。調洮岷道。洮岷番彝雜居。轄土司二十四。屯田茶馬。任劇事繁。公以誠信待物。在官三載。不名一錢。及以事望。吏議得旨。送部引見。將行。土官屯軍追送。多泣下者。以父憂歸里。復丁太夫人喪。葬祭如禮。服闋。吏部引見。卽命往河南。補陳州府知府。陳地窪下。多水患。公甫至。值淫雨。卽周歷屬城。相視隄防。至西華之青龍隄。水大至。隄且潰。衆洶懼。勸公避之。公曰。官去。民將安恃。下令敢有走避者罪之。親率人夫守護。隄賴以完。府城故有絃歌書院。七邑生徒肄業其中。公爲延名師課之。暇日。則親往校其文藝之優劣。而獎厲之。諸生之秀俊者。咸聞風而至。由是文風甲于中州。以失察屬吏被劾。左遷江南蘇州府督糧同知。吳中估客所集。督糧主徵比逋欠。前政或持兩端爲利。案日以積。公至。敕吏胥取累年故案。立爲決之。無敢干以私者。其治雷州也。海濱蠻獠多不帥教。公能以誠信化之。遂溪民韋甲爲仇家所誣。以姦殺事。巡道某力主之。獄已具。公審得其情。惻然曰。典郡之謂何。殺無辜以媚上司。吾不爲也。卒改其讞。大計舉卓異第一。未及入覲。以疾卒於官舍。春秋六十有四。時乾隆二十年六月十九日也。啓其橐。無百金裝。巡撫以下咸歎息。厚賻之。公仕宦三十餘年。宅心忠厚。未嘗有疾言遽色。嘗題座右曰。居官求有功。無過。無過便是有功。始在郎署。有能聲。及出典郡。以治行受知兩朝。官雖不過四品。然當世數良吏者。必屈指及公。昔人著官箴。

言私罪不可有。公罪不可無。公前後屢絀吏議。起而復躡。然未嘗有一私過也。此可以爲賢矣。其居家孝友。撫孤姪若己出。叔弟某嘗知金壇縣。罷官客死江南。公哭之慟。遂得左臂偏枯之疾。卒以是至不起。公諱祖悅。字鍾冀。別字敏齊。先世有諱盛者。自山東壽光縣遷于代。隸振武衛軍籍。皇朝雍正中。省諸衛改隸州縣。今爲代州人。曾祖如京。廣東左布政使。祖雲驢。康熙丙辰進士。翰林院編修。禮科給事中。父歷。康熙辛卯舉人。刑部四川司主事。公始娶繼娶。皆李氏女。兄弟也。三娶亦李氏。皆誥贈恭人。四娶張氏。生子三。曰郵。乙酉選拔貢生。曰郟。廩膳生。曰邵。國子監生。五娶戈氏。誥封恭人。生女子二。僭夏邑縣舉人武潢。國子監生徐天駿。初。公在甘州。恭遇恩詔。時張夫人主中饋。例得封。願讓封前妻曰。前人皆與君共貧賤。且無子。可無以少慰地下乎。由是三前妻得並贈。親鄰皆賢。張夫人云。孤郵等卜某年月日葬公於某鄉某原。先期來請銘。銘曰。

稽古治行。大小馮君。代郡之馮。豈其苗裔耶。自左布政而下。多以方面績聞。堂堂雷州。名達至尊。當世以爲殊遇。何治之循而數之屯。井俸旣安。以利嗣人。千秋兮萬歲。知有賢二千石之墳。

山西分守冀寧道沈公墓誌銘

觀察沈公。胚胎名族。通曉時務。起家州縣。累擢監司。與上官意不合。拂衣而歸。優游鄉里者。十有五載。貴而不驕。鄉邦以爲矜式。予比年假館吳門。暇輒訪公。談諧竟日。公長於予七歲。而步履矍鑠。勝予數倍。常

歎羨目爲地行仙。今春示微疾。捐館。灑然若無累者。公之子培。嘗從子游。因請子志其墓。子不得辭。沈望出吳興。而吳中之沈尤蕃衍。多達人。公之先世。明兵部郎中某。以名德祀鄉賢。再傳至皇朝翰林侍讀學士朝初。公卽學士曾孫。歲貢生曾虹之孫。湖南零陵縣知縣華之子。諱之燮。字汝枚。蔭園其號。少隨父。任溫清之暇。兼習吏事。乾隆二十八年。授河南獲嘉縣知縣。三十年。調祥符縣。三十五年。遷許州知州。四十年。大計。以卓異薦。四十一年。引見。記名。卽擢山西寧武府知府。四十五年。調平陽府。四十六年。題陞分巡冀寧道。以四十八年引疾歸里。其卒。以嘉慶三年三月三日。春秋七十有八。卽以其年七月十五日葬。元配耿淑人。繼配任淑人。子五人。堉。坊。壇。培。均。孫十人。秉銓。秉鐸。秉鈺。秉鈐。秉鑑。秉鏐。秉鎰。秉錕。曾孫一人。公筮仕之始。廉幹識大體。尤習於刑名。其在祥符。以職獄。爲何恭惠公燭所知。恭惠任臬使日。它郡有疑讞。多委公會鞫。公亦爲盡力。所平反甚衆。其尤著者。光州俞牛兒。新野李拒搆二事。牛兒故無賴。一夕村民阮志被竊。控官言牛兒等夜行竊。縛事主。輸姦其婦。州獲犯。旣招伏矣。公以昏夜行竊。何由圖姦。志被縛。旣呼牛兒姓名。當殺以滅口。何又從容成姦。再三詰之。志詞窮。始言牛兒實竊。非姦。乃鄰人愆恩。欲重其罪。以除害耳。牛兒等遂得不死。李拒搆者。李閭氏之姪。閭氏無子。養拒搆爲嗣。爲娶陳惟善女。拒搆隱宮者也。陳氏不安其室。逃歸者數矣。一日。惟善送女至壻家。還至中途。女復趨至。惟善憤怒。縊殺其女。并自縊焉。縣役艷純士者。索賄於李弗得。乃言閭氏與拒搆通。令其兄閭國祥殺之。縣令入其言。

掠治鉅璫。當抵極刑。獄已成矣。公覆驗得其情。白上司。請釋三人。而戊純士。縣令亦得罪。乃有左袒新野令者。謂公枉斷。故出入人罪。蜚語播京師。部臣卽以入告。詔提人犯。令軍機大臣與刑部會審。公以原問官亦赴質詢。及會讞日。大臣頗有爲新野令地者。詰公詞色甚厲。公極言鉅璫冤狀。申辨再三。諸郎官驗鉅璫受刑傷痕。經年不滅。皆曰。殆天意也。遂以實奏。請如原斷。而公治獄明恕。聞於海內矣。公在許日。臨穎有殺人獄。已審正兇擬抵矣。大吏欲翻其案。訊囚以好語誘之。囚曰。我實殺人。不敢誣好人。乃止。在西。再署按察使事。秋讞多從輕比。嘗曰。罪疑惟輕。古之訓也。我敢不勉乎。公達於從政。雖遇盤錯。恢乎有餘。在豫日久。最爲上官倚重。亦未嘗曲意求合。其觀察冀寧。入覲日。或勸以謁要人。謝曰。吾外吏秩卑。敢游卿相之門乎。公五世祖兵部公。久祀郡學鄉賢。閱百數十年。而公之考繼之。公乃剏建祖孫鄉賢祠。以志一門盛事。又特爲學士建祠。捐田八十畝。以供烝嘗。易簣前七日。猶親往宗祠致祭。拜跪如禮。其治家敦族。周卹故舊。多可稱者。銘曰。

吳興之望。昌於吳。世德趾美。慶有餘。懿哉觀察。名實孚。親民司牧。衆所愉。雪冤肺石。回瘠枯。如唐徐杜。漢張子朱。幡擁節腰。銀魚年未七十賦。遂初元豐十老入畫圖。鬱鬱佳城白日徂。紀德示後久勿渝。

大理府知府張公墓誌銘

乾隆五十有一年九月八日。故大理府知府張公晴沙。卒於里第。春秋八十有一。先是婁東有七老人會。

皆縉紳歸田。德望可矜式者。當時比諸睢陽洛下之盛。及予來主講席。則諸老已凋落。惟廬州守王公容齋與公歸然無恙。每風日晴朗。輒從二老游。公眉目秀偉。衣冠肅整。望而知爲有道之士。尤熟於鄉邦文獻。口講指畫。無異目睹。雖年臻耄耋。未嘗有謬誤語。予益敬而親之。乃未及二年。而容齋先歿。公亦繼逝。老成淪喪。予益俛俛無所之矣。悲夫。越三年。孤子惇等卜以某月日葬公於某鄉之原。先期乞予文刻之。穿中公良吏。於法宜銘。且與予雅故。其何敢辭。按狀。公諱瞻洛。字文江。號晴沙。世爲太倉州人。明南京工部尙書輔之之六世孫。尙書生候選訓導洪。洪生慶都縣丞凝道。凝道生儀徵教諭元薦。元薦生州學生塈。塈生議敘州判舉孝廉方正閏。則公之考也。公始孩而失母。事父及繼母。能得其歡心。未弱冠能文。以國學生應南北試。數薦不售。乃援例入選。得湖北安陸府通判。分駐沔陽之新堤。其地四面環水。豪民編木截流而漁。水蓋激怒。舟楫多致覆溺。公親往撤之。行族稱便。嘗奉檄勘潛江水災。所至饑民載道。郡守欲匿不以聞。公曰。是可忍。安用民牧乎。卽馳詣大府言狀。得入告振卹。丁母憂。服除。補河南彰德府通判。彰德糧甲於中州。官吏不能檢束。旂丁因以需索。公至則預告有漕州縣。嚴飭家人胥吏。絲毫毋擾。由是旂丁無生事者。在任十年。署府事者四。攝州縣者三。嘗奉檄至陽武督賑。而饑民千數。蠶聚縣治。縣令倉卒無措。公輕騎往呼其耆老。使前曉以利害。因出散賑款目示之。咸唯唯而去。賑事甫畢。而河工徵糶料之檄又至。縣令益窘。夜謁公曰。縣境被水。安所得此。公曰。此易與耳。頃在賑所。見大戶儲料頗多。若酬其

直而善諭之。雖百萬可立致也。卽出示所屬。果如期而辦。其署汲縣也。適河東商人乏鹽。假長蘆鹽行銷。各官皆有餽遺。公獨固却之。旣而歐陽觀察永祺舉其事。監司以下得罪者八人。唯公一無所染。其署歸德也。部檄採買黑豆三十萬石。公以積歉之後。派買獨多。力請於上官。得減五萬。民皆德之。遷雲南大理府知府。過闕請訓。奏對稱旨。到官。律己以廉。馭下以法。輯睦文武。撫綏土司。甚得吏人之和。府倉貯兵糧二萬餘石。每歲諸縣糧戶。自運交納。公念其遠來。隨到卽收。且令人自執概。各攜餘糧以歸。僉謂向來所未有也。他如修學宮。興書院。革鑄錢。撓砂之弊。嚴洱海巨綱之禁。皆足爲後來法。爲忌者所中。被劾落職。歸裝唯攜點蒼石二枚而已。所居爲桑民懌先生故宅。水石竹木。頗深秀。春秋佳日。與賓朋羣從。觴詠其閒。蕭然有世外之想。兩遇萬壽慶典。得復元官。而公以年老不能復出矣。元配陳恭人。於予爲中表姊。先卒。子棹。乾隆庚子舉人。詠棻。太學生。皆側室張孺人出。女三人。長適錢荃。次適俞佩聲。次適蔣載。孫寶熊。吉燕仁煦。俱幼。銘曰。

吏二千石。令長之率兮。苟民譽之毋失。雖去其官。奚恤兮。言歸家園。樂耆年兮。曲江風度。儼神仙兮。天與善人。有子而賢兮。我銘其室。曰是惟良吏之阡兮。

凌竹軒墓誌銘

君姓凌氏。諱存淳。字鯤游。竹軒其別字。居松江之上海縣。大父直齋。父蒼山。俱尙義有隱德。以君貴。贈朝

議大夫母黃生母何皆封太恭人。君少而沈靜嗜學。補縣學生。肄業成均。文譽籍甚。族父兵部侍郎榆山公。深器重之。年三十三。筮仕得府同知。掣籤赴廣東試用。屢署要職。題補雷州府同知。以廉明善決獄。爲督撫所知。在粵先後十有三年。署縣事者四。署州事者一。署府事者五。署同知者三。通判者二。而於雷州本任。莅事纔數月。蓋多試之。齷齪不欲久置散地也。初署永安。閱舊牘。甲訴乙賴婚。乙言吾女許字甲次子。而甲欲妻其長子。故不願及庭鞫。召二子至。長醜而次美。閱女年帖。又與長者相若。以詰乙。則言兒女昏嫁。年歲不必同。且長幼亦不相懸。媒氏又助乙證成之。因諭曰。汝兩家各執一辭。婚姻天定。吾爲女決之於天。書兩名置盤中。令乙探之。探得者卽女壻。乙對天虔禱。取一紙啓視之。甲長子也。遂伏罪。歎曰。天果不可強也。署番禺時。有馮甲兄弟。儼張丙屋。奉母同居。一日。以小故相詈。馮不能勝。則訟言張毆其母。君往驗無傷。遣出。越數日。忽言傷重。殞令驗之。仍無傷痕。而得服毒死狀。僉謂馮鳩母以陷張矣。君意小嫌不至此。問馮家尙有何人。云弟有二子。皆童叟。召至內署。緩詞問之。則云。大母素苦腹痛。近得一方。酒沖鷄鶩糞。可療。飲之。經宿死。君因悟曰。此鷄食斷腸艸。糞中有毒。其母適中之耳。遂破械出之。有巡撫吏訟佃戶欠租。訊之無實。乃吏利其產欲占之。君勃然曰。此風不可長。卽重笞之。而告于巡撫岳公。濬岳公曰。凌君洵健吏。立命革役。荷校以徇。省城肅然。其署潮陽也。有甲竊乙漁網。事露。反言乙竊其網。已追獲之。前令未之決。以網存官庫。君召兩造。問網有識乎。乙言損左一角。甲不能對。出網驗之。果如乙言。乃拏

甲而還乙。其剖斷明敏多此類。君既以才能累攝大郡。會瓊州守缺。總督蘇公將特疏舉薦。先檄任事。君念太恭人年已八旬。亟繳檄請終養。上官交留之。辭益力。遂歸。杜門不出者二十年。事黃何兩太恭人。生養喪葬。必誠必信。祥禫甫畢。有司檄令赴補。遂以足疾辭。下帷却掃。不與外事。嘗舉先儒言。居官不受一人屬。居家不以一事屬人。書於齋壁。論者以爲不媿斯言。性好施予。厚於桑梓。而薄于游客。衣冠動作。必依乎禮法。有嫻家子著新履。頗詭異。君見之曰。此優伶所尙。非良家子弟可用。亟令易去。好吟詠。兼善擘窠大字。題榜尤工。生於康熙五十二年九月丙辰。歿於乾隆四十五年九月某日。春秋六十有八。娶俞宜人。孝謹勤儉。白首相敬。無間言。子鏡心。松江府學增廣生。松心。上海縣學生。復心。國子監生。女一。適國子監生黃珏。孫男九人。女七人。鏡心等將以壬寅歲正月某日卜葬新阡。先期屬子銘之。其詞曰。學優而仕。政平訟理。愛人約己。廉可師兮。將莅瓊海。陳情引退。養志匪懈。孝無違兮。老氏知足。孟氏寡欲。葛氏抱朴。兼有之兮。申江漣漣。鬱鬱新阡。先生藏焉。名永垂兮。

此页空白

潛研堂文集卷四十八

墓誌銘七

鈍閑詩老張先生墓誌銘

吾邑詩老鈍閑張先生。春秋八十有二。以乾隆三十八年十一月廿一日卒。又十年。子承鈞暨諸孫等。卜吉仲冬廿一日。葬復禮鄉火字圩之原。以元配錢孺人。孺人大昕族姑也。總角授書。卽側聞先生緒論。丁亥冬。乞假里居。往來尤密。嘗從容言。僕老矣。身後之文。願以屬吾子。及大昕再入都門。奉諱南回。則先生謝世。再易寒暑矣。茲先生之文孫璉。述事狀乞銘其藏。息壤之盟。其敢寒諸。先生諱錫爵。字擔伯。號中巖。先世自常熟至崑山。三傳至諱元恩者。始占籍嘉定。生允陳。允陳生縣學生欽明。欽明生候選州同龍光。卽先生之本生考也。先生生未周晬。奉祖母命爲仲父觀光後。始就傅。記誦兼數人。外祖顏君茂名撫其頂曰。此吾家陽元也。弱冠。與宗人南華宮詹同夫孝廉。及朱藥庭徵士相酬唱。抗志希古。不爲俗學。間就正於族父樸村徵士。所得益博而醇。補吳江縣生員。又援例肄業成均。累應南北鄉試。終不見售。而所作益奇。中年以後。絕意仕進。長洲沈文愨公見其詩。歎賞不置。欲以代興屬之。先生曰。吾詩但適吾性耳。

標榜非吾事也。年六十有脚氣之疾，杜門不出，每日焚香誦太上感應篇，與覺宗上人講論釋典，得遺世觀我之旨。年踰七十，視聽不衰，取平生所作詩，手自刪定，爲吾友于齋詩鈔廿卷，論說序記雜文，又得八十餘篇，皆有益於世道者。其居家恭儉，與人交有終始，訓誨子弟，必依於忠厚，視世俗榮利，泊然無所歆羨。晚年自號鈍閑詩老，蓋以辛敬之程孟陽自況云。錢孺人，國學生衍之女，勤儉自持，白首相莊，無交謫聲。年七十有九而卒。子五人，承鈞、承恂、葵承、詩承、禮承，恂、葵承、詩皆邑庠生，葵爲弟西疇後。女三人，婿國學生朱紹緒、附貢生金日藻、國學生錢肇燾、孫十三人，曾孫五人，孫璉、曾孫彥曾，皆邑庠生。銘曰：詩老之稱，肇自溪南，松圓繼之，得公而參，辛固奇士，所患樸直，程亦逸才，所乏風力，猗歟先生，有實有華，根柢槃固，亦正而葩，一命非榮，千秋斯壽，封侯萬戶，不如千首，詩家長城，超程軼辛，碌碌餘子，曾何足論，井椁旣營，玉靈告吉，陵谷可移，詩名不滅。

舅氏沈君墓誌銘

舅氏沈君臣表之卒也。大昕爲位哭于京邸，旣而吾母以書至，命大昕汝宜爲銘。於是大昕泫然流涕，謹敘其事曰：君諱詮，臣表其字，居青浦之黃渡，曾祖某，祖某，父時俊，母黃氏，妻曹氏，先卒。女一人，嫁毛某，春秋七十，以乾隆三十一年八月二十二日卒，合葬鄧家浜之原，從先兆也。君治家儉，交友信，口無戲言，鄉黨皆嚴憚之，少與陳山人雪笠善，雪笠工繆篆，鐫竹器爲人物山水，入能品，故君子二事皆能之，又善鼓

琴得前輩指法。久之家日窘。乃屏諸嗜好。服賈三十餘年。衣食粗能自給矣。既老。喟然歎曰。吾久失偶。又無子。縱跡如苦行僧。尙安以家爲哉。先人同氣。惟妹一人。吾當依吾妹耳。自是棄家而主于我。終日焚香撫琴而已。君之從弟虞明。居重固里。君嘗往視之。撫其子某曰。他日當爲我後。今年七月。忽買舟往重固。問之曰。吾且暮且死。兄妹親也。生當相依。死則當歸于沈氏。吾母泣。君亦泣。留之不可。在重固未一月。竟卒。若前知者。嗚呼哀哉。君長于吾母三歲。吾母之來歸也。去家三十里而近。外祖父母存日。吾母歲一歸寧。或間歲一歸。及喪外祖母。吾母歸寧益稀。自外祖父棄世後。吾母不復歸矣。君以治生故。亦不能數至吾家。歲中率一兩至。甚則經歲絕不至。故吾母與君相見常難也。比四五歲。始得聚首如少時。君又棄吾母而去。此吾母之所以悲而思。思而欲假文以傳之也。嗚呼慽矣。銘曰。

徐良輔墓誌銘

錢門塘之名。見于宋鄭賣水利書。其水久湮廢。而市猶以塘名。南傍郭石塘。東界顧浦。臨水而居者。裁百餘家。與予所居望仙橋。相去僅三里許。在縣之最西。俗朴而儉。無聲色侈靡之習。與予鄉略相似。徐翁良輔。居其地三世。倜儻而尙義。年八十餘。筋力強壯。不減四五十者。乾隆三十五年某月日。以疾終。孤子文範。寓書京師。乞予銘其墓。翁與家大人交最厚。家大人誠子兄弟。數言徐翁雖不讀書。而行事闡與古人

合。可以媿當世之號爲文人。而薄于內行者。於其歿也。義當爲銘。初翁之叔父介繁。以任俠凌鄉曲。好蒲博。習拳勇。不治家人業。翁少從諸父遊。而恥以俠名家。故貧力耕作。營什一之利。遂以饒足。然內行修謹。友愛諸弟。撫弟之子如子。立宗祠於所居之西。春秋率子弟行禮。無敢跛倚僂言者。平居食無兼味。不衣繒帛。然親故以急難告。應之無難色。里中橋道多不治。爲行者病。翁常出錢爲之倡。木者石之。迨者廣之。圯者新之。無者有之。大小凡數十所。鄉人稱爲造橋徐翁云。翁諱某。良輔其字。葬以某年月日。子文範。國子監生。篤志經史。尤精于輿地之學。孫口人。東南之俗。稱鄉之大者曰鎮。其次曰市。小者曰村。曰行。錢門塘南宋嘗置稅務于此。故爲大鎮。自明以來。人戶衰少。特鄉村之小者爾。經曰。十室之邑。必有忠信。然鄉曲微行。鮮能播於通都大邑。往往湮沒不彰。甚可歎也。自錢門塘置鎮至今。無一人列名志乘。獨明時有洪君學者。歸熙甫嘗爲撰菊窗記。故洪君之名。得附其集以傳。蓋文之足重如此。今徐翁之行。視洪君殆過之。當得熙甫其人者而文之。而文範乃求之子。予則豈其人哉。銘曰。

父之執。我所敬。於人有濟世無競。善積於身後。當興。視我銘詞左券徵。

西泚先生墓誌銘

西泚先生。以篤學鴻文登巍科。入詞館。不數歲而參綸閣。班九卿。貴且顯矣。甫逾強仕。奉諱星奔。服闋。遂不復出。里居三十餘年。日以經史詩古文自娛。撰述等身。弟子著錄數百人。嘗取杜少陵詩句。以西莊自

號學者稱西莊先生。西莊之名滿海內。頃歲忽更號西泚。予愕焉。諷使易之。不肯。私謂兒輩曰。泚者止也。汝舅其不久乎。西泚於經義。專宗鄭氏。茲以嘉慶二年十二月二日捐館。歲行在己。龍蛇之戾。與康成先後一揆。斯亦異矣。予與西泚總角交。予妻又其女弟。幼同學。長同官。及歸田。衡宇相望。奇文疑義。質難無虛日。予駑緩。西泚數鏃厲之。始克樹立。平生道義之交。無逾西泚。常以異姓軼轡相況。匪由親串。暱就。輒相標榜也。今窀穸有期。而予視息猶在。人世誌石之銘。奚敢辭。西泚姓王氏。諱鳴盛。字鳳喈。一字禮堂。外舅虛亭先生長子。爲世父升孟公後。幼隨王父卓人公丹徒學署。奇慧。四五歲日識數百字。縣令馮公詠以神童目之。稍長。習四書義。才氣浩瀚。已有名家風度。年十七。補嘉定縣學生。學使歲科試。屢占第一。鄉試中副榜。才名籍甚。巡撫陳文肅公大受。取入紫陽書院肄業。東南才俊。咸出其下。在吳門。與王琴德。吳企晉。趙損之。曹來殷諸君唱和。沈尙書歸愚。以爲不下嘉靖七子。又與惠徵君松厓講經義。知詰訓。必以漢儒爲宗。服膺尙書。探索久之。乃信東晉之古文固僞。而馬鄭所注。實孔壁之古文也。東晉所獻之大誓。固僞。而唐儒所斥爲僞太誓者。實非僞也。古文之真僞辨。而尙書二十九篇。粲然具在。知所從事矣。乾隆十二年。中江南鄉試。十九年。會試中式。殿試一甲第二人。及第。授翰林院編修。蔣文恪公溥爲院長。重其學。延爲上客。二十三年。天子親試翰詹諸臣。特擢一第一名。超遷侍講學士。充日講起居注官。其冬。扈從盤山。明年。充福建正考官。未歲事。卽有內閣學士兼禮部侍郎之命。還都。召對。天語甚溫。未幾。御史論其

馳驛不謹。部議降二級。明年授光祿寺卿。扈從木蘭。秋。彌二十七年。以平定回部覃恩。誥封三代。賜貂皮大緞等物。二十八年。丁朱太淑人憂。去職。回里。既除喪。以虛亭先生年高。遂不赴補。其後入都。祝萬壽者一。迎駕行在者再。皆有文綺之賜。恩遇不異供職時。而西泚自以多病。無宦情矣。性儉素。無玩好之儲。無聲色之奉。宴坐一室。左右圖書。咿唔如寒士。卜居蘇州閭門外。不與當事通謁。亦不與朝貴通音問。唯好汲引後進。一篇一句之工。獎賞不去口。或評選其佳者。刊而行之。嘗言漢人說經。必守家法。亦云師法。自唐貞觀撰諸經義疏。而家法亡。宋元豐以新經義取士。而漢學殆絕。今好古之儒。皆知崇注疏矣。然注疏惟詩三禮及公羊傳。猶是漢人家法。它經注則出于魏晉人。未爲醇備。故所撰尙書後案。專宗鄭康成。鄭注亡逸者。采馬王補之。孔傳雖僞。其訓詁猶有傳授。非盡鄉壁虛造。閒亦取焉。經營二十餘年。自謂存古之功。與惠氏周易述相埒。又撰十七史商榷百卷。主于校勘本文。補正譌脫。審事迹之虛實。辨紀傳之異同。於輿地職官典章名物。每致詳焉。獨不喜褒貶人物。以爲空言無益實用也。蚤歲論詩。溯原漢魏六朝。宗仰盛唐。中年稍變化。出入香山東坡。晚年獨愛李義山。謂少陵以後一人。前後吟詠甚富。手自刪定。爲二十四卷。王琴德謂其以才輔學。以韻達情。粹然正始之音。非虛僞恃氣者所及。古文紆徐醇厚。用歐曾之法。闡許鄭之學。一時推爲巨手。又撰蛾術編百卷。其目有十。曰說錄。說字。說地。說制。說人。說物。說集。說刻。說通。說系。蓋仿王深寧顧亭林之意。而援引尤博贍焉。自束髮至垂白。未嘗一日輟書。年六十八。兩目

忽瞽閱兩歲得吳興醫鍼之而愈。著書如常。時春秋七十有六。夫人寶山李氏。子三人。嗣構候選州同。嗣穫。嗣疇。皆學生。女六人。婿姚箎。嚴曜霄。黃恩長。顧亦竊。宋豫芳。吳振錡。孫男女若干人。銘曰。

古三不朽。立言其一。言非一端。所重經術。漢儒治經。各有師承。後儒鑿空。師心自矜。堂堂光祿。樸學是好。祖述後鄭。升堂視輿。學優而仕。實大聲宏。鷲鳥累百。鸞鷲先鳴。立朝九考。晉秩二品。優游林泉。著作自任。經明史通。詩癖文雄。一編纔出。紙貴吳中。弁山元美。畏壘熙甫。兼而有之。華實相輔。枌榆共社。科第同年。肩隨兄事。申以婚媾。有過必規。有疑互質。相思披衣。老而愈密。壑舟云逝。大名長留。斯文光燄。芘護松楸。

鶴谿子墓誌銘

鶴谿子。姓王氏。名鳴韶。字鶚起。有薄田。在太倉之鶴瀝。因自號鶴谿子。外舅虛亭先生之次子。而西莊光祿之弟也。其先世事迹。已具外舅墓志中。鶴谿子。少于予四歲。初相識時。年裁舞勺。眉目如畫。舉止有名。家風度。濡染家學。高自期許。稍長。涉獵羣書。慕洪景廬。王伯厚。陶九成。王貽上之風。好評論古文字人物。侃侃伉伉。不肯隨聲附和。予嘗謂西莊曰。君家又得僧彌矣。及予作就壻。晨夕與偕。歲時。中外姻婭聚會。諧謔。予或少屈。鶴谿子必助予搢拄之。以是知其遇予特厚也。予與西莊先後入都。鶴谿子侍二親在家。甚謹。而學日益進。學使戶部侍郎夢麟公。賞其文。以廷諤名。補新陽學生員。後乃改今名。性落拓。澹于榮利。而好爲詩古文。兼工書畫。外舅論詩。宗眉山劍南。真書似裴柳。行書似李北海。鶴谿子盡得其傳。又與邑。

高士周晉瞻牧山談畫理。遂精其藝。與陸孝廉卽仙稱二妙云。西莊自列卿家居。以詩文提唱後進。評選江左十二家詩。鶴谿子居其一。論者不以爲私。歲乙未。予督學廣東。招鶴谿子至署。酬唱往復。無間昏旦。遇巖洞奇秀。輒邀同游。鶴谿子嘗得錢叔寶紀行圖殘本。乃弇山園故物。欲仿其意。自吾邑至粵。所過湖山鎮市。各紀以圖。規畫甫有緒。會予聞先府君之訃。匆遽歸里。此事遂輟。生平喜鈔書。所收多善本。每有新得。恆就予評泊。尤喜元明人書畫。眞屢入手立辨。家貧不能多蓄。有心賞者。解衣付質。庫易之。弗惜也。於邑中文獻。留心搜訪。寺觀橋梁。殘碑隻字。躬自摹搨。攷證異同。以補志乘之闕。談先達遺事。世系派別。里居遷徙。立身賢否。歷歷如在目前。自鶴谿子歿。而後生數掌故者。無從質所疑矣。生于雍正十年某月日。歿于乾隆五十三年某月日。春秋五十有七。娶莊氏。子嗣學。嘉定縣學生。嗣祥。孫男女若干人。銘曰。文毅之裔。簪紱綿聯。元陽學仙。孟夙逃禪。有文而隱。鶴谿繼焉。跌宕琴劍。揮灑雲煙。詩書滿腹。囊笠一軒。第五之名。自足千年。少託葭莩。晚親笑言。人琴永訣。風流未湮。

瞿封翁墓誌銘

吾鄉有厚德篤行君子曰瞿封翁。學南。以乾隆五十一年九月乙未卒。其明年四月壬子。子兆驤等卜葬於長洲縣八都四圖西北鄉劍號字之原。以夫人陳氏祔。先期乞予文。志其穿中之石。予病後。久不爲人作銘狀。顧念總角時。卽與翁相識。歸田後。投契益密。翁之次子塘。又與予親家。乃不辭而序之。謹案瞿氏

見於王僧孺百家譜。蓋望出蒼梧。元明以來。散處常熟華亭上海。稱詩禮舊族。元末。少中大夫號琴軒者。居上海之下沙。明初。以巨室被籍。有乳媪抱四歲兒。懷棗實升許。逃之嘉定之高橋鎮。閱數傳。而子姓繁衍。田連數十頃。僮手指千。出入乘騎。里中莫敢抗。曾祖穎隆。好行善。作黃浦義渡。以濟行旅。至今賴之。贈修職郎。祖有恆。始遷居嘉定城。以明經起家。由貴池縣訓導。遷和州學正。父大定。贈朝議大夫。母汪恭人。翁九歲而孤。哀毀已如成人。後以家計中落。治生爲急。吾鄉地產木絲。衣被四方。乃於吳門經理貿遷。試計然之術。積其奇羨。遂至饒裕。翁性耿介。動必以義。不苟然諾。慮事精密。纖悉畢周。治家接物。皆中法度。先世墓田。爲族人私鬻出贖而歸之。手定宗譜。條列井井。故居在儒學之南。歲久敝漏。翁旣葺而新之。後雖徙家吳閫。猶以學南自號。示不忘本也。少從侍御時西巖先生受業。故熟於邑中舊事。譚論鄉先輩嘉言善行。亶亶不倦。其訓子孫。嚴而有法。讀書力學。務求遠大。勿狃於詞章浮靡之習。子塘。孫中泌。皆以文學馳名。三吳翁之教也。晚歲多儲方藥。服食惟謹。嘗舉古人善言不離口。善藥不離手之語。爲子誦之。翁長子者一紀。而精神完固。乃過予。予往來白下。數主翁家。促鄰劇譚。不限晨夕。泊翁沒。而邑中耆舊凋零欲盡。益俛俛無所之矣。翁諱連璧。字璞存。生於康熙丙申歲。春秋七十有一。敕授儒林郎。候選州同知。晉封朝議大夫。候選知府。夫人陳氏。少於翁一歲。其卒也。先於翁首有三十日。賢明識大體。白首相莊。無閒言。初封安人。晉封恭人。子三。長兆騫。國學生。候選知府。次塘。廩貢生。碭山縣教諭。次兆麟。國學生。議敘。

府同知女三人。壻曰朱漣、黃黼、錢喬雲。孫男九人。中泌、廩饒生。中浩、國學生。中溶、中淵、中瀚、中治、中泰、中沛、中泳。皆習儒。中溶子壻也。曾孫男二人。女一人。銘曰。

鶴沙之苗。衍於江東。孝友世澤。耕讀家風。翁之大父。移邑南郭。學優而仕。儒林矩矱。矯矯惟翁。蚤歲偏孤。始困終亨。以昌其家。研子心計。任公家約。道充身安。有餘綽綽。無憚無傲。曰儉曰慈。恭而近禮。約而好施。厥有義方。著爲庭誥。賢哉三男。令德克劭。綸音載錫。式賁里閭。郊原散步。飄然白鬢。言爲士坊。行爲衆望。翁之襟期。雲舒月朗。前瞻射瀆。後枕虎邱。鬱鬱佳城。平生所游。井椀旣成。卜日云吉。我銘斯藏。俾後有述。

陸淞園墓誌銘

陸子嵩庚。卜以乙卯歲十月二十五日。合葬其考淞園公妣錢宜人於本邑崧塘之原。先期踵子門流涕述母氏遺命曰。當代能文而不苟諛者。莫如吾詹事弟。它日。吾夫婦志銘。盍往求焉。予亦泫然泣下。乃爲之序曰。吳中舊族。莫盛於陸氏。漢吳及晉。名德相承。唐宋而降。別爲四十九枝。其居青浦陸家圩者。自一耕公始。三傳至君滋公。始遷黃渡。卽淞園曾大父也。大父學圃公。附監生。考授州同。父容亭公。國學生。竝以學行著於鄉閭。淞園諱名時。字景雍。幼而開敏。十歲能文。先達多以遠大期之。弱冠游齊魯梁豫。諸公貴人。邀入幕府。折節訂忘年交。淞園不屑也。乾隆丙辰。以國學生入南闈。本房奇其文。薦之以額滿。未售明年。入都肄業。成均。孫文定公爲祭酒。深加器重。會天子舉臨雍之典。淞園隨班聽講。得賜白金克食。及

經書一部。蓋異數也。其夏吏部試授職州吏目。其秋應京兆鄉試。二場甫畢。得家書。知父病。不俟終場。星夜歸里。到家躬奉湯藥。父病小愈。又逾年。而父歿。既服闋。親友勸以出仕。謝曰。小人有母。不忍遠離。捧檄非吾事也。嗣是養志不出者。幾二十年。營治窳窳。必誠必信。生平篤於行誼。見善必爲。歲饑捐賑。歲疫施醫。苟利鄉井。弗顧其私。教子敦品讀書。勿狃章句之陋。以故兩子服官內外。咸能有聞於時。春秋六十有九。以乾隆四十一年正月十九日卒。議敘布政司理問。敕授儒林郎。誥贈奉直大夫。配錢宜人。歲貢生衍之孫女。蘇州府學生如升之女性淑慎。善相夫子事。尊章能得其歡心。識量明達。不輕喜怒。一日火焚其舍。器物都盡。淞園頗以爲憂。宜人解之曰。惟勤與儉。可以集事。是在吾兩人勉之而已。不數年。而堂構皆還舊觀。晚歲精力益健。每挑鐙夜坐。兒孫繞膝。必告以敦尚忠厚。毋失先世勤儉之風。毋蹈華靡豁刻之習。春秋七十有七。以乾隆五十三年五月二十四日卒。敕封安人。誥封太宜人。子二。長祖庚。福建延平府南平縣知縣。先卒。次嵩庚。光祿寺典簿。兼珍饈署署正。女四。皆適仕族。孫男四。廷桂。國學生。廷槐。曰壽。邑庠生。宜人於予爲族姊。故於兩家行實。知之爲詳。系以銘曰。

印纒綬若。不如循陔之樂也。款段下澤。鄉里視之爲矩矱也。室有萊婦。白首與偕也。有子登期。義方之誥也。淞江之湄。土厚且沃也。宰木蔥蘢。如斧如夏屋也。潘楊之好。感舊而神傷也。勒銘穿中。久弗忘也。

敬亭弟墓誌銘

敬亭諱肇熹字希文晚自號敬亭少予一歲同出六世祖北郊府君高祖瑜字純夫國初以服賈致富行善於鄉名載聞在上縣志潛德傳曾祖嶙字介邱歲貢生巢縣訓導有文名築東岡艸堂於南橫瀝之東與唐東江輩爲詩社祖衍字子振國學生有兩子長如升字天培吳江縣學生配旌表節孝范孺人敬亭之嗣父母也次楷字元禮國學生配姚孺人敬亭本生父母也嗣父蚤世事嗣母及本生二親躬躬愉愉無子弟之過年十一二時元禮公延吾父爲之師予亦隨往晨夕聚首不異同胞敬亭性嚴冷不好與人狎爲文刻苦以先民爲程弱冠後補博士弟子鄉先進殷君聘尹有外岡志敬亭搜羅遺事續成四卷簡當有法少多病因博觀靈素難經甲乙諸書并宋元以來諸家書盡得其旨能決死生於數年前不爽豪髮然未嘗受人一錢之餽劉河人患疔羸數年徧體生五色暈衆醫莫能識敬亭診其脈知有積食詢其所嗜云素嗜牛肉敬亭曰此種牛毒也以藥下之大便成塊者數十暈去而病亦除歲甲辰予忽患痿脾腰以下麻木不仁亟延敬亭診之曰此脾陰下陷當用東垣補中益氣湯如其言服之數劑漸瘥半月後已能行矣平生爲人治療此類甚多或勸爲醫案記之則笑曰是偶中耳豈足以傳後世故予所記止此配兪孺人國學生九芝之女前卒子三人瑞恆瑞墀瑞口孫某某敬亭素重予文予文雖不工猶足以傳敬亭今衰病垂盡而其事不見於集中恐無以相見地下篝鐙力疾口授腹藁令東塾甄錄寄其子俾刻諸封中之石銘曰

學不求遠。儒不爲迂。一藝之工。比蹤淳于。子起子病。子銘子阡。非阿所好。其美足傳。

此页空白

潛研堂文集卷四十九

墓誌銘八

封一品夫人熊太夫人墓誌銘

經筵講官太子少傅工部尙書新建裘文達公既葬之二十八年元配熊太夫人終於里第第三子行簡方開藩江左聞訃戴星就道雞斯號慟旬有九日而至苦次祭奠哭踊皆如禮將以某年月日奉太夫人靈輜啓文達公之兆而合祔焉先期貽書屬大昕文其竊中之石大昕夙從文達公游廁門牆之末嘗升堂瞻拜翟茀貞淑懿美知之最悉不敢以病廢才盡辭謹按太夫人姓熊氏世爲南昌甲族明崇禎壬午舉人皇朝贈資政大夫工部尙書諱曰馮者曾祖考也宜興丞諱一湘者祖考也康熙壬午舉人臨桂縣知縣加知州銜諱大燮者考也太夫人幼明惠知大體居不識應屏言不出閫闔善相者謂當大貴且壽而文達公幼有神童之譽因締姻焉年十七于歸不逮事君舅而奉姑王太夫人盡禮乾隆四年文達公官翰林乞假南旋奉王太夫人就養京邸太夫人偕行冷官俸薄節縮絲粟廛以不匱及文達公受知裕陵入直內廷由卿貳晉尙書前後卅年間內參密勿外理簿書兼領大著作又屢奉使指治河讞獄丈地

察邊東極遼瀋西逾哈密南至閩嶠馳驅鞅掌席不暇煖公固一心報國弗問家人生產而奉甘旨肅賓客經費出入章程井井公得以無內顧者繫太夫人之力及文達公謝世朝廷賜祭塋予諡恩禮優渥而家次息早沒稚子幼孫未露頭角太夫人專力教誨寓嚴於寬由是子姓以科目起家凡五人歟歷中外聲望赫然餘各嗜學砥行不改寒素風太夫人年開九秩神明不衰諸郎君或握郡符或任牧令輒迎待溫清維謹間以歸養請則正色曰汝家豈它人比耶戀私而忘公非汝先人意也行簡以中書舍人久直樞禁遭遇今皇帝眷念舊臣之嗣累遷內閣侍讀學士嘗召對詢及家事奏以親老不敢陳情卽奉命祭告南海諭以事竣省親蓋異數也今年行簡以太僕少卿奉命頒賞軍營途次擢太僕卿旋授河南布政使尋調江寧旬月之間三承綸綍及入謝諭以汝母年高改調汝近省便於迎養如老年憚行遣使問省不異在家也聖天子念舊教孝親若骨肉稽之史冊殆未嘗有於戲世祿之家名德相繼者鮮矣而裘氏多材咸自樹立恪守慈誨服官有聲太夫人康強壽考親見其子受兩朝榮遇以振文達公之緒生平嚮子恩勤藉以大慰妻道也母道也古大家所不能兼而太夫人德興福全無少遺憾置之劉子政十三篇中當爲第一於戲盛哉太夫人生于康熙五十四年九月十七日終于嘉慶六年八月三日春秋八十有七子四人麟乾隆庚辰進士翰林院編修師太學生俱早卒行簡乾隆乙未欽賜舉人江寧布政使行恕乾隆癸卯舉人湖北試用知縣護荊州府同知女四人壻鉛山程爲霖曲阜孔廣枚同邑曹寅生南昌徐

廷表孫十二人。承重者元復。庚子。欽賜舉人。國子監助教。元巽。甲寅。恩科舉人。增壽。丁酉。舉人。福建廈門同知。保舉堪勝知府。元善。太學生。實錄館謄錄。元淳。元俊。俱太學生。元遜。元穆。元英。元定。太學生。元勳。太學生。元秉。元穎。孫女九人。曾孫男十二人。女八人。系以銘曰。

敬姜惠班。所天忽焉。王姬韓姑。似續無聞。潘楊蘇程。或促于年。鴻妻滂母。受福弗全。懿哉女宗。一品魚軒。善相夫子。槐棘崇班。孝彰陔膳。儉美組紉。璇宮大慶。錫賚便蕃。先公卽世。孤稚膝前。家人嚴君。兼於一身。詩禮克紹。科第蟬聯。有子皆鳳。無孫不蘭。濟濟袍笏。誨勉維勤。樞廷地峻。列職符分。爭扶板輿。綵衣舞駢。皇華賜假。定省寢門。帝命方伯。建業大藩。謂近親舍。就養差便。安輶纔迓。凶問倏傳。阿婆老福。何不百春。瀧岡峨峨。合祔茲阡。善無不報。歐陽所云。山迴水抱。芑蔭後昆。婦順母儀。彤管垂芬。

廣西按察使馮公妻封淑人王氏墓誌銘

故通議大夫廣西按察使代州馮公元方之夫人。誥封淑人王氏。世居江南之上元縣。太子太保。戶部尚書。端簡公宏祚之曾孫。刑部雲南司郎中瑜之孫。廣西柳州府通判世清之女。而翰林院編修。禮科給事中雲驢之孫婦。廣西南寧府同知壘之冢婦也。夫人外內兩家。皆世族。柳州與南寧。同官相善。故夫人歸於馮。南寧奔父喪。盡室歸里。夫人始得拜見王姑魏夫人。姑田夫人。皆喜曰。江南新婦。動止有禮法。及居舅姑喪。哀敬盡禮。宗族皆賢之。馮公以名進士。由州縣擢歷監司。夫人常從任所。治家事。內外井井。故公

得一其心於職事。爲時名臣。公年逾四十。未有嗣。夫人爲置側室。蘭氏生子郁。晨夕撫視。若己出。公之仲弟□□官嘉禾縣知縣。夫婦相繼歿。遺一子二女。夫人親撫養之。教誨婚嫁。鴈行侍膝下。僮僕新至者。不知其爲從子也。公旣卒。官粵西。夫人扶櫬歸里。營窀穸。花家莊先塋之旁。勗子以讀書立品。無墜先人志。子郁以從三品蔭。授河南閩鄉縣知縣。將迎夫人就養。夫人聞閩鄉清貧。恐以私養妨公務。竟不往。每獻歲。闔鄉使致。至安石榴木瓜一二種。夫人必問物何從來。答以同僚見遺。或署中所產。則喜。或誤答以紳士餽遺。輒不懌。貽書誡曰。此包苴之漸。不可不慎也。郁以是益自勵。用廉幹調儀封縣。咸曰賢母之教云。夫人年八十餘。神明不衰。燈下猶能治鍼綫。齒落者僅一二。其卒於乾隆三十五年八月十日。春秋九十一。卽郁也。女一。適辛未進士廣西左江道李天培。孫男四人。廷堅。廷望。廷圭。廷翌。以某年月日合葬。夫人於按察公之兆。屬其從子刑部郎中廷承來乞銘。予與郎中以道義交。故得悉夫人之族世。銘曰。尚書之門有淑女。廉訪之門有內主。仙令之門有壽母。祔同穴歸其所。以德受福昌厥後。

王太宜人墓誌銘

刑部湖廣司郎中仁和湯君蓴棠。奉其母王太宜人。之計。將奔喪歸葬。述事狀。踵門來乞銘。且言曰。曩先君子捐館舍。太宜人遵治命。營窀穸。西溪之上。葬吾王父母。以先人從葬。歲實在辛亥。越今四十有一年。將啓先人之封而祔焉。術者曰。神靈久安。動則有愆。土脈凝結。不利沮泄。若古攸聞。不以卑動尊。考亭大

儒故事可循。盍別擇地而兆乎。詢之知禮者曰。可。今卜葬吾母於某鄉某原。永惟苦節。熾行合於女史。請子述之。以勸不朽。按狀。太宜人姓王氏。處士某之女。誥贈奉政大夫湯公長庚之妻。幼有淑德。年十九而嫁。三十有五而寡。守志撫孤四十年。以乾隆三十六年四月七日卒。春秋七十有五。其年恭遇大慶。推恩誥贈宜人。子四人。長萼樓。太學生。次萼聯。乾隆乙丑進士。翰林院編修。先太宜人卒。次振。殤。次卽郎中。也由乾隆癸未進士。歷今官。女三人。長適祝聖齊。次適魏學徵。季未嫁。卒。孫男九人。憲。優。貢。生。充。覺。羅。宗。學。教。習。照。附。貢。生。愷。勳。俱。縣。學。生。燾。燿。煒。並。幼。孫。女。四。人。曾。孫。男。三。人。太。宜。人。之。嫁。也。甫。入。門。而。舅。疾。亟。卽。去。妝。飾。奉。湯。藥。不。以。新。嫁。自。異。姜。翁。周。士。者。姑。之。從。弟。耄。而。無。子。館。之。衣。食。終。其。身。曰。吾。不。逮。事。姑。此。以。承。先。姑。志。也。人。皆。謂。湯。氏。得。孝。婦。其。佐。奉。政。公。也。家。故。貧。躬。紡。紝。務。儉。素。早。作。夜。思。久。而。衣。食。漸。裕。夫。病。割。臂。肉。和。藥。飲。之。人。皆。謂。湯。氏。得。令。妻。中。年。而。寡。遺。息。長。者。僅。十。有。四。幼。者。未。周。歲。養。之。教。之。使。皆。成。立。有。名。于。當。世。人。皆。謂。湯。氏。得。賢。母。湯。氏。自。侍。郎。西。厓。先。生。後。久。無。達。者。編。修。始。以。高。才。連。取。科。第。登。館。閣。又。十。餘。年。而。郎。中。繼。之。在。西。曹。平。亭。疑。獄。奏。當。無。冤。者。名。動。闕。廷。方。將。大。用。于。世。苦。節。之。報。未。有。艾。也。始。郎。中。以。養。疾。不。與。計。偕。者。三。科。或。以。爲。言。太。宜。人。曰。遲。速。時。也。躁。進。何。爲。其。識。鑒。遠。達。如。此。大。听。于。編。修。爲。後。進。又。與。郎。中。交。善。辭。不。獲。命。謹。敘。次。而。銘。之。曰。

家之興。溯世德。節孝門。報不忒。懿宜人。內行備。先劬勞。後昌熾。伯養志。仲登朝。季踵之。名益劭。文章醇。政

事敏。推所自。母之訓。卜新阡。龜筮從。神有知。靡不通。西湖水。清而瀏。賢母澤。與同久。

邢孺人墓誌銘

益都李進士文藻。喪其母邢孺人。葬有日矣。遣一介走京師。以所爲狀乞予銘。文藻從予遊久。其母之賢。固耳熟焉。乃序而銘之。孺人姓邢氏。諱止。候補州判李翁諱遠之配也。端重寡笑言。事君姑張孺人。甚有婦道。翁嘗病傷寒。十日不汗。孺人稽首籲天。請減己壽十年。以益夫算。病良已。又十年乃卒。君姑猶在堂也。孺人將迎。百方慰傷。姑心哀至。則哭于別院。久之。姑亦怡然忘其失子。延名師教諸子于家。程課有常。修膳必腆。故諸子皆成立。而文藻尤以文學顯。青州士夫。知從事于詩古文。自文藻始也。孺人好施。予親鄙以貧乏告者。周之無吝色。戊辰歲。縣大饑。孺人爲粥。日餉百餘人。自十月至明年四月乃罷。困廩爲空。獨不信仙佛因果之說。僧道至其門求施者。拒之曰。吾豈有貲財。供其蓋五臟廟哉。五臟廟者。諺謂假修寺觀。恣飲啗也。其馭女奴以嚴。有過必笞。然能時其飲食。勞逸必均。又及時爲擇良對。故旣歿而竈下皆哭失聲。張孺人好畜啞婢。謂有二善。一殘疾不失養。一不以口舌生家釁。孺人亦買二焉。村女有爲狼齧失人形者。其父母棄之。孺人令收養。名之曰狼臙。狼臙善操作。孺人甚愛之。孺人歿。諸婢哭最哀者。狼臙也。孺人卒于乾隆丙戌六月某日。丈夫子四。文藻。乾隆二十六年進士。候選知縣。文濤。文淵。縣附生。文濬。女子子二。其嫁于竇者蚤寡。守志。孺人嘗慰之曰。吾子女不朽者。惟汝耳。何恨。銘曰。

歷城之邢名族裔。遷于益都。今五世祖諱振邦。考士掄。兩世不仕。潛德聞。孺人十六室于李。善事威姑。相夫子。中年集蓼。食苦辛。撫孤父師兼一身。懿哉德修。未食報。終五十九。廬下壽。海岱閣南安定鄉。鬱鬱佳城。夫所藏。丁亥二月日巳未。孺人之匱。耐于是。有子而才多文詞。賢母之澤。百代貽。

張太孺人墓誌銘

元和陳孝廉鶴。以乾隆五十八年六月廿有八日。丁大母張太孺人憂。卽以其年十有二月十有七日。奉匱合葬於大父忍伯公之新阡。先期自述事狀。乞予銘其藏。鶴篤行人也。其詞質而可信。故不辭而序之。蓋鶴於忍伯爲族孫。忍伯有子廣勤。慧而能文。早遊縣庠。未娶而夭。忍伯慟其子甚。臨沒。與太孺人議。以鶴爲廣勤後。而孫撫之。且徧告諸族。甫三日。而忍伯沒。族人有覲其資者。相與齟齬之。而鶴之本生。考曾懋。恥與爲人後。亦堅辭。太孺人以先夫遺言。固不許。越六年。外侮稍定。乃撫鶴膝下。嫠婦弱孫。相依爲命。伶仃廿載。卒能教以成立。親見其登科。可謂賢矣。鶴之言曰。吾祖母家故饒裕。親串多素封。而寒門獨終窶。乃遭族侮。遺產盡廢。衣食或不給。而太孺人安之若素。嘗語鶴曰。人生遭際。各有定分。求非分之獲。必有非意之損。又言處貧賤時。持身不可不謹。其明於大義如此。吳中陳氏。自中丞公以來。名德相繼。忍伯諱燦。張由增。廣生。貢成均。同輩推爲宿學。初娶沈孺人。早卒。而太孺人繼之。生一子。一女子。卽廣勤。女嫁長洲學生胡璜。女亦孝。歲時迎養。太孺人或留數月。晚年辭不往。曰。吾老矣。設有不諱。不可殯於壻家。識

者以爲達禮。嗣孫鶴。乾隆壬子舉人。曾孫德勉。銘曰。古稱女士。能識大體。詒厥後人。式穀以似。猗與賢母。作配穎川。仁厚爲本。禮法靡愆。無子有孫。視孫如子。克家元宗。由苦得旨。大母之訓。維孫是承。合祔云吉。佑啓雲仍。

墓表

候選州判李君墓表

君姓李氏。諱遠。君宏其字。先世自棗強遷益都東關之春牛街。曾祖有能。祖逢春。父元盛。以好義稱。推產讓二兄。服賈以奉母。年五十始得子。卽君也。君生之日。廳事方上梁。親鄰咸賀。以爲考室之祥。幼奇慧。應童子試不利。入粟爲國子生。後又援例候選州判。有志于仕進矣。太夫人年漸高。意不欲君行。遂不謁選。人以終其身。中歲得病幾殆。旣瘳。乃杜門攻甲乙家言。三年而成。療疾如操左券。求治者日闐街巷。君乘騎出視之。雖大風雪無阻。然未嘗受其家餽謝。嘗有男子叩門求寄炭。俟之半年不來取。君知其巧于餉也。命分給里之凍者。衆醫忌君之能。或譏君藥物有不盡識。持以相試。君笑曰。譬之于人。我識其性情心術。而君識其形貌耳。惡足以難我哉。久之家有狐祟。白晝投石傷什器。或言祭以雞卵白酒。則去。君不聽。日向空詈之。祟益甚。君爲文將訴于城隍神。詞甚厲。甫脫稿而安。隣有跛者竇三。無故登君之門大詬。家

人咸不堪。君子之粟數石，慚謝而去。或以爲怯，答曰：吾伸于狐而屈于鄉人，不亦可乎？嘗論教子之法，十歲爲擇師，二十爲擇友，鮮衣美食，勿使御淫詞，勿使觀有不成者，鮮矣。乾隆丁卯春，夢天使韓某召己，覺而歎曰：韓者寒也，入冬其不免乎？十月病瘧，自診必不起。以是月十八日卒。春秋四十有一，配邢孺人，賢而知大體。君歿，事姑氏，生養死葬，無失禮。教其子文藻等讀書立品，毋忘先人之訓。歲己卯，文藻以第二人舉于鄉，明年舉禮部，而文淵亦補博士弟子。孺人乃泣告于君墓前曰：兒有登第入泮宮者矣，是夫子之志也。君有子四人：文藻、文濤、文淵、文濬。女二人：一嫁國子生蔣汝業，一嫁寶嶺蚤寡。君歿之二十年而邢孺人卒。孤文藻等將啓君之兆而耐焉。先期，文藻以書告曰：先人捐館有年，而墓道之石未立，敢請吾子表之。又曰：世俗行狀多繁蕪，不合義法。爲文者別爲應酬之文，姑塞求者，而不編以入本集。惟吾子擇其合于銘法者書之，庶附吾子之集以傳。嗚呼！斯可謂賢子也已。予惟古來淳德長者，行善于鄉，名位不顯，而卒能傳于後者，賢子孫之力也。行善矣，而無子孫，或有又不才，雖善久且不著，其傳不傳，有天幸焉。然而爲善者，常爲之不悔也。觀君之行善如此，文藻之欲傳其親如此，天之報作善者，果有爽哉，果有爽哉。

贈儒林郎翰林院檢討曹君墓表

吏科掌印給事中汾陽曹君學閔，一日過同年友錢大昕，告之曰：某之先人，行甚高而不求聞于世，旣沒

四十年。士大夫數鄉之耆德。宜有後者。必首屈一指焉。夫無善而誣其先。非孝也。有善而不能彰。非義也。某生十二年而孤。於先人行事。知之不詳。惟夙所聞于先太宜人。及親故常所稱述。不誣者。粗識一二。乞吾子一言。以表墓道之石。給事人品修潔。其文質直無虛詞。乃詮次而志之。曰。君諱曰英。字彥傑。世居汾陽縣城北十里之太平村。曾祖朝仕。嘗遇異人。授以術。可暴富。終不一試。客請以千金受其方。曰。挾術而忘義。必敗。固弗與。易簣時。告子孫曰。吾得異術。非不知。可少利。若曹也。然遺之以利。何如遺之以正乎。術竟不傳。君未冠。失所怙。事母夫人孝。爲邑諸生。有聲庠序間。與人交有終始。重然諾。僦儻好施。予宗鄙。賴以舉火者甚衆。邑有王惠庵先生者。孝子也。貧而樂道。獨與君善。君常餽之粟。寒則遺之布。人或效君所爲。王先生輒怒曰。若豈彥傑比哉。安得以所有溷我。張媪者。於母夫人爲中表姊妹。嫠老無所依。君養之終其身。張病且死。語人曰。吾受曹氏恩。無以報。天道有知。其子孫必有顯者矣。汾之士。斥鹵可鹽。案外鹽亦間有擔以至者。例皆禁不得售。而令商轉安邑池鹽鬻于市。道險又回遠。鹽益貴。豪商倚勢凌平民。輒誣以私販罪。君稔其害。糾同志詣官。白狀。請均其稅于糴。而逐商。事得行。民至今以爲便。居鄉務爲退讓。子偶與村毗。詬語。卽扶之。曰。此吾隣里。卽汝諸父行。孺子敢無禮耶。親詣毗舍。謝失教。不計其曲直也。年五十有一。自尅其亡之日。病革。家人移床正寢。笑曰。尙須數刻。及期。整衣冠而逝。實雍正九年九月三日也。配王宜人。壽陽縣儒學訓導。凝道之女。奉養君姑。數十載無間言。後君口歲卒。子男四人。長學會。次學

思季學雍給事其三子也。登乾隆甲戌進士。由翰林院檢討累遷今官。女五人。孫男若干人。曾孫若干人。給事又言君沒後數日見夢于給事。張蓋輿馬導從甚盛。類世俗所祀神人者。嗚呼幽明之理固不可測。而行道有福其常也。世果有神人。其必在正直而壹者矣。生不求聞死而神之。此理之可信者夫。給事在翰林日逢國大慶得贈及父母。敕贈君儒林郎翰林院檢討。葬以某年月日。銘曰。西河故郡卜子所教。漂然節概先民是傲。疊疊曹公行善于鄉。貞固隱括以矯俗涼。五十未衰瘞化則止。匪天斬之以昌孫子。幽蘭空谷其芳不言。過者必式有道之阡。

黃氏先塋表

上海黃生森從予遊。乞予敘其先人事狀。表諸墓道。且言曰。森之王父載南府君。躬孝友。治生織齋。稍自給。王父與世父相繼辭世。而吾父治家事不懈。益虔。今從兄培蘭爲家督。門無異財。猶稱吾父遺志也。去秋奉王母張宜人合葬於載南府君之兆。在縣東二十二保十八圖。而世父葬於左。吾父葬於右。昭穆相次。迫於時日。未及納銘於竊方。今能文而有法。莫如先生。願請爲文刻於石。謹按黃氏咎繇之後。以國爲族。而春秋衛有黃夷。晉有黃淵。戰國之時。楚有黃歇。漢初黃公居四顛之一。而景帝時有黃生。與博士轅固論湯武革命事。厥後丞相興於淮陽。司空太尉顯於江夏。而族浸以冒。述郡望者皆原本於江夏焉。上海黃氏先世仕宋。居於汴。有諱彥者。扈從高宗南渡。始居嘉定八都之騰陽。再遷而東。卽今析隸寶山之

清浦江傳五世至文明兄弟三人一居浙西一居崇明獨文明守故宅三傳至昇始居界浜口以海水內溢率其族築捍海塘紆迴數百丈至今有黃家灣之稱有子六人次二曰亨以輸粟振山東饑授承事郎表其坊曰尚義十一傳至錫周好義重然諾隣有盛甲者罷官負累不得歸錫周遇之逆旅慨然出千金贈之盛感其義欲以愛妾出侍艷然曰公非知我者遂拂衣而起再傳至霖性儻不羈有子五人長曰衡松載南其字也幼習舉子業從嘉定張儼思先生學與其子南華宮詹同筆硯交好無閒父沒棄儒服賈其配張氏南華從兄弟行也賢而達大體悉出奩中物爲貲本逐什一之利事母以孝撫諸弟以友愛課子以忠厚禮讓不尙華侈晚年與昆弟子姓聚首一堂勸以勤力或講論古今成敗得失皆洞中竅要卒年口十有口以子貴誥贈奉直大夫張宜人年九十餘耳目猶聰明子孫欲爲稱壽則力却之令其子捐佃戶租一歲曰此所以爲我壽也年至九十五卒誥封宜人子二人長曰雲章字漢文一字勗哉事親以禮好施予戚友有匱乏者不俟其請輒稱父命助之嘗遠賈千里外附書問父母安否纖悉必以白雖不在親側親心安焉年四十有五誥贈奉直大夫次曰雲師字騶書一字守愚佐父家政條理井井兄沒撫兄子四人如其子剏建宗祠合祀六世以下之主春秋時享會祭者百餘人乙亥歲大饑有司勸富民煮粥以食餓者騶書言煮粥有中飽之患有守候之苦不若以錢給之乃身自爲倡卽所居五十二圖驗其最貧者大口日給錢二十小者半之民不勞而得食全活甚衆以入貲候選布政司理問加二級年六

十漢文子四人。長培蘭。候選布政司理問。次培鎬。淦培桂。俱國子監生。騶書子一人。森。邑庠生。黃氏世居黃浦之濱。黃浦卽古之滬濱。黃與滬聲相轉也。今人以爲由春申君得名。吾邑有黃渡。亦云然。皆傳會難信。然載南翁父子以孝友勤謹起其家。積善之慶。其流必長。異日援冉溪之例。謂浦以高行黃氏而名。奚不可哉。

贈儒林郎董君墓表

君諱華鏜。字進聲。姓董氏。世居浙江之慈谿。漢句章孝子黯之六十世孫也。父之璉。國學生。君少而朗悟。讀書務通曉大義。不屑屑尋章摘句。旣長。自傷家貧。無以給甘旨。乃棄儒服賈。營什一之利。嘗歷荆襄。泝巴峽。舟車數千里。與其賢豪長者交。莫不信而服之。旣而生計稍裕。乃喟然曰。父母在不遠遊。古聖之訓也。向特不得已而爲之。今菽水幸無缺。可以補前愆矣。性儉朴。與妻孥噉麩。而二親之饌必豐腆。母嘗病劇。諸方劑皆不效。齋戒祈禱。割左臂肉以進。母服之。竟痊。僉謂至孝所感。居喪。柴毀骨立。讀禮三年。未嘗見齒。仲兄客死虞山。事寡嫂以禮。撫其弱女如己出。旣長。罄己橐嫁之。其游三楚時。有客負其金五百。緩君知其不能償。置勿索。且爲籌生計。毋致失所。一時稱爲長者。其治家纖嗇。而教子弟必先以寬厚。年四十有六而歿。以長子入仕。贈儒林郎。元配葉安人。莊靜寡言笑。以儉勤佐家政。事舅姑。睦娣姒。教諸子咸有法度。晚歲病目醫。就醫杭州湖上。一日。諸子請泛舟六橋。忽愴然曰。汝父在日。嘗言卿一生勤苦。足

不出門闔。倘得偕老西湖。不可不共游。今汝父已下世。吾何忍獨游哉。安人生三子。長景澗。候選州同。次景澄。國學生。次景沛。廩膳生。以讀書砥行聞於鄉邦。嘉慶六年三月。景沛訪予吳門紫陽書院。出所撰事狀。稽首而言曰。先考妣合葬縣西五十里玉犀山之原有年矣。而墓表尙闕。唯先生幸憐之。予衰病久廢鉛槧。辭之再三。則又曰。鄴人之事昌黎。嘗有違言。願先生有以解之。予感其意。爲慨然敘次之。不復辭也。嗟乎。人肉瘵瘵。始於唐。陳藏器本草。唐以前無此方。是以古聖賢無此事。夫身體髮膚。不敢毀傷者。人子晨昏之常節。一旦親在垂危。有可以藥斯疾者。雖蹈湯火。亦所不辭。何乃於割股之孝子。而責之備乎。昌黎之論。特謂有司不當旌異之耳。有司立法。固當戒輕生之漸。人子盡孝。何暇計他日之名。今旣無旌門之例。而猶不令其稱於鄉黨。此與於不孝之甚者也。昌黎雖有是言。而後之史家。未嘗沒其姓名。蓋善善之心。人皆有之。不能執一家之議論。以抑千古奇傑之士也。審矣。昔虞仲翔以句章君怨親之辱。白日報仇。目爲孝子。使繩以後儒之論。必有大不滿者。而孝子之名。自與日月爭光。然則君之割臂瘵母。亦可以自信千古矣夫。

墓碣

盛涇先塋之碣

盛涇先塋者。錢氏始遷祖之所藏也。蘇松之水。皆注于婁江松江以入海。縱者爲浦。橫者爲塘。其稱涇者。特小小者爾。盛涇介于吳塘顧浦之間。廣不過四五尺。不能容舟楫。相傳昔有盛姓者居之。鄉人讀盛姓爲直上切。并以氏斯涇焉。吾始祖自常熟之雙鳳里來。贅于盛涇之管氏。貧不能歸。且樂其俗之朴而淳也。有田五畝。有屋兩間。夫耕婦樨。足以自給。既沒而葬于涇之陽。江澗錢氏多稱吳越武肅王之裔。吾始祖之遷。失其譜系。其出于吳越與否。不敢知也。自始祖之沒。迄今二百五十年。先大父在日。嘗訪求始祖遺事。欲著之族譜。而宗婣隣里。俱無有能言之者。近世士大夫。述家乘。往往崇飾虛譽。勦取一二故事。可通用者。以文益之。此之謂誣其先人。非篤行者所取也。吾始祖行善于鄉。不求人知。傳序至今。閱八九世。成丁者垂及百人。或稽田。或讀書。皆安分量力。不輕去其鄉。無有作姦犯科。而麗于刑辟者。此則吾始祖垂訓之善。而流澤之長有自矣。今秋。大人貽書大昕曰。汝備位侍從。爲人作銘誌多矣。而先塋尙未有碣。是不可以闕。於是大昕謹紀所聞。令族子玷以小篆書之。寄歸刻于貞石。乾隆三十有八年。歲在癸巳。冬十月。丙戌朔二十九日。甲寅。七世孫。日講起居注官。翰林院侍讀學士。上書房師傅。兼充三通館纂修官。加一級。紀錄四次。大昕謹述。

布衣陳君墓碣

嗚呼。自科舉之法行。士大夫習其業者。非孔孟之書不觀。非程朱之說不用。國無異學。學無它師。真所謂

一道德以同俗者矣。然學者自就傅而後。粗涉章句。卽從事於應舉之文。父師所講授。無過庸輒骫骳之詞。得其形似。便可以致功名。轉不如詩賦策論之難工。由是六經諸史。束之高閣。卽四書之義。亦可勿深求。譬猶苾芻。誦經禮懺。志在乞食。而不在修行。蒙竊優焉。攷元時始以四書義取士。當時士大夫。謂天理同根人心。誦其言者衆。則爲其道者將多。迄今垂五百年。自通都大邑。以至窮鄉蠻徼。無不知誦四書。尊程朱。而未見有爲其道者。所誦者禮義。所好者名利。豈口耳之果無與于身心歟。何其相戾之甚也。於此有人焉。能究心於四書。以自淑其身。而不爲科舉之學。可不謂豪傑之士乎。太倉之南鄉。有陳君宏猷者。幼而穎敏。年二十五。慨然有求道志。或勸應童子試。謝不應。家貧。教授生徒。手四書一編。晨夕研討。雖燕居衣冠必正。數十年如一日。鄉里笑其迂。稱爲小朱文公。君以爲誠然。欲然曰。吾無其實。敢有其名乎。寧化雷公鉉。視學江蘇。君攜所著四書晰疑往謁。雷公延以賓禮。留署中。講論無虛日。以爲相見晚也。君自少時好談易。繼乃專力于四書。晚年復作四書就正錄。其言平易。非儒先之說不道也。間出一二新意。或疑與注異。則曰。明經當以理爲主。與其屈經從註。何如舍註從經耶。明季陳孝廉確庵。以講學名。或言君爲確庵之後。君悚然曰。非也。然豪傑之士。必有待而興乎。其立志如此。君諱鉉。宏猷其字。其卒以乾隆二十八年十月廿九日。春秋七十有三。葬於十七都七圖鹽鐵塘。今之士大夫。諱言道學。愬無實而冒其名。或藉以梯進干譽。爲世所輕誚。然聖賢之書具在。優而柔之。厭而飲之。終身不怠。而未嘗志于祿利。與世

競一日之名。若陳君者。誠加于人一等哉。予居嘉定西鄉之望仙橋。去其廬不二十里。顧未嘗與君識面。君既沒。門弟子王濤持其遺書請予文表其碣。予非能知君者。嘉濤之不忘其師。重違濤意。而爲之辭。蓋師死而不之背。亦今人之所難也。

此页空白

潛研堂文集卷五十

家傳

先大父贈奉政大夫府君家傳

府君諱王炯。字青文。號陳人。世居嘉定西鄉之望仙橋。生而穎敏。好讀書。年卅有三。始補學官弟子。家貧。以課徒自給。親舊家有藏書。輒借讀之。雖盛夏。未嘗一日少輟。又謂讀書必先識字。故於四聲清濁。辨別精密。不爲方音所囿。其教子弟。五經句讀。字之偏傍。音之平仄。無少譌溷。士大夫有難字疑義。從府君取決。皆得其意。以去。嘗游浙東。避雨入村塾。有童子問大學孔氏之遺書。明道語邪。伊川語邪。其師不能對。府君笑曰。此伊川先生語也。諸君未讀小學書乎。皆大歎服。或言王勃滕王閣詩序。蘭亭已矣。梓澤邱墟二句。屬對未稱。府君曰。已矣。疊韻。邱墟雙聲。何不稱之有。府君於四部書。靡不研究。旁及卜筮。祿命之術。輒有奇驗。唯不喜二氏學。嘗云。仙言長生。佛言不滅。二者皆未可信。夫神依形以在。未有形去而神存者。今學仙學佛之徒。徧天下。卒無一人能見古仙古佛者。則長生非生不滅。仍滅也。若謂覺性常在。則吾儒何獨不然。匪獨孔孟程朱。卽李杜韓蘇輩。其精神亦至今在也。孔子言疾沒世而名不稱。聖人豈好

名哉。立德立功立言。吾儒之不朽。卽吾儒之長生不滅也。府君事父母至孝。兄早歿。撫孤姪使成立。剏修宗譜。斷自遷嘉定之祖爲始。而不附會貴胄。蓋其慎也。太倉李翁景初。府君父執也。幼時相依課誦。李翁誨之備至。翁歿。無子。府君迎其配黃孺人。敬養三十餘年。歿爲制服。葬而除之。歲時必設位致祭焉。年踰六十。始得孫大昕。甫晬。卽教以識字。比五歲。觀授以經書。稍暇。卽與講論前代故事。詳悉指示。俾記憶勿忘。乃止。如是者殆十年。府君年九十餘。視聽不衰。出入不假扶掖。散步阡陌間。望之如神仙中人。乾隆二十三年。有司舉行鄉飲酒禮。延府君爲大賓。黃髮卽席。觀者聳然起敬。縣尹介公玉濤。問何以致壽。答曰。某生平不知導引服餌之術。但文字外別無他好。未嘗輕易喜怒。中年以後。從不露處耳。性和易。有犯之者。置弗校。久之。卒自慚謝。與人子弟言。必依於孝弟。其有蒲博廢業。誼競生事者。正色責之。往往改悔。家無儲粟。而錙銖不妄取於人。方耆艾時。恭遇恩詔。賜老人粟帛。或請增年以覲賞。府君曰。欺天以邀榮。吾不爲也。已卯歲十月卒。年九十有二。以大昕貴。誥贈奉政大夫。翰林院侍讀。加一級。所著有字學海珠三卷。星命瑣言一卷。元和陳鶴填諱

先考贈中憲大夫府君家傳

府君諱桂發。字方五。號小山。贈奉政大夫陳人公之子。少承庭訓。以讀書立品爲務。性耿介。不妄與人交。友朋有過失。規箴必盡所欲言。或以爲太過。則曰。吾知有直諒而已。豈可以諛佞待良友乎。好讀先正學。

業文。恥流俗腐濫之習。年近四十。始補學官弟子。歲科試。文益有名。而秋賦屢躓。及子大昕通籍登朝。遂絕意進取。以詩酒自娛。是時王光祿鳴盛之父虛亭公。曹學士仁虎之父檀濟公。年齒與府君相上下。親串款洽。文酒唱和無虛日。當時稱三封翁。乙亥歲大稜。邑令廖公運芳。設粥施饑者。外岡一廠。距城稍遠。特延府君董其事。府君晨入夜歸。檢視必周。經畫井井。胥役無中飽者。性疎散。好游山水。三吳兩浙名勝之區。足跡靡不到。芒屨竹杖。旬日妄返。登陟嶮巖。如履坦途。雖少年不能及。嘗謂子弟曰。家貧不能爲園。名山水近在數百里。扁舟可達者。皆吾園也。但苦屐齒不盡到耳。平生衣服飲食皆儉朴。尤厭新奇玩好之飾。嘗言士大夫居鄉。不能轉移風氣。已可愧矣。況可爲風氣轉移邪。當事重府君名。往往造廬問興居。府君自報謁外。或終年不更至。人以爲簡傲。府君曰。古人非公事不見邑宰。今人非私事不見邑宰。吾無私事故不見。非簡也。乙酉歲大昕奉命典試浙江。奏請試畢。乞假十日。便道歸省。時府君與沈太恭人。皆年近七旬。斑衣稱壽。鄉黨以爲榮。然府君雅不喜矜銜。門第卑陋。僅蔽風雨。晚歲始於城中買數椽屋。後有小池。池上有亭。周遭植花竹。四時紅紫粲然。殊有郊野之趣。徒步出入。不攜僮從。遇人家有好花石。叩門翫賞。興盡便返。城隍廡後園。有林壑之勝。距所居僅一里許。非風雨寒暑。日必一至。與邨翁相爾汝。觀者不知爲四品封君也。授徒二十年。遇少年質美者。必教以兼通古學。勿蹈科舉空疎之陋。獨稱族孫塘。可與道古。後果以經術知名。又勅議立宗祠於外岡之西。每歲春秋。合族薦享。儀節略依朱子家禮。年已

及耄猶率子弟行禮。無倦容。愛游山而未嘗拜佛。尤不喜巫鬼禱禳。易簣之日。遺誠勿作佛事。卒年七十有九。以子官誥封奉政大夫。翰林院侍讀。加一級。晉贈中憲大夫。詹事府少詹事。有小山吟稿三卷。元和陳鶴填諱

行狀

錢處士行狀

處士姓錢氏。諱民。字子仁。一字生翁。嘉定縣外岡里人。早孤。十三棄書學。賈數爲鄉里所侮。乃歎曰。世多妄人。求其不妄者。聖賢而已。初名樞。字子辰。夢許魯齋教以民名。覺而思曰。聖人之於民亦類也。遂易今名。慨然有學聖之志。聞青浦有孔子衣冠墓。擇日齋戒往謁。願爲聖人之徒。是夜夢有告己者曰。謝絕漢以來諸儒論說。乃可爲學。自是始讀四書正文。年已三十矣。題其所居之室曰存養廬。日靜坐其中。所學日進。平湖陸清獻公宰吾邑。以正學自任。處士嘗與之論學。又五年。自謂學已成。復往平湖。質之陸公。公與之言多不合。怪而詢之。則曰。公從文公入。某從尼父入耳。嘗與友人書言。先聖之學。貴乎本末兼盡。始終有序。大學所謂知本者。知所作聖之基也。誠正者。爲其作聖之功也。中庸所謂尊德性。先也。本也。道問學。後也。末也。卽物窮理。其誤在于無本。六經爲吾注脚。其誤在于無末。論語曰。君子務本。本立而道生。文

公以爲學者不可厭末求本。教人但學其末。是所謂其本亂矣。本亂而求末之治。豈可得乎。此未合于大學也。孟子曰。堯舜之知不徧物。中庸曰。雖聖人亦有所不知焉。文公教初學者。卽責以知旣盡。而後意可誠。語類又云。格物者。窮事事物物之理。致知者。知事事物物之理。如此。則意之惑亂殊甚。又何可誠。且使堯舜復生。亦恐知不能徧物。况初學乎。此未合于孟子也。程子曰。不必盡格天下之物。又云。存心一草木器用之間。此是何學問。所謂如此而望有得。如炊沙而欲其成飯也。文公則曰。上而無極太極。下而一草一木一昆蟲之微。亦各有理。一書未讀。則闕了一書道理。一事不窮。則闕了一事道理。一物不格。則闕了一物道理。須著逐一件與他理會過。愚意無極太極。是天人合一之學。學至有成。亦可自得。初學者學之。雖非先務。無傷也。草木昆蟲。事物之衆。人無百年壽筭。何能一一盡之。孟子以治天下不可耕且爲。文公亦以大臣不當親細務。奈何志在學聖。而反務盡一草一木一昆蟲之微哉。此未合于二程也。又言今之學者。不知追求孔孟之實。而只辨朱陸之所以異。非聖學本務。去道甚遠。所以近世學文公者。止得整庵之學而已矣。學象山者。止得陽明之學而已矣。在朱陸當日。雖有不同。亦不至相關如明儒之甚也。學聖而相關是務。聖學必亡矣。蓋處士之學得於靜坐。謂後儒多未合先聖之旨。故直追孔孟。自闢門戶。又以意更定四書次序。其言洗洋自恣。或不免果于自信之失。雖然。使以處士之志。而得聖人以爲之師。亦幾於嚶嚶之狂士矣。成颺曰。彼丈夫也。我丈夫也。我何畏彼哉。孟子取其言以勉人之立志者。若處士者。與

過成颺遠矣。處士之沒已七十餘年。子孫無能讀書者。遺文雖存。吾恐後人用覆醬餚也。因叙次其行如右。後之人可以識其志焉。曾祖諱某。祖諱某。父諱源。娶衛氏。某年月日。族子大昕謹狀。

行述

先考小山府君行述

嗚呼痛哉。府君遽舍不孝等而長逝耶。府君天稟素厚。中年以後。無大疾病。或體中小不快。勿藥亦自愈。比歲踰七望八。精力益矍鑠。出行未嘗扶杖。亦不攜蒼頭。自隨輕衫芒屨。散步看花村郭間。往返日數里。許邈近田父村疇。則與話桑麻。勗以孝弟。任恤殷勤。如家人語。去秋不孝大昕奉命督學廣東。將迎府君就養。府君夙聞嶺南山水奇秀。又學使廨中有九曜石遺蹟。欣然規往。乃命不孝大昭偕諸幕友。先于今春赴粵。而自率諸孫以仲夏啓行。旻天不惠。四月中旬。偶感熱疾。荏苒旬有餘日。遽至大故。嗚呼痛哉。不孝大昕在韶州試畢。與不孝大昭私計。府君南行有日。方遣人詣前途。迓侍起居。乃舟行未一舍。急足至。得凶問。兄弟搥心飲血。昏眩靡措。卽目委教授盧君文起。賈勅印至省城。交巡撫德公。而戴星北行。鷄斯徒跣。踰嶺涉江。歷三旬。始抵廬次。痛哉痛哉。不孝等視息偷存。含歛失奉。終天之恨。悔其可追。惟是府君居心行事。光明坦白。夙爲輿論所推。若不及今詮次。以永其傳。不孝等罪戾滋大。用敢和淚泚筆。疏記梗

概焉。府君諱桂發，字芳五，一字方壺，號小山，姓錢氏。先世諱鑑公，自常熟雙鳳里徙居嘉定之盛涇，生北郊公。諱浦，北郊公生順郊公。諱炳，移居望仙橋。府君高祖也。曾祖侍郊公。諱珠，祖公瞻公。諱岐，俱隱德弗曜。父青文公。諱王炯，博學篤行，有聲庠序，享壽九十餘。州縣敦請爲鄉飲大賓，誥贈奉政大夫，翰林院侍讀，加一級。府君少讀書，不屑屑記問章句，習舉子業，滌煩去濫，壹以先正爲師。與同里王丈鯨栢論文，尤有水乳之合。顧屢困童子試，年幾強仕，始受知於學使禮部侍郎桐城張公廷璐，歲科試屢占優等。三上秋闈，不遇。杜門課徒自給。初館族父元禮齋，後館族兄彥輝齋，皆攜不孝大听自隨。晨夕督課，當是時，舉業家多不習詩，生徒或私作韻語，則父師相詬病，以爲妨于制義也。府君獨喜教不孝爲詩，示以唐人安章宅句之法，又謂詩文非空疏無學者所能爲，貸錢爲不孝購書，恣其繙閱。其後車駕南巡，不孝大听以獻賦召試，通籍海內，傳爲殊遇。不數年，有詔鄉會闈歲科試，皆兼試詩，衆乃服府君先識。且善教子也，家故無負郭田，大父以授徒餬口不足，則脫大母奩中物付質庫償之。歲時伏臘，四顧壁立，恒相對愀然。洎府君弱冠後，亦出授徒，束脩所入，悉以奉菽水，而吾母沈恭人躬紡織佐之。大父母顧子婦皆賢，雖窶貧，安其憂焉。大父母並享高年，府君與吾母侍奉六七十載，未嘗有提絮諍語。府君寡兄弟，有幼弟甫十齡，以痘殤。府君以大母所鍾愛也，每時祭及忌日，設位奠之，終身。府君於族人敦睦無間，倡議立宗祠於外岡之西。春秋偕宗人設祭，年已耆耄，猶拜跪盡禮。又增修族譜，前有表，後有小傳，義例謹嚴，無傳會失實。

之病。性伉直。戚友有過失。面規之。無所隱。及其有患難爭競。則委曲周全。惟恐不及。自爲諸生。足跡不涉縣寺。晚年不孝大昕列官於朝。府君益避事遠勢。遇鄉人益恭謹。邑大夫或造廬訪利病。則以年老重聽。

謝之。惟乙亥歲大禋。議勸富民捐穀。於次年春分四鄉煮粥。以食餓者。縣令廖公運芳。敦請主外岡粥廠。府君晨夕赴廠。察視必周。災民得無失所。而姦徒亦無敢中飽者。府君久困文場。備嘗諸生艱苦。及不孝

大昕承乏詞垣。當預校試。先期寓書諭以士子三年勤苦。主文者勿以粗心致失佳士。不孝大昕累忝司

衡。幸不得罪於士大夫者。遵府君之訓也。聞不孝大昕將使粵。卽馳書諭之曰。吾家累世寒士。諸生無大

過而摧辱之。於心安乎。大昕承命憊然。按試半載。未嘗笞一人。諸生亦尠犯法者。不孝大昭應南北闈鄉

試。屢薦。僥得輒落。府君亦不以介意。曰。科名得失有命。無其實而暴得名者不祥。汝但務實學。何亟於科

第爲。府君於世俗嗜好。罕所留意。獨喜登臨山水。自謂有濟勝之具。中歲衣食奔走。足跡不能及遠。比婚

嫁畢。乃賦近遊。常以春秋佳日。扁舟遨遊蘇杭間。訪尋名勝。率旬日或涉月乃返。龐眉皓髮。登頓巖磴間。

身輕如飛。童冠偕行者。或喘汗不能從。咸嘖嘖稱羨。道書所傳地行仙。府君殆近之矣。今春二月。表弟沈

宿昭謁。選得貴陽經歷。將赴任。府君送之吳門。徧遊支硎楞伽鄧尉諸山。探梅過東西崦。至石壁望太湖。

徒步行山中。竟日不疲。僉以爲期頤可卜。乃未屆兩月。以微疾竟至不起。痛哉痛哉。易簀前二日。問家僮

侍疾者曰。汝聞鼓吹聲否。明日午後。忽自言。速具舟船旗幟。若有騶從迎導者。豈所謂歿而爲神者耶。嗚

呼痛哉。不孝大昕久宦京師。屢請兩大人就養。輒不允。惟癸未歲。攜不孝大昭北來。留一歲。稍修潔白之

養。乙酉。以典試浙闈。請於朝。得給假十日。省覲。還。召見勤政殿。蒙聖恩垂問。父母年歲甚悉。丁亥秋。不孝

大昕。念兩親年高。乞假歸里。故居褊隘。幾無容膝之所。乃別于城中買屋數椽。屋後有隙地百弓。府君日

課僮鑿池蒔花竹。其旁意欣然樂之。居二載。府君察不孝大昕不欲離膝下。正色諭之曰。吾夫婦精力尙

健。且有汝弟在家侍養。明歲國家大慶。汝叨列侍從。可不隨班行禮乎。不孝大昕再補官。承命入直內廷。

侍。皇子講讀。府君屢作書諭。以勤勉慎密。毋貽老人憂。及粵東命下。府君以書諭之曰。吾欲來觀汝聲

名何若。且爲羅浮之游。不孝等私幸得於官舍綵衣稱觴也。而竟不可得。嗚呼痛哉。府君生於康熙二十

六年丁丑三月二日。卒於乾隆四十年乙未四月二十三日。享年七十有九。恭遇覃恩。誥封奉政大夫。日

講起居注官。翰林院侍讀。加一級。配吾母沈恭人。處士諱時俊公女。誥封宜人。子二。長不孝大昕乾隆甲

戌進士。由編修累遷。日講起居注官。詹事府少詹事。兼翰林院侍講學士。上書房行走。提督廣東全省學

政。紀錄四次。娶王氏。誥封通議大夫。光祿寺卿。加一級。諱爾達公女。前卒。不孝大昭國學生。娶周氏。候

選州同名銘公女。女一。適邑庠生陳名濂公子。附貢生考充四庫館。謄錄候選州同名曦。例贈安人。前卒。

孫男四。東璧不孝大昕出。聘汪氏。內閣學士兼禮部侍郎名廷璵公女。東垣不孝大昭出。東塾不孝大昕

出。東壩不孝大昭出。孫女二俱幼。不孝等樸儂無文。重以荒迷忘失。罣一漏萬。然不敢以無實之言。誣我

先人伏惟當代立言君子錫之銘誄以光窀穸。不孝等死且不朽。益都李文藻填諱

亡妻王恭人行述

恭人姓王氏諱順嫺字正仲世居崑山爲右族後遷嘉定丹徒縣儒學教諭贈通議大夫卓人先生焜之孫新陽縣學生封通議大夫虛亭先生爾達之女也母朱淑人恭人生而明慧虛亭先生奇愛之不欲輕字人有議婚者輒不應予年十五應童子試甫出場先生見其文賞歎以爲必售已而果然恭人兄禮堂於儕輩少可亦極口稱予先生乃以恭人許予爲配焉予家貧無負郭田或謂骨相寒陋雖早慧不能得功名諸親戚及僮奴輩竊議先生素奇幼女何妄許寒士爲先生終以爲快女婿也歲庚午予始贅外家明年以獻賦召試行在特賜舉人授內閣中書報至親鄰皆喜過望予既北上就職恭人亦以次年入都途間得病幾殆舟至楊村扶入肩輿昇至寓舍調治兩月餘病良已甲戌禮堂以第二人登第予亦成進士同入詞垣衆皆爲恭人賀恭人謂予曰君與吾兄豈以一第爲重輕者所幸兩家父母皆康強耳恭人性儉朴布衣蔬食處之泊如在都中十餘年恒視一歲所入以具饋粥中饋操作每躬親之雖甚空乏從不假貸于人內外戚屬無長幼待之以禮遇臧獲有法度終年不加鞭笞而事亦治性强記米鹽出入之數典庫質劑之期閱久遠無一忘失讀書不多偶述一二故事亦疊疊可聽予年三十餘尙無子恭人屢勸予置篋久之乃納浦氏甚憐愛之去秋浦生子產後臥蓐月餘恭人夜中數起視之僮婢見者咸感泣

今春二月。兒病頗劇。恭人千方醫治。焚香禱天。言輒淚下。予慰之曰。豈有賢如吾妻而無後者。未幾。兒果愈。而予復病。病兩月不解。恭人視醫藥。進飲食。夜以繼日。勸則和衣就枕。予曰。吾病未卽死。何太自苦。恭人忍淚不言。及予疾痊。恭人始喜曰。自今災星退矣。無幾何。恭人忽得嘔泄之疾。一兩日旋止。後十日復作。又五日。大汗四支皆冷。自謂汗出病已全去矣。索盥洗者再三。頃之。忽自起坐曰。將去。侍者亟扶之。寂然而逝。若釋氏所云趺化者。嗚呼。悲夫。予薄宦京華。兩大人以婚嫁未畢。不能北來。聞恭人能佐予治家。甚喜。吾父於甲申歲嘗一來。恭人侍養者裁一歲。而于吾母未奉一日之養。今秋將攜恭人南歸。覲省。行有日矣。乃令吾父吾母垂白爲長婦哭也。傷哉。恭人嘗言初生時。星家推其壽可至八十二歲。又術者言其行運佳。當相夫三十年。予比年心血耗。夜常不寐。恭人每爲予憂之。而未嘗自慮其短折。且以恭人之德及相法。皆不應止于此。毋乃予之獲咎于天。當死不死。而禍移于妻耶。天道恆予善人。而善者不久于世。又何說也。恭人生于雍正六年七月十九日戌時。卒于乾隆三十二年六月二十九日酉時。得年四十四。子一人。東壁。恭人歸予垂二十年。離別之日殊少。比者俸入粗有餘。輒謂寒士得此已爲過矣。又謂女兒弟二人。姊性少急。不如某之知足。故不永年。蓋庶幾于知道者。平居忻忻無交謫聲。及爾偕老。吾願已足。一旦舍我而去。鰥魚之目。何時得眠也哉。謹述其大略。將乞銘于當代立言者。

祭文

祭座主錢文敏公文

嗚呼。龍頭之選。句臚玉除。尙書喉舌。上應斗樞。並人世之所貴。謂際會之特殊。公少登狀頭。沒贈尙書。徊翔著作之林。出入承明之廬。曉承旨而趨左掖。午轉對而伏青蒲。南齋侍直。宮中誇爲才子。西曹讞獄。輦下避其八騶。恩禮優于終始。名譽翔于八區。若夫神采湛若。眉宇軒如。丹鳳九苞。瑞應之生非偶。精金百鍊。時出而用有餘。口不言阿堵。而富于五車三倉之儲。胷不設城府。而樂與先民前喆爲徒。探百氏之奧。窺六藝之膏腴。經緯成組繡。咳唾皆明珠。對策高第。似董仲舒。詞賦獨步。似庾肩吾。議論根柢。似范滂。夫紀述博瞻。似洪景廬。讀經進之篇。則以爲唐之燕許。閱平亭之奏。則以爲漢之張子。聆其警效。識爲神仙之骨。瞻其風度。可入名臣之圖。至于書畫之妙。灑落不拘。吐煙雲于咫尺。生花鳥于須臾。師造物而心得。追名蹟而手摹。縑素流傳。筆墨尙濡。一卷之直。重于璠璣。元則鷗波擅美。明則香光流譽。詔易名以文敏。洵並轡而齊驅。嗚呼。維公朝之弁冕。士之楷模。詞章足以潤金石。政事可以贊訐謨。讀破萬卷。而恥爲流俗之學。官登二品。而依然山澤之矧。樂稱人之善。不隨衆而趨。汪汪千頃之陂。亭亭百尺之梧。雖高位之自致。恨年歲之易徂。立朝垂三十載。曾未展懷抱之瑾瑜也。昔闕逢之紀歲。忝策名于天衢。公實爲座

主兮獨五策之賞予。謂予可與道古兮。暇長侍夫履紉。昨銜恤而南邁。送公行乎城隅。瞻顏色以顛頓。祝眠食其慎諸。痛歲蛇之奄及。倏隙駟之不居。凶問遽至。仰天悲吁。屬纊弗侍。視舍徒虛。感知己而未報。思立身之或渝。踴敵詞以遙薦。庶精爽之鑒於。

祭外舅虛亭先生文

嗚呼。馬鞍之峯。古稱玉山。蔚然耆儒。鐘英其間。惟公之先。銀緋世聯。文毅清強。說經便便。司成三黜。譽譽益振。講求水利。單邨差肩。元陽負才。海岱嶙峋。天祿外史。奇奧眩真。厥考通議。鄉貢有名。位不酬德。終于校官。公少岐嶷。日誦百篇。作爲詞章。紆餘而妍。侍親京口。官清地閑。丹徒馮尹。以文自矜。一見公作。嘆爲絕羣。顧謂當今。此事推袁。金焦北固。鶴林招隱。詩朋兩三。擎舟策蹇。潑墨大字。留題巖端。觀者不知。或疑列仙。治家以禮。事親克勤。邱嫂次兄。相依終身。夫人沛國。孝淑最賢。尊章先後。各無間言。公之於詩。吐故納新。長篇短律。多師爲先。心所追摹。放翁後邨。公之書法。瘦硬通神。三真六草。柳骨顏筋。一字藏弄。什襲是珍。公之制義。有本有原。俗競速化。勦說相沿。廓而清之一宗。先民嗜好酸鹹。不與俗遷。樗蒲弈局。齒道不分。歲科兩試。數冠其軍。謂掇青紫。必於其躬。秋風瑁璫。屢躡不伸。閉門課徒。以昌後昆。長公光祿。中朝鳳麟。句臚對策。五色雲屯。帝稱才子。擢冠詞臣。既掌內制。入直絲綸。改長卿寺。九棘班尊。歸而著書。南陔彼循。名位富貴。世或有倫。文苑儒林。兼之實難。次公繼之。逸才騰騫。若軾得轍。如機有雲。畫品

神逸詩卷清芬。江左風流萃于一門。憶歲闌茂予初識韓成童。無知如木之芘。公獨激賞。謂非常鱗。小試鹿城。索文往觀。謂當見錄。已而果然。素奇季女。許爲婚姻。人譙碧鶴。公耳不聞。三載就壻。東床坦眠。食之教之。與子姓均。獻賦通籍。公送登輪。自我不見。遂十四春。乙酉暮秋。再謁里閭。置酒新堂。引觴爲歡。昨歲之冬。乞假南還。失我伉儷。使公悲酸。公猶健飯。談諧不勸。贊予卜居城西一廛。十日五日。從公周旋。首夏示疾。偶作而痊。間日往問。尙手一編。微察容色。了無苦艱。公亦自言。勿藥且安。學海水枯。蓺林葉乾。痛矣哲人。竟歸下泉。戴侯云逝。誄出安仁。聘士石表。考亭製文。承諱怛。迸淚潺湲。撫棺一憶。公其鑒旃。

祭衛伯恭文

嗚呼。南宮撒棘。題名慈恩。二百卅人。異姓弟昆。中州多材。君軼其羣。惟君早慧。頭角嶙峋。伯仲叔季。師友一門。文壇旗鼓。大張吾軍。君先登科。石渠校文。淵雲枚馬。莫之或先。京兆同考。兩奉絲綸。山左典試。玉尺手懸。癸未禮闈。君尤得人。識拔老宿。師道以尊。久次清華。文與行敦。天子予嘉。將登臺垣。一行作吏。胡命之屯。都門送別。爲君三歎。君曰往哉。內外奚分。我有利器。試之盤根。百里可治。忍鄙吾民。當陽古邑。衆號神君。三載考績。薦達九闈。廉吏可爲。協于公論。除目初下。佐官臺端。吾儕私喜。小拙大伸。君家尙書。由縣令遷。君或繼之。才望惟均。跂君還期。在旬月間。一朝訃至。當食輟餐。黃楊厄閏。鮎魚緣竿。文人薄命。善士不年。令僕牧伯。金紫駢肩。誰之不如。而所遇艱。楚山鬱鬱。江水潺潺。誰遣巫陽。敵詞招魂。往在京華。晨夕

般桓談諧間作。兩忘主賓。歲月如昨。警效依然。今茲長別。路隔三千。設位遙祭。執紼無因。精爽不昧。尙或鑒旃。

祭蔣秦樹編修文

嗚呼。皖江之濱。山幽谷奇。厥生才人。卓犖不羈。繡虎入夢。靈徵誕彌。慧業夙成。筆墨爲嬉。五車四庫。腹笥在茲。作爲文章。蔚其鴻裁。往歲辛未。省方求才。大禮三賦。名動赤墀。給札召試。至尊書題。觀者堵牆。濡筆淋漓。親收六人。君爲之魁。一朝釋褐。同登鳳池。稽古之遇。故事所稀。地分清切。入直樞機。扈從捺鉢。紀以歌詩。句牘旣唱。策名金閨。十年禁近。風雅共推。皇武綏定。渠授以西。詔修方略。手任編排。大書特書。博而能該。九遷非願。一經是貽。學益道損。榜于棟楣。次道聚書。永叔訪碑。嗜好酸鹹。不以俗移。人生百歲。彈指幾時。君已過半。沒而名垂。文苑之傳。鄉賢之祠。視祿萬鍾。奚止倍蓰。仲春朔日。良會吾儕。拍肩歡笑。不改鬢眉。曾未二旬。逝者難追。有琴在床。有酒在卮。長夜永閔。一哀何涯。魂兮歸來。尙鑒予悲。

祭朱太翁文

嗚呼。先生之先。系出邾婁。自浙北徙。籍占大都。少就外傅。折節爲儒。高安文端。人倫楷模。翰林老宿。陽羨之儲。公皆師之。亦步而趨。經明入仕。古道未渝。牽絲咸寧。漢唐故墟。移宰盩厔。士悅民愉。渭水之盜。奪民田廬。百年以來。浮糧不除。盡然心傷。手自作疏。墾荒終南。以償額租。證于碑碣。我言非誣。上官入告。天子

曰。愈寬大詔下。彫劾以紓厥德。不訾。可例其餘。投劾杜門。課兒詩書。伯仲叔季。得四明珠。各在仕版。簪笏魚魚。三登進士。兩列石渠。一門盛事。爲長者娛。正歲望日。暨十月初。鄉飲有典。正齒媵觚。大尹戒賓。蒼顏白鬚。兩太史從。左右掖扶。是父是子。都人歎嗟。匪齒之尙。惟德之譽。紫誥崇封。頌自正衡。積善之慶。洵有是夫。門才官職。世或有諸。所尤難者。文與行俱。於惟先生。行充體腴。教人自爲。質而不夸。四時代謝。古今須臾。年未七十。哲人云徂。憶歲焉逢。貢士天衢。先生叔子。同與句臚。交親十年。臭味相於。時從軾轍。通謁老蘇。撰杖脫屣。清風穆如。典刑永逝。痛哉吾徒。遺容在懸。復衣在廡。文以紀實。侑茲清醑。

祭亡妻王恭人文

嗚呼。吾妻之逝。越九十日。仰見冰蟾。三度圓缺。人言秋月。令人生愁。愁多而苦。孰如今秋。自子歸我。寒暑十七。夙興夜寐。動無違失。我善忘事。子輒記之。我拙治生。子能理之。耽思致疾。子恒戒我。放言召謗。子強諄我。我顛而固。子慧且通。我躁多悔。子靜多功。辛勤爲我。不爲一己。家有佳婦。我得良友。我幼善病。思不永年。而使子寡。獨居塊焉。何圖今日。事固難料。我猶爲人。子去已杳。嗚呼哀哉。吾將安依。想子下泉。其能不悲。人生同盡。修短一揆。以子明達。詎昧斯旨。夫病兒弱。賴子扶持。不能忘情。或者在茲。我今奠酒。忍淚告子。子不復生。我未可死。我有父母。宜戀此生。我有著述。當待其成。嬌兒幼小。未解哭母。子如有知。尙其我佑。嗚呼吾妻。勞瘁有年。天遣舍我。以息子肩。子有賢母。又有伯姊。先爾云亡。見子應喜。子之魂魄。當戀

故鄉京洛雖廣。匪子所藏。買舟送子。潞河之側。我亦南歸。爲子卜宅。昔子北來。不與我俱。今雖同舟。幽明路殊。嗚呼吾妻。行長身促。匪子不年。繫我無福。靈車將行。贈子以詞。悠悠逝者。云何弗思。

康智局轉交
鎮北縣東門圖書

212 8000 21

上海图书馆藏书



A541 212 0006 1632B

上海圖書館



76207